

**REGULA CLERI,
EX SACRIS
LITTERIS,
SANCTORUM
PATRUM...**

Simone Salamo





*Ad simplicem ymum P. F. Nicolai Sirini
a Valentino Min: Obs: 1824.*

E

REGULA CLERI,


EX SACRIS LITTERIS,
SANCTORUM PATRUM
MONIMENTIS,

ECCLESIASTICISQUE SANCTIONIBUS,
Excerpta.

*Studio & operâ SIMONIS SALAMO,
& MELCHIORIS GELABERT, Presbyterorum,
Doctorum, & Missionariorum Diœ-
cesis Elnensis.*

TERTIA EDITIO,
CUI ACCESSIT
RÆPARATIO PROXIMA
AD MORTEM.

*icumque hanc Regulam secuti fuerint, pax
super illos & misericordia. Ad Gal. 6.*



RANCOPOLI-RUTHENORUM,
I PETRUM VEDEILHIÉ, Regis
Typographum.

M. D C C. L X.

n Approbatione & Privilegio Regis



JESU-CHRISTO,

SACERDOTUM ET PASTORUM

PRINCIPI.


TIBI, ó Pontifex futurorum bonorum, qui es principium & finis, & Pater luminum à quo omne datum optimum & omne donum perfectum descendit; tibi in quo vivimus, movemur, & sumus, & cui, utpotè Regi seculorum immortalì, soli Deo, honor & gloria; tibi, inquam, Regi dicamus opus nostrum. Tu siquidem, Altissime super omnem terram, dignus es accipere gloriam & honorem, quia tu creasti omnia, & propter voluntatem tuam creata sunt.

Attamen tu scis, Domine, quia non sumus sufficientes cogitare aliquid nobis quasi ex nobis, sed sufficientia nostra ex te est.

Tu ergò, scientiarum Domine, qui illuminas omnem hominem venientem hunc mundum, qui linguas infanz facis disertas, qui intellectum parvulis, & qui verba vitæ æternæ

habes , da nobis os & sapientiam , ut cum simplicitate cordis nostri loquamur quæ decent sanam doctrinam ; emitte Spiritum tuum , & renovabis faciem terræ.

Et verò , cum fides sine operibus mortua sit , rogamus te humillimè , ô summe Sacerdos , ut Sacerdotes tui hoc opus legentes , intelligant ; ut comedentes hoc volumen , servent ea quæ in eo scripta sunt ; ac sic , induentes justitiam , & dignè ambulantes vocatione quâ vocati sunt , semetipsos salvos faciant & omnes qui eos audierint ; & ut tandem , cum tu Princeps Sacerdotum & Pastorum apparueris , omnes simul percipiant immarcescibilem gloriæ coronam , & in secula seculorum laudent te.





AD UNIVERSUM
ECCLESIASTICUM ORDINEM

PROLOGUS.

Cum simus Ministri Christi ,
Dispensatores Mysteriorum
Dei , & insuper Nazaræi ; id est ,
Domino consecrati , in ministerium
missi propter eos qui hæreditatem
capiunt salutis , æquum est ut sancti
simus quia ille sanctus est , ac proin-
dè ut jam non amplius conformantes
huic seculo nequam , conformes ve-
rò imagini Christi , in omnibus ex-
ibeamus nos sicut Dei Ministros.

Hanc viam arctam quæ ducit ad
itam , exhibuit prior , quàmvis
ompendiosæ , informis , majoreq;
i parte truncatæ Regulæ Cleri edi-
; eandem verò viam hæc secun-
prolixius , firmius , & ordinatius
hibebit ; pro quâ stabiliendâ , hau-
ius ex libro vitæ , ex monumentis
nciliorum , ac Patrum , quæ ad

nostram doctrinam scripta sunt. Undè satis indignum esset, ut ait Julius Pontifex, quemque, vel Pontificum, vel Ordinum subsequendum, hanc Regulam refellere quam Beati Petri Sedem & sequi videat & docere.

Nemo ergò sibi nos propria tradidisse putet, nec tanquam nostra suscipiat, ut loquamur cum Divo Bernardo; Deus, scientiarum Dominus, qui linguas infantium facit disertas, & qui infirma mundi eligit, ut fortia quæque confundat, ut non gloriatur omnis caro in conspectu ejus, ipse Dominus Altissimus dedit vocem suam; semel locutus est, aperuit os asinæ, & locuta est; undè, suadentibus juxta cor Dei Pastoribus, non abscondemus Sacramenta Dei, sed ponemus in lucem scientiam illius: etenim Sacramentum Regis abscondere bonum est; opera autem Dei revelare & confiteri, honorificum est, ut sit nomen ipsius benedictum & glorificatum coram omnibus viventibus & in secula.

Verùm, loquemur vobis placen;

tia & auribus prurientia? Absit ut adulteremus verbum Dei. Undè, exemplo Christi, qui nos à juventute docuit, & qui sine parabolis non loquebatur, loquemur pariter & nos (licèt doctos allocuturi) cum simplicitate cordis nostri; vivus est enim sermo Dei & efficax, & penetrabilior omni gladio ancipiti, & pertingens usque ad divisionem animæ. *Sermo meus & prædicatio mea*, inquit Apostolus, *non in persuasibilibus humanæ sapientiæ verbis, sed in ostensione Spiritûs & virtutis: nos autem, subjungit, prædicamus Jesum-Christum, & hunc crucifixum.* Et reverà, cum simplicibus sermocinatio ejus, & arcana coelestia quæ abscondit sapientibus & prudentibus, revelat parvulis.

Accipite ergò, Fratres charissimî, in simplicitate cordis vestri hoc opus quod nos vobis in simplicitate cordis nostri offerimus; efficiamini sicut parvuli quibus Deus dat intellectum. Verùm, cùm illi qui sine regulâ vivunt, inordinate ambulent, obsecramus vos, Fratres charissimî, per

viscera misericordiæ Dei nostri qui nos de præsentiseculo nequam ereptos, & ex hominibus in sortem suam simul assumpsit, ut in hæc Regulâ Cleri, tanquàm in splendidissimo speculo vos sedulò inspiciatis, ut faciliùs agnoscere possitis utrùm quisque vestrùm regulariter vivat, utrùm proficiat an deficiat, utrùm Deo placeat an displiceat.

Sed cavete ne sitis similes viro consideranti vultum nativitatis suæ in speculo; consideravit enim se, & abiit, & statim oblitus est qualis fuerit. Vos verò, utpotè gens sancta; vos verò homines Dei quos decet esse in omnibus bonæ voluntatis homines, *sic vos in hoc speculo respicite, ut fæda quæque corrigatis, vel pulchra plus ornetis.* S. Aug. Non enim ignoratis quod scriptum est: *Non auditores legis iusti sunt apud Deum, sed factores legis justificabuntur.* Rom. 2.

Quapropter, scuto bonæ voluntatis armati, gustate & videte hæc verba vitæ, conferentes hæc in

P R O L O G U S. ix

de vestro, ut indè exardescente meditatione vestrà igne illo quem Iristus Dominus venit mittere in terram, possitis in omnibus perfecti re, & in quâ vocatione vocati tis, in eâ permanere; & ut luceat x vestra coram hominibus, qui videntes opera vestra bona, glorificent Patrem qui in coelis est.

Memineritis, ô Genus electum, regale Sacerdotiũ, Gens sancta, & Populus acquisitionis, memineritis istius quod scriptũ est: *Quicumque hanc Regulam secuti fuerint, pax super illos & misericordia.* Igitur hoc facite & vivetis.

Porrò, quàmvis hæc vobis Confacerdotibus, charitatis intuitu, prærogemus, absit ut prærogativam nobis scientiæ vindicemus, aut vitæ perfectæ nos esse fateamur, cùm de vitâ perfectâ vos monemus; sed potius, ut cùm hæc ad vos loqui audemus, simul vobiscum quæ loquemur audiamus. *S. Ambr.* Quare, ne sermo quem locuti sumus ipse iudicet nos in novissimo die; & ne

x P R O L O G U S.

fortè , cùm aliis prædicaverimus ,
ipsi reprobi efficiamur , quæsumus
cum Divo Gregorio , *ut quisquis*
vestrùm hæc legerit , apud districtum
judicem solatium nobis suæ orationis
impendat ; & qui per nos verba acci-
pit , pro nobis lachrymas reddat , ut
peccatorum nostrorum veniam &
expiationem assecuti , misericordias
Dñi in æternùm cantemus. Amen.

P R I V I L E G E D U R O I.

L O U I S , par la grace de Dieu , Roi de
France & de Navarre : A nos amés &
féaux Conseillers les Gens tenant nos Cours
de Parlement , Maîtres des Requêtes ordi-
naires de notre Hôtel , Grand Conseil , Pré-
vôt de Paris , Baillifs , Sénéchaux , leurs
Lieutenans Civils & autres nos Justiciers
qu'il appartiendra ; S A L U T : Notre amé
V E D E I L H I É , Libraire à Villefranche ,
Nous a fait exposer qu'il désireroit faire
réimprimer & donner au Public des Livres
qui ont pour titre , *Regula Cleri : Præpara-*
tio proxima ad Missam ; s'il nous plaisoit
lui accorder nos Lettres de Permission pour
ce nécessaires. A C E S C A U S E S , vou-
lant favorablement traiter l'Exposant , Nous
lui avons permis & permettons par ces Pré-
sentes de faire réimprimer lesdits Livres ,


nt de fois que bon lui semblera , & de
vendre , faire vendre & debiter par tout
le Royaume pendant le temps de trois
années consécutives , à compter du jour
la datte des Présentes : Faisons défenses
aux Imprimeurs , Libraires & autres per-
sonnes de quelque qualité & condition qu'el-
les soient , d'en introduire de réimpression
dans aucun lieu de notre obéis-
sance ; à la charge que ces Présentes seront
enregistrées tout au long sur le Régistre de
la Communauté des Imprimeurs & Librai-
res de Paris , dans trois mois de la datte
l'icelles , que la réimpression desdits Livres
sera faite dans notre Royaume , & non
ailleurs , en bon papier & beaux caractères ,
conformément à la feuille imprimée , atta-
chée sous le Contre-scel des Présentes ;
que l'Impetrant se conformera en tout aux
Réglemens de la Librairie , & notamment
à celui du 10. Avril 1725 ; qu'avant de les
exposer en vente , les Imprimés qui auront
servi de copie à la réimpression desdits Li-
vres , seront remis dans le même état où
l'Approbation y aura été donnée , es mains
de notre très-cher & féal Chevalier Chan-
celier de France , le Sieur DE LAMOIGNON ,
& qu'il en fera ensuite remis deux Exem-
plaires de chacun dans notre Bibliothèque
publique , un dans celle de notre Château
du Louvre , & un dans celle de notre dit
très-cher & féal Chevalier Chancelier de
France , le Sieur DE LAMOIGNON , le tout
à peine de nullité des Présentes ; du con-
tenu desquelles vous mandons & enjoignons

de faire jouir ledit Exposant & ses ayans-
causes pleinement & paisiblement, sans souf-
frir qu'il leur soit fait aucun trouble ou em-
pêchement : Voulons qu'à la copie des Pré-
sentes qui sera imprimée tout au long au
commencement ou à la fin desdits Livres ,
soit ajoutée comme à l'original : Com-
mandons au premier notre Huissier ou Ser-
gent sur ce requis , de faire pour l'exécu-
tion d'icelles tous actes requis & nécessai-
res sans demander autre permission , & non-
obstant clameur de Haro , Charte-Norman-
de , & Lettres à ce contraires : Car tel est
notre plaisir. **DONNÉ** à Versailles , le sei-
zième jour du mois de Septembre , l'an de
grace mil sept cent soixante , & de notre
Regne le quarante-fixième. Par le Roi en
son Conseil. **LE BEGUE.**

*Réglé sur le Réglé XV. de la Chambre
Royale & Syndicale des Libraires & Impri-
meurs de Paris , N°. 58. fol. 106. confor-
mément au Réglé de 1723. A Paris , ce
30. Septembre 1760. G. SAUGRAIN,
Syndic.*



REGULA



REGULA CLERI.


CAPUT PRIMUM.

JANUA

AD STATUM CLERICALEM.

ARTICULUS PRIMUS.

Seminarium.



U M adolescentium ætas, nisi rectè instituat, prona sit ad mundi voluptates sequendas, nisi à teneris annis ad pietatem & religionem informetur; & cùm Seminariorum fundatio eò tendat, ut Clerici ad pietatem, religionem, ecclesiasticam disciplinam, bonos mores, & litteras erudiantur; nihil hâc fundatione utilius ad Cleri disciplinam in singulis Ecclesiis propagandam, animarumque

A

salutem procurandam. *Concilia passim.*

Undè tamen fit ut plerique ad sacros ordines promoveri cupientes, pulvere adhuc terreno foedati, & vitiis scatentes, extorqueant dispensationes, in simulando pauperiem vel infirmitatem, aliasque fraudulentas causas allegando, ut Seminarii jugum à se projiciant, quasi in terram habitatores suos devorantem intrarent? Parùmne est quòd lubricæ ætatis annos inter vanitates & insanias falsas egerint? Væ illis, si antequàm ad regale Sacerdotium exaltentur, inter Ecclesiasticas disciplinas aliquamdiù non degerint, probatissimo superiori deputati, quem Magistrum regularis observantiæ, & testem arctioris vitæ habuerint! Væ illis, si vagos, effrænatos, superbosque animos suos severiori regulâ coercere, ejusdem Magistri dirigentibus monitis & corroborantibus exemplis, renovare recusantes, obtinuerint subreptitias dispensationes, iisque utantur! Annon, excusso fraudulenter jugo, & rejectâ frontosè disciplinâ, & posthabitis ad formidanda ministeria exercitationibus, totâ vitâ postea torpescentes, ac in deteriora ruentes, erunt sibi & aliis petra scandali, idola pastorum, Dei hominumque abominatio? Scriptum est enim: *adolescens, juxta viam suam, etiam cum senuerit, non recedet ab ea.* Prov. 26.

Alii quidem Seminaria adeunt, sed ægrè prorsus & inviti, quasi in terram alienigenarum gentium pertransirent, aut in exilium pellerentur; quasi in teterrimum detruderentur carcerem, aut ad triremes damna-

rentur ; hinc Seminarii statuta passim violant , pietatem negligunt , Deo obedire tanquam obedientiæ filii vix sciunt ; præpositis vices Dei gerentibus , subjacere renuunt ; eorum quidem voluntati se tandem subji- ciunt , sed mancipiorum instar obediunt ; quare ? Quia humilitatis usum non habent , & quoniam fuerunt semper filii Belial. Quapropter superiores & præfectos immoderata severitatis accusant & damnant. Hinc tacitis saltem cogitationibus , adversus eos murmurant , eorum defectus aperiunt & amplificant.

Societatem cum protervis ineunt , externorum colloquiis delectantur , proximo suo , & secretò & palam detrahunt ; ipsi jam perverfi , alios pravis exemplis pervertunt ; suos errores , licet ob eorum utilitatem id fiat , deferri molestè ferunt , consilia negligunt , increpationes oderunt & relinquunt , corripienti irascuntur ; mentiri , aut sua errata inficiari , aut excusare solent ; adeò dyscoli , & morosi sunt , ut nec aliis nec sibi conveniant ; in detestabile fufur- rium laxant procaces linguas ; undè discor- dias feminant , odia excitant & foveant ; vanè , scurruliter , ironicè , procaciter , & impudicè loquuntur , aut respondent ; aut ad summum , de beneficiis , dignitatibus , ordinibus , & vanitatibus sæculi , quibus avidi inhiant , verba faciunt , rarò autem de divinis. Quid mirum ! Quamvis in terrâ Sanctorum versentur , de terrâ sunt , idcirco de terrâ loquuntur ; indecorè & buccis crepitantibus rident , huc & illuc rotant

oculos , incompósito corpore ambulant ; sedent & jacent ; electorum modestiam vix norunt.

Per cubicula , ipso studii , recollectionis & silentii tempore vagantur ; quinimò , ad exteriora semper effusi , facultatem extra Seminarium exeundi , & per domos curfitandi , necessitatis prætectu , sæpius æquo extorquent ; otio , quieti , somno , ignavia , confabulationibus & nugis , nimium per diem indulgentes , vix ad Theologiæ , sacrae Scripturae , Rituum , Rubricarum , Cæremoniarum & Cantûs scientiam incumbunt ; vix ad Sacra Mysteria ritè & sanctè obeunda se exercent.

Quot videas qui ventri , tanquam Deo serviunt ? Hinc , quamvis sat saturati , murmurant ; ad sæcularium epulas , quoad fieri potest , stimulante gulâ , non fame , convolant quasi helluones , & ciborum gurgites ; & ni id sufficiat , cibos sibi clam afferri curant ; cibariis in ipso conclavi non carent , quò sæpius gulæ indulgere valeant.

Sunt alii qui partiales amicitias contrahunt ; adeò singulares sunt , ut ambulent , conveniant , & sedeant seorsim à cæteris : singulariter sum ego , proclamare videntur , non sum sicut cæteri. Scientiâ tumidi , & in Cleris dominari , ac in cathedrâ seniorum maturiùs sedere cupientes , ad honorifica opera , veriùs dicamus , ad vanam gloriam assiduè nimis se exercent , vix ad pietatem , & ad sui abnegationem ; conciones sibi coacervant , non virtutes ; student priùs esse canalis quàm concha ; priùs docere quàm

facere ; priùs Magistri esse quàm Discipuli ; totum Seminarii tempus dant actioni , nihil contemplationi ; discunt quidem , sed ad scientiam veritatis numquàm perveniunt ; intrarunt tepidi , exeunt frigidi.

Undè fiunt postea arbores autumnales , ubera arentia , nubes sine aquâ , æs sonans & cymbalum tinniens ; balbutiunt velut infantes , recitant labijs & psitacorum instar , ea quæ nec cor sentit nec intelligit , quia nondùm didicerunt ea opere complere , imò nec meditari. Hinc fit ut non sibi profint , & aliis obfint ; & verò , qui sibi nequam , cui bonus erit ?

Debent quidem se ad scientiam , ad Catechizandum & ad Evangelizandum exercere ; sed multò accuratius ad scientiam Sanctorum , id est , ad spoliandum veterem hominem cum actibus suis , & ad induendum novum , qui secundùm Deum creatus est in justitiâ & sanctitate veritatis. Hinc , quantò potentiores brevi tempore fierent in opere & sermone ! O utinam D. Thomæ , D. Bonaventuræ , D. Bernardo , & aliis id expertis crederent , & fideliter adhærerent !

Attamen adeò sunt suâ tumidi superbiâ , adeò inanis gloriæ cupidi , ac proprio addicti iudicio , ut illud nec intelligere , nec audire velint. Usque adeò proprio sensu hâc in re interdùm abundant , ut Pastores sanctos & expertes aliter suadentes , quasi delirantes & somniatores reputent , & ut cæteros condiscipulos , qui utpotè sapientiores (quamvis scientiam non negligent) reformationi , & vitæ spirituali sedulò student , as-

pernentur, eos scrupuli aut desidiæ, aut simulationis accusent, eorum simplicitatem derideant, eorumque consortia aufugiant, aut molestè ferant. Infelix cæcitas!

Illi quidem interfunt meditationi, examini, collationibus de divinis, aliisque exercitiis spiritualibus, sed coactè, perfunctoriè, & ut videantur à superioribus orantes & arctiori vitæ addicti; regularitatem, Phariseorum instar, omni ornatu, & candore exteriori profitentur; eximiæ pietatis speciem habent, ejus autem veritatem abnegant; sunt falsi & fallentes Sancti. *S. Aug.* Sunt sepulchra dealbata, intus autem mortuorum ossibus plena. Hinc Seminaria vulgò dicuntur hypochritarum sodalitia.

Et verò, quot sunt qui dùm in Seminario versantur, confessioni quidem, communioni, aliisque piis exercitiis vacant, absentes verò hæc omnia fastidiunt, & negligunt? Attamen seriarum transacto tempore, testimonia de regulari vitâ fraudulenter extorta, ad Superiorem scripto deferunt, ut illis sibi imponant. Ecce tibi formosos & conformes nimis histrionum imitatores.

Hæc tamen fucatâ humilitate, simulatâ pietate, fallaci adulatione, studiosiori obsequio, exiguæ & inanis scientiæ ostentatione inflati ac freti, à cœlesti autem alieni, Superiorum favorem captant, viam sibi ad ordines & ad beneficia parant; hos enim, utpotè cupidos, elatos, libertatis & sui amatores, adurit ordinationum cupiditas, earumdem secundum Canones dilatio cruciat, & ad desperationem adigit. Hinc patet, ser-

pit ut cāncer , simul & foetet grande eorum propriæ voluntatis malum , voluntati divinæ & Episcoporum judicio contradicentis. Hinc ordinum tantò minùs sunt digni , quantò avidiùs ad eos anhelant , eosque callidis machinationibus intempestivè , & nondum probati , extorquere conantur.

Sunt-ne hi omnes pretiosa Seminarii ornamenta ? Minimè : ejus sunt potiùs simulachra , idola , scandala , & opprobria , ex his sodalitiis potiùs expellenda , quàm ad ordines , ad beneficia , & præsertim ad animarum curam assumenda & exaltanda. Tali poenâ mulctari præcipit Concilium Trid. hos dyscolos & incorrigibiles malorum morum feminatores.

Attamen , quoquo modo ordinibus initiati hi & scientiæ & pietatis simulatores , lætantur in exitu de Seminario quasi in exitu de Ægypto & de populo barbaro ; & quoniam fucata & violenta virtus non durat , jam excussio regularis observantiæ jugo quod ægrè portabant , vanitatem , aliaque vitia quæ non ruperant , sed solum interromperant , ut rectè loquitur S. Augustinus , præ se ferunt , ad graviora etiam ruunt ; jam hæc sepulchra tandem referata , foetidum coram Deo , Angelis & hominibus , odorem exhalant & spargunt.

Ecce quomodò hi filii Ephrem intendentes & mittentes in Seminariorum gymnasiis arcum , convertuntur in die belli , cum diabolo & sæculo , infensissimis animæ hostibus pacem brevè & ignavè inituri.

O infausta & deploranda fors ! Hinc quot

A iv

detrimenta his ignavis Clericis , Ecclesiæ & Populo imminencia ! O utinam hi stulti aliquandò sapiant , ut tot tantaque pericula à se , & ab aliis avertere satagant solliciti !

Tu verò , charissime Frater , lectis & auditis his defectibus & vitiis quæ in ordinandos irrepere solent , egredere quamprimum poteris de terrâ tuâ , & de cognatione tuâ , ingressurus in terram fluentem lac & mel ; quasi modò infans genitus , hoc lac sine dolo concupisce ; quàm bonum tibi erit , si jugum Domini portaveris ab adolescentiâ tuâ ! Iterùm suademus , surge velociter , ingredi lubens & hilaris Seminarium , vel aliud Clericorum sodalitium ; ibi dicetur tibi quid te oporteat facere , ut duce Anania , innocentiam tuam à vitiorum & sæculi illecebris tutam præstes , ad Angelicam vitam animum tuum à teneris annis dirigas , ac inter pias exercitationes dignus evadas qui , quamvis puer , eligaris à Domino , & super quem ponat ille spiritum suum. Et quamvis facultates tibi defint , Deum time , in illo confide ; numquid vidisti justum derelictum , & semen ejus querens panem ? Num ergò , timens Deum , deficies omni bono ? Ecce Dominus , qui dat escam esurientibus , adest , & vocat te ; ille regit te & nihil tibi deerit ; veni , propera , gusta & vide quàm bonum & jucundum sit habitare Fratres in unâ & sociali vitâ ; ibi enim homo in virtute probatur & exercetur ; ibi ad perfectiora , verbo & exemplo trahitur ; ibi suam imperfectionem considerare & lugere compellitur ; ibi alterius fervore excitatur , alterius humilitate

C L E R I. 9

docetur; istius patientiâ, illius obedientiâ movetur. Ibi alterius correctio fit ipsius admonitio; ibi alienum periculum, proprium efficitur speculum; ibi unius vigilantia alterius est custodia; ibi homo portat & portatur; ibi multa audit & videt undè docetur; ibi boni commendantur, ut meliores fiant; ibi negligentes arguuntur, ut reservescant, &c. Hæc enim Angelicæ vitæ æmulatrix est. *A Kempis.*

At contrà, vae soli! Undè, ut jam vidisti, melius est duos esse simul, quàm unum; habent enim emolumentum societatis suæ. Quis ergò non properet in Seminario vel in alio Clericorum sodalitis vitam agere?

Verùm, charissime Frater, ut Seminarium aut aliud Clericorum sodalitium tibi profit, hæc sequere documenta.

1°. Seminarium ingressus, recogita in amaritudine animæ tuæ delicta juventutis tuæ, & omnes annos tuos, tuamque conscientiam generali Confessione, & uberibus lachrymis emunda.

2°. Sæculi insanias, amicorum & veterum sociorum illecebras, ac patris domum oblitus, frequenter & coram Deo dicito tibi cum D. Bernardo, N. *Ad quid venisti?* Haud dubiè venisti, aut saltem venire debuisti, ut animam tuam sanctifices, eamque eruditione & pietate ad sacrum Ecclesiæ ministerium præpares. Si hæc fuerit mens tua, quàm maximè contende vitam, ut Clericum decet, toto Seminarii tempore instituere. Quapropter memineris istius sententiæ D.

A y.

Bernardo dignam : *non locus homines , sed homines locum sanctificant.*

3°. Præpositis , tuisque moderatoribus , prompto & hilari animo in omnibus obedire , eisque te , tanquam Deo , subjacere in deliciis habeas ; obedientia enim , est tuta ad gratias particulares & ad salutem æternam via ; at contra , omnem ordinem sine obedientiâ perturbari necesse est. *Convent. Meldul.* Adeò ut non esset infernus , si cessaret propria voluntas. *S. Bern.*

4°. Erga eosdem Rectores & Superiores eâ sis animi affectione quâ filii erga parentes ; ab iis , si quid præter voluntatem imponitur aut negatur , id existima ad utilitatem tuam referri ; pro certo habens Superiores ad id multis duci causis quæ adolescentes plerumque lateant. *Act. Eccl. Mediol.* Eorum monita libenter accipe ; imò & illorum increpationes æquo animo tolera ; quàm bonum tibi erit , si identidem humilient te ! Justus , eff accusator suû : noli ergò excusare excusationes in peccatis. Præsertim , si ab iis petens ordinationem , repulsam tuleris , cave ne de eorum agendi ratione queraris , licèt personarum acceptionem tibi videantur facere ; sed potius tacitus & libens acquiesce ; & in te reversus , humilia te , ac ordinibus propter peccata tua te indignum existima ; expectans placidè expecta , & interim cor tuum accuratiùs proba & præpara ; humilis sis corde , & invenies requiem animæ tuæ.

5°. Eisdem Rectoribus & Superioribus sensus tuos liberè expone , ut illos prout

opus fuerit, consulas, cum nihil sit difficilius adolescenti, quam immoderatis animi affectionibus per se moderari.

6°. Statuta Seminarii fideliter observa, eaque singulis mensibus lege; hæc enim sunt vitæ tuæ Regula, & qui Regulâ vivit, Deo vivit. *Gregor. Nyss.*

7°. Modestiam in omnibus & ubique serva: *Act. Eccl. Med.* Quapropter cave ne oculos huc illuc circumferas; ne altius loquaris, nec strepitum excites, nec nimis festinanter incedas; sed potius nihil in, vel minimis corporis motibus, nisi grave & Religione plenum præ te feras. *Trid.*

8°. Cum silentium, permultum ad pacis pietatisque conservationem, ad studia, ad multas perturbationes evitandas conferat, numquam colloquaris, nisi de rebus necessariis, præterquam relaxationis tempore, quo de rebus utilibus sermonem habere, sine tumultu tamen licebit. *Act. Eccl. Mediol.* Præsertim inania & faceta colloquia, verba minus honesta & detractoria pro viribus evita.

9°. In omnibus actionibus, motu corporis & verbis elationem & superbiam fuge, cum ea homines Deo inimicos; & ceteris odiosos reddat; & quoniam scientia inflat & excecet, noli in collationibus contendere verbis præ tumore & nimio æstu, nec altum sapere, nec præ scientiâ & presumptione, inter sodales tuos dominari; & multo minus eos, quamvis minus doctos, contemnere aut confundere; id enim intolerabilem superbiam redolet; da ergo operam

ut fragrans charitas & humilis modestia decertationes tuas ædificent; æmulare charismata meliora. Quapropter humilitatis & mansuetudinis studiosus, omnes Jesu-Christo & tibi lucrificare incumbe. Si parvulus in medio eorum fias ut infans, Deus tibi utpotè humili, dabit gratiam, & secreta cœlestia quæ abscondit prudentibus & sapientibus inani scientiâ tumidis, revelabit.

10°. In omnibus fuge singularitatis notam. S. Ber. Cave ergò ne ipso relaxationis tempore ambules separatim ab aliis, nec unquam nisi tres saltem, aut quatuor fuerint. *Eccl. Mediol.*

11°. Mutuam charitatem, concordiam ac benevolentiam amplectere. *Ibid.* Omnes sodales honore prævenias; sis cum illis cor unum & anima una, sine acceptione personarum; nescit enim nostra Religio personas accipere. S. Ber.

12°. Neminem irrideas nec verbis offendas; factionem & susurrium, utpotè discordiarum fomitem, à tuo corde & ore elimina.

13°. A privatis amicitiiis nimiâque familiaritate abstineas. *Act. Eccl. Mediol.* Privatæ amicitiae inimicissimæ amicitiae sunt. S. Ber. Attamen omnium sodalium infirmitatibus scias compati & condolere, ut charitatem Christi jam adimplere incipias.

14°. Nullius cubiculum intres absque Superioris aut Præfecti facultate. *Conv. Melod.*

15°. Quas in aliis virtutes respexeris, eas in te ipso exprimere contende; vitia verò, si quæ fortè in aliis videris, quasi pestem fuge; ne sis adeò impius ut dæmonis officio

fungens, alios piè aliquid agentes vituperare audeas, eosque ab operibus virtutum abducere coneris. *Act. Eccl. Mediol.*

16°. Si crimen tuum aliquod deferri contingat, auctorem non quæras; resciscens autem, nullam malè erga illum affecti animi significationem des; conare potius melior in posterum fieri, neque ea admittere, propter quæ meritò accusari possis. *Ibidem.*

17°. Sobrius esto; quapropter ne comedas extra Seminarium, nisi apud tuos parentes vel propinquos, idque rarò & cum facultate. *Conv. Melod.* Nihil extra refectio-
nis tempus comedas; hoc enim ingluviem sapit; alimenta autem in cœnaculo tamquam medicamenta sume. *S. Aug.* Eaque altiori ad sacram lectionem attentione condire satagas.

18°. Ad Theologiæ scientiam viriliter incumbe; simul ad Sacræ Scripturæ intelligentiam, ut potens fias exhortari in doctrinâ sanâ, & eos qui contradicunt arguere. Assiduo etiam Canonum, Rituum, Rubricarum, & Cantûs studio te ad pietatem & ad sancta sanctè tractanda exerce; in hoc positus es.

19°. Quò plenius pretiosum Seminarii tempus conteras, ne colloquaris etiam cum externis, nisi cum Moderatoris licentiâ. *Conv. Melod.* & dumtaxat propter necessitatem, utilitatem, & Christianam urbanitatem; exeundi facultatem numquàm, nisi propter similes causas petieris. Quid tibi cum sæcularibus? Quoties cum hominibus eris, minor homo redibis. *Imit. Chr.*

20°. Meditationi , examini sensuum , & animæ recollectioni & mortificationi sedulus adhære simul , & vitæ spirituali. Frequentata quàm sæpius poteris Sacramenta Pœnitentiæ & Eucharistiæ ; ambula coram Deo, ejusque suavissimam præsentiam , actibus jaculatoriis & ignitis , omnibus in locis fove ; quære illum in simplicitate cordis tui , & illum invenies ; Christum Dominum in Eucharistiâ , frequenter & piè , quoad fas erit , visita ; hauri ex ejus ardentissimo corde scientiam Sanctorum.

Tandem , quamdiù in Seminario versaberis , incipe quotidie exhibere te idoneum & dignum Dei Ministrum. In omnibus vel minimis statutis , Canonum regulis , & Moderatorum monitis adeò fidelis sis , ut horum usum jam radicatum habens , & ab his numquàm deflectas. Nulli sodali sis lapis offensionis ; in omnibus verò jam teipsum præbe exemplum bonorum operum.

Attamen cave & iterum cave ne exercitiis spiritualibus incumbas ut à Superioribus & à sodalibus tuis videaris , & ut favores , beneficia , & ordinationes tibi concilies ; sed dumtaxat ad majorem Dei gloriam , & ad tuæ animæ , fideliumque tibi postea commissorum profectum ; ama & opta secretum ; sis æquè fervens , humilis , mansuetus , & modestus in sodalitia & in cubiculo quàm extrà ; cor tuum coram Deo ferventiùs effunde quàm coram hominibus. Sanctitatis internæ sis magis avidus quàm exterioris ; humilitatis magis cupidus quàm ordinationis ; esto in Seminario , sicut

Apostoli in solitariâ domo, perseverans in oratione, & expectans cum fiducia & totâ animi quiete adventum Spiritûs Sancti; hinc tandem exhibis sicut illi, ignem spirans & amore divino quasi ebrius, factus ipsi diabolo terribilis.

Iterum monemus, charissime Frater, contende esse sanctus & vivere de Spiritu Christi, in cujus sortem jam jam vocandus es; ejus divinæ providentiæ te totum committe, illa non tibi deerit; quin potius, omnia felicius cadent tibi secundum beneplacitum ejus; bibe interim, bibe aquam de cisternâ tuâ, & fluentâ putei tui, ut postea deriventur fontes tui foras, & in plateis aquas tuas dividas. Dominus qui custodivit introitum tuum, custodiet exitum tuum, te sub umbrâ alarum suarum protegens, tibi dans fortitudinem, ut disciplinam quam tibi Majores & Moderatores tui tradiderunt, & quam coepisti tenere, non deferas; verum potius crescas de die in diem, perseveres usque in finem, & tandem te ipsum salvum facias & eos qui te audierint. Amen.

ARTICULUS II.

Vocatio.

BEATA gens cujus est Dominus Deus ejus, populus quem elegit in hæreditatem sibi! Benedictus qui venit in Nomine Domini! Maledictus verò qui venit nomine proprio, turpis lucri & otii gratiâ, ex appetitu laudis

& dignitatis ! Quid restat nisi ut descendat vivus in infernum sicut Coré, Dathan, & Abiron ?

Quare superbi illi Levitæ condemnati sunt ? Ut posteris daretur exemplum, ne quis præsumptione superbi spiritûs non sibi à Deo datum munus Pontificatûs invaderet. *S. Aug.* Igitur vae filii desertores, dicit Dominus, ut faceretis consilium, & non ex me, & ordiremini telam, & non per spiritum meum, ut adderetis peccatum super peccatum, & os meum non interrogastis. *Isai.* 30. Trahe me, ait sponsa; nunc autem trahit sua quemque voluptas; & odorem turpis lucri sectantes, quæstum æstimant pietatem, quorum certa est damnatio. *S. Bern.*

Attamen, si hæc damnatio solos indignè ambientes maneret, certè minùs deploranda esset; hanc superbi illi jure merentur poenam; sed, quod sanguineas ex corde elicit lachrymas, illud est quòd multa mala per Sacerdotes non vocatos Ecclesiæ proveniant: nam qui non intrat per ostium in ovile ovium, sed aliundè, ille fur est & latro; fur non venit, nisi ut furetur, & mactet, & perdat. Unde cathedra pestilentiarum sibi & aliis est causa ruinæ. *Pet. Bles.* Proh dolor!

His ergò, Frater, animo recogitatis & altè corde defixis, vide vocationem tuam; nullus sibi sumit honorem, sed qui vocatur tanquàm Aaron; proba quæ sit voluntas Dei bona, beneplacens & perfectæ, ne ex præsumptuosâ te ingerens temeritate, in ten-

sationem, in laqueum diaboli, & in æternam damnationem te & alios tandem detrudas.

Sed quænam sunt, inquires, veræ vocationis indicia? Ecce tibi hæc indicia corde & animo recogitanda. 1. Innocentia vitæ. 2. Idoneitas, seu aptitudo ad munia Ecclesiastica. 3. Proprii Episcopi assumptio. 4. Intentionis rectitudo, id est, non ob temporale commodum, non propter honores aut otium, sed propter Dei cultum, animarum salutem, & ministerium Ecclesiæ. 5. Inculpatus ingressus, id est, non ambitu aut fraude, non adulatione vel obsequio, non pretio, aut prece.

Vide nunc & iterum perpende, an his indiciis voceris à Deo, an te ipse non vocatus ingeras.

Quænam autem sunt media, iterum interrogabis, divinæ vocationis indagandæ, agnoscendæ, & exequendæ? 1. Oratio. 2. Indifferentia. 3. Consilium, non quidem petendum à peccatoribus, non à sæcularibus aut juvenibus, non à domesticis, parentibus, & mercenariis, sed à sapientibus & piis, à Superioribus & Directoribus.

Si per supradicta indicia & media, agnoscas Dominum te eligere & ponere super te spiritum suum, ne dubites ascendere superius; Deus enim quæ stulta sunt mundi eligit, ut confundat sapientes; quapropter divinæ voluntati sic manifestatæ obedi. 1. Promptè, id est, sine ulteriori consultatione, sine dilatione vel minimâ. 2. Humiliter, id est, non pertinaciter recusans, sed

invitus ad ordines ascendens. 3. Confidenter, dicendo cum divo Leone: *respiciens ad exiguitatis meae tenuitatem, & ad suscepti muneris magnitudinem, etiam ego illud propheticum debeo proclamare: Domine, audi vi auditum tuum & timui. Consideravi opera tua & expavi. Quid enim tam insolitum, tam pavendum, quam labor fragili, sublimitas humili, dignitas non merenti? Et tamen, non despero neque deficio, quia non de me, sed de illo præsumo qui operatur in me. At tamen, magis ac magis satage ut per bona opera certam tuam vocationem & electionem facias.*

Si verò per eadem indicia & media cognoscas carnem aut sanguinem hanc tibi revelare vocationem, non verò Patrem coelestem, recumbe libenter in novissimo loco; hoc in nidulo quietus mane, & in eo quietus morere, ut salutis tuæ securius provideas.

Quòd si temerè tibi jam sumpseris honorem, vel si intraveris non habens vestem nuptialem, vel si sanctuarium Dei iniquâ hereditate possideas, ingemisce, fac dignos poenitentiae fructus, & deinceps cum timore & tremore salutem tuam operari contende; Deus qui neminem vult perire, faciet tecum misericordiam.

Si verò in ovile ovium, non per ostium, sed aliundè ascenderis, vel si recolas conscientiam tuam jam dictæ præmotionis obtentu fuisse vel in modico vulneratam, & periclitari, ad æternæ salutis bravium in vanum te fatigas, nisi honorem in quo de-

liquisti, derelinquas; sancta enim & salubris est cogitatio, factâ cessione, privatam ducere vitam. *Pet. Bles.* Et sic salvare animam tuam.

Domine Jesu, spirituum ponderator, & cordium scrutator, qui suaviter omnia disponens, ad te semper vocasti quos voluisti, & qui à fine usque ad finem fortiter attingens, suscitas tibi Sacerdotes fideles & Pastores juxta cor tuum, quandoquidem ex legitimâ & verâ Clericorum vocatione pendeat Cleri & Populi sanctitas & salus æterna, ne permittas intrare in sanctuarium tuum & in ovile ovium vocatos à carne & sanguine, mercenarios, latrones, & lupos rapaces; sed solum dignos & fideles à te missos & electos, quique sic à te vocati & electi, fiducialiter dicere possint: *Domini est assumptio nostra, & sancti Israël Regis nostri.* Hoc nostrum, hoc omnium piorum est votum, cui fave, & cœlitus adspira.

ARTICULUS III.

Probatio ante ordines.

Quid sunt Sacerdotes? Audi divina oracula, Patrumque monimenta. Sacerdotes sunt Ministri Christi, dispensatores Mysteriorum Dei; illius adjutores, & Redemptoris coadjutores; duces & rectores gregis illius; mediatores inter Deum & populum; fidei lumina & columnæ; janua civitatis æternæ; lux mundi; sal terræ; forma gregis; Angelici homines; minores qui-

dem Deo, sed homine majores. In hanc divinam sortem vocati sunt; hunc spectant munera eorum, &c. O quàm magnam in se continet dignitatem formidabile & admirabile Sacerdotium! *S. Ephr.* Ingens hæc; Angelica, imò Divina est dignitas. *S. Dionys.* Non mortalis quisquam, non Angelus, non Archangelus, non alia quævis creatura; sed ipse Paracletus ordinem hujus modi disposuit. *S. Chrys.* Excedit intellectum & orationem, donum altitudinis dignitatis Sacerdotum; &, sicut arbitror, hoc est quod Paulus quasi in stuporem mentis actus innuit, exclamans: ô altitudo! *S. Ephr.* Sed heu! Quot onera humeris Angelicis formidanda! *Trid. Sess. 6 de Ref. C. 1.*

Ergò necessaria est prævia consideratio ob sublimitatem statûs; necessaria ob periculum infelicitis exitûs, aut apostasiæ. Ergò longa requiritur probatio, id est, consideratio diuturna, & exactissima discussio: illa requiritur ob excellentiam statûs; requiritur longa, ne detrimentum patiantur populi; longa, ne scandalum patiatur Clericus; longa, ne indignus ordinetur, aut ordinatus deficiat. Ergò requiritur probata & firma virtus; illud exigit ordinatio divina; illud postulat perfectio in Cleri statu requisita; illud requirit periculum casûs & damnationis æternæ.

Sed heu! Obstupefcite cœli super hoc! Curritur passim ad sacros ordines; & reverenda ipsis quoque spiritibus Angelicis ministeria, homines apprehendunt sine re-

verentiâ , sine consideratione. *S. Ber.* Ecquid ? Ipſi ſutores , ſartores , & fabri , &c. non aſſumuntur ad inſimum officium , niſi præviâ & longâ probatione ; & nunc multi , interdum inhabiles & indigni , vitiis adhuc fœdati , & ſatanæ dolis decepti , ad magnam & multam , ad immenſam & infinitam ipſius Sacerdotii dignitatem , abſque vel minimâ meditatione anhelant & aſſumuntur. O quàm præſumptuoſa temeritas ! Ille præponitur ovili Dominico , qui nescit adhuc dominari ſpiritui ſuo. *Nicolaus Papa.* Stupenda inordinatio !

Heu ! Quot detrimenta & ſcandala oriuntur ex hâc ſtupendâ & miſerabili inconsideratione ? Reverà , quot Clerici , ante ætatem maturitatis , ante tempus examinis , ante meritum laboris , ante experientiam diſciplinæ , Sacerdotalem honorem adepti , in irâ Dei aſſumuntur ; & in ruinam populorum , ſuique perditionem ad regale Sacerdotium exaltantur ? O cæci promoves ? O infelices promoti ! O miſerabiles populi , quibus Deus in furore ſuo ſuſcitât paſtores qui dereliſta non viſitant , diſperſum non quærent , contritum non ſanant , & qui quod ſtat non enutriunt , & carnes pinguium comedunt ! *Zachar. 11.* Quis medebitur vobis ? Nonne adverſus vos fiet iſtud verum : *Laqueus ruinæ populi mei , Sacerdotes mali ? Ezech. 44.*

Obſecramus vos , novellæ plantationes Dei , ô vos qui ad Sacerdotium anhelantes , nondum exercitatos habetis ſenſus ad diſcretionem boni & mali , nolite ſequi cordis

vestri iudicium, nec abundare in sensu vestro, ne adhuc Neophyti, in superbiam vestram, & in laqueum diaboli incidatis. Cavete ne precibus, adulatione, obsequio, favore, & importunitate ordines intempestivè & nondum probati extorqueatis. Nescitis sc̃pissimè quid petatis. Videte prius vocationem vestram; probate seriâ & longâ consideratione quæ sit voluntas Dei beneplacens & perfectâ; considerate utrùm Spiritum Christi habeatis; qui enim spiritum ejus non habet, hic non est ejus. Attendite quomodò pulli avium, si ante pennarum perfectionem volare appetant, undè ire in alta cupiunt, indè in imâ merguntur. *S. Greg.* Sic & vos, si pinnaculum templi, adhuc debiles, ascendere presumatis, precipiti & fœdo casu in profundum barathrum ruituri estis.

Imitemini hos structores qui turrim ædificare volentes, prius sedentes computant sumptus qui necessarii sunt ad perficiendum, ne posteaquàm posuerint fundamentum, &c. *Luc. 14.*

Utinam magis, turrim inchoaturi, sedentes computetis, ne fortè sumptus non habeatis ad perficiendum; utinam vos qui continere non valetis, perfectionem temerariè profiteri, aut cœlibatui dare nomina vereamini! Sumptuosa siquidem turris est, & verbum grande quod non omnes capere possunt. *S. Ber.* Precavete hanc formidolosam Domini sententiam: *bonum erat ei si natus non fuisset.*

Pensent & iterùm pensent. Episcopi, altè

meditentur illud Apostoli : *nemini citò manus imposueris , neque communicaveris peccatis alienis.* 1. Tim. 1. Quid est illud citò ? Non ex primâ probatione , nec secundâ , nec tertiâ ; sed ubi consideratio diuturna præcessit ; tunc imponant manus ; neque enim ea res periculo caret. *Eorum quæ injustè consecratus peccaverit , illi quoque pœnam dabunt , qui initium dederunt , etiam præcedentium delictorum.* S. Chrys.

Meminerint & non obliviscantur peccata quæ Episcopos instante morte , & ante tribunal Christi acerbius cruciant , & quæ difficiliùs remittuntur , esse ea quæ ex imprudenti & temerariâ manuum impositione proveniunt. *Prat. spirit. à 7. gener. citatum.*
O Abyssus !

Utinam ergò , Apostolorum exemplis edocti , quantâ curâ ac delectu manûs impositionem fieri oporteat. *Conc. Colon.* sedulò satagant ut non singulos ad ordines assumant , sed dignos dumtaxat , & quorum probata virtus senectus sit. *Trid. Sess. 23. de Ref. c. 12.* & ut nullum ordinent qui , suo iudicio , non sit utilis aut necessarius Ecclesiis suis. *Ibid. c. 16.* Satiùs enim est , maxime in ordinatione Sacerdotum , paucos bonos , quàm multos malos habere Ministros. *Conc. Later. 4.* Multiplicarent quidem gentem sed heu ! Non magnificarent lætitiâ ; multiplicarent potiùs tanta mala quæ sentimus , & quæ per ostium impositionis manuum intrarunt , & quotidie in Ecclesiam Dei agminatim irrepunt. *Conc. Colon.*

Domine Jesu , qui ministros irreprehen-

sibiles , & Pastores juxta cor tuum exigis
& suscitari jubes , emitte spiritum tuum su-
per Episcopos tuos , quos ille posuit regere
Ecclesiam tuam quam acquisivisti sanguine
tuo ; & renovabis faciem terræ.



CAPUT SECUNDUM.

Finis statûs Clericalis.

A R T I C U L U S I.

Sanctitas.

QUis dubitet an Clerici , & præsertim
Sacerdotes , utpotè Ministri Christi , &
dispensatores mysteriorum Dei , ejusque
Angeli , conversatione & sermone Dei , po-
pulo præesse debeant , & indui sanctitatem
eximiam ? Quis hoc neget ? *Trid. Sess. 14.
de Ref. c. 1.* An illud prolixiori probatione
indiget ? Nonne sufficit ut memores sint ejus
quod scriptum est : *Sancti estote , quia ego
Sanctus sum* ? Lev. 19. Et istius : *Sacerdo-
tes qui accedunt ad Dominum , sanctificen-
tur , ne percutiat eos* ? Exod. 19. Hoc om-
nes sciunt , hoc singuli fatentur.

Sed heu ! Plures sunt Sacerdotes nomi-
ne , pauci opere : *S. Chrys.* Multiplicatur
quidem gens , sed non magnificatur lætitia ;
multiplicantur monstrosa peccata , scanda-
la , & ruinæ populorum ; vox quidem , vox
Jacob est ; sed manus , manus sunt Esaii.

Væ

Væ his filiis iræ ! Nonne bonum erat eis si in Sanctuarium numquàm intrassent , & si nati non fuissent ! Aut saltem , nonne melius fuisset illis fodere aut mendicare ? *S. Ber.* Honor sublimis , & vita deformis ; deifica professio , & illicita actio. *S. Amb.* Undè hæc monstra , quibus hodiè dilatatur Ecclesia , & Domini Sabaoth demolitur vinea ?

Tu verò , charissime Frater , cùm sis in honore , intellige ne fias similis jumentis insipientibus ; scias non sufficere quòd vocatus fueris. Certè Saül electus fuerat à Domino & vocatus ad regnum , ab illo unctus. Nadab quoque & Abiü designati fuere & vocati à Domino ad Sacerdotium. Judas etiam ad Apostolaturn & Sacerdotium à Christo vocatus est ; sed tantæ vocationis & dignitatis immemores , respicientes retrò , claudicantes in duas partes , in vitia detracti , è cœlo , in profundum abyssi detracti sunt. Nonne & tu huic sæculo te post consecrationem conformans , & te vitiis post vocationem implicans , divino ingratulus beneficio , ex illis esses per vitam ? Nonne in eâdem , post mortem , fores damnatione ? Profectò : Dominus locutus est : *Sicut patres tui , ita & tu.*

Hoc barathrum effugere non contendas ? O stulte ! verè non est timor Dei ante oculos tuos ; intellectum det tibi idem qui te vocavit Deus.

Respice , charissime in Christo Frater , aperi oculos tuos ut videas tibi imminens periculum. Si nondum deliqueris , *noli negligere gratiam quæ in te est , quæ data est*

B

tibi cum impositione manuum Præbyterii. Si verò excideris, admonemus te cum Apostolo, ut eandem resuscites gratiam; hanc sacro fervoris igne suscitata, ne postea finas conversatione mundanâ, pulvere terreno, cinere desidæ obduci, tepescere, & extingui. At, sicut ignis ligno & flabello eget, ut suscitetur & nutriatur, ita & gratia cœlestis novis alitur desideriis; postea, vigilantia animi, piis & jugibus conatibus, ferventibus precibus renovatur, incrementumque accipit ejus flamma.

Non te tædeat, Frater, magna incipere, & inchoata tenere: perseverantia informat merita, coronat bona proposita, remunerat currentem, ducit ad bravium & portum. Hæc est quâ laureantur Martyres, quâ Virgines coronantur, quâ Sacerdotes sublimantur. S. Bern.

Quò autem te ferventiùs ad dignè ambulandum eâ quâ vocatus es vocatione excites, sæpè cum D. Bernardo dicito tibi: *ad quid venisti?* Si hic tuæ vocationis scopus animo tuo altè adhæreat, quo fervore rogabis Dominum ut per gratiam suam effloreat super te sanctificatio? Quâ alacritate per angustam portam intrare contendes? Quâ animi fortitudine viam quæ ducit ad vitam constanter sequeris? Vis-ne ad id acrius calcar? Pone tibi ob oculos S. Franciscum Salesium, S. Carolum Borromæum, & alios; & dicito tibi: *non potero quid isti? Eodem insignitus charactere, eidem Domino serviens, ad eandem sanctitatem & gloriam vocatus, cur non æmulor eo?*

rum charismata meliora ? Usquequò in duas partes ignavus claudicabo ? Ubi piger volens & nolens tandem parebo ?

Si hæc & alia te ad fervorem & ad sanctitatem non inflamment, te ipse, quæsumus, definias. Infelix ! nonne vides abyssum os suum aperientem ut deglutiat te ?

ARTICULUS II.

Progressus in virtute.

Quem ob finem, ô Clerice, plantatus es in domo Domini, & stas in atriis Dei tui ? Nonne ut floreas & germines sicut lilium, ac multipliceris sicut cedrus libani ? Verum, numquid potes huic studere fini, nisi sitiens justitiam, contendas ire de virtute in virtutem, crescere de die in diem per omnia in illo, qui est caput Christus, & proficere sapientiâ & gratiâ coram Deo & hominibus ? Si huic progressui non adhæseris fortiter, quid accidet tibi ? Heu ! regredieris profectò, quia non progredi, regredi est, *S. Ber.* & interdum de abyssò ad abyssum ruere ; nonne illud experienciâ constat ?

Verum dic, amabimus, benevole Lector, undè oritur illud quod sentis rerum divinarum fastidium ? Undè profluunt tot in tuo intellectu tenebræ ? Undè tanta in corde tuo duritia ? Undè illud foedè cadendi, & non emergendi imminens periculum ? Undè ? Nonne ex negligentia in virtute proficiendi ? Nonne ex contemptu perfec-

tionis tuo sublimi statui adeo congruæ? Nonne ex abusu tot adminiculorum ad juges progressus adeò aptorum? Non vis ergò proficere? Non vis deficere? O stulte! Hæc est tua mens, tuumque propositum? Nescis quid loqueris. Quare? *Quin hoc vis quod esse non potest; quid enim stat in hoc sæculo? Certè de homine specialiter dictum est, Job. 14. fugit velut umbra, & numquàm in eodem statu permanet. S. Bernardus. Undè eveniat necesse est ut sis aut omninò frigidus, aut omninò calidus, aut omninò malus, aut omninò bonus; vel saltem ut jugiter contendas melior fieri; inter utrumque diù consistere impossibile est. S. Dorotheus. Ecce tibi ante te vita & mors; quodcumque volueris, dabitur tibi.*

Iterùm dicimus, iterùm & tu attende: non vis progredi? Et quod periculosius est, modica spernis? Tandem certè decides; non quidem statim (nemo enim fit repentinè malus) sed paulatim, dicit Dominus, & quod pejus est, inopinans, & hujus lapsus mortisque secundæ inscius. Horrenda catastrophe! Sed heu! Quid in Clero frequentius? Nonne tuam ipse sententiam legis? Hanc à te avertere non fatagas? O socordiam tuam!

Væ tibi, charissime Frater, si ad hæc lecta non emmolliatur cor tuum! Væ tibi, si scientiam salutis & proficiendi viam callens, & hanc alios docens; si panem Angelorum manducans, & de plenitudine Christi accipiens, non muteris in alium virum, in virum perfectum; fias è contra

ipsis Laïcis deterior & damnabilior ! Dic , age , quæ tua mens ? Ut quid sanctorum terram occupas ? Vide , vide quomodò , te hortante , surgunt indocti & rapiunt cœlum ; tu verò cum scientiis & doctrinis tuis carne volutaris & sanguine ; proh pudor ! Ecquandò incipies misereri animæ tuæ , placens Deo ? Nunc incipias necesse est ; est periculum in morâ ; incipe nunc , iterum monemus ; vae tibi si , stimulante gratiâ , differas de die in diem !

Quapropter noli negligere gratiam quæ data est tibi ; si sanctus sis , modis omnibus efficias ut sanctificeris adhuc ; arduum quidem est opus , sed confortare , ecce adest tibi Deus , auxiliator fortis ; exere vires , tantum proficies , quantum tibi vim intuleris ; ipse Deus admirabiles ascensiones disponet in corde tuo.

Verum time , & iterum time ne ejus gratiam ad perfectiora vocantis , in vacuum recipiens , & voluntatem ejus cognoscens & non faciens , multis in hoc sæculo & in altero vapulaveris ; nonne ipsi Laïci surgent in judicio condemnantes te ? Proh dolor !

ARTICULUS III.

Imitatio Christi , & intima cum illo unio.

QUos Deus præscivit , & prædestinavit conformes fieri imagini Filii sui. Ego sum via , veritas , & vita , inquit Magister bonus : exemplum dedi vobis , ut quemad-

B iiij

modum ego feci , ita & vos faciatis. Hæc & alia innumera testimonia omnibus Christianis insinuantur , ut inspiciant , & fideliter faciant secundum exemplar quod cunctis in monte monstratum est , donec Christus formetur in eis , & ut illum sequentes , non ambulent in tenebris , habeant verò lumen vitæ , & in æternum conglo-
rificentur.

Sed quantò magis Sacerdotes , qui , ut loquitur S. Cyrillus , sunt Christi figura expressaque forma , debent esse bonus odor Christi , & in omnibus sentire in se quod & in Christo Jesu ? Si omnis qui dicit se in Christo manere , debet , sicut ille ambulavit , ipse ambulare , quantò magis qui pro eo munere se dicunt , qui pro eo legatione funguntur , qui ei ministrant qui eum sequuntur ? Si aliter fecerint , nonne inexcusabiles sunt ? S. Ber. Et verò annon sciunt & sæpè legunt hæc imitationis Christi incitamenta , nimirum : *qui mihi ministrat me sequatur ; volo , Pater , ut ubi ego sum , illic sit & Minister meus ?* &c. Non est ergò diutius probandum Clericos præcipuè imitari debere Christum , cujus personam gerunt. Sed videamus utrùm reverà Christum induant.

Aperiamus ergò , charissime Frater , librum vitæ , scilicet vitam Domini Jesu ; accede , fiducialiter nobiscum age.

Ipse Dominus Jesus , Filius Dei exinanivit semetipsum ; & tu , charissime Frater , qui non es tui , sed Christi , altum in omnibus sapis & superbis : quid respondes ?

Ille numquàm fecit suam voluntatem, sed Patris; tu verò voluntatis propriæ abnegationis, adeò commendatæ, ipsum nomen ignoras; nonne hoc verum est? Ille oblatus quia ipse voluit, obediens fuit usque ad mortem; nonne tu Prepositis tuis, & Ecclesiasticis sanctionibus ac Ecclesiæ decretis, in rebus facillimis obedire renuis? Respondeat cor tuum.

Ille, cùm dives esset, adeò propter nos egenus factus est, ut non habuerit ubi caput reclinaret; tu verò, similis Judæ, loculis & divitiis inhias; vanitatem in supellectili, in vestitu, & in reliquo vitæ genere petulanter ostentas; quid tua tibi hîc objicit conscientia?

Ille jejunavit, esuriit, & sitivit per vitam; felle & aceto, instante morte, potatus est; tu verò, helluo & ciborum gurges, crapulam interdum ructas, ventri tuo tanquàm Deo effrenatè servis; hoc plerique vident, hoc testantur & rident. Ille adeò passus est, relinquens tibi exemplum, ut verè dictus sit vir dolorum; tu verò vel minimam Christi mortificationem in corpore tuo circumferre recusas; quinimò, corpus tuum omnibus voluptatum illecebris ac delitiis satiare ac farcire studiosiùs satagis. Nonne loquela tua, ipsaque opera te manifestum faciunt? Ecquandò te Ministrum Christi pudebit esse, sub capite spinato, & vulneribus à plantâ pedis usque ad verticem fauciato, delicatum membrum?

Ille non suam, sed Patris gloriam indefessus quæsit; tu verò, inanis gloriæ cu-

pidus , te ipsum , non illum prædicas , ejusque verbum præ tumore adulteras. Nonne ex abundantia tumidi cordis os tuum loquitur ?

Ille in omnibus fuit mitis corde tanquam ovis ; tu verò , quàmvis infirmitate circumdatus , non vis compati & condolere his qui ignorant & errant ; levi de causâ irasceris & peccas. Undè hoc monstrum Laicis ipsis odibile ?

Ille proficiens ætate , proficiebat gratiâ & sapientiâ coram Deo & hominibus ; nonne tu in dies deterior fis , & petra scandali ? Statue te contra faciem tuam , & narra , si quid habes ut justificeris ; quin potius obmutesce & confusione confundaris.

Ille , quàmvis ad Evangelizandum pauperibus missus sit , vitæ tamen absconditæ per triginta annos adhæsit ; tu autem adhuc infans aut vix neophytus , ad exteriora effusus , sine virtute & experienciâ teipsum manifestas mundo , splendidas dignitates , ac honorificas cathedras maturius ambis ; numquid hæc est febris tua ?

Ille tandem , ut cetera omittamus , zelo zelatus pro Domino Deo exercituum , & pro ovibus quæ perierant , prædicavit incessanter regnum Dei ; quinimò laboribus ac fatigationibus exhaustus , animam suam posuit pro eisdem ovibus ; tu verò in idem ministerium missus propter eos qui hereditatem capiunt salutis , quàmvis ubiquè videas prævaricantes , non tabescis ; eos fictis oculis & frigidissimo corde in infernum trahi finis , nec eos liberare properas ; non-

ne hæc est vera tui imago ? Dominus locutus est : *messis quidem multâ ; operarii autem pauci.*


O præclarum Christi , cujus vices geris , imitatore ! Verius loquamur : ô monstruosam Magistrum inter & Ministrum contradictionem ! Nonne reprehendit te cor tuum , charissime Frater ? Quid respondes , membrum putre & jam jam recusandum ? Usquequò te discipulum degenerem patietur Dominus Jesus ?

Sed dic , amabimus , quoniam ausu , ô mendax , dicis te diligere Dominum Jesum , & te in illo manere , intereadum renuis ambulare sicut ille ambulavit ? Quâ fronte ejus imagini adeò dissimilis , huic autem sæculo adeò conformis , te prædestinandum fore speras ? Erras ; nam , si fidei imitatione & intimâ cum illo unione cum illo manere , nec illi tanquam membra capiti , & sicut palmites viti , per vitam uniri nolis ; nonne post mortem audies & senties hanc formidabilem separationem : *discede à me , non es mei ?*

Erubescere , charissime Frater , erubescere : vide quomodo aulici se in omnibus Principi conformant , & sæculi amatores fatuis sæculi vanitatibus , ut hominibus placeant , & ut miserè ipsi pereant. Incipe ex nunc esse minister Christi , non solum charactere , habitu , verbo , & ministerio tenus , sed opere & veritate ; adeò expressè indue Dominum Jesum Christum , ut sive vivens , sive moriens , illius sis , & ut in Domino gloriari habeas : *vivo ego , jam non ego ;*

vivit verò in me Christus. Si manseris in illo , & ille in te , multum fructum tùm tibi , tùm aliis feres ; tandem futurus es heres Dei , coheres autem Christi.

Vide nunc , vide quàm magna gloria sit sequi Dominum. Eccl. 13:



CAPUT TERTIUM.

*Impedimenta salutis aut sanctitatis
Clericorum.*

ILLA præcipua impedimenta sunt quodcumque peccatum ; sed præsertim superbia , ambitio , avaritia , cura rerum sæcularium , luxuria , vita otiosa , amor sæculi , vita tepida , & spatiosa via , pravum exemplum , falsa conscientia , & difficultas conversionis. Hæc omnia impedimenta breviter hîc perstringimus.

A R T I C U L U S I.

Quodcumque peccatum.

OMNIS homo , qui est in immunditiâ , si accesserit ad ea quæ consecrata sunt , peribit coram Domino. Lev. 22. Nam peccata Sacerdotum sunt monstra , & quidem multò graviora peccatis Laïcorum , fivè quia scientes & volentes peccant , fivè quia majoribus gratiæ donis locupletantur ,

sivè quia in sublimiori statu collocantur, sivè quia eorum peccata maximum populo afferunt detrimentum, & gravem Ecclesiæ præbent offensionem; undè acerbiora merentur supplicia. Hoc omnis scriptura insinuat; hoc omnes sancti Patres proclamant, hoc ipsa ratio persuadet; quis ergò dubitet?

Ergò, charissime Frater, quasi à facie colubri fuge peccatum, fornicationem & omnem immunditiam, aut avaritiam, aut turpitudinem, aut stultiloquium, aut scurrilitatem nec nomines, sicut decet sanctos. Absit ut in terrâ sanctorum iniqua geras. Numquid videres gloriam Domini? Nequaquam. Nonne tamen, dilectus Dei, & in domo Dei, fecisti & adhuc facis scelera multa? Si res ita sit, quâ fronte sic quotidie gloriaris: *ego autem in innocentia mea ingressus sum, ego autem ambulavi in innocentia cordis mei, & in Ecclesiis benedicam te, Domine?* Nonne mentita est iniquitas sibi? Nonne Deus exercituum, qui plantavit te, & te elegit ex omni carne, loquetur super te malum, emigrabit te de tabernaculo suo, & delebit nomen tuum de libro viventium? O miserum te, si hanc promptâ & seriâ pœnitentiâ non prevenias ultionem! Satage ex nunc ita innocenter vivere, ut proportionem datâ, dicere possis cum Christo Jesu: *quis ex vobis arguet me de peccato.* Joan. 8.



ARTICULUS II.

Superbia.

Initium omnis peccati superbia ; quid mirum , si odibilis sit coram Deo & hominibus ? Quid mirum , si dissipet Dominus ossa eorum qui hominibus placent ? Si non patiatur habitare eum in domo suâ qui facit superbiam ? Si projecerit de cœlo fatanam sicut fulgur , ad infernum , in profundum lacûs , eum non ampliùs in cœlo assumpturus ? Quid mirum , si dominantes in Cleris , & inani scientiâ inflatos & tumidos tradiderit Deus in pestiferos errores , in desideria cordis eorum , in immunditiam , in passiones ignominiae , & in reprobum sensum ? Quid mirum , si dederit eos contemptibiles omnibus populis ; si tandem humiliaverit eos usque ad inferni novissima ?

Time., charissime Frater , qui altum sapis , time ne hæc omnia eveniant super te. Videmus in te contradictionem. Hic sæpè dicis : *elegi abjectus esse in domo Dei mei* ; ibi avidus cupis ab hominibus videri , ubiquè superbia tua ascendit semper ; in corde & corde loqueris. Numquid Deus irrideatur ? Nonne vult ut sis humilis corde , & non labiis tantùm ?

Memineris te esse Ministrum Christi Jesu , qui exinanivit semetipsum ; quid-ni ergò corde & animo abhorreas ab omni specie superbiæ , præsumptionis & vanitatis ? Quid-ni satagas magnis tuis fletibus & laboribus

hanc tibi conciliare humilitatem quam semper respexit Deus, & ex quâ ipsam Dei Matrem beatam dicent omnes generationes? *Vide in meditationibus de humilitate hanc superbiam fusiùs & acriùs profligatam.*

ARTICULUS III.

Ambitio.

H Onores sunt onera & frequens animæ perdendæ periculum, affirmant gravissimi sancti Patres. Hinc fit ut doctissimi viri, utpotè fide viventes, & honorum pericula agnoscentes, fugerent trepidi, & in speluncis laterent, ne dignitates Ecclesiasticas suscipere cogerentur. Moyfes jam electus in ducem populi; Jeremias etiam vocatus à Domino, ut populum rebellem erudiat, humiliter se excusant. Ipse Dominus Jesus, cùm cognovisset qui venturi essent ut raperent eum, & facerent eum regem, fugit iterùm in montem ipse solus.

Nunc tamen heu! Homines cupidi, elati, se ipsos, non Deum & animas amantes, ac propriæ imbecillitati & inidoneitati parùm consulentes, ambiunt fœdè, & mendicant turmatim beneficia & honores; susceptum verò curæ Pastoralis officium ministrare dignè tantò magis nequeunt, quanto ad hujus humilitatis magisterium ex solâ elatione pervenerunt. *S. Greg.* Væ illis! Emoti sicut ebrius, ascenderunt usque ad cælos, & tandem ejecti & confusi, descendunt usque ad abyssos. Quot enim pau-

pertas ad cœlum promovet, tot cum dignitatibus suis infernus absorbet. *Pet. Bles.* O gens absque consilio & sine prudentiâ ! O ambitio, pestis generalis ! O ambitio, ambientium crux, quomodò omnes torquens, omnibus places ? *S. Ber.* Servum Dei oportet non litigare, inquit Apostolus. Attamen quot sunt Clerici, qui, videntibus & dolentibus Laïcis, lites ad multos annos protrahunt, ut sibi beneficium pinguius parent, vel potius ut sibi gravius onus imponant ? Undè hæc bella, & hæ in eis lites ? Nonne hinc, ex concupiscentiis eorum ? *Jac. 4.*

Sed tandem quot sunt inter hos cupidos elatosque Clericos, qui nunc in inferno positi, aut fodisse, aut panem ostiatim mendicasse mallent, quàm ad beneficiorum & honorum culmina ascendisse per vitam, atque ita animam suam securiùs salvasse ? Et verò, quid eis profuit honorum jactantia.

Quantò sapientiùs egit B. Gaudefredus, Cænobii Claravallensis Prior, qui ut Episcopatum Tornacensem acceptaret, nullis potuit umquàm precibus aut importunitatibus induci, & qui post mortem cuidam Religioso ejusdem Cænobii apparens, dixit : *Salvus sum, mihi feliciter cessit fuga Episcopatus ; si enim fuisset de numero Episcoporum, fuisset de numero damnatorum. Ita mihi Sancta Trinitas revelavit.* Undè verum est istud : *gravissimum judicium fiet his qui præsumunt.* Sap. 6.

Similiter & tu, charissime Frater, si sapias, novissima hæc maturiùs provide ; hinc

disces nolle dominari, ut non dominetur tui omnis iniquitas. *S. Ber.* Inhereant animo hæc Christi Domini verba : *Quicumque voluerit inter vos major fieri, sit vester minister; & qui voluerit inter vos primus esse, erit vester minister.* His & aliis altè in animo defixis, ne te immittas in populum, & non alligabis duplicia peccata. *Eccl. 7.* Elonga verò, fugiens; ama nesciri, tutius enim est latere, & fumare sub modio, quàm ascendere super candelabrum. *Petr. Bles.* Iterùm suademus ut maneat in solitudine; ibi expecta eum qui te salvum faciet à pusillanimitate spiritûs & tempestate; ibi multiplica, sicut palma, dies tuos; *in hoc nidulo tuo quietus morere.* *Job. 29.* Aut saltem recumbe, & sta firmus in novissimo loco, donec Dominus, Superiorum Ministerio, tibi dicat invito : *ascende superiùs, meam facturum voluntatem; ne timeas, ego tecum sum, ut sis Pastor juxta cor meum, & ut te ipsum salvum facias, & eos qui te audient.*

Quinimò, cùm periculosum sit Sanctuarium Dei hereditate possidere, & longè periculosius donum Dei possidere, pecuniâ scilicet, vel munere à manu, vel munere à linguâ, vel munere ab obsequio; & cùm Ecclesiasticus Ordo pervertatur quando unus plurium Officia occupat Clericorum, ut loquitur *Trid. sess. 24. c. 17.* Cave ne ambitione hæreditariâ, avidus sis possidendorum beneficiorum, & eâdem ambitione, resignandi parenti beneficium tuum; pluralitas beneficiorum certum continet animarum periculum. *Conc. Later. 3. & re-*

signatio efficit aliquoties resignatorem reum peccatorum alienorum ; caro & sanguis sepius revelat has resignationes , & non Pater cœlestis. Cave ne nimium innitaris dispensationi , vel ad possidendum hereditate sanctuarium , vel ad plura possidenda beneficia , vel ad resignandum indigno parenti beneficium tuum ; si enim hæc dispensatio obreptitia sit , vel subreptitia , non mentiris hominibus sed Deo , & in verticem tuum iniquitas descendet tua. Posses ire in infernum sine licentiâ ; certè nunc ibis cum dispensatione. *Alb. mag.*

Quot collatores beneficiorum ululant , & præ angustia gemunt in inferno , quia hominibus placere volentes , & non Deo ; quique carni aut sanguini acquiescentes , indignos dignis pretulerunt ? Nonne ovium sanguinem de ipsorum manu requisivit Deus ? Hoc nos quidem breviter obiterque perstringimus ; sed ululatus iniquorum collatorum æternus erit. Sempiternus pariter erit luctus horum latronum , qui in ovile intrarunt , non per ostium , sed aliundè , ut maccent & perdant. Hoc in speculo inspicere te , benevole lector.

A R T I C U L U S I V.

Avaritia.

Quid avaro scelestius ? Nihil. Eccl. 10. Cupiditas enim , est radix omnium malorum ; quam quidam appetentes , erraverunt à fide , inseruerunt se multis dolori-

bus, inciderunt in tentationem, & in laqueum diaboli, ac sepulti sunt in inferno, sicut Judæ avaro, & indè proditori, miserè accidit.

Quot heu! sunt Clerici qui in Sanctuarium Dei præ avaritiâ intrarunt; qui vel sacras functiones non obeunt, nisi turpis lucri gratiâ; qui mammonæ serviunt, non Deo; qui avaritiæ adeò tenaciter student & adherent, ut ad beneficia & primatus anhelent insipientes, & se negotiis sæcularibus fœdè implicent? Quot sunt qui quàmvis divites, paupertatem tamen ubiquè insimulantes, debita inclementer exigunt; necessaria ad victum & vestitum, tùm sibi, tùm egenis inhumani recusant; miserè vivunt, ac sui pauperumque sunt veluti necatores? Quo fine? Quo? Ut congregent, & congregata servant. Verius loquamur, ut thesaurizent sibi iram Dei? Sed tandem mortui, inveniuntur (cunctis stupentibus simul & execrantibus) viri divitiarum, quibus conglutinatus fuit semper & est cor eorum, moriuntur pleni divitiarum, sed pleniores maledictionum. Hi thesauri, quos inhiantes paraverunt, cujus tandem sunt? Latronum; quod enim non capit Christus, rapit fiscus. *S. Aug.* Verùm, quò deventerunt hi insatiabiles corde? Avaro Judæ fideliter per vitam adherentes, in eâdem cum illo fuerunt damnatione; hinc, post mortem, cum illo, & divite in inferno sepulti sunt. Deploranda fors!

Quid times, charissime Frater, si hanc idololatriam & hanc desolationem usque ad

consummationem & finem perseveraturam ; non timeas ? Hanc ergò cupiditatem , quæ est idolorum servitus , ex corde tuo eradicare coneris ; ne hæc oratio , quam quotidie effundis , scilicet : *inclina cor meum Deus in testimonia tua , & non in avaritiam* , fiat tibi in peccatum. Habens alimenta , & quibus tegaris , his contentus sis ; *quod his abundantius est , à malo est.* Matth. 5. Quid intulisti in hunc mundum ? Nihil. Quid sumes cum interieris ? Nihil. Nudus ingressus es , nudus egredieris. Iterum dicimus , non descendent tecum divitiæ tuæ ; eas alienis relinques ; sola opera tua sequentur te. Verum , quò ibit anima tua ? Tu videris. Ubi thesaurus tuus nunc est , ibi & cor tuum forsàn in æternum erit : quia pecunia tua , nisi resipiscas , erit tecum in æternam perditionem.

O servum mammonæ ! Nonne te pudet fidelibus predicare ut non sint solliciti in crastinum , dum tu pecuniæ igne exardescens , numquàm dicis : *sufficit , sufficit* ; sed dicis semper cum sanguisugæ infernalis filiâ : *affer , affer* ? Tu , qui ob inopiæ timorem , justitiam & cælum deferis ? Tu , qui propter avaritiam cunctis notam , factus es petra scandali , opprobrium hominum , & abjectio plebis ?

O miserum te ! Si recogitans vias tuas , non convertas pedes tuos in paupertatem Christi Jesu , cujus Minister es ; aut saltem , in paupertatem spiritûs & cordis , in subsidium pauperum ; & indè in viam pacis & in requiem animæ tuæ ! Nos verò suade-

mus tibi : sic tranſeas per bona temporalia ut non amittas æterna. Quid-ni & tu contendes ?

A R T I C U L U S V.

Cura rerum ſæcularium , & negotiatio.

Nemo militans Deo , implicat ſe negotiis ſæcularibus , ut placeat ei , cui ſe probavit. Quapropter , *non erit ultrà mercator in domo Domini.* Zachar. 14.

Quid eſt cur , chariſſime Frater , facis domum Patris tui domum negotiationis ? Numquid mittens manum ad aratrum , & reſpiciens retrò , aptus eris regno Dei , orationi , & miniſterio tuo humeris Angelicis formidando ? quonam auſu monere poteris Laicos ne ſolliciti ſint in craſtinum , ſi tu ipſe , videntibus illis , turpium occupationes lucrorum appetas , & ſæcularium domos diſcurrens , litigioſorum & procuratorum perſonam geras ? Quàmvis veritatem dixeris eis , credent ne tibi ? Dic , amabimus , operarie iniquitatis , an expectas dùm Dominus iterùm faciat flagellum de funiculis , & ejiciat te de Templo ſancto ſuo ? Quid ergò turbaris erga plurima ? Te à Divinis imprudens avertis , ſcandalum præbes , & vituperari ſinis miniſterium tuum.

Abdica tandem , Nazaræe , ſæcularia negotia ; repudia procurationes & lites , ut his omnibus impedimentis ſepoſitis , lectioni , orationi , tuoque miniſterio ferventiùs & fructuoſiùs iſteſ. Ne commiſeris ,

ut quis è vitâ discedens , te ad tutelâs , curas , & sollicitudines vocet. Ad sublimiora jam vocatus es ; quere primùm regnum Dei & justitiâ ejus , & hæc omnia , quæ vilibus occupationibus aucuparis anxius , copiosè adjicientur tibi. Quinimò , negotiatorem Clericum , & ex inope divitem , & ex ignobili gloriosum , quasi pestem fuge. *Concil. Calced.*

Si verò dives esse cupis , veras divitias ama ; quapropter , nobiliori & foecundiori negotiationi te des , velimus. Negotiare ergò dùm citò venit judex , cuilibet , prout gessit , redditurus ; negotiare , dùm tempus habes , pro animâ tuâ , ut thesauros tibi in cœlis thesaurizes ; centuplum accipies , & vitam æternam possidebis. Felix negotiatio ! Hinc fideles in odorem tuum currentes , discent perituras calcare divitias , aut saltem iis uti tamquàm non utantur ; discent negotiationibus non vacare , nisi propter infirmitatem & necessitatem , tamquàm iis non vacent.

Si tamen necesse sit ut rerum tuarum satagas , cave ne iis cor apponas ; facito semper ut inter hæc negotia , quibus te invitus & gemens in ipso tuo statu implicatum vides , ambules coram Domino , in cœlum semper intentus ; ita ut , dùm secundum beneplacitum Christi satagis circa frequens ministerium , sicut Martha , sedeas spiritu , ut Maria , secus pedes Domini , audiens verbum illius & orationi addictus. Omnis populus dicet : *fiat , fiat.* Verùm , si id non fiat , quid de te fiet ?

ARTICULUS VI.

Luxuria.

INter omnia Christianorum certamina ,
asserit D. Augustinus , sola sunt castita-
tis prœlia , ubi quotidiana pugna , ubi rara
victoria. Undè , subdit D. Greg. *hoc ma-
ximè vitio periclitatur genus humanum.* Sed
quantò magis periclitantur Clerici illi , qui
postquàm castitatis votum emiservunt , splen-
didè epulantur quotidie , somno , quieti , &
otio indulgènt torpidè , familiaritati & con-
sortio mulierum assidue & liberè nimis adhe-
rent imprudentes , & sic carnis illecebris
fomitè præbent , & colaphizanti angelo
satanæ dant locum ? *Vidi* , affirmat geme-
bundus D. Augustinus , *vidi cedros libani
turpiter corruisse , de quorum sanctitate , non
magis , quàm Ambrosii & Hieronymi dubi-
tassent.*

Quomodò ergò stabunt arundines , id
est , infirmi & fragiles Clerici , mortifica-
tionis & pietatis nequidem speciem habèn-
tes ? infausta præsumptio !

Væ illis Clericis , qui hoc foetido vitio
laborantes , quique ad Missæ celebrationem
obligati , nec tamen ab illâ , præ scandalo
aut lucro abstinentes , à spiritu immundo
se coinquinari & possideri sinunt !

Nonne sub peccato venundati , & des-
perantes , se tradunt impuditiæ , in ope-
rationem immunditiæ omnis ? Nonne fron-
tem meretricis sibi facientes , & iudices in

propriâ causâ se constituentes , aggerant sacrilegia , induunt maledictionem sicut vestimentum , incidunt in laqueum diaboli , & in foveam æternam quam sibi fecerunt ?

Tu verò , charissime Frater , si turpiter corrueris , redi ad cor ; & in te reversus , dic , amabimus ; quem fructum habes in illis in quibus nunc erubescere debes , & quorum finis est mors ? Heu tibi ! In croceis , & pane Angelorum enutritus , & de Deo saginatus , amplexatus es stercorea ; factus es similis jumentis insipientibus , quibus non est intellectus. Proh pudor ! sed quantò vilior factus es , iterans post millia proposita , pessimas vias tuas ? Agnosce dignitatem tuam , & ne tardes exire ex hoc volutabro. Fac dignos pœnitentiæ fructus , noli amplius peccare , & hoc te sterquilinio iterum fœdare , ne quid deterius contingat tibi ; & sicut hætenus exhibuisti membra tua servire immunditiæ & iniquitati ad iniquitatem , ità nunc exhibe membra tua servire justitiæ ad sanctificationem. Si autem hoc vitio inquinatus non fueris , gratias age Deo qui dedit tibi victoriam per Jesum Christum. Attamen , ne confidas in castitate præteritâ , ut monet S. Hieronymus ; sed vigila , & omni curâ custodi cor tuum. Otium , utpotè luxuriæ fomitem , fuge , & da operam ut Diabolus te inveniat semper occupatum. *Idem.* Odi vel minimam luxuriæ speciem & illecebram ; elimina illius vel levissimam occasionem. *Qui amat periculum peribit in illo.* Eccl. 3.

Sed præsertim in medio mulierum noli.

commorari. De vestimentis procedit tinea , & à muliere , iniquitas viri. Mulier laqueus est venatorum , & fagina cor ejus ; vincula sunt manus illius. Adolescentiores viduas devota , monet Apostolus ; simul & Virgines , quæ , quàmvis sanctæ sint , non minùs sunt cavendæ. Quò sanctiores sunt , eò magis alliciunt , ait S. Aug. Quòd si cum illis absque necessitate , etiam prætextu devotionis familiariter converferis , tibi accidet ut , cùm spiritu cœperis , carne tandem consummandus sis. Hoc dicunt tibi suâ infelici experienciâ quidam majores tui , & quidem te multò doctiores & sanctiores. Quid-ni his exemplis edoctus , cautior eris ? Ergò , cùm pauca quæ sunt ad salutem necessaria , allocutus fueris , statim advola. Nemini , hâc in parte , des vel minimam offensionem ; nam si mirabantur Apostoli quia cum muliere loquebatur Christus ; nonne tu virginibus & viduis assuens , malæ suspicionis de te præbebis materiam , vitamque tuam sinistrae opinionis infamabis ? Numquid patieris vituperari ministerium tuum ?

Et quamvis senex sis , time. Attende quid de Rege Salomone dicatur : *cùm jam esset senex , depravatum est cor ejus per mulieres ut sequeretur deos alienos.* Undè tu superbis ? Undè de te præsumis ? Numquid es Davide sanctior , aut Salomone sapientior ? S. Hier. Cogita & iterùm cogita quòd libidinis tentatio fugiendo superetur. S. Aug. Ne assumas in ministerium tuum mulierem quæ annum quadagesimum quintum non

attigerit. Hoc in omnium ferè Diœcesum statutis prudenter edicitur. Quòd si illusionibus illus & impletus, Præpositum tuum in hoc spernas, scito quia Deus non irridetur; & in verticem tuum descendet iniquitas & præsumptio tua. Quinimò, pangas fœdus cum oculis tuis, ut ne cogites quidem de virgine; mors ascendit per fenestras. Sepi aures tuas spinis. Et quoniam nemo potest esse continens nisi dederit Deus, postula enixè continentiam. Verùm mortifica membra tua quæ sunt super terram; hoc enim genus dæmoniorum in nullo potest exire nisi in oratione & jejunio. Quàmvis Sacerdos sis, circumdatus es infirmitate, & ad malum ab adoleſcentiâ pronus. Nonne idipsum tibi experienciâ compertum est?

Tandem noli altum sapere; sed timens, humilia te in omnibus; Deus enim occultam superbiam punit apertâ luxuriâ, asserit D. Augustinus. Et scriptum est: qui se exaltat, humiliabitur, & quidem usque ad passionem ignominie; at, qui se humiliat, exaltabitur ante tribunal Agni immaculati. Elige.

A R T I C U L U S VII.

Vita otiosa.

E Go vos elegi ut eatis, & fructum afferatis. Quos alloquitur Dominus Jesus? Apostolos alloquitur, & eorum successores. Verùm, possunt-ne fructum afferre; si Apostolorum

Apostolorum exemplo , non sint in vigiliis , in laboribus plurimis , & in fatigatione ? Undè intelligere debent Clerici , se non ad propria commoda , sed ad Dei labores , & sollicitudines pro Dei gloriâ , vocatos esse. *Trid. sess. 25. de refor. c. 1.* Sed heu ! Quinam sunt hodiè qui in labore hominum non sunt , & qui cum hominibus non flagellantur , nisi Clerici ? Hinc profluit illud quorundam dictum : *Quid est Sacerdotium , nisi otium ?* Ipsi siquidem , post recitatas cursim horas canonicas , & post celebratum perfunctoriè Missæ Sacrificium , stant totâ die otiosi ; ferè omnes , tùm sibi , tùm populis inutiles sunt ; non est qui faciat bonum , non est usque ad unum ; ducunt in bonis dies suos , & in puncto ad inferna descendunt ; scriptum est enim : *Omnis arbor quæ non facit fructum bonum , excidetur , & in ignem mittetur.* Terribilis Sacerdotum exitus !

Prætereà , multam malitiam docuit otiositas ; undè fit verum istud : *Sicut populus , sic Sacerdos.* Quinimò , quid mirum si Clerici otio torpentes , fiant interdùm ipsis laïcis deteriores ? Quod vidimus testamur.

Quousque tandem & tu , charissime Frater , marcebis ignaviâ ? Nonne ad laborem natus es , sicut avis ad volatum ? Quomodò , torpens otio , declinabis à malo , faciens bonum , & ministerium tuum dignè implebis ? Numquid speras te percepturum hanc immarcessibilem gloriæ coronam , legitimè & constanter certantibus paratam ? O illusoria & vana spes tua ! Noli errare ; quæ

feminaveris, hæc & metes. Veriùs loquamur; nonne, fervus inutilis, projiciendus es in tenebras exteriores? Nonne tot ovium tibi commissarum, & tuâ ignaviâ perditarum, sanguis à te requirendus est? Ità fanè. Væ tibi, si hodiè vocem Domini audiens, non festinaveris prædari, ac tempus tuosque dies malos præteritos redimere, & laborare deinceps sicut bonus miles Christi! O quàm strictam rationem de tot diebus salutis perditis redditurus es! Hoc seriò cogita; ferventior hætenùs sis; sæcularibus, imò & clericis te ad inutilia vocantibus, sic cum Nehemiâ responde: *Opus grande ego facio, & non possum descendere, ne fortè negligatur.* 2. Esd. 3. ne post vitam tuam inutilem, & tempus instante morte petenti tibi, acerbè dicatur: *tempus non erit amplius; intra in diem æternitatis, & in illam noctem in quâ nemo potest operari.* Terribilis, sed justa sententia Clericis otiosis imminens!

ARTICULUS VIII.

Amor sæculi.

O Mne quod est in mundo, concupiscentia carnis est, & concupiscentia oculorum, & superbia vitæ. Si ergò, charissime Frater, spiritum extinguere, & vocationem tuam præfocare nolis; si Dominum sine impedimento obsecrare, proficere in sapientiâ, & exhibere te in omnibus sicut Dei ministrum cupias, noli diligere

mundum, neque ea quæ in mundo sunt. Numquid potes duobus dominis servire? Iterum monemus, noli conformari huic seculo, quod totum in maligno positum est. *Observa fideliter ea quæ à sacris Conciliis de luxu, commensationibus, choreis, aleis, & lusibus, copiosè & salubriter sancita fuerunt, non obstantibus consuetudinibus.* Trid. sess. 22. de ref. c. 1. *Modestâ suppellectili & mensâ, ac frugali victu non solum contentus sis, verum etiam in reliquo vitæ genere ac totâ tuâ domo, nihil appareat quod à sancto instituto sit alienum, quodque non simplicitatem, Dei zelum, ac vanitatum contemptum præ se ferat.* Idem. sess. 25. de ref. c. 1.

Quapropter memineris diei illius, in quâ egressus de Ægypto & de domo servitutis, dixisti: *Dominus pars hæreditatis meæ, & calicis mei; tu es qui restitues hæreditatem meam mihi.* Quidni tibi sufficiat? Quid cum illo tibi deerit? Jam non es de hoc mundo: utere ergò mundo tamquàm non utens: dimitte mortuos sepelire mortuos: quoties inter homines eris, minor homo redibis; de terrâ sunt, de terrâ loquuntur; quid reverà narrant, nisi terrena, vana, curiosa, fabulationes, ne quid deterius dicamus? Ecquid mirum? Ex abundantia cordis os loquitur. *Meminisse debes, non aliundè Clericalis Ordinis dignitatem fuisse gravius offensam, quàm nimia laicorum familiaritate, & frequentiori cum illis convivio, ludo, & spectaculo.* Conc. Aquil. Igitur, quàm maximum poteris cahos inter te, & inter laicos firma, si eorum mores

induere , & ministerium tuum vituperari nolis.

Præterea , cùm sis Sacerdos secundùm ordinem Melchisedech , Nazaræus , & Domino consecratus , cave ne acquiescas carni aut sanguini ; quinimò , omnem affectum paternum , malorum seminarium in Ecclesia Dei extantem , penitùs depone. *Trid. sess. 25. de ref. c. 1.* Obliviscere domum patris tui , & vocationem tuam certiores facies. *Vide dicta in præparatione ad mortem.* Abstineas à venatione , saltem clamorosa & frequenti. *Conc. passim. Esau erat venator quia peccator erat ; & penitùs non invenimus in Scripturis sanctis aliquem sanctum venatorem.* S. Hier.

Attamen , si adeò ardentè & crebrò venari cupias , cogita esse & aliam venationem Deo gratiorem , & tibi utiliore. Sis ergò venator animarum , & quidem eodè zelo quo Christus Dominus voluit & constituit Apostolos fieri piscatores hominum. Hæc venatio non distrahit à divinis , nec pusillos scandalizat sicut altera ; sed te & ipsos ædificat. Quidni in hanc , post moderatas & sanctas animi recreationes , incumbas ?

Tandem , cetera omnia quæ in mundo sunt , totumque mundum , animæ tuæ insensissimum hostem , fastidire , contemnere , & usque ad mortem profligare non desinas. Anhelent alii ad beneficia & Prælaturas ; inhient insipientes corde ad divitias , ad delicias , & sæculi pompas , ad honores & favores ; tu verò ad pauperiem & mortificationem , ad cruces & persecutio-

nes ad tui odium & abnegationem ; ita ut, abdicatis & contemptis omnibus sæculi illecebris , possis tutò & liberè dicere : *regnum meum non est de hoc mundo.*

O nimis felix , charissime frater , si nunquàm respexisses in vanitates & insanias falsas ; si mundus tibi crucifixus fuisset , & tu mundo ; si Domínium secutus fuisses ; certè non ambulasses in tenebris , & millia peccatorum monstra evasisses. Usquequò ergò , gravi corde , diliges vanitatem , & quæres mendacium ? Memineris istius , scilicet , *quicumque voluerit esse amicus hujus sæculi , inimicus Dei constituitur.* Et verò , quæ conventio Christi ad Belial ? Quid tibi cum pompis diaboli , quibus in baptismo , & in sacrâ unctione renuntiasti , ut uni Deo adhereres ? Nonne tempus est fugiendi de medio Babylonis , ut te immaculatum ab hoc sæculo custodias , & salves animam tuam ? Expectas-ne dùm durus nuntius , tibi , instante morte , dicat : *proficiscere de hoc mundo?*

A R T I C U L U S I X.

Vita tepida & spatiosa via.

A Postolus monet ut simus sollicitudine non pigri , spiritu ferventes , Domino servientes. Ipse Dominus , qui facit ministros suos sicut flammam ignis , præcipit ut Sacerdotes subjiciant ligna manè , per singulos dies , & alant perpetuum animi ardorem erga divina ; zelumque gloriæ Dei , & salutis propriæ ac animarum , tanquàm

ignem sacrum ad sacras actiones necessarium.

Sed heu ! quàmvis Sacerdotum status fervoris & observantioris vitæ studium exposcat, quot tamen sunt qui effrenatè dicunt se ad tantam non teneri perfectionem ? Sufficit, juxta illos, quòd horas canonicas non omitant, quòd rogati Sacramenta administrent, quòd missas, obligationis tempore, celebrent, quòd scandalum publicum non præbeant, quòd conscientiam peccatis mortalibus oneratam non sentiant ; ad religiosos, dictitant, spectat perfectio. Igitur, quot sunt qui liberè proclamant se ad peccata venialia vitanda non teneri, nec ad ea in confessione declaranda, utpotè rati se ad majorem perfectionem non obligari ?

Quid plura ? Quot sunt, qui peccata venialia, quibus enerviter & frontosè afuescunt, nihili faciunt ; quinimò contemnunt ? Recitare officium inordinatim, indecorè, & irreverenter, medias inter turbas & alternas confabulationes, juxta illos parùm est ; omittere multos ritus, pluresque cæremonias, parùm est ; celebrare Missam cursim, tepidè, cum vestimentis sordidis, pannosis & laceratis, parùm est ; detrahare proximo, indecora proferre, & in mille aliis & singulis momentis offendere, parùm & minutulùm est ; quinimò, si ipsis credatur, nihilum. Abstinere se, ut monet Apostolus, ab omni specie malâ, & timoratam habere conscientiam, ac altioris pietatis studium, est merum scrupulum, quo Sacerdotes angi dedecet. Luce-

re, & ardere super candelabrum & coram hominibus sacro illo igne quem Christus Dominus venit mittere in terram; conversari in solitudine cum illo suavissimo sponso, qui in illâ solitudine loquitur ad cor sponsæ, est hypocritarum morem & fucum præ se ferre.

Hinc fit ut derideant simplicitatem iustorum, & ferventiorum fratrum, eosque habeant in derisum, & in similitudinem improperii; ipsi autem hæc omnia exempla & fervoris incitamenta respicientes, pulvere terreno excæcati, desidiâ obruti, & proprio sensu abundantes, huic sæculo in omnibus se conformant; ventri, somno, & otio indulgent; pretiosis se comunt vestibus; splendidè epulantur quotidie; ludis, choreis, aleis interfunt assidui; negotiis secularibus se avidi implicant; congerendis pecuniis student; vanitati, ambitioni & præsumptioni, interiùs exteriùsque dediti cernuntur; inani scientiâ tumidi, & inter ceteros dominatum habentes proclamantur; hûc & illûc vagantes & nimis effusi, ad plateas, ad mercatorum officinas, ad ludantium societates, ad immoderatas deambulationes & vanas recreationes, ad compotantium & epulantium contubernia currunt; inter mulierum consortia confabulantes & ridentes, pretiosum tempus conterunt.

Tandem, totâ vitâ otiosi, ignaviâ marcentes, in licentioris vitæ luto submersi, mundani, animales, libertatis sectatores, simul & amatores hujus sæculi chimeræ,

vix quidquam temporis , lectioni , conscientiae examini , & rerum sacrarum meditationi infumunt ; cordis puritati numquam student ; languidè & perfunctoriè , sine spiritu , sine zelo , divina obeunt ministeria ; coelica mysteria , omniaque Dei opera negligenter faciunt , usu potius quàm affectu , ut marsupium pecuniâ impleant , non verò ut animam adipe & pinguedine coelesti repleant. Sic totum vitae tempus in negligentis , & vitiis ordinariis miserè transigunt.

Et quia caligine & pulvere mundano obtusos gerunt oculos , vulnera animae suae , egestatem cordis & proximam utriusque mortem non perspiciunt ; in modico iniqui , jam in majori iniqui fiunt ; modica spernentes , paulatim decidunt ; per totam vitam tepidi , ex ore Dei evomuntur ; & dum nomen habent quòd vivant , mortui sunt ; curationum utilitas vix in eis est , sive quia hunc statum miseri ignorant , sive quia vel utilissima remedia usu vilescunt. Quid tandem restat , nisi ut occulto & justo Dei judicio suaeque malitiâ excœcati , de abyssò ad abyssum , de sacrilegio in sacrilegium ruentes , ejiciantur ; fiant Deo abominabiles , & in peccato suo inscii moriantur ?

Hæc est vita tepida , quæ Dei nauseam & vomitum provocat ; hæc & spatiosa via quæ ad perditionem ducit. Grande periculum ! terribilis exitus ! Quid tamen in Clero frequentius ?

Et verò , annon hæc est vera & germana plurium Sacerdotum effigies ? Qui le-

git , intelligat , & se hoc in speculo contemplatus , dicat sibi : *cujus est imago hæc ? Nonne mea ?*

Verùm , charissime Frater , si tibi blandiri nolis , dic , amabimus : nonne in hoc periculoso statu versatus es , & adhuc versaris ? An illud negare audeas ? Audi , audi quàm veridicum de te & adversus te testimonium perhibeat , & quidem fortiter , conscientia tua , si nondùm effrenata te excæcet malitia. Vide ergò undè excideris , & age pœnitentiam. Devita levia delicta , quæ in te maxima essent , ut affirmat Trid. & ab omni specie malâ te abstinere contende ; cupiditati dominanti insta ; sis in modico fidelis ; tui statûs munia , prompto & alacri animo exequere ; nescit molimina amor ; facta carnis , spiritu mortifica , & vives ; eme tibi aurum ignitum , ut concaleat cor tuum intra te ; sequere viam arctam quæ ducit ad vitam ; & quàmvis tepidi Sacerdotes detrahant tibi , quoniam sequeris bonitatem , constanter persevera , & dabitur tibi corona vitæ ; scito quia omnes qui piè volunt vivere in hoc sæculo , persecutionem patientur ; tuum animi fervorem nunquàm intermori & sopiri permittas ; quapropter accede frequenter ad cor Jesu , ad hanc fornacem amoris igne exæstuantem ; hoc sacro igne accendetur cor tuum , flammescet igne charitas , accendet ardor proximos. *O ignis sancte ! vae illis qui ex te non ardent , qui per te non lucent ! S. Aug.*

A R T I C U L U S X.

Pravum exemplum.

A Udite hoc, Sacerdotes. Quoniam vos recessistis de viâ, scandalizastis plurimos in lege, laqueus facti estis speculationi, & retē spansum super Thabor, & victimas declinastis. Undè fit verum istud Jer. 23. *A Prophetis Jerusalem egressa est pollutio super omnem terram.* Proh scelus! ipsemet Propheta, qui alios ædificare debet, demonis officium gerit, factus est laqueus ruinae in domo Domini! O profundum & malitiæ & poenæ barathrum! Quis hoc credat? Heu tamen! quod omnes vident, hoc gemebundi testantur. Hinc acerbè queritur Deus: *Ruinae populi mei, Sacerdotes mali.* Ezech. 44. Hinc sic rectè concludit D. Greg. *Nullum puto majus præjudicium tolerat Deus, quàm quandò eos quos ad aliorum correctionem posuit, dare exempla pravitatis cernit; quandò ipsi peccamus, quì compefcere peccata debuimus.* Reverà, Sacerdos qui unctus est, si peccaverit, delinquere faciet populum Dei. Lev. 4. Quinimò ad quamdam peccandi necessitatem eundem populum impellet: nam tunc populus liberè dicet: ecquid? Ipse Sacerdos qui Angelus Domini est, sciens bonum & malum, eadem quæ corripit, perpetrat? Certè, quamtùmvis increpet, eadem & nos perpetrare possumus, cùm ipse æquè strictè ac nos Dei mandata servare tenea-

tur. Hinc, pravo Clericorum exemplo corroboratus ipse populus, se ad fœda peccata frontosè injiciet, eaque velut aquam bibet. Nonne id ipsum experientiâ constat?

Væ homini illi per quem scandalum venit! Heu! Si ei qui scandalizaverit unum de pusillis, expedit ut suspendatur mola asinaria in collo ejus & demergatur in profundum maris, quid erit de Sacerdote, qui positus super candelabrum ut luceat, factus est lapis offensionis & petra scandali? Ipse est sal terræ; sed, si sal evanuerit, ad quid valet? Ad nihilum, nisi ut conculcetur ab hominibus.

Quid plura? Ipse impius quem tu, ô Sacerdos, scandalizaveris, ille quidem in iniquitate suâ morietur; sanguinem autem ejus de manu tuâ requiret Deus: anima tua erit pro animâ illius. Quid hoc est mirum? Venit Filius hominis quærere & salvum facere quod perierat; tu verò, scandalum præbens, homicida es; Antichristus es factus; & sic, tuâ culpâ perit infirmus propter quem Christus mortuus est, & pro quo tu ipse, ut bonus pastor, animam tuam ponere debueras. Stupendum crimen! Si vox sanguinis Abel clamârit vindictam de terrâ; quantò magis clamat anima fratris tui qui, malitiâ tuâ, in æternum periit, & cujus animam salvam facere debueras?

Angeli colligent de regno Dei omnia scandala; quantò magis scandala tua? Quid superest, nisi ut ex hoc regno ejectus detraheris in infernum sicut Lucifer, propter hæc scandala? O quàm verè dictum

est esse quorundam peccata præcedentia ad iudicium ! Nonne hæc sunt peccata tua ? Revela , quoties habitu , incessu , sermone , consilio , negligentia , ignorantia , & mille aliis indecoris modis , causa fuisti cur multi , sub peccato venundati , descenderunt in infernum viventes ? O flagitium flagitiosissimum ! Parumne est quod ipse pecces , & te in tartarum detrudas ? Quid est cur fideles in eadem peccata , & in eadem damnationem involvas ? Nonne bonum esset si natus non fuisses ?

Quoties tamen contigit ut ea scandala nec confessus es , imò nec advertisti ? Nonne ergò in falsam conscientiam & in sacrilegiorum abyssum descendisti ? O peccata aliena ! ô periculosa peccata ! ô proditoria scelera ! ô abyssus multa ! Nonne Deus strictissimè requiret ista ! Quid tamen in Clero frequentius ? Quis non paveat ? quis non fleat ? quis in cinere & cilicio poenitentiam non agat ?

Hoc tamen non sufficit , charissime Frater ; nam sicut tua prava exempla serpserunt sicut cancer , da nunc operam ut fluant sicut ros eloquia divina ex ore tuo , & odorifera exempla ex operibus tuis. Noli ergò erubescere Evangelium , quidquid dixerint tepidi Sacerdotes. Euge , serve bone , sequere coram populo viam arctam , ut impii , vias Domini tuo exemplo edocti , ad Deum convertantur , & ut tu conversus , confirmes fratres tuos quos scandalizasti. Macte animo , abjice opera tenebrarum , induere arma lucis ; sic in die honestè am-

bula, & non nocte, sicut Nicodemus, ut illi quos delinquere fecisti, jam ex operibus tuis te considerantes, glorificent Deum. Væ tibi, si id alacriter non fiat!

ARTICULUS XI.

Falsa conscientia.

Quid falsâ conscientiâ periculosius? Quid tamen illâ inter Clericos frequentius? Reverà, quot sunt qui transeuntes in affectum cordis, & omnia appendentes in staterâ dolosâ, dicunt malum, bonum; & bonum, malum; ponentes tenebras, lucem; & lucem, tenebras; ponentes amarum in dulce, & dulce in amarum? *Quodcumque volunt, bonum est; & quodcumque eis placet, sanctum est.* S. Aug.

Quot sunt qui suâ scientiâ tumidi & in-nisi, quemquam consulere & intelligere nolunt, ut benè agant; qui è contrà, præsumptione & malitiâ excoëcati, ac in propriâ causâ judices, non solum respuunt, ut meros scrupulos, quædam peccata, quæ juxta pondus Sanctuarii, maxima sunt, sive propter scandalum, sive propter contemptum, & alia adjuncta; sed etiam arbitrantur interdum se obsequium præstare Deo? O quantæ tenebræ!

Quot sunt qui quidem proprio non inniuntur judicio, qui tamen, ut remordentes conscientias Apostolicâ delinire licentiâ possint, & ut suis cupiditatibus, effrenati & tutò servire valeant, coacervant sibi &

sequuntur magistros auribus prurientes , pulvillos ponentes sub omni capite , errantes ab utero , loquentes falsa , à veritate avergentes , in deceptione illusores , aut ad summum , minimæ probabilitatis scintillæ , relictâ semper probabiliori sententiâ , adhærentes ?

Quot sunt qui peccatum alienum , non ut opprobrium , sed ut exemplum sumentes , & huic sæculo se in omnibus conformantes , irrita faciunt mandata Dei propter nefariam traditionem ? Nos autem talem consuetudinem non habemus , nec Ecclesia Dei. *1. Cor. 11.* Quare ? Quia consuetudo sine veritate , vetustas erroris est. *S. Cypr.* Numquid Evangelio prævalere debet , vel privilegium Nationum , vel patrocinium personarum ? Minimè. *Ter.* Numquid ergo hi sectatores consuetudinum ad vitia lenocinantium , cum multitudine salvabuntur ? Nequaquam ; sed potius , cum testes & patronos dormientes adhibeant , verè cum illis obdormiunt , & tandem timore horribili turbati , dicent cum multitudine : *ergo erravimus.* *Sap. 5.*

Reverà , quot sunt qui nescientes in hoc misero statu , quòd ab eis recesserit Dominus , iniquitatem & sacrilegia quasi aquam bibunt inscii , & viam salutis æternæ sibi securè nimis præcludunt inconsiderati ? Nefanda securitas ! Quomodò ergo resipiscant ? Heu ! sibi infaustè dicunt : *pax , pax ;* attamen eis terribiliter dicitur : *non est pax ;* nomen quidem habent quòd vivant ; sed mortui sunt. Periculosa vita ! proditoria mors ! Quare ? Quia videntur thesaurizare

blandè sibi iram Dei per vitam , & tandem mori certâ & pessimâ peccatorum morte. Deploranda fors ! O conscientia falsa ! abyssus multa ! *S. Ber.*

Nonne & tu , charissime Frater , ex illis es , vel non obediendo veritati & definitionibus Ecclesiæ Romanæ , vel non loquendo quæ decent sanam doctrinam , vel disseminando libros suspectos & pestiferos , vel citò imponendo manus , & nondum probatos ad regale sacerdotium exaltando , vel absolvendo indignos , nec non compartem & complicem in materiâ luxuriæ ; & sic , fovendo impudicitiarum & abominationum monstra , vel reputando in eâdem materiâ tanquam parùm quod non est parùm , vel habendo te circa venerea merè negativè , vel versando in proximâ ejusdem peccati occasione , & pusillos sic multifariam scandalizando ?

Nonne ex illis es , non instruendo populum , nec eum de peccato arguendo ; vel confessionis sigillum , saltem indirectè , violando ; vel non recitando Officium , & non cantando Missas , Anniversaria , attentè & devotè , &c. vel possidendo plura beneficia , vel ea indignis conferendo , rejectis dignis , aut ea nequiter & simoniacè resignando ; vel fundationes & legata pia adimplere negligendo ; vel non celebrando pro populo juxta mensuram reddituum tuorum ; vel differendo ad longius tempus Missarum celebrationem ; vel accipiendo pro unâ Missâ plura justo stipendia , & his pluribus acceptis , per unâ Missam satisfaciendo ; vel

accepto pinguiori stipendio, sacra per alios exsolvendo, dans illis consuetum stipendium, & reliquum retinendo; vel non incumbendo reparationibus faciendis domui presbyterali, aut agris tuo beneficio annexis? Quid hîc tua tibi objicit conscientia?

Nonne ex illis es, Missam non nisi rarissimè, præ falsâ humilitate, celebrando; vel non residendo, per fraudem, in choro, in Parochiâ, & in Ecclesiâ tuâ; aut residendo perfunctoriè & velut phantasma; vel non notando absentes, aut corpore tantum præsentes, eisque distributiones elargiendo; vel dissipando luxu, ludo, comestationibus, & nimio erga parentes affectu, res ecclesiasticas, quæ Dei & pauperum sunt; vel faciendo domum Dei domum negotiationis?

Nonne ex illis es, non faciendo fructus dignos pœnitentiæ; vivendo è contrâ tepidè, molliter, & secundum carnem; quinimò jejunium, levi de causâ, frangendo, aut non jejunando juxta regulas ab Ecclesiâ statutas? Nonne, modica spernendo, paulatim decidisti, & in profundum peccatorum tandem venisti? Quoties, propter invidiam, odia, discordias, schismata, rixas, detractiones, contumelias, calumnias & lites, factus es Deo odibilis & hominum abominatio? Nonne propter otiositatem, ignorantiam, socordiam, omissiones, & inconsiderationes voluntarias, communicasti imprudens peccatis alienis? Nonne propter negligentiam reparandi hono-

rem proximi, vel restituendi fructus, quos quibusdam in casibus non debuisses facere tuos, lethaliter lapsus es? Nonne propter avaritiam Dominum prodidisti, sicut perfidus Judas, & pauperum necator fuisti, sicut dives.

Quoties peccati mortalis, quàmvis occulti, conscius, nec illud confessus es, nec illud tantillum, tuâ culpâ, percepisti; & tamen, absque præviâ confessione, ad sacrum altare introisti, & sic iudicium tibi manducaisti & bibisti? Nonne ergò cæcus à nativitate, & usque ad mortem cæcus, sacrilegia super sacrilegia ad mortem usque appones? Quoties, operando cum conscientia practicè dubiâ, mortaliter peccasti? Quarè? *Quia omne quod non est ex fide, peccatum est: Rom. 14.* Quid enim per *fidem* ibi intelligitur, nisi certa de bonitate actûs persuasio? Quoties, defectu sufficientis examinis, veri doloris, sinceri ac firmi propositi, fœdam egisti pœnitentiam?

Quid ad hæc respondes? Nihil times, ubi omnia sunt formidinis plena? Ecquid? Nemo scit an amore, an odio sit dignus; omnes, vel ipsi sancti, de propitiato peccato timere debent. Apostolus Paulus, vas electionis, nihil sibi conscius erat; attamen non se credebat omninò justificatum; tu verò, charissime Frater, qui tibi ipsi imponens, sæculi viam spatiosam sequeris; tu qui habes conscientiam adeò fauciatam, & reptilibus quorum non est numerus corrosam; tu qui inter mille labyrinthos intricatus, non cogitas corde, quin potius,

timoratorum conscientiam scrupuli accusas ; tu , inquam , non times ? Quinimò , securè vivis ? Illusoria tranquillitas ! Credis - ne quòd ex hâc vitâ securè exiturus sis , & quòd pòst mortem visurus sis Deum salvatorem tuum , illo in æternum fruiturus ? Erras. Quarè ? Quia illi soli videbunt Deum qui mundo corde , conscientia bonâ , & fide non fictâ serviunt illi.

Verum , hæc quia locuti sumus tibi , tristitia forsan implevit cor tuum. Attamen , etsi hæc omnia contristaverint te , non nos poenitet ; imò verò gaudemus , non quia contristatus es , sed quia ad poenitentiam jamjam contristandus es. Ad hanc poenitentiam excitare te volumus , non verò ad scrupulos , anxietates ; multò minùs ad insaniam aut desperationem te adigere.

Quapropter , redi ad cor , charissime Frater ; hæc omnia sigillatim & seriò expende coram Christo iudice ; quippè hæc & alia ducunt Clericos in falsam conscientiam. Nonne & te in laqueum diaboli inopinantem detruferunt ? Statue te contra faciem tuam ; conscientia sinus & latebras districtius explora ; hæc tua conscientia te in conspectu iudicis accusabit simul & condemnabit , si tibi blanditus fueris.

Quàmvis autem in his omnibus non offenderis , quid prodest tibi ? Nonne qui offendit in uno , factus est omnium reus ? Cave ergò , ne lumen quod in te est , tenebræ sint ; scito quia Dominus intuetur cor , & quòd in eo tenebræ non sint ullæ. Fode parietem hujus cordis tui ; ibi vide-

his forsan abominationes pessimas : accipe lucernam in manibus tuis. Surge ergò qui dormis , & illuminabit te Christus ; surge velociter , & te ipse scrutatus , age pœnitentiam super tot peccatis nec recogitatis , imò nec notatis , in thesauris tamen Dei signatis & conditis. Roga enixè ipsum Deum ut te ab occultis mundet ; sed & tu gratiâ ejus adjutus , rectas facito vias tuas , & sequere deinceps viam arctâ quæ ducit ad illam pacem quæ exsuperat omnẽ sensum , & indè ad vitam æternam. Cave & iterum cave ne tibi nimium blandiaris ; nec innitaris prudentiæ tuæ , sed habe pastorem & ducem juxta cor Dei , cui docibilis sis corde ; dà & tu operam ut *ante omnia opera tua , verbum verax præcedat te ; & ante omnem actum , consilium stabile* ; Eccl. 37. Quapropter , nihil agas quod conscientiæ rectoque Dei judicio non sit consentaneum , quodque jamjam moriturus fecisse nolles. Hæc erit gloria tua : testimonium bonæ conscientiæ. Quid optabilius ?

ARTICULUS XII.

Difficultas conversionis Sacerdotum , & summum eorum damnationis periculum.

Grandis dignitas Sacerdotum ! sed grandis ruina eorum si peccent ! S. Hier. Cùm sint Angeli Domini , amici Dei , scientes bonum & malum , quodammodò Dii & verè filii Excelsi omnes , ac gratiarum ubertate inebriati ; quandò ipsi peccant , inex-

cusabiles sunt. Hinc fit ut eorum conversio sit admodum difficilis, sive quia tenet eos superbia, adeò ut omne consilium respuant; sive quia deliciis affluentes, vitæ asperioris labores perhorrescunt; sed, sicut scriptum est, incrassati & dilatati, recalcitrant; sive quia in Scripturis exercitati, ad nullum Dominicæ comminationis tonitru expergiscuntur. *Nihil ergò impossibilius, inquit D. Chrysostomus, quàm corrigere eum qui omnia scit; nam, quidquid terribile est in Scripturis, usu vilescit; propterea Clericus, si cœperit eas contemnere, numquàm excitatur ut illas timeat. Quis umquàm vidit Clericum citò pœnitentem? Laïci delinquentes, facile emendantur; Clerici autem, si mali fuerint, incorrigibiles sunt.*

Heu, charissime Frater! nonne & tu id ipsum experiris? Et verò, frangit-ne cor tuum illa vox Domini confringentis cedros libani? Emollit-ne duritiam tuam mors peccatorum pessima? Numquid te movent alia tremenda nimis Dei oracula, quæ ipse legis ac prædicas; & quæ Laïcos ac rudes ad pœnitentiam excitant? Quomodò ergò ad Deum converteris? Quomodò effugies à iudicio gehennæ! Audi, audi D. Chrys. sic rectè concludentem: *Non temerè dico, ut affectus sum ac sentio: non arbitror inter Sacerdotes multos esse qui salvi fiant, sed multos esse qui pereant. Sic sentit de cunctis Sacerdotibus: ecce nunc quid de Parochis sentiat idem Doctor. Miror an fieri possit ut aliquis ex Rectoribus sit salvus. A talibus verbis non formidat cor tuum? Hoc*

barathrum tibi imminens non effugies? Non contendes magnis tuis fletibus & laboribus ad vitæ novitatem & integritatem renovari? Non curabis, post acceptam justitiam, dignis & assiduis pœnitentiæ fructibus in eâ perseverare, ut nulla tibi deinceps dominetur iniquitas, & ne quid deterius contingat tibi? O stupiditatem tuam, damnationis æternæ prænuntiam!



CAPUT QUARTUM.

*Obligationes seu munia & exercitia
Clericis omnibus communia.*

A R T I C U L U S I.

Zelus propriæ salutis & perfectionis.

HÆC meditare, in his esto; hæc meditare die ac nocte: *Unum est necessarium; hoc est omnis homo.* Quapropter à te incipiat consideratio tua, & in te finiat; quòcumque evagetur, ad te revocaveris eam cum salutis fructu: tu tibi sis primus, tu tibi ultimus; nemo tibi germanior unico matris tuæ. S. Ber.

Eia ergò, charissime Frater; si multùm das actioni, laudo te; si considerationi nihil, in hoc non laudo. *Idem.* Nam, quàmvis prædicaveris Evangelium omni creatu-

ræ, quàmvis ïeris & fructum attuleris, quid prodest tibi, si ipse reprobus efficiaris? Quid prodest tibi, si universum mundum lucreris, animæ verò tuæ detrimentum patiaris? Quam pro animâ tuâ commutationem dabis?

Attamen, heu! licet in vineis te posuerint custodem, vineam tuam non custodis, tu te ipse negas. *Idem.* Nonne animam tuam in vanum accepisse videris? Semper quidem dicis, sed ad scientiam veritatis numquàm pervenis. O stulte!

Verùm, si linguis hominum loquaris & Angelorum, charitatem autem non habeas, quid es? Nihil. Quid tandem audies, ô serve tibi inutilis & nequam? Quid audies? Audies & senties istorum tonitru verborum, nimirum: *discede à me, operarie iniquitatis; dixisti & non fecisti; discede, ex ore tuo te judico.* Quid post tam formidabilem sententiam supererit tibi? Quid? Fleus, & stridor dentium, timor horribilis, vermis non moriturus, ignis inextinguibilis, ignis æternus, sempiterna desperatio. O cæcitas lacrymis sanguineis deploranda! O inconsideratio desolatione desolans ipsam Sanctorum terram!

Dic, amabimus, charissime Frater, intellexisti hæc omnia? Verùm, si hæc intelligas, cur non primùm misereris animæ tuæ, placens Deo? Cur animam tuam salvare non contendis? Usquequò claudicabis in duas partes? Ecquando tandem dices: *dixi, nunc cæpi?* Ex nunc ergò ad pietatem te ipsum exerce; pietas enim ad om-

nia utilis est , promissionem habens vitæ quæ nunc est , & futuræ.

Scias idcirco quid tibi desit ; & dùm tempus habes , operare bonum ; noli negligere gratiam quæ data est tibi cum impositione manuum ; ne conformeris huic sæculo ; cum timore & tremore salutem tuam operare ; sequere arctam viam ; cor tuum omni curâ custodi ; castiga etiam corpus tuum , ne fortè , cùm aliis prædicaveris , ipse reprobus efficiaris ; quænam satis magna securitas ubi periclitatur æternitas ?

Memento proinde reddere teipsum tibi ; nec semper dare actioni ; sed considerationi , aliquid tibi & cordis & temporis sequestrare. S. Bern. Undè , ad meditationem & lectionem , ad conscientiæ examen , ad animi recollectionem , ad cetera pietatis officia , & ad jugem in virtute progressum viriliter incumbe.

Tandem , vide ministerium quod accepisti à Domino , ut illud impleas ; sed prius adipiscaris scientiam Sanctorum iterum monemus ; vim in illud facias , quia vim patitur regnum cœlorum , & violenti rapiunt illud. Ad mortem esto semper paratus ; nam si Domino servias in sanctitate & iustitiâ coram ipso omnibus diebus tuis , tunc aliis efficacius proderis , & sic teipsum salvum securius facies , & eos qui te audierint. Utinam hæc omnia intelligere vellent Clerici ! Sed heu ! Hæc omnia usu vilescunt.



ARTICULUS II.

Perfectio proprii statûs.

Quid à te , charissime Frater : exigit Deus ut illum verè diligere agnoscaris , ut ille in te sibi benè complaceat , & det tibi immarcessibilem gloriæ coronam ? Quid ? Ut serves ejus mandata. Quid insuper à te postulat , ut sis perfectus sicut ille perfectus est ? quid ? Ut facias voluntatem ejus , sicut ille descendit de cœlo , Patris sui voluntatem facturus , & illam fecit : ideò missus est. Vis ergò voluntatem ejus semper & securè facere ; ac summum perfectionis apicem adipisci ? Ministerium tuum imple perfectiori quo poteris modo ; in hoc consistit sanctificatio tua. Hæc meditare ; in his esto , ut perfectus tuus sit omnibus securè manifestus , & securiùs coram Deo. Quid ampliùs exoptes ?

Iterùm monemus , & idem monitum usque ad mortem , si necesse sit , insinuabimus tibi : incumbe in minutissima tui statûs munia ; ne turberis erga plurima , charissime Frater ; anhelent alii ad splendida ministeria ; tu verò intra limites tui statûs , licèt obscuri , libenter quiesce ; intra te erit regnum Dei.

Cave & iterùm cave ne Angelus Sathænæ transfiguret se in Angelum lucis , ut te seducat ; dignè ambula vocatione , quâ vocatus es ; euge , serve bone , sis in hæc pauca fidelis ; hæc enim agens , in his fidelis usque

usque ad mortem, quæ placita sunt Deo facies semper; morieris plenus dierum & divitiarum; ac à vanitate tutus. O quàm lætè morieris! Suprà multa te constituet miserator & misericors Dominus. Quàm bonus Israël Deus his qui illum quærunt in simplicitate cordis sui!

ARTICULUS III.

Horæ canonicæ.

J Am scis, charissime Frater, sacris initiate, te ad horas canonicas quotidie recitandas, sub peccato mortali teneri; insuper ad illas recitandas dignè, attentè, & devotè. Cave ergò ne opus tanti momenti omittas, aut perfunctoriè peragas. Memineris multos Sacerdotes revelari damnatos, non quidem duntaxat propter omissum Officium, sed propter malè recitatum. Time ne, sicut Patres tui, ita & tu.

Quapropter, ante hanc divinam orationem, præpara animam tuam, scope spiritum tuum, ac stude recollectione animi internâ, divinum prævenire Officium, ne sis quasi homo qui tentat Deum.

Psalle Deo tuo; & ut jucundum sit ei eloquium tuum, psalle in conspectu Angelorum, psalle sapienter, psalle spiritu & mente: si ores linguâ, mens tua sine fructu est, & de te benè prophetatur: *Populus hic labiis me honorat, cor autem ejus longè est à me.* Cave ne oratio tua fiat in peccatum. Recollige interdum mentem, & renova

D

sæpè attentionem ; vim in illud facias ut sis attentus : recitare enim Officium cum distractionibus directè vel indirectè voluntariis , est admodum periculosum ; quid loquimur ? Est peccatum mortale. Quare ? Quia oratio sine attentione , non est oratio , sed orationis simulatio.

Quoties tamen hoc adiisti periculum , recitando horas post serias sæculi sollicitudines non depositas , & hinc continuò reviviscentes ; vel inter confortia vana & risus facetos ; vel inter externas occupationes animo semper & cordi defixas ; vel inter alternas confabulationes ; vel propter nimiam præcipationem & nauseam ; vel propter tædium & oscitationem ; vel ob negligentiam propulsandi animi divagationes ? Nonne hæc omnia impediunt interdum attentionem ? Ecquid ? Ipsi sanctissimi viri orantes soli cum Deo solo , vix à distractionibus liberi sunt ; tu verò homuncio , tu qui vel ipsum vitæ interioris nomen ignoras , superbe præsumis te posse dignè horas persolvere inter tumultuaria colloquia , confortia , negotia , & somnia ? Verè à fatanâ te tentari finis ; verè ipsum Deum tentas ; verè peccati mortalis & æternæ damnationis periculum incurris. Et deinceps non caveas tibi ? O excors !

Insuper , recita officium distinctè , continuè , integrè , & ordinatè. Distinctè , ne verbum mastigando , vel exiliter proferendo , vel nimium festinando , dicenda confundas. Continuè , ut interruptiones in eo non facias interloquendo , nisi urgente ne-

cessitate. Integrè, ut de dicendis nihil omittas. Ordinatè deniquè, in substantiâ, tempore, & modo exsequi studeas; postpositiones, implicationes, variationes facile non admittas. *S. Bonav.*

Modestam quoque totius corporis compositionem, quam rubricæ, & Dei tremenda quam alloqueris majestas exigit, præ te ferre satage. Hæc omnia sunt imagines fidei ac pietatis, & signacula religionis. *Trid.* Hinc *S. Carolus* totum officium flexis genibus recitabat.

Tandem, tempus congruum serva, nec facile, præter necessitatem, horas converteris. *S. Bonav.* Memento *S. Zepherinum* referri in Purgatorio punitum propter anticipatum ob negotia Aulæ horarum tempus. Heu! quanta tibi imminet poena propter hanc & alias fœdas inordinationes! Væ tibi, si præterita non lugeas, & futura non præcaveas!

Sacra Rituum Congregatio facultatem concedit Matutinum recitandi post meridiem, horis infra notatis.

MENSES.		HORA.	
1.	Januarii	2	cum quadrante.
1.	Februarii	2	cum mediâ.
1.	Martii	2	cum trib. quadran.
15.	Martii	3	
1.	Aprilis	3	
15.	Aprilis	3	cum quadrante.
1.	Maii	3	cum mediâ.
1.	Junii	3	cum trib. quadran.
1.	Julii	3	cum trib. quadran.

D ij

M E N S E S.	H O R A.
1. Augusti	3 cum mediâ.
1. Septembris	3 cum quadrante.
15. Septembris	3
1. Octobris	3
15. Octobris	2 cum trib. quadran.
1. Novembris	2 cum mediâ.
15. Novembris	2 cum quadrante.
1. Decembris	2

ARTICULUS IV.

Frequens Missæ celebratio.

QUare nos sumus Sacerdotes in æternum, secundum ordinem Melchisedech? Nonne ut offeramus panem & vinum, & ut, fungentes Sacerdotio, habeamus laudem in nomine ipsius? Hæc est mens Concilii Tridentini Sess. 23. c. 14. ubi dicit: *curet Episcopus ut ii, Sacerdotes, saltem diebus Dominicis, ac Festis solemnibus, Missas celebrent.* Huc spectant ista Conc. Mediol. verba: *qui Sacerdotes estis, Missæ sacrificium facite sanctè ac religiosè.* Quare, quia Sacerdos, non legitimè impeditus, celebrare omittens, quantum in se est, privat sanctam Trinitatem laude & gloriâ, Angelos lætitiâ, peccatores veniâ, justos subsidio & gratiâ, in purgatorio existentes refrigerio, Ecclesiam spirituali Christi beneficio, & seipsum medicinâ & remedio contra quotidiana peccata & infirmitates. *Beda.*

Quot tamen sunt Sacerdotes qui pingue

beneficium possidentes , rarò celebrant Missam ; non quidem præ humilitate , at potius præ nausæâ , & quò liberius conformentur huic sæculo ? Sed heu ! nonne illa diù protracta Missæ celebratio , aliquem illius contemptum denotat ? Nonne grave detrimentum infert animæ ipsius Sacerdotis ? Nonne majorem inducit peccandi licentiam ? Nonne interdum pusillos scandalizat ? Indè tandem accidit , ut diù elongantes se ab altari , non habeant vitam in se , & tandem pereant.

Quot sunt etiam Clerici , qui solius indigentes tonsuræ , vel Ordinis Subdiacонатûs aut Diaconatûs , ut augeantur beneficiis , non curant ; imò respuunt ascendere ad Sacerdotium , quò effrænatiùs secundum carnem vivant ; & qui tamen , præ ignaviâ , præ fastidio , & præ falsâ humilitate , rarissimè accedunt ad sacram communionem , ut non arceantur à pravâ vivendi consuetudine ? Ecquandò aberit à loco sancto illa abominatio desolationis ? aberit & illud seminarium malorum ?

Si optaret sacro-sancta Tridentina Synodus ut in singulis Missis fideles adstantes , non solum spirituali affectione , sed Sacramentali Eucharistiæ perceptione communicarent , quoad eos sanctissimi hujus sacrificii fructus uberius proveniret. Sess. 22. cap. 6. quantò magis optare videtur ut hi qui stant assiduè in atriis domûs Dei sui , & qui se ejus obsequio manciparunt , sæpè communificent , ut de Deo saginati , sancti in dies sint , quoniam ipse sanctus est ?

Forſan dicet aliquis Sacerdos aut Clericus : hæc omnia vera ſunt , ſed heu ! non ſum dignus ut adeò tremendum tractem myſterium. Non es dignus ? quis dubitet ? ecquis eſt dignus ? *Si haberes Angelicam puritatem , & ſancti Joannis Baptiſtæ , non eſſes dignus hoc Sacramentum ſuſcipere , nec tractare ; non enim hoc debetur meritis hominum quòd homo conſecret & tractet Chriſti Sacramentum , & ſumat in cibum panem Angelorum , à Kempis.* Attamen , vult interim Dominus , qui ſuâ benignitate ſupplet quod ex nobis deeſt , ut ſincero cordis affectu & reverentiâ , non ex aridâ conſuetudine aut neceſſitate , tantæ actioni pietatem præparemus , & ut deindè adeamus cum fiduciâ ad thronum gratiæ ; hoc vult & præcipit Dominus Jeſus.

Tu autem , chariſſime Frater , præ humilitate accedere non vis ? & interim Chriſti præceptum de obſervantiâ hujus Sacramenti contemnis ? Interim has ejus minas parvipendis : *nifi manducaveritis carnem Filii hominis &c. ?* Interim ſic vivere non fatagis ut quotidie merearis accipere ? quinimò , inordinate vivis ? O præclara humilitas ! Imò potiùs , deteſtanda & odibilis coram Deo & hominibus hypocryſis ! O monſtruoſa humilitas !

Accedere quidem indignè , horrendum eſt judicium ; ſed non accedere ex falſâ humilitate , vel notabili negligentia , vel contemptu , damnabilis eſt culpa. *Beda.*

Absit etiam ut approbemus temeritatem periculoſam plurium Sacerdotum , qui in-

terno corporis animique languore voluntariè laborantes, & variarum illecebris voluptatum libenter servi, corpus Christi febriente manu attingunt. *S. Amb.* Profectò dolemus hos Sacerdotes, qui non dijudicantes corpus Domini, ferè quotidie celebrant, non tam propter Christum, quàm propter nummum; turpi potius usu, quàm amore & spiritu divino; & qui adhuc cibos, vel crapulam præcedentis diei ructantes, primo diluculo consurgunt, & altari se sistunt, vix lectis matutinis horis, sine præviâ aliquâ oratione; sicque celeriter, cursim, perfunctoriè omnia peragunt, ne distributione careant. Utinam hi tepidi & mercenarii Sacerdotes hoc Apostoli præceptum diligentius observarent: *probet autem seipsum homo, &c.* ne fiat eis mensa Domini in laqueum, in retributiones, & in scandalum; & ne tandiù imbecilles, iudicium tandem sibi manducent & bibant inscii!

Verùm, charissime Frater, si, Deo propitio, nihil tibi conscius sis; si cupiditates vel minimas tibi dominantes refrænare contendas, quare evacuas divinum cultum & latriam Creatori debitam, ingratus de beneficiis? Quare te privas fructibus ex sacrâ communionem provenientibus, quæ sunt peccatorum remissio, fomitis concupiscentiæ mitigatio, mentis illuminatio, interior refectio, Christi & corporis ejus mystici incorporatio, virtutum roboratio, contra diabolum armatio, fidei servitudo, spei elevatio, charitatis exercitatio, devotio-

Div

nis augmentatio, & Angelorum convitatio? *S. Bonav.* Quare, præ falsâ tuâ humilitate, fideles à sacra communione arces, quos tuo exemplo compellere ad intrandum deberes, ut sæpè & ferventer, celebrantium vel communicantium multitudine, impleatur domus Domini, & sint filii ejus sicut novellæ olivarum in circuitu mensæ cœlestis?

An credis Deum magis tuâ humilitate glorificari, tuamque ac fidelium animam majori pinguedine repleri, quàm hoc divino sacrificio & sacramento? Es-ne humilior quàm D. Apostolus Andreas, qui tamen Agnum immaculatum in altari quotidie immolabat? Es-ne humilior & prudentior quàm S. Ambrosius, quàm S. Thomas Aquinas, quàm B. Laurentius Justinianus, & quàm innumeri alii, qui nullo die sacrificium Deo offerre neglexerunt; non quidem arido usu, torpidâ intentione, & perfunctorio modo, sed ex impulsu Divini amoris & diligenti præparatione? Nonne his exemplis & aliis rationibus allatis devoratur sapientia tua? veriùs dicamus: nonne propter transgressionem Dominici præcepti, propter scandalum, & sterilitatem animæ tuæ, in peccati & mortis barathrum falsâ humilitate excæcatus, te præceptis detrudis?

Væ illi qui suo sensu, hac in re, pertinaciter abundat, & qui non manducans, manducantem judicat & spernit! nonne audiet & sentiet pondus istorum verborum? *Si quis mundus est, & tamen non fecit phase, exterminabitur anima illa de populis suis.*

quia sacrificium non obtulit Domino tempore suo. Num. 13. Et istorum? dico vobis quod nemo virorum illorum, qui vocati sunt, & qui cœperunt simul omnes excusare, gustabit cœnam meam. Luc. 14. Qui legit intelligat & timeat.

ARTICULUS V.

Exercitia ante Missæ celebrationem.

Monita salutis.

P*Aratur nobis mensa Domini, in quâ fecit memoriam suorum mirabilium, ubi divitias divini sui erga homines amoris velut effudit, & in quâ ipse sanctitatis auctor sumitur tanquàm antidotum quo liberamur à culpis quotidianis, & à peccatis mortalibus præservamur. Trid. Verùm, undè fit ut nos qui divina mysteria toties frequentamus, simus infirmi, imbecilles, & dormientes multi? undè fit, ut nos, qui panem Angelorum toties manducamus, delectemur siliquis porcorum, fiamus forsàn, propter peccata occulta & aliena, rei Corporis & Sanguinis Christi, & ut habentes quidem speciem pietatis, veritatem autem ejus abnegantes, judicium tandem nobis manducemus & bibamus? Heu! nimirùm quia obiter & persunctoriè opus grande gerimus, usu potius & turpis lucrû gratiâ, quàm effectu ducimur, non dijudicantes corpus Domini. Caveamus, charissimi Fratres, ne lumen quod in nobis est, tenebræ sint; quapropter cogitemus hæc gravissima verba.*

D

Grande opus ! neque homini preparatur habitatio , sed Deo. Pavete ad sanctuarium meum. Maledictus qui facit opus Dei negligenter. Sacerdotes sancti erunt Deo suo , & non polluent nomen ejus ; incensum enim & panes Dei sui offerunt , & ideò sancti erunt. Probet autem seipsum homo , & sic de pane illo edat & de calice bibat ; qui enim manducat & bibit indignè , judicium sibi manducat & bibit.

Memores etiam istius , quod ad nos spectat : Mundamini qui fertis vasa Domini ; ità ut nullus sibi conscius peccati mortalis , quàmvis sibi contritus videatur , absque præmissâ sacramentali confessione , ad sacram Eucharistiam accedere debeat. Trid. Quinimò , peccata venialia , quæ contristant Spiritum sanctum , & quæ uberiores hujus Sacramenti fructum præpediunt , lugeamus ; & ea , tamquàm à facie colubri , fugere conemur. Hoc Christus Dominus docuit , cùm discipulorum pedes lavit , antequàm reciperent & manducarent corpus ejus. Deniquè , quàmvis adeuntes cum fiduciâ ad thronum gratiæ , habeamus vestem nuptialem ; attamen , operæ pretium ut actualem animi devotionem omni curâ excitemus , ut gustare & videre possimus quàm suavis sit Dominus.

Proderit etiam meditari sapienter : quis sit qui in Sacramento venit ; ad quos venit ; quare ; quomodò ; quoties veniat ? Effundamus coram illo corda nostra : cum simplicibus sermocinatio ejus. Eum ergò quæramus in simplicitate cordis nostri ; & cùm varietas arceat fastidium ex crebrâ unius & ejusdem

præparationis repetitione oriri solitum, adhibeamus, si spiritus spiret, breves sed ignitas aspirationes, velut diversa fercula in eâdem mensâ; sed corde potius quàm ore proferendas. His ignitis aspirationibus idemtidem per diem & medias inter occupationes elicitis, sæpè magis conditur pietatis opus, & ardentius inardescit animus, quàm prolixis orationibus & exercitiis. Da amantem, & sentit quod dico; da desiderantem; da esurientem; da in hâc solitudine peregrinantem atq; sitientem, & fontem æternæ vitæ suspirantem; da talem, & scit quid dicam; si autem frigidus loquor, nescit quid loquor. S. Aug. Excutiamus, Fratres charissimi, pulverem terrenum, & spiritu ferventes, corde & animo parvuli, istam sequamur methodum & praxim.

I. Intentio rectificanda.

II. Christi passio memoranda.

III. Amor excitandus.

IV. Humilitas concipienda.

V. Assistentia sanctorum flagitanda.

Actus jaculatorii & igniti, quos de corde expedit elicere manè ante Missam; inter ipsa negotia; inter confessiones audiendas; & inter cæteras ministerii functiones implendas.

Cogita Angelum custodem te sic alloqui & monere.

Ecce Magister adest & vocat te; festinans descende, quia hodiè in domo tuâ oportet illum manere. Hæc est dies quam fecit tibi, exultes & læteris in eâ. Ecce sponsus venit, exi obviam ei: veni & prospera; mirabitur & dilatabitur cor tuum.

D vj.

Ecce Rex tuus venit tibi mansuetus : holocausta medullata offeras illi , ut domum tuam scopis mundatam inveniens , hanc benedictionibus dulcedinis repleat. O si scires donum Dei , & quis sit ille qui venit ad te ! quantò celerius properares ? quantò ferventius præparares cor tuum in adventu illius ! Verùm , accede , & illuminare.

Excita fidem.

O Jesu ! tu ipsa veritas dixisti : *hoc est corpus meum*. Credo , Domine , verè tu es Deus absconditus ; tu es Christus , filius Dei vivi , qui in hunc mundum venisti , & quem pastores & reges procidentes adoraverunt. Adauge fidem meam , ut te cognoscens Jesum Christum , præparem cor meum , ac eâ quâ potero te recipiam reverentiâ & humilitate : præstet fides supplementum sensuum defectui.

Deum adora.

Rex regum & Dominus dominantium ! Dominus meus & Deus meus ! Rex meus & Deus meus. Tu solus altissimus , & substantia mea tamquàm nihilum ante te. Tibi Regi sæculorum immortalis , soli Deo , honor & gloria. Adoro te ut principium & finem ; omnis terra adoret te & psallat tibi. Adorate eum omnes Angeli ejus , &c.

Admirare.

Magnus Dominus & laudabilis nimis , qui parasti in dulcedine tuâ pauperi ; Deus ! Quàm suavis est spiritus tuus ! Caro tua verè est cibus , & sanguis tuus verè est potus. O res mirabilis ! Reverà , non est alia Natio tam grandis , quæ habeat deos ap-

propinquantes sibi, sicut tu Deus noster ades nobis.

O dulcissime Jesu! undè hoc mihi ut tu Dominus meus venias ad me? Quis ego sum, Domine Deus, & quæ domus mea? Si enim cœlum & cœli cœlorum te capere non possunt, quantò minùs domus hæc? Quid est homo quia magnificas eum, aut filius hominis, quoniam visitas eum? aut quid apponis erga eum cor tuum? Quàm bonus Israël Deus!

In spiritu humilitatis accede ad Deum, qui humilibus dat gratiam.

Tu Rex cœli & terræ, Sanctus, Sanctus, Sanctus, in cuius nomine omne genu flectitur, tu ad me venis qui pulvis sum & cinis? tu me invitas pauperem, servum, & humilem? quis audivit umquàm tale?

Tu candor lucis æternæ, tu ad me venis? ad me, qui apponens iniquitatem super iniquitatem, millies te mihi metipso crucifixi? confusio faciei meæ cooperit me.

Exi à me, Domine, quia peccator sum; verè non sum dignus ut intres sub tectum meum; quinimò, non sum dignus vocari filius tuus, quia peccavi in cœlum & coram te, gratiam tuam, tuumque Sacramentum in vacuum recipiens, & servire te faciens iniquitatibus meis.

Exi ergò à me, Domine. Verùm, si propter nimiam charitatem tuam, desiderio desideres intrare in cor meum; tu Domine, qui ornasti cœlos, fac cor meum immaculatum, ut non confundar; aspice in me, & miserere mei, ô Deus, misericordia mea!

Accede ad Dominum cum tremore.

Hortaris nos , ô Jesu , ut frequenter comedamus panem & bibamus vinum quod miscuisti nobis ; sed vicissim tuæ severitatis exempla me absterrent. Nonne metuere debeo ne cum Ozâ & Bethzemitibus peream ad contactum & conspectum arcæ sanctissimi tui corporis ? Timeo ne non habeam vestem nuptialem , & ne eâ exutus , mittar in tenebras exteriores. Ecquid ergo faciam miser ? si me elongaverim à te , peribo ; si indignè manducaverim & biberim , judicium mihi manducabo & bibam ; quid faciam ? undiquè mihi sunt angustiae , & quid eligam ignoro.

Charissime in Christo Frater , spera in Deo , gaude in Jesu tuo , qui non venit vocare justos sed peccatores ; vocavit ad cœnam magnam pauperes ac debiles , cæcos & claudos , hos compulit intrare ; ille est Jesus. Modicæ fidei , quare dubitas ? nonne bonitas ejus præstabilis est super malitiâ tuâ ? Surge igitur & veni , tu qui laboras & oneratus es , ille reficiet te. Ecce tibi panis cœli adversus omnes qui tribulant te ; verè trepidas timore , ubi non est timor ; accede cum fiduciâ ; culpæ quotidianæ , quas ille permittit ut sis fervens & humilis corde , non debent te abstertere ; præsertim si absit affectus , & adsit vincendi conatus. Surge velociter ; grandis enim tibi restat via ; comede , ut in fortitudine cibi illius ambules usque ad montem Dei ; hoc cibo confortatus , ab inimicis salvus eris , & vives in æternum. O verba bona ! ô verba consolatoria !

Lætatus sum in his quæ dicta sunt mihi :
quarè tristis es anima mea, & quarè conturbas
me ? Nonne audisti vocem dilecti tui pul-
santis ? Annon te ad se suaviter trahit ? Quid
times ? O Jesu ! Quis intelligit misericor-
dias tuas ? Quis similis tibi ?

Nunc scio quia areret cor meum, & præ-
valeret inimicus meus adversus me, si obli-
viscerer comedere panem meum : igitur in-
troibo ad altare tuum, quoties, te propi-
tio, nihil mihi conscius ero.

O Jesu, refugium meum ! ad quem irem ?
Tu solus verba vitæ æternæ habes ; tu solus
consolaris nos in omni tribulatione nostrâ.
Unus ergò sit dolor meus, hâc escâ pri-
vari. *S. Chrysoſt.*

Fiducialiter agam in te, & non timebo,
ô Salvator mi ! tu es spes mea, tu es vita
animæ meæ ; beatus homo qui sperat in te !

Accede ad Dominum in animo contrito.

Infelix ego homo ! tibi soli peccavi. Quid
vilius ? Quinimò, iniquitates meæ multi-
plicatæ sunt super capillos capitis mei. Væ
mihi ! cùm essem notus tuus, dulces te-
cum capiens cibos, magnificavi super te
supplantationem, nec cognovi tempus vi-
sitationis meæ ; ego nequam fui, quia tu
bonus : quid detestabilius ? Quis ergò da-
bit capiti meo aquam, & oculis meis fon-
tem lachrymarum, & plorabo die ac nocte ?

Doleo, Domine, quia peccavi nimis
in vitâ meâ ; doleo de peccatis, quia bo-
nus es tu, & quia non Deus volens ini-
quitatem tu es ; doleo propter te, ô di-
lecte mi ; sed quia parùm doleo maximè

doleo : doleam vehementius. Miserere mei, Deus, quoniam in te confidit anima mea; ab occultis meis munda me, Domine, & ab alienis parce servo tuo; & quàmvis, ut confido, jam mundatus sum, ampliùs lava me ab iniquitate meâ, ut introïre idemtidem possim ad altare tuum, ubi, ut confido, renovabis juventutem meam: ne confundas me ab expectatione meâ.

Nolo ampliùs peccare, etiamsi oportuerit me millies mori. Deducat me ac teneat dextera tua, Domine Jesu; diffidam mihi, & fidam in te qui cognoscens figmentum nostrum, das fortitudinem plebi tuæ.

Dilige Dominum Jesum, qui cùm dilexisset te, in finem dilexit te.

O dulcissime Jesu! deliciæ tuæ sunt esse cum filiis hominum! Sacramentum hoc instituisti ut cum illis esses usque ad consummationem sæculi! O Jesu! tu me amanter invitas ad tuum Sacramentum, ut manducans hunc panem qui confirmat cor hominis, & bibens illud vinum germinans virgines, maneam in te, & tu in me, ac vivam in æternum! Dulcis amor! quis non diligat te, ô totus desiderabilis! Anathema illi qui non amat te, ô totus amor, ô totus amabilis!

O ignis qui semper ardes & numquàm extingueris, accende cor meum! O amor! da ut anima mea liquefiat tui amoris igne! O Jesu, amor mi, pone me ut signaculum super cor tuum, ut signaculum super brachium tuum, quia fortis est ut mors di-

lectio. Diligo te, ô dilecte mi, ex toto corde meo, ex totâ animâ meâ, & ex totis viribus meis; diligo te, ô fortitudo mea, ô Jesu, quia es totus amabilis, & quia prior dilexisti me. Moriatur cor meum, si non vivat amore tui.

Ecce voluntariè sacrifico tibi & præbeo cor meum; omnia mea tua sunt; sis tu dilectus meus mihi, & ego tibi. Quid mihi hâc mutuâ dilectione charius? quid mihi suavius?

O Deus charitas! ô vita animæ meæ! diligam te, non verbo tantum & linguâ, sed opere & veritate. Idcirco paratus sum & non sum turbatus, ut custodiam judicia justitiæ tuæ, & animam meam ponere pro te.

O amantissime Jesu! utinam nec vita, nec mors separent me à charitate tuâ! Diligo etiam proximum meum sicut meipsum; diligo & inimicos meos propter te: ne statuas illis ullum peccatum.

Ardenter desidera quem diligit anima tua.

Quàm dilecta tabernacula tua, Domine virtutum! concupiscit & deficit anima mea in atria tua: in te, Rex meus & Deus meus, in te exultant cor meum & caro mea. O panis Angelorum! quò sæpius edo te, eò ardentius esurio. Quemadmodum desiderat cervus ad fontes aquarum, ita desiderat anima mea ad te, Deus; ita sitit in te anima mea, ô desideratus cunctis gentibus!

Quid mihi est in cœlo, & à te quid volui super terram? O Deus cordis mei, ô centrum animæ meæ? Quàm bonum est

adherere tibi Deo meo ! cætera vanitas & afflictio spiritûs. Veni ergò , & noli tardare , ô requies mea , & dulcis hospes animæ meæ : anima mea sicut terra sine aquâ tibi ; sed apud te est fons vitæ : veni , ô Jesu , ut hauriens ego in gaudio de fontibus tuis aquam salientem in vitam æternam , non sitiam in æternum.

O Jesu , fructus benedictus ventris Virginis Mariæ ! In toto corde meo exquisivi te ; veni , veni , dilecte mi ; veni , & jam me nemo despiciat.

O Jesu , pater orphanorum , iudex viduarum , & defensor vitæ meæ , vide afflictionem meam , quoniam circumdederunt me mala quorum non est numerus. Veni , Domine Jesu , salva de ore leonis & de necessitatibus animam meam ; si tu Deus pro me , quis contra me ?

Ecquandò consolaberis me , ô Deus totius consolationis , & convertes planctum meum in gaudium mihi ? Si moram feceris , expectans expectabo te quidem Dominum meum ; sed tandem urgebo meipsum , ut te inveniam , & teneam quem diligit anima mea ; tunc plenius gaudebo & exultabo in te Jesu meo. Exurge ergò , Christe , adjuva me ; anima mea exultabit in te , & delectabitur super te salutari meo ; plenum erit gaudium meum. Veni , refugium meum , veni ; paratum cor meum , Deus ; aut saltem , ô Jesu , qui sanctificasti tabernaculum tuum , præpara ipse cor meum ; præparatione cordis mei audiet auris tua , & mirificabis misericordias tuas , quæ à sæculo sunt.

CONSIDERATIONES UTILES.

DIE DOMINICA.

Considera Christum ut Regem.

O Rex gentium, & desideratus earum, tu solus es dignus accipere divinitatem & honorem.

O Rex meus & Deus meus! bonorum meorum non indiges, & tamen desiderio desideras ut Pascha novum manducem. Eia ergò, ô Rex pacifice, procede & regna; dominare in medio inimicorum tuorum. Adveniat regnum tuum, ô Princeps pacis!

Nonne tibi subjecta erit anima mea? Imò, ô Rex Regum, obediens ero tibi usque ad mortem; da quod jubes, & jube quod vis,

FERIA II.

Considera Christum ut Patrem.

O Abba Pater! tu vides quomodò misereatur pater filiorum suorum. Nemo tam pater quàm tu; manus tuæ fecerunt & plasmaverunt me; redemisti me in sanguine tuo, & cibus me ex adipe frumenti, nempe corpore & sanguine tuo: grandis misericordia!

O Pater misericordiarum, qui non vis mortem peccatoris, sed ut magis convertatur & vivat: veni; sed veniat tecum super me misericordia tua, ut repletus adipe & pinguedine corporis tui, electorum fru-

menti , te patrem meum honorificare , & tanquàm filius sapiens te lætificare possim. Quid ampliùs à filio pater exoptet ?

F E R I A I I I.

Considera Christum ut Magistrum.

O Jesu , via , veritas , & vita ; ô Jesu , veni in cor meum ; bonitatem , & disciplinam , & scientiam doce me ; loquere ad cor meum cùm intraveris sub tectum meum ; audiam quid loquaris in me Dominus meus ; eloquia tua , eloquia casta ; ignitum eloquium tuum vehementer ; quidni servus tuus diligat illud ? Nonne illud est super mel ori meo ? Interim , ô præceptor , ecce sto secus pedes tuos , audiens verbum tuum ; da servo tuo cor docile , ut custodiam sermones tuos , &c.

F E R I A I V.

Considera Christum ut Medicum.

O Jesu , verè languores nostros tuo livore sanasti ; ego sum infirmus ille ad quem sanandum de cœlo descendisti ; ecce languet tepida anima mea ; ecce jacet in domo meâ paralyticus animus meus ; sana animam meam quia peccavi tibi.

Ecce quem amas infirmatur : descende priusquàm moriar ; non est opus valentibus medicus , sed malè habentibus ; veni ergò , & dic animæ meæ : salus tua ego sum. O pie Samaritane , infunde vulneribus meis vinum contritionis , & oleum misericordiæ.

O lux vera , quæ illuminas omnem hominem , miserere mei ; fac , Domine , ut videam.

O Jesu , salus mea ! ecce me leprosum ; sed si vis , potes me mundare : dic ergò : *mundare* ; vivet anima mea , & laudabit te.

O Jesu ! si solummodò pertransiens curabas omnes ; si umbra Petri curabat infirmos ; nonne ego confidere debeo , quia intrante te sub tectum meum , & in me inhabitante cum plenitudine divinitatis , sanabor ab infirmitate meâ , quàmvis sit ad mortem. Adauge fidem meam , ut fides mea me salvum faciat.

Veni ergò , Deus salutis meæ ; jam imperante te morbis meis , derelinquet me febris superbiæ , iracundiæ , teporis ; exultabit cor meum in te salutari meo.

Verùm , ne quid deterius contingat mihi ; da , ut postquam sanus factus fuero , non amplius peccem. Væ mihi ! quàm vilis fierem iterans vias meas ? Heu , heu ! hoc periclitor ; operi manuum tuarum porrigere dexteram.

F E R I A V.

Considera Christum ut Pastorem.

O Jesu , Pastor bone , qui cognoscis oves tuas , & pro illis animam tuam posuisti , easque in gremio cordis tui pinguedine tuâ reple ; quære servum tuum ; erravi sicut ovis quæ periit ; video lupum venientem , & jamjam me rapientem. Eia ergò , veni defensor vitæ meæ , propera ; rege me , &

nihil mihi deerit in loco pascuæ , in circuitu mensæ tuæ ubi me collocasti. Salva à cornibus unicornium humilitatem meam ; custodi me , Domine , ut pupillam oculi ; dulcissime protector mi ! ô Jesu , tu es refugium meum in hac terrâ desertâ , inviâ , & inaquosâ. Jacto super te omnem curam meam ; contendo ego semper sequi viam arctam & bonam per quam ambulem , & tu dux meus , propter nomen tuum deduces me & enutries me ; sub tegmine alarum tuarum sperabo , donec adducas me ad pascua vitæ æternæ.

F E R I A V I.

Considera Christum ut Redemptorem.

O Jesu , Redemptor piissime ! dilexisti me , tradidisti te ipsum pro me , & lavisti me in sanguine tuo , ut me redimeres ab omni iniquitate : mirabilis misericordia !

O Agne immaculate ! non solum redemisti me pretioso sanguine tuo ; sed etiam hunc sanguinem tradidisti mihi bibendum , ut amplius lavarer ab iniquitatibus meis , & ut super nivem dealbatus , jam in hoc deserto , torrente voluptatis potarer , & mundus corde te viderem in cœlo. O magnum pietatis Sacramentum !

O Redemptor clementissime , redime me & miserere mei ; vides quia non est qui redimat , neque qui salvum faciat ; sed apud te , Domine Jesu , misericordia , apud te est copiosa redemptio ; proba me , & scito cor meum , & si via iniquitatis in me

est, lava me in sanguine tuo antequàm accedam ad altare tuum, ne bibens indignè sanguinem tuum, bibam iudicium meum. Nefandum scelus! bonum mihi esset si natus non fuisset. O Jesu dilecte, candide, rubicunde, admitte me propitius intrantem in sancta sanctorum per sanguinem tuum; calicem salutaris accipiam; nomen tuum invocabo, & salvus ero.

S A B B A T O.

Considera Christum ut Sponsum.

O Sponse sanguinum! sponsa me tibi hodiè in misericordiâ & miserationibus.

O Jesu amator, speciose præ filiis hominum! trahe me post te funiculis charitatis tuæ.

O Jesu, zelator animarum; Deus meus, ignis consumens, qui facis Angelos tuos spiritus, & ministros tuos ignem urentem, veni, ure renes meos & cor meum; ignem venisti mittere in terram, & quid vis nisi ut accendatur?

Veni, ô Sponse mi, veni, quia amore langueo; ecce aret cor meum, refrigescit charitas mea; idcirco ecce venio obviam tibi, ut veniente te, ô dilecte mi, ardens sit cor meum, & liquefiat tui amoris igne.

Veni, Domine Jesu; & sicut igne examinatur & probatur argentum, ita amoris tui igne examina cor meum, ut non inveniatur in me iniquitas. Amo te, mi Jesu; & si adjuveris me, Deus salutaris meus, aquæ multæ non poterunt extinguere charitatem.

Spesta fines ad quos, ex vi institutionis, sacrificium, adeoque Sacramentum offerri debet.

I. Est latreuticum, seu holocaustum offerendum Deo, in agnitionem supremi ejus dominii, & tamquam summus cultus supremæ ejus majestati debitus.

O Pater æterne, ex quo, per quem, in quo sunt omnia, & cujus Filius, non propriam quærens gloriam, tradidit semetipsum oblationem & hostiam tibi, in odorem suavitatis; ego quoque, quemadmodum ille fecit, ita & faciens, immolo tibi hodiè sacrificium laudis, & reddo tibi altissimo vota mea. Tu es Dominus altissimus super omnem terram; vitæ & mortis potestatem habes; in te vivo, moveor, & sum; præbeo tibi cor meum in sempiternum & rationabile obsequium. Servus tuus sum ego; eligo te hodiè in hoc sacrificio in Regem & Deum meum qui facis mirabilia magna solus; in manus tuas commendo spiritum meum; quod bonum in oculis tuis est, facias semper.

II. Est Eucharisticum, seu pacificum, offerendum Deo in gratiarum actionem pro innumeris ejus beneficiis.

Deus misericors & patiens, sic dilexisti mundum ut filium tuum unigenitum dares; proprio filio tuo non pepercisti, & cum illo omnia nobis donasti; donasti siquidem filium, qui non rapinam arbitratus est esse se æqualem Deo; formam servi accipiens, semetipsum exinanivit, factus pro me obediens usque ad mortem, mortem autem crucis;

crucis ; & qui pridie quàm pateretur dedit mihi corpus & sanguinem , ut hæres quidem tui , cohæres illius essem. Mirabilis Deus ! Benedictus in donis suis Pater misericordiarum !

Benedic ergò, anima mea, Dominum , & omnia quæ intra me sunt , nomini sancto ejus. Verùm , ô Pater æterne , quid retribuam tibi pro omnibus quæ retribuisti mihi ? Quid ? ecce calicem salutaris accipiam , & nomen tuum invocabo. Dedisti mihi unigenitum Filium tuum , & cum eo , omnia mihi donasti : ego quoque , in gratiarum actionem pro omnibus beneficiis tuis , creationis , redemptionis , vocationis , conservationis , gubernationis , &c. offeram tibi hunc dilectum Filium , in quo tibi benè complaces , & cum illo , cor meum.

III. *Est propitiatorium , offerendum Deo in propitiationem peccatorum.*

O Pater misericordiarum ! tibi soli peccavi ! Hei mihi ! iniquitates meæ supergressæ sunt caput meum ; sed habeo apud te advocatum Jesum Christum , qui factus est propitiatio pro peccatis meis ; reconciliavit me tibi in sanguine suo. Respice ergò in faciem Christi tui , qui peccata mea portavit in corpore suo super lignum ; quàmvis iratus fueris , misericordiæ recordaberis , & propitius eris mihi peccatori. Quapropter , copiosam ejus redemptionem offero tibi in hac Missâ , in quâ idem Christus incruenter immolatur , qui in arâ crucis semel seipsum cruentè obtulit. *Trid.*

E

IV. *Est impetratorium, offerendum Deo ad impetranda bona animæ & corporis, & avertenda quæcumque mala; idque pro nobismetipsis, amicis, & inimicis, justis, & peccatoribus, vivis, & defunctis.*

O Pater amantissime, cujus voluntas sanctificatio mea, memento hujus quod suggerit Filius tuus: *Si quid petieritis Patrem in nomine meo, dabit vobis; ecce nomen ejus, Jesus, qui, proposito sibi gaudio, sustinuit crucem; ecce nomen in quo oportet me saluum fieri: hic est Filius tuus dilectus: igitur, propter gloriam nominis ejus, propter ejus merita infiniti valoris, da mihi cor contritum & humiliatum; da mihi hanc charitatem quæ operit multitudinem peccatorum; concede mihi ut sim pastor juxta cor tuum, fidelis dispensator mysteriorum tuorum, ut sim mitis & humilis, & quæ placita sunt tibi faciam semper, ut cum timore & tremore salutem meam operer, ut inhabitem in domo tuâ omnibus diebus vitæ meæ, &c.*

Operæ pretium est, ut tibi præfigas unum finem particularem; scilicet, vel extirpationem illius vitii quo laboras, & quod aliorum est origo; vel affecutionem illius virtutis cujus præcipuè eges.

V. *Quia hoc mysterium institutum est à Christo in memoriam Passionis suæ, perutile est, Deoque gratissimum, speciali directione intentionis illud offerre in memoriam & venerationem Passionis Dominicæ.*

Denique, quia omnis nostra diligentia, & omnis præparatio, minor est, quàm ut

tantis mysteriis sufficiens esse queat ; meritò opem à Deo , à Beatâ Virgine , Angelo tutelari , SS. Patronis , & Cœlitibus omnibus , subsidiumque postula.

I. Itaque , roga Deum per merita Filii ; & omnium Sanctorum , ut gratiam tibi præstet dignè celebrandi Missam , & suscipiendi hoc Sacramentum.

II. Repræsentatis Christo peccatis , imperfectionibus , omnibusque necessitatibus tuis ; per merita Passionis , & sanguinis ejus , pete veniam , & piè celebrandi ac communicandi gratiam.

III. Ad Spiritum sanctum humiliter convertere , ut donis suis , Christo Jesu dignum in te præparet habitaculum , sicut fecit in Virgine Deiparâ.

IV. Implora opem Sanctorum , ut tibi gratiam sanctæ Communionis impetrent.

O Sancti Dei omnes , per eum vos rogo quem facie ad faciem , nos autem hîc per speculum videmus , & velatum in hoc Sacramento suscipimus , succurrite mihi , quæso , vestris precibus apud Deum , ut sic illum nunc in Sacramento possim recipere , ut aliquandò eum in propriâ specie vobiscum merear videre.

Tu præcipuè , ô sacratissima Virgo Maria , cujus illam humilitatem respexit Deus ex quâ beatam te dicent omnes generationes , & fecit tibi magna qui potens est ; discam à te , & à Filio tuo qui humilibus dat gratiam , esse mitis & humilis corde , ut magnificet anima mea Dominum , & exultet spiritus meus in Deo salutari meo.

O Maria Virgo , quæ Spiritu Sancto cooperante , gratiâ plena , Deum & hominem purissimis visceribus concipere & portare meruisti , impetra mihi , quæso , gratiam Spiritûs Sancti per amorem Filii tui , ut & ego eum dignè in hoc Sacramento excipere & portare valeam.

Adsis , ô Angele custos , & clientem tuum pio ductu dirige , ut panem illum Angelorum , Dominum cœli & terræ , decenter excipiam.

O Patroni mei , aulici Dei , succurrite ; & Domino vestro hospitium cordis mei congruenter adornate.

V. Offer Regi tuo venienti humilitatem ; & sanctitatem Virginis matris Mariæ , fervorem & devotionem omnium sanctorum , ut illorum merita suppleant quicquid humana tua non valet infirmitas.

Ascende ad altare tanquàm ad calvariæ locum , ubi Jesu-Christi confixus cruci , crucifigas carnem tuam cum vitiis & concupiscentiis ; & sic ejus mortem efficacius annuntiabis donec veniat. Omnem curam & diligentiam in eo ponas ut quàm maximâ fieri potest cordis munditiâ , atque exteriori pietatis specie , hoc sacrificium peragatur , ut monet Trid. ità ut qui viderint te Ministrum altaris , Dominum ipsum venerentur. S. Amb. & ad rerum quæ in sacrificio latent , contemplationem excitentur. Trid. Memineris ergo istius quod scriptum est : ignis in altari semper ardebit , quem nutriet Sacerdos , subiciens ligna manè per singulos dies. Lev. 6. Ignis ille non est alius , nisi ille quem Christus

secundum ordinem Melchisedech venit mittere in terram. Sit perpetuus iste ignis in corde tuo, & quem nutries piis ac crebris affectibus. Erumpat in adstantes divinus ille ignis, ut omnes amore Christi inflammentur. Cogita quo animi fervore S. Martinus, S. Philippus Neri, S. Ignatius, & alii, divina tractabant mysteria; time ne divinissimum hoc opus adeo negligenter faciens, maledicaris.

ARTICULUS VI.

Exercitia post Missam, & Communionem.

Monita salutis.

P*Eraetâ Missâ & Communionem, cave ne tanto hospiti qui visitavit te oriens ex alto, mox tergum obvertas, ad ludibria & inania te convertens, immemor beneficii, non curans cum eo paulisper conversari. Quid est hoc? nisi vilipendere hospitem, imò etiam graviter offendere, delicias ejus respuere, & scandalizare pusillos. Nonne sacrilegium est, linguam tremendis ministrantem mysteriis, tali sanguine purpuratam, factam aureum gladium, ad scurrilia transferre? S. Chrys. Ac proinde, nonne hoc est hujus divini hospitis se indignum præbere deliciis? Ingratitudo enim, est ventus urens, gratiarum fontem exsicans. S. Ber.*

Oportet ut non solum præpares te ad devotionem ante communionem, sed ut etiam te sollicitè conserves in eâ post Sacramenti perceptionem: nec minor custodia post exigitur,

quàm devota præparatio priùs ; nam bonæ postmodùm custodia , optima iterùm est præparatio ad majorem gratiam ; ex ea quippè redditur quis valdè indispositus , si statim fuerit ad exteriora nimis effusus. Imit. Chr.

Quid ergò sic properas ? quid quæris præter Deum tuum ? Plus ille te docebit quàm omnes libri ; plùs delectabit quàm omnes amici ; plura præstabit commoda quàm omnes mundi artes , opes , scientiæ , &c. Ex illo siquidem audies arcana quæ non licet hominibz loqui. Sanctæ Theresiæ à Jesu , id expertæ , credito.

Igitur , ne defrauderis à die bono , & particula boni diei non prætereat te ; duc tantum hospitem in cubiculum interius , id est , cor tuum ; cave à multiloquio ; mane hic secretò , & fructu suavissimo hospite tuo ; ipsum enim habes quem totus mundus tibi auferre non potest. Delectare tunc in Domino ; vaca , & vide quoniam est Dominus ; exalta magnitudinem ejus , gusta saporis ejus dulcedinem ; & licet pulvis sis & cinis , loquere ad Dominum tuum ; loquere fiducialiter ad eum , sicut solet amicus ad amicum loqui ; fructu sine strepitu loquentis intùs veritatis , sorbearis in illo silentio. S. Aug. Tribulationem tuam ante ipsum pronuntia , & effunde coram illo cor tuum ; pete & accipies ; hauri tunc ex Dominico fonte aquam salientem in vitam æternam , & scientiam salutis ; ac gloriam illi dans , indue novum hominem , sentiens in te quod & in Christo Jesu ; & tamquàm leo ignem spirans ab hâc mensâ recede , factus diabolo terribilis. S. Chrys.

MEDITATIONES

POST MISSAM.

- I. **Q** Uis est ille qui venit ad me ?
- II. **Q** Ad quem venit ?
- III. Cur venit ?
- IV. Quomodo venit ?
- V. Quid à me tantus hospes requirit ?
- VI. Quid hactenus propter ejus amorem feci ?
- VII. Quid nunc volo facere ?
- VIII. Volo illud sincerè ?
- IX. Quid facere debeo ut promissis stem ?

Aliæ.

- I. Amplexus.
- II. Beneficium ponderandum.
- III. Admirari.
- IV. Gratiarum actionis imparem se fateri.
- V. Patri Filium pro gratiis offerre, & se utrique.
- VI. Gratiam ejus petere.
- VII. Necessitates aperire.
- VIII. Proponere.
- IX. Media proposito efficaci congrua inquirere, & strenuè exequi, ut indè vera & sincera cognoscatur voluntas.

Amplexus.

Inveni quem diligit anima mea ; tenui eum ; nec dimittam , ut fiducialiter dicere queam : vivo ego ; jam non ego : vivit verò in me Christus.

Nunc , ô Jesu requies mea , nunc dimittis servum tuum in pace , quia viderunt oculi

E iv

mei salutare tuum : in te nunc deficit anima mea ; in te nunc exultat cor meum. Verum, quis mihi det, ô Deus cordis mei, ut in amplexu tuo, & in osculo pacis lætus moriar ?

Admirare.

O Jesu ! ô sancte, innocens, impollute, à peccatoribus segregate, cœlis excelsior ! tu venisti ad me ? in me, malevolam animam, intraisti ? Quis loquetur potentiam & misericordiam tuam ? Ecquid tibi Domine, Rex gloriæ, cum hoc foetido sterquilinio ? *Gerson.*

O Jesu mi ! Quàm admirabile est nomen tuum in universâ terrâ !

Venite, audite omnes qui timetis Deum, & narrabo quanta fecit animæ meæ : suscepi misericordiam Dei mei in medio templi ejus ; quinimò, ipsum Angelorum Dominum ipsumque gratiarum fontem, in medio cordis mei suscepi. Stupendum beneficium ! Annuntiate hoc in universâ terrâ, ut omnis spiritus laudet Dominum meum.

Adora.

Dominus meus & Deus meus ! O Altissime super omnem terram, mortificans & vivificans, deducens ad inferos & reducens ! Adoro te ; tu enim solus es dignus accipere virtutem, & divinitatem, & fortitudinem, & honorem, & gloriam, & benedictionem ; undè omnia ossa mea dicent : Domine, quis similis tibi ?

Magnus Dominus & laudabilis nimis ! Adorate eum omnes Angeli ejus, &c.

Gratias age.

Quid retribuam tibi, Domine Jesu, pro omnibus quæ retribuisti mihi, & præsertim hodiè? Sollicitus mei, dedisti mihi corpus tuum in cibum, & sanguinem tuum in potum, & utrumque in pignus futuræ gloriæ. O sacrum convivium!

Jam misericordia tua subsequetur me omnibus diebus vitæ meæ, ut inhabitem in domo tuâ in longitudinem dierum. Ideò exultabunt labia mea cùm cantavero tibi, & anima mea quam redemisti. Sed & lingua mea totâ die meditabitur justitiam tuam, cùm confusi & reveriti fuerint qui quærunt mala mihi. Repleatur os meum laude, ut cantem totâ die gloriam tuam.

Magnificat anima mea Dominum, & exultet spiritus meus in Deo salutari meo.

Benedic anima mea Domino, & omnia quæ intra me sunt, nomini sancto ejus. Noli, anima mea, noli oblivisci omnes retributiones ejus qui visitavit te, & fecit tibi redemptionem, sanans infirmitates tuas. Laudate Deum meum omnes gentes, quoniam confirmata est super me misericordia ejus. Laudate eum omnes Angeli ejus, &c.

Offer Deo Patri Filium.

O Pater æterne, Pater misericordiarum, qui sic dilexisti me, ut Unigenitum tuum mihi dares in pretium, & in cibum; cum eo omnia mihi donasti; respice in faciem Christi tui in quo tibi benè complacuisti. Hunc ego dilectum Filium, & cum eo, cor meum retribuo tibi pro his quæ hodiè retribuisti mihi: complaceas tibi, Pater, hodiè in

E v

illo ; ac per eum , indignationem tuam averte à me.

Ecce mediator Dei & hominum, Christus Jesus , Advocatus & Pontifex , qui interpellat pro me. Hunc ego offero tibi ; ipsum, inquam , qui peccatum non fecit , sed tulit peccata mundi , & languores nostros suo livore sanavit.

Igitur , suscipe , ô sancte Pater , sanctam hanc & immaculatam hostiam Filii tui , in laudem & gloriam nominis tui , in gratiarum actionem pro omnibus beneficiis tuis in me collatis , in expiationem quoque peccatorum meorum , & in supplementum omnium defectuum meorum.

Dilige Jesum qui prior dilexit te.

Deus misericors , patiens , & multæ misericordiæ , & verax , qui das escam timen- tibus te ; jam verè diligo te , fortitudo mea , quem inveni & teneo. Quis mihi hoc tri- buat , ut jugiter diligam te , qui ultrà quàm facere debueras , fecisti ? Pereat cor meum , si desinat amare te , qui semper & ineffabi- liter amasti me.

O Domine Jesu ! ô dilecte mi ! quid me vis facere ut placeam tibi omnibus diebus vitæ meæ ? Doce me facere voluntatem tuam , abnegare meipsum , & adhærere tibi. O quàm bonum mihi illud erit !

O Jesu ! ô amor mi ! da ut diligam te in toto corde meo ; nihil aliud posco ; scio enim quoniam diligentibus te omnia coope- rantur in bonum ; & licèt pauper sim & inops , laudabo nomen tuum , & tanquàm nihil habens , omnia possidebo ; tu es Deus meus & omnia.

Offer teipsum Christo, qui se tibi tam amanter offerre dignatus est.

Suscipe, Domine, universam libertatem meam; accipe memoriam, intellectum, atque voluntatem omnem; quidquid habeo vel possideo, mihi largitus es; id tibi totum restituo, ac tuæ prorsus voluntati trado gubernandum; amorem tui solum cum gratiâ tuâ mihi dones, & dives sum fatis, nec quicquam ultra poscam. S. Ignat. Loy.

Spera in Deo salutari tuo: thesaurum infinitum opum cœlestium, & ipsum gratiæ fontem hîc habes: avidè pete quantum vis; pete veniam peccatorum, ac virtutes christiano homine & tuâ potissimùm vocatione dignas; confide, & fides tua te salvum faciet.

O clementissime Salvator! Quid mihi nunc denegabis, postquàm temetipsum tradidisti mihi in cibum & potum, & in pignus futuræ gloriæ? O quanta erit fiducia mea, cui cognita est tanta pietas tua! Igitur miserere mei secundùm magnam misericordiam tuam; si iniquitates observaveris, Domine, Domine quis sustinebit? quis accedere ad altare tuum audebit? Ab occultis meis munda me, Domine, ab alienis parce servo tuo, & ignorantias meas ne memineris; parce mihi, si eâ quâ par erat præparatione & animi devotione non tractavi hoc mysterium ipsis Angelis tremendum.

O Jesu, lux vera, quæ illuminas omnem hominem venientem in hunc mundum, da Domine, ut videam, ô lumen oculorum meorum, ut sciam quid desit

mihi. Noverim te, noverim me, ut exaltem te & humiliem me.

O Jesu, qui cùm in formâ Dei esses, temetipsum exinanivisti, formam servi accipiens; & qui in hoc sacramento enutrians & exaltans filios, te sperni à multis, & conculcari à canibus finis, discam à te esse humilis corde; da ut abominer vel minima superbiæ signa.

O Jesu, qui factus es obediens usque ad mortem, & qui in hoc Sacramento obediisti voci hominis, da ut cibus meus sit facere voluntatem tuam, & obedire Prepositis meis propter te. Deus meus volui, & legem tuam in medio cordis mei: da quod jubes, & jube quod vis.

O Jesu Rex regum, qui cùm dives esses, propter me egenus factus es, non habens diversorium, nec ubi caput reclinares.

O Jesu! qui cum plenitudine divinitatis habitas in templis pauperibus, tanquàm mortuus à corde. O Jesu, qui pauperum desiderium exaudire soles, inclina cor meum in testimonia tua & non in avaritiam, ut delecter in viâ testimoniorum tuorum sicut in omnibus divitiis. O Jesu, tu thesaurus meus es, in te unico fixum sit cor meum; nec divitias, nec paupertatem dederis mihi, sed tantum victui meo tribue necessaria, ut habens alimenta, & quibus tegar, his contentus sim. Quid ampliùs exoptet anima mea?

O Agne sine maculâ! O Jesu, Fili Mariæ Virginis, qui pasceris inter lilia, qui mihi dedisti hodiè illud vinum germinans

Virgines, cor mundum crea in me; tu scis quia non possum esse continens, nisi tu Deus dederis mihi. Verum, quàmvis Angelus satanæ me colaphizet, sufficit mihi gratia tua. Da ergò ut sim, sicut Angeli tui in cœlo, sollicitus tantum de iis quæ Domini mei sunt; ut anima mea, tota pulchra, sine maculâ & rugâ, audire tandem mereatur: *veni, veni de libano, soror mea, sponsa; veni, coronaberis.*

O Jesu, qui sitiens, felle & aceto potatus es, & qui omnis saporis suavitatem in hâc mensâ parâsti mihi, aufer à me ventris concupiscentias; da ut tibi soli serviam, non ventri, aut voluptati; sim verò sobrius, ne umquàm gravetur cor meum crapulâ & ebrietate.

O Jesu, qui in horto, cum sudore sanguinis prolixius orasti, & qui, ipsâ nocte quâ tradebaris, parâsti mihi hanc mensam, oro te ut tibi Domino serviens, spiritu fervens sim; accende me hodiè illo igne quem venisti mittere in terram; renovabor, ut confido, spiritu mentis meæ; jam curram viam mandatorum tuorum cum dilataveris cor meum.

O Jesu, vide afflictionem meam; patientia mihi necessaria est ut reportem reprobationem. Tu es patientia mea; discam à te esse mitis corde: æquum est ut, qui calicem salutaris toties accipio, bibam passionis calicem quem tu bibisti.

O Jesu, qui pro inimicis tuis orasti, & qui instituisti hoc Sacramentum tanquàm symbolum charitatis, *Trid.* ut diligam pro;

ximum sicut meipsum , benefaciam his qui oderunt me : da mihi hanc charitatem , quæ est vinculum perfectionis , & sine quâ nihil sum.

O Jesu ! da mihi scientiam sanctorum , scientiam salutis , & scutum bonæ voluntatis ; custodi animam meam ut pupillam oculi ; da ut sanctus sim ego , quia tu sanctus es , ac serviam tibi in sanctitate & justitiâ omnibus diebus meis. O unum necessarium ! Unum volo , unum quæro , unum desidero , unum mihi est necessarium : salvum me fac , Salvator mi ; da mihi amorem tui , contemptum mundi , odium mei , & zelum animarum. Si ergo inveni gratiam in oculis tuis , ô Rex , & si placet tibi , dona mihi animam meam pro quâ rogo , & populum meum pro quo obsecro ; cætera tolle tibi.

Poteris etiam hinc rursus considerare Christum ut Regem ; ut Patrem ; ut Magistrum ; ut Medicum ; ut Pastorem ; ut Redemptorem , & ut Sponsum.

I. *Ut Regem.*

O Rex meus , & Deus meus , venisti ad me mansuetus ! O Rex sæculorum , dominare per residuum annorum , dominare in medio inimicorum tuorum , & in medio cordis mei. Vivas ergo , Rex , in æternum ; tuum , Domine , est regnum ; non mea voluntas , sed tua semper fiat , sicut in cælo , & in terrâ. Verum , ô mi Rex , undè veniet auxilium mihi , nisi à te qui fecisti coelum & terram ? Adjuva me , ne moreris.

II. *Ut Patrem.*

O Pater misericordiarum ! ego sum infelix ille prodigus qui iniquè egeram ; sed tu longanimis & multum misericors , suscepisti me , delectasti super me , & satiaſti me hodie , non hircorum ſanguine , non ſolum de rore cœli , de pinguedine terræ , & de vitulo ſaginato , ſed pretioſo corpore & ſanguine tuo , & coronaſti me in miſericordiâ. Sed quoniam miſertus es mei quomodò miſeretur pater filiorum , ne remiſcaris delicta mea , ſed reminiſcere miſerationum tuarum quæ à ſæculo ſunt. Rogo te , ut obediens ſim tibi uſque ad mortem. Ita Pater , quod placitum erit tibi faciam ſemper.

III. *Ut Magiſtrum.*

O Magiſter ſapientiſſime , qui docuiſti me à juventute meâ ; loquere nunc ad cor meum ; paratus cuſtodire ſermoneſ tuos , in corde meo abſcondam eloquia tua , ut non peccem tibi ; conſervabo omnia verba tua , conferens in corde meo ; ignitum eloquium tuum vehementer , & ſervus tuus diliget illud. Beatus homo quem tu erudieris , Domine ! Da ſervo tuo cor docile.

O anima chriſtiana , velut Magdalena ſtans retrò ſecùs pedes Domini , & audiens verbum illius ; audias pariter in ſilentio , & cuſtodire coneris quid loquatur in te Dominus Jeſus. Eloq̃ia ejus in corde tuo abſcondere ſatage.

IV. *Ut Medicum.*

O Jeſu , pie Medice , qui hodiè deſcendiſti priuſquàm morerer , & qui non ſolum

imposuisti mihi manum, sed etiam voluisti languores meos tuo ipso livore sanare, sana animam meam quia peccavi tibi. Ingressus aliquandò Zachæi domum, dixisti: *hodiè huic domui salus facta est*. Ingressus jam es, ô Christe, domum animæ meæ; dic ei, quæso: *salus tua ego sum*; ab omni specie malâ sana eam; da illi integram sanitatem in conspectu omnium, & exiliens laudabo te, & dicam semper: *magnificetur Dominus qui benè omnia fecit, & mutos loqui, & surdos audire, &c.*

Hic revela Domino viam tuam & infirmitates tuas quas ipse portavit; ora eum ut te sanet ab illo languore quo tepidus es, &c.

V. Ut Pastorem.

Erraveram sicut ovis quæ periit, sed conversus sum ad te Pastorem animæ meæ; & tu, ô Pastor bone, qui pascis me à juventute, imposuisti me in humeros tuos, & in loco pascuæ, id est, corporis tui, me hodiè collocasti. Quid mihi deinceps deerit? Jam super aspidem & basiliscum ambulabo, & conculcabo leonem & draconem.

Ne discefferis à me; custodi me ut pupillam oculi, donec perducas me ad pascua vitæ æternæ.

VI. Ut Redemptorem.

Redemisti me, Redemptor meus, & misertus es mei; solvisti vincula colli mei; jam excussus sum de pulvere; ego, ô Jesu Christe, victus tui sum; servus tuus sum ego, & filius ancillæ tuæ; custodi animam meam, ut iterum iugo servitutis non conlinear. Tuus sum ego, in manus tuas com-

mendo spiritum meum, redemisti me,
Domine, Deus veritatis in sanguine tuo,
ac eodem hodiè lætificasti cor meum.

VII. *Ut Sponsum.*

O Jesu ! tanquàm sponsus procedens de
thalamo tuo sponsasti me tibi hodiè in sem-
piternum : ego vicissim sponso me tibi ; po-
ne me ut signaculum super te, quem rece-
pi hodiè, & elegi ut esses mihi Deus. De-
ficiat in te anima mea, ô Jesu vita mea ;
liquefiat amore tui ; mihi vivere, Christe,
sis, & mori lacrum.

*Qui perseveraverit usque in finem, hic sal-
vus erit. Pete ergò ut corpus Domini nostri Jesu
Christi custodiat animam tuā in vitam æternā.*

O Jesu ! tu verè dixisti : *qui manducat
hunc panem, vivet in æternum.* Hodiè man-
ducavi hunc panem : sit ille mihi pignus
gloriæ perpetuæ ; da ut anima mea moria-
tur morte justorum.

O Jesu, corona mea ! quis me separa-
bit à charitate tuâ ? An tribulatio ? an gla-
dius ? Hæc omnia superabo propter te, qui
dilexisti me. Pono te Deum adiutorem
meum ; te, inquam, sine quo nihil possum
facere, & in quo confortatus, omnia possum.

P A C T A,

ET PROPOSITA AMOROSA,

*N*on quidem simul & coacervatim, sed
sigillatim per hebdomadas ineunda, &
singulis diebus alternatim exercenda.

Propono.

I. Omnia facere in gloriam tuam.

II. Non conformari huic sæculo.

III. Esse mitis corde, ut possim compatiri infirmitatibus proximi, & condolere iis qui errant; ac inde, possidere terram, ac in patientiâ possidere animam meam.

IV. Excutere omnem teporem, & esse fervens spiritu.

V. Manere in solitudine, quoad fas erit; sepire aures meas spinis; pangere fœdus cum oculis meis.

VI. Sobrius esse, & mortificari propter te in tali occasione N. tali modo N. &c.

VII. Ambulare coram te. Offero tibi adorationes Sanctorum pro omnibus momentis quibus non cogitabo de te.

VIII. Promovere gloriam tuam, & omnibus omnia fieri, ut omnes faciam salvos.

IX. Emendare illud vitium ad quod pronus sum.

Expende quodnam sit illud vitium, & illud, in gratiarum actionem, & Jesu, quem possides, cooperante, extirpare contende. Adhibe & tu aliquam mortificationem huic victoriæ congruentem, & quam offerente se per diem occasione, exercebis.

Deniquè, juro & statuo custodire judicia justitiæ tuæ. Adhæreat lingua faucibus meis, si non meminero tui. Adjuva me; Deus salutaris meus, & propter gloriam nominis tui libera me, & salva me.

O Jesu! mane mecum, Domine, quoniam advesperascit; venit nox in quâ nemo potest operari; mane mecum, ô Jesu, ne me tenebræ comprehendant.

Sed saltem, non dimittam te, donec

benedixeris mihi. O utinam accipiam benedictionem à Domino, & misericordiam à Deo salutari meo, quatenus eam de virtute in virtutem, donec facie ad faciem te videam Deum Deorum in Sion, quem velatum in sacramento, & per speculum, in ænigmate video.

Per manus & merita beatissimæ Virginis Mariæ, & omnium Sanctorum, commenda Deo sacrificium, aut communionem tuam; & eorum ope & intercessione pete ab illo fructum ejusdem sacrificii & communionis, ac tui propositi efficaciam.

Pete quoque gratias pro proximis tuis vivis & defunctis, pro his præsertim quos habes singulariter commendatos.

Vade in pace, ô Christiane, ô Sacerdos: descende jam justificatus pœnitentiâ, & pane Angelorum confirmatus; jam non tibi vivas, sed Christo; ne obliviscaris Domini Dei tui; elice per diem actus jaculatorios sacrificio & communioni congruentes; eos præsertim quos suggeret unctio Spiritûs.

Cogita idemtidem quali sis insignitus honore, quali mensâ fruaris. S. Chrysol.

Et verò, si cum sancto sanctus esse facile quis potest; quidni sanctus eris, charissime Frater, tu, inquam, qui panem cœli ferè quotidie manducas, in quo habitat corporaliter plenitudo divinitatis & sanctitatis? Heu tibi! quot ad salutem viæ? Sed væ tibi, si nihil horum te à malis avertat, & si manens in Christo, non vivas propter Christum, & non sis conformis imagini ejus!

ARTICULUS VII.

Alia brevior ad Missam præparatio.

Monita salutis.

Accipite & comedite, dicit Magister bonus: hoc est corpus meum. Accedamus ergo frequenter ad hoc altaris Sacramentum quo liberamur à culpis quotidianis, & à peccatis mortalibus præservamur. Hic est panis qui de cælo descendit; & qui manducat hunc panem, vivet in æternum. O sacrum convivium! quis ad illud non properet? Unus ergo sit dolor noster hâc escâ privari. S. Chrys.

Absit tamen ut accedamus ad altare nauseâ, usu, perfunctorio modo, turpis lucri gratiâ, cum affectu ad peccata venialia, & præsertim, cum conscientiâ peccato mortali gravatâ; qui enim manducat & bibit indignè, fit reus corporis & sanguinis Domini. Proh abominatio! judicium sibi maducat & bibit, non dijudicans corpus ejus. Stupenda desolatio! Quis ergo seipsum non probet antequàm de pane illo edat & de calice bibat?

Insuper, cum sancta sint sanctè tractanda, & cum ipse Dominus Jesus mundis corde & ferventibus spiritu affluentius det, accedamus ad thronum gratiæ maximâ quâ poterimus reverentiâ, fide firmâ, fiduciâ securâ, humilitate profundâ, ardenti desiderio, flammanti charitate, vehementi dolore, & integrâ divinæ voluntati resignatione. Indè gustabimus & videbimus quàm suavis sit Dominus.

BREVES MEDITATIONES.

I. **Q**uodnam est illud opus quod jam jam peracturus sum? Grande opus, omnium præcellentissimum opus; non enim homini præparatur habitatio, sed Deo.

II. Quis est ille qui venit ad me?

III. Quis sum ego, ad quem ille venit?

IV. Quoties venit?

V. Quomodo venit?

VI. Cur venit?

VII. Quo fine ad eum ego venio?

VIII. Quomodo ad eum venio?

IX. Accedo ad eum quasi ante tremendum ejus tribunal statim post sacrum manifestandus?

DIRECTIO INTENTIONIS.

Ego volo celebrare Missam, & conficere Corpus & Sanguinem Domini nostri Jesu Christi juxta ritum sanctæ Romanæ Ecclesiæ.

I. Ad laudem omnipotentis Dei, in agnitionem supremi ejus dominii, & tanquam summum cultum supremæ ejus Majestati debitum.

Vi ejusdem intentionis, offer Deo Patri; in unione intentionis & meritorum Christi, cogitationes tuas, consilia, verba, operaque tua, labores & anxietates; uno verbo, universam libertatem tuam, nempe memoriam, intellectum & voluntatem; ei totum da à quo-

omnia pendent, ac ejus prorsus voluntati gubernandum trade.

II. In gratiarum actionem pro beneficiis creationis, redemptionis, vocationis, conservationis, gubernationis, & aliis innumeris beneficiis, ac præcipuè hujus sacrosancti beneficii & excellentissimi sacramenti.

III. In propitiationem & expiationem innumerabilium peccatorum & negligentiarum mearum, & in satisfactionem opprobriorum quæ Dominus Jesus perpeffus est, sive à Judæis in passione & morte suâ, sive ab infidelibus, hæreticis, & malis christianis in hoc amoris sacramento.

IV. Ad impetranda bona animæ & corporis; idque pro memetipso, pro parentibus, amicis, & inimicis, pro ovibus mihi commissis, pro justis & peccatoribus, vivis & defunctis; sed præsertim ad hæresum extirpationem, ad exaltationem sanctæ Romanæ Ecclesiæ militantis, ad pacem & concordiam inter Principes Christianos; tandem, ad salutem omnium eorum pro quibus Deus vult & scit me debere orare.

V. In memoriam & venerationem Passionis & Mortis Jesu Christi, quam annuntiari volo, & desidero donec veniat.

Hinc, Domino Jesu gratissimum erit, & tibi utilissimum, si ante Missam, unum Passionis & Mortis punctum quotidie mediteris; præsertim, si hanc meditationem aliquâ, quamvis levi, mortificatione condias.

VI. In honorem beatæ Mariæ Virginis, cui me devoveo, & cujus me tutelæ committo.

VII. In venerationem totius curiæ triumphantis, ad cuius præsidium fidens confugio.

Porro hæc intentionis directio in singulos hebdomadæ dies, pro cujuslibet opportunitate & devotione, distribui potest.

ACTUS RELIGIONIS.

Actus Fidei.

O Jesu ! Quàmvis te in hoc Sacramento non videam ; credo tamen te esse ibi verè , realiter , & substantialiter præsentem ; eundem Filium Dei qui in hunc mundum venisti , & quem pastores & magi procidentes adoraverunt ; eundem Deum & hominem qui sedes ad dexteram Patris ; hoc firmiter credo , quia tu ipsa veritas dixisti : *hoc est corpus meum*. Adauge fidem meam.

Actus adorationis.

Firmiter credens te esse in altaris sacramento præsentem , ibi te adoro ut Regem regum , Dominum meum & Deum meum. Adoro te eâ quâ possum animi & corporis reverentiâ , ut primum principium & ultimum finem ; tu solus Altissimus , & substantia mea tanquàm nihilum ante te ; & quoniam agnosco cuncta in ditione tuâ esse posita , protestor quòd tibi semper & in omnibus subiecta futura sit anima mea. Offero tibi adorationes pastorum , magorum , omnium Sanctorum & Angelorum , in unio-

ne earum quas tu Deo Patri in terris obtulisti.

Actus admirationis, humilitatis & timoris.

O dulcissime Jesu ! tu ad hoc sacramentum nos amanter invitas ? Quàm suavis est spiritus tuus ! Sed quid est homo quia magnificas eum , aut filius hominis , quoniam visitas eum ? Præsertim , undè hoc mihi , ut tu Dominus venias ad me ? Quàm bonus Israël Deus ! Exi à me , Domine , quia homuncio & peccator sum ; tu verò , Rex coeli & terræ , Sanctus , Sanctus , Sanctus. Heu mihi ! Timeo ne non habeam vestem nuptialem , & ne eâ exutus , reus fiam corporis tui , & iudicium mihi manducem & bibam. Bonum mihi esset , si natus non fuisset. Quid ergò faciam miser ?

Actus spei.

O Jesu ! Sum quidem ego pulvis , cinis , & peccator ; sed tu es Pater misericordiarum & Deus totius consolationis. Quis umquàm intellexit misericordias tuas ? Nonne laborantes & oneratos vocas ad te , ut eos reficias ? Nonne tu es refugium meum ? Ad quem ergò irem ? Tu solus verba vitæ æternæ habes ; tu solus consolaris me in omni tribulatione meâ. Sum quidem æger ; sed tu es salus mea ; non est opus benè valentibus medico , sed malè habentibus. Si solummodò pertransiens , curabas omnes ; si umbra Petri curabat infirmos ; nonne ego confidere debeo quia , intrante te sub tectum meum , & in me in habitante cum plenitudine divinitatis , sanabor ab infirmitatibus meis ?

Igitur ;

Igitur , cùm nihil , te propitio , mihi conficius sim , surgo & eo ad te Patrem , Medicum & Refugium meum , & spero quòd hæc communio futura sit mihi fidei , spei & charitatis augmentum ; contra insidias inimicorum meorum firmissima tuitio ; turpium cogitationum effugatio ; hujus defectus & vitii N. exterminatio ; operum tibi placentium , & præsertim hujus virtutis N. salubris efficacia ; & tandem pignus futuræ gloriæ. Reposita est hæc spes mea in sinu meo , quia miserator & misericors es , ac in promissis fidelissimus.

Actus pœnitentiæ.

Væ mihi ! Peccavi in cœlum & coram te ; quinimò , te in multis quotidie offendendo ; confessus quidem sum adversum me injustitiam meam ; mihi videor , miserante te , justificatus : attamen , heu ! inscrutabile est cor meum. Tu ergò qui scrutaris renes & corda , ab occultis meis munda me , & ab alienis parce servo tuo ; & licet , ut confido , mundatus sim , amplius lava me ab iniquitate meâ , ut super nivem dealbatus , & mundus corde , hoc tremendum sacrificium dignè celebrare , te in hoc sacramento sanctè recipere , & te tandem facie ad faciem in cœlo videre valeam.

Doleo , Domine , quia peccavi ; doleo propter te , ô summe dilectus & amabilis ; nolo amplius peccare ; malo , tibi dilecto , mori , quàm tibi offenso , vivere. Adjuva me Deus salutis meæ , & ab inimicis meis salvus ero.

Actus charitatis.

O amantissime Jesu ! deliciae tuæ sunt esse cum filiis hominum. Corporis & sanguinis tui mensam nobis in dulcedine tuâ parasti , ut in æternum viveremus. O amor ! ineffabilis amor ! quis non diligat te , ô totus amor ? Moriatur cor meum , si non vivat amore tui. Væ mihi , si manducans te , non viverem propter te !

Diligo te , ô dilecte mi , diligo te ex toto corde meo , & quidem propter te ; ecce voluntariè sacrifico , & præbeo tibi cor meum : sis tu in æternum dilectus meus mihi , & ego tibi. Utinam adeò intimè tecum hoc sacramento uniar , ut neque vita , neque mors separent me à te , nec te à me. Quid mihi hâc mutuâ charitate charius ? Quid mihi suavius ?

Et quoniam sacramentum hoc instituisti tanquàm symbolum charitatis , (*Trid.*) protestor quòd diligam proximum meum & inimicos meos sicut meipsum , propter te. Radica , quæso , in corde meo hanc charitatem , utpotè vinculum perfectionis meæ , & plenitudinem legis.

Actus desiderii.

Est hoc sacramentum cibus animæ , non minus ei necessarius & utilis , quàm suus corpori ; & sicut cibus corporis prodest nutritque plurimum si cum appetitu & fame sumatur , & alioquin interdum noceat ; pari ratione , animæ cibus , id est , sacramentum Corporis & Sanguinis Christi. Si ergò absit illa fames , hunc quidem cœlestem cibum sumes , sed gustum illius perexiguum habebis. Heu tamen ! quàm sæpè

abest à Sacerdotibus hujus cibi fames ; ita ut , si non esset aliundè celebrandi obligatio , si non affulgeret lucri spes , quàm citò nausearet omninò anima eorum super cibo isto , tanquàm levissimo ! Quid mirum , si non gustent quàm suavis sit Dominus in hoc cœlesti cibo , qui & si contineat omnem saporis suavitatem , tamen non nisi animam inanem & esurientem satiat bonis ! Tu verò , charissime Frater , da operam ut piis meditationibus scias hoc excellentissimum donum Dei. O quantò hujus cibi cœlestis avidior fies , & ad illum cum fructu & augmento sumendum aptior ! Ad hanc ergò famem , te his aut aliis aspirationibus ignitis excites optamus.

Quemadmodum desiderat cervus ad fontes aquarum , ita desiderat ad te , & in te sitit anima mea , ô desideratus cunctis gentibus ! In te , Rex meus & Deus meus , in te exultant cor meum & caro mea. Ecquid mihi est in cœlo , & à te quid volui super terram , ô Deus cordis mei , thesaurus meus , & centrum animæ meæ ? Noverim te , quò ardentius te desiderem , avidius me urgeam , citius te inveniam , & te arctius teneam quem diligit anima mea , & in quem desiderant ipsi Angeli prospicere.

Parce , Domine Jesu , parce frigido cordi meo. Trahe ergò me funiculis charitatis tuæ ad sanctuarium tuum ; veni , & noli tardare , defensor vitæ meæ , dulcis hospes animæ , Deus meus & omnia. Quî fieri potest ut te infinitum thesaurum frigide cu-

piam, intereadum ad caducas divitias insatiabili corde anhelant avari? O animalis homo, quam parum percipio quæ tua sunt! Numquam-ne hoc donum omnium donorum pretiosissimum sciam? Suppleas, quæso, mi Jesu, modicæ fidei meæ; exurge, adjuva me, ut eò ardentius esuriam quò sæpius edam te.

Petitio gratiæ ad dignè celebrandum & communicandum.

O Pater æterne, per merita Filii tui concede mihi gratiam dignè celebrandi Missam, & recipiendi, non solum sacramentum, sed etiam rem & virtutem sacramenti. Offero tibi humilitatem & sanctitatem Virginis Mariæ, fervorem & devotionem omnium Sanctorum, ut illorum merita suppleant quidquid mea non valet infirmitas.

Domine Jesu, propitius esto mihi peccatori, & concede mihi piè celebrandi & communicandi gratiam, ut vivam in te, per te, & propter te, qui es vita animæ meæ.

Veni Sancte Spiritus, & dignum Christo Jesu, in me præpara habitaculum, sicut fecisti in Virgine Mariâ.

O sacratissima Virgo Maria, quæ Spiritu Sancto cooperante, Deum & hominem purissimis visceribus concipere & portare meruisti, impetra mihi gratiam, ut & ego eum dignè in hoc sacramento accipere & portare valeam, & ut habeam spiritum huius dilecti Filii tui.

O vos Sancti omnes, per eum vos rogo quem facie ad faciem, nos autem hîc per speculum videmus, & velatum in hoc sa-

ramento suscipimus ; succurrite mihi , quæ-
so , & Domino vestro hospitium cordis mei
congruenter adornate , ut eum jam hoc in
exilio possidere valeam.

MEMENTO VIVORUM.

I. **M** Ei , parentum , fratrum , sororum ,
consanguineorum , & amicorum
meorum.

II. Omnium quibus fui gravamen , scan-
dalum , & occasio peccandi.

III. Omnium benefactorum meorum in
spiritualibus & temporalibus.

IV. Omnium mihi commissorum , in ge-
nere & in specie.

V. Omnium Sacerdotum & Ministrorum
Ecclesiæ Dei Catholicæ.

VI. Omnium inimicorum meorum , ad
dimissionem.

VII. Omnium hæreticorum & infide-
lium , ad conversionem.

VIII. Omnium pro quibus vis & scis me
debere orare.

Memento etiam mortuorum.

I. Animarum parentum , fratrum , so-
rorum , consanguineorum , & amicorum
meorum.

II. Animarum quæ , occasione mei , pur-
gantur in Purgatorio.

III. Animarum omnium benefactorum
meorum in spiritualibus & temporalibus.

IV. Animarum omnium mihi commissa-
rum in genere & in specie.

F iij

V. Animarum omnium Sacerdotum & Ministrorum Ecclesiæ Dei Catholicæ.

VI. Animarum morte improvisâ corporibus exutarum.

VII. Animarum quarum non est specialis memoria.

VIII. Animarum miserrimè existentium in Purgatorio, & omnium pro quibus vis & scis me debere orare.

Præfige tibi unum finem particularem, scilicet, vel extirpationem hujus vitii N. quo laboras, & quod aliorum est origo; vel affectionem hujus virtutis N. cujus præcipuè eges.

Indue sacra paramenta, quasi moriturus & cum eis sepeliendus. Accede ad altare tanquàm ad calvariæ locum, ad crucifigendum veterem hominem cum actibus suis, hoc N. præsertim tibi dominans vitium; & ad te sacrificandum Domino Jesu, qui pro te in arâ crucis se cruentè obtulit.

ARTICULUS VIII.

Aliæ breviores post Missam gratiarum actiones.

Quid frequentius pravâ consuetudine Sacerdotum, qui statim post Missam & Communionem, ad inania colloquia & ludibria se convertunt, & ad exteriora nimis effunduntur, non curantes cum dulcissimo hospite paulisper conversari? Quid est hoc, nisi hunc vituperare, delicias ejus respuere, & scandalizare pusillos? Undè fit ut non dijudicent Corpus Domini à cibo terreno, & ut amici

& præpotentis viri visitationem pluris faciant, quàm Regis Regum ? Ex arido celebrandi usu, & ex modicâ fide. Hinc fit, ut in ipsâ mensâ Domini, fame pereant ; in ipsis Salvatoris fontibus areant, & ut totâ vitâ tepefcant, imbecilles & infirmi, ne quid pejus dicatur.

Tu verò, charissime Frater, frueri in silentio & in sensuum tuorum recollectione, suavissimo hospite tuo ; ex illo siquidem audies arcana quæ non licet homini loqui. Gusta & vide.

MEDITATIONES

POST MISSAM.

I. **Q**uis est ille qui venit ad me ? &c.
ut *suprà*. pag. 103.

Actus jaculatorii.

O Jesu, dulcis hospes ! prosperè processeris ad hunc pauperculum & humilem servum ; intraveris faustè sub hoc angustissimum & vile tectum. Benedictus & superexaltatus, qui venisti in cor meum, oriens ex alto.

O Rex pacifice ! fuga ex animo & corde meo catervas vanarum cogitationum, ut te solum pacis auctorem contemplari & diligere queat anima mea. Ecquid, præter te, ô pax, tranquillitas, & dulcedo cordis mei, quærat & gustet anima mea ? Silete ergò creaturæ omnes ; ecce Rex meus venit mihi mansuetus. Abite, hunc solum volo regnare super me. Abite ergò, finite me

audire Regem , Dominum & Magistrum meum , & me in illo benè complacere.

Hic parùm loquere , & multùm meditare , ut totus in Jesu tuo absorbearis. Illo fruens , cetera exercitia liberè omitte ; jam enim habes quod desideras.

Inveni quem diligit anima mea ; teneo eum nec dimittam.

O Jesu ! nunc dimittis servum tuum in pace , quia viderunt oculi mei & gustavit cor meum salutare tuum. Quid mihi nunc restat , nisi ut in amplexu tuo moriar ? Claudantur interim omnes sensus mei omnibus rebus creatis , ut pro te solo vivant , & te solo delectentur.

O Jesu , sancte Jesu ! tu venisti ad me ? Quàm admirabile est nomen tuum ! quàm grandis misericordia tua !

Dominus meus , & Deus meus ! quis similis tibi ? Adoro te. O vos Angeli & Sancti omnes , adorate pro me Dominum & Jesum meum , quoniam magnus est , & laudabilis nimis.

Domine Jesu ! quid retribuam tibi pro omnibus quæ hodiè retribuisti mihi ? Magnifica , anima mea , Dominum , & omnia quæ intra me sunt benedicite nomini sancto ejus. Laudate Deum omnes gentes , quoniam confirmata est hodiè super me misericordia ejus.

O Pater æterne , hunc dilectum Filium tuum , quem hodiè in cibum dedisti mihi , offero tibi , & cum eo cor meum , pro his quæ hodiè retribuisti mihi ; tibi in illo benè complaceas. Gratiarum actioni me imparem

fateor ; quoniam inops & pauper ego sum.

O Jesu ! quid te ad me pauperculum traxit , nisi amor ? Quid à me exoptas , nisi amorem ? Igitur , diligo te propter te ; quid justius ? Quid dignius ? Offero me totum tibi in rationabile & sempiternum obsequium. Numquid sæculi vanitatibus rursus aperirentur oculi mei , postquam te , salutare Dei , viderunt ? Absit. Ad te , ô pulchritudo antiqua , ad te erunt semper deinceps oculi mei ; alioquin obscurentur & pereant oculi mei. Numquid os meum corpore tuo consecratum , tuoque purpuratum sanguine , vaniloquia & scurrilia , falsa , detractatoria , & turpia adhuc loqueretur ? Absit. Si enim locuturum sit , sermones tantum tuos loquetur ; si quid esurierit & sitierit , te solum , Angelorum panem , esuriet ; te solum vitæ fontem sitiet ; solamque , propter te , justitiam esuriet & sitiet ex abundantia cordis os meum ; alioquin obstruatur & pereat os meum. Numquid istud cor meum , in quo propter nimiam charitatem tuam tibi sanctuarium parasti , ut jam te in hoc exilio possideam , aliud præter te , aut nisi propter te amaret ? Absit , mi Jesu , absit. Te solum , utpotè summè amabilem , diliget cor meum. Pereat ergò cor meum , si non amet te propter te summè dilectum. Indica mihi quid me velis facere , ut placeam tibi omnibus diebus vitæ meæ ; da quod jubes , & jube quod vis.

Hic audi quid loquatur in te Dominus

F v.

Jesus ; qui hunc tibi aperiet defectum & suaviter exprobrabit , mediaque ad ejus exterminationem affluenter suggeret ; postulabitque pariter à te tale sacrificium. N. , vel talem mortificationem N. per diem exercendam. Si Dominum Jesum totâ mente dilexeris , quâ fronte hæc sacrificia denegabis illi qui semetipsum tibi totum tradidit ? Vel potius , quâ animi alacritate , & fidelitate hæc adimplebis sacrificia ? Probatio enim amoris , exhibitio est operis. S. Gregorius. Consultissimum etiam est renovare hîc idemdem castitatis votum , in odorem suavitatis. Ama , & fac quod vis. S. Aug.

Quid mihi nunc denegabis , postquam temetipsum tradidisti mihi in cibum , in potum , & in pignus futuræ gloriæ ? O quanta erit fiducia mea , cui cognita est tanta pietas tua !

Igitur , miserere mei secundum magnam misericordiam tuam ; noverim te ; noverim me , ut exaltem te , & humiliem me ; ut oderim me , & amem te ; ut persequar me , & sequar te , & nihil cogitem nisi te ; ut mortificem me , & vivam in te , ac in æternum potiar te.

Discam à te esse mitis & humilis corde , & in patientiâ meâ possidere animam meam ; doce me facere voluntatem tuam , & quæcumque eveniant , accipere à te.

Inclina cor meum in testimonia tua , in paupertatem tuam , & non in avaritiam. Nonne tu es thesaurus meus ? In te unico fixum sit cor meum.

O Jesu ! puritatis amator , ure renes

meos & cor meum, ut tibi casto corpore serviam & mundo corde placeam.

Da ut sobrius sim, & ut alimenta tanquàm medicamenta sumam, donec de necessitatibus meis me eruere digneris. Meus cibus sit facere voluntatem tuam, & adhærere tibi Deo meo.

Accende me hodiè igne illo, quem venisti mittere in terram, ut tibi Domino meo serviens, spiritu fervens sim, & omnia agam in gloriam tuam, eamque pro viribus promoveam.

Vide, Domine, afflictionem meam, & quomodò multiplicati sint qui tribulant me; spiritus meus promptus est & ad malum pronus, caro autem infirma. Exurge ergò in adiutorium meum, & ne inducas me in tentationem, ut laudem dicam tibi, quia non est alius qui pugnet pro nobis & nobiscum, nisi tu Deus noster. Absconde me intra vulnera tua, & præcipuè intra cor tuum; ibi est tutissimum refugium meum, ibi requies mea; hoc in nidulo vivere volo, & mori desidero. Quem, hâc fortitudine vallatus & custoditus, timebo?

Sed quoniam sæpissimè nescio quid petam, da mihi quod mihi magis expedire scis ad gloriam tuam; da mihi scientiam Sanctorum, scientiam salutis, & scutum bonæ voluntatis. Custodi inter tot pericula animam meam; da ut sanctus sim, quia tu sanctus es; fac me dignum sacris altaribus tuis Ministrum, & Pastorem juxta cor tuum. Cùm sim Nazaræus, & Sacerdos secundum ordinem Melchisedech, in nullo afficiar

nisi in te ; perdere sciam in hoc mundo animam meam , ut eam in vitam æternam custodiam.

Sed quid peto ? Amorem tui solum cum gratiâ tuâ mihi dones , & dives sum satis , nec quidquam ultra poscam.

O unum necessarium ! Hoc unum volo , unum quæro , Deum meum & omnia.

Heu mihi ! Illud vitium N. , quo laboro , tibi multum displicet , & mihi maximè nocet ; illa virtus N. quæ mihi deest , tibi multum placet , & mihi admodum necessaria est. Da mihi ergò gratiam ut hunc defectum vincam , & hanc assequar virtutem ; hanc à te spero victoriam. Ego quoque contendam hoc exterminare vitium , & istam acquirere virtutem ; quapropter exercebo per diem hanc mortificationem N. , eliciam hunc actum N. huic vitio contrarium ; fugiam hanc occasionem N. Hæc omnia etiam præstare propono , in gratiarum actionem pro beneficio sacrificii & communionis hodiernæ. Da ut fidelis sim in proposito meo , & ut tandem victor , ac de manu inimicorum meorum liberatus , moriar morte justorum , & coroner in patriâ.

Et quoniam dives es in omnes qui invocant te & pro quibus te oramus ; & cum te nunc possideam gratiarum fontem , illumina , quæso , infideles te ignorantes ; revoca hæreticos & schismaticos ; converte miseros peccatores ; indue Sacerdotes sanctitate tuâ , ut sancti ipsi , populos sanctificent. Famulum tuum Papam nostrum N. ; Antistitem nostrum N. , & Regem nostrum

N. & suam prolem regiam ab omni adversitate custodi. Adesto parentibus, propinquis, benefactoribus, & inimicis meis, ac ovibus mihi commissis. Miserere omnium pro quibus orare debeo, & tu rogari vis. Da vivis veniam, gratiam, & perseverantiam finalem; da fidelibus requiem lucemque sempiternam. Amen.

Memento per diem hujus immensæ charitatis propter quam Dominus Jesus visitavit te. Quapropter, elice interdum actus jaculatorios sacrificio & communioni congruentes; hos præsertim quos suggeret unctio spiritûs. Cave aridum sacrificandi & communicandi usum; vilesceret tandem in te hoc maximum opus. Sed potius, ex sanctitate tuâ in dies crescente, cognoscant omnes qui te viderint, & quibuscum conversaris, te accepisse & quotidie accipere ipsum sanctitatis fontem. Ecquid? Cum sancto sanctum non esse? O monstruosa res! ô res plena periculi! Cujus est imago hæc? Qui legit, intelligat & sibi caveat.

ARTICULUS IX.

Studium & scientia.

NUllus præsumat ad Clericatûs ordinem illiteratos promovere, quia litteris carens non potest esse aptus mysteriis. *Gelas.*

Attamen, charissime Frater, si jam sis sacris initiatus, memineris te esse Angelum Domini, in ministerium, propter eos qui hæreditatem capiunt salutis, missum; & te debere illuminare hos qui in tenebris se,

dent ; undè , debent labia tua custodire scientiam , ut potens sis exhortari in doctrinâ sanâ , & eos qui contradicunt arguere.

Quis hoc neget ? In magnâ ergò temeritate Magisterium ab imperitis suscipitur , quia ars artium est regimen animarum. *S. Greg.* Si cæcus cæco ducatum præstet , nonne ambo in foveam cadunt ? O quàm multa malorum & hæresum monstra orta sunt ex Clericorum imperitiâ , in Ecclesiâ Dei ! ignorantia siquidem , cunctorum est mater errorum. *Conc. Tolet. IV.*

Dices forsan , te non egere studio & scientiâ , eò quòd animarum curam non susceperis ? Erras. Scias te non exiguâ egere scientiâ , ut ea quæ statum sacerdotalem concernunt , callere & adimplere possis. Nonne tamen nova , curiosa , vana , & faceta , avidè legis & disertè narras ; salutaria autem & necessaria fastidis & ignoras ? O præclarum Ministrum formidandis deputatum mysteriis ! Veriùs loquamur : undè profluunt tot Clericorum scandala , nisi quia , velut homines animales , non percipiunt ea quæ spiritûs Dei sunt , & quia nolunt intelligere ut benè agant ?

Quousquè tandem & tu ipse marcebis ignaviâ , & hinc laborabis ignorantia ? Nonne ignorans ignoraberis ? An-non , scientiam repellens , repelleris ipse ne Sacerdotio fungaris Deo tuo ? Tolle ergò ex nunc , tolle & lege hos libros quos tibi tuoque statui magis congruere noveris ; hæc volumina comede. Studium tamen oratione

condire satagas maximè expedit, & scientiam charitate ædificare contendas. Quare? Quia tam vitâ quàm doctrinâ clarere debet Ecclesiasticus Doctor; nam doctrina sine vitâ, arrogantem reddit; vita sine doctrinâ inutilem facit. *S. Isid. Hispal.*

ARTICULUS X.

Bonum exemplum.

HÆc meditare, in his esto, ut profectus sit omnibus manifestus.

Nihil est quod alios magis ad pietatem & Dei cultum assiduè instruat, quàm eorum vita & exemplum qui se divino ministerio dedicaverunt; cum enim Clerici in altiore sublati locum conspiciantur; in eos, tanquàm in speculum, reliqui oculos conjiciunt, ut ex iis sumant quod imitentur. Quapropter, sic detet omninò Clericos in sortem Domini vocatos, vitam moresque suos ita componere, ut habitu, gestu, incessu, sermone, aliisque omnibus, nihil nisi grave, moderatum, ac religione plenum præ se ferant. Trid. Sess. 22. de ref. c. 1.

O nimis beatus populus qui hoc speculum præ oculis semper habet! *salus enim populorum, Sacerdotes boni.* Quapropter, charissime Frater, cum sis lux mundi & sal terræ, in omnibus temetipsum præbe exemplum bonorum operum, in doctrinâ, in integritate; modestia tua nota sit omnibus hominibus; jam omnes qui viderint opera tua, glorificabunt Patrem tuum qui in coe-

lis est ? Quare ? Quia approbata conversatio , & irreprehensibilis vita , prædicatio efficacissima esse censenda est. *S. Laur. Just.* Quinimò , bonum exemplum est veluti perpetuum quodquam prædicandi genus. *Trid. Sess. 25. de ref. c. 1.* Huic profectò prædicationi vix resistere possunt ipsi effrænati populi.

E contrà , si exemplo non firmaveris quod sermone prædicas , aërem verberabis , & fiet verum istud : *sicut tu Sacerdos nequam es , sic populus nequam erit.* Undè si dicis & non facis , te ne verba quidem facere convenit , sive quia vix proficis , sive quia te ridiculum præbes , & litteras mortis tuæ portas. Et verò , dùm in Ecclesiâ loqueris , tacitus quilibet respondet : cur ergò hæc quæ dicis , ipse non facis ? *S. Hier.* An decet avarum & latronem objurgare alium avarum & latronem ? Sed heu ! audi ipsum Deum te his verbis increpantem : *quare tu enarras justitias meas , & assumis testamentum meum per os tuum , intereadum ipse odis disciplinam ? Ex ore tuo te judico , serve nequam.*

Hanc ut effugias divinam ultionem , da operam ut sis irreprehensibilis , lucerna lucens & ardens , bonus odor Christi in omni loco , forma gregis ex animo , & exemplum fidelium , ut is qui ex adverso est vereatur , nihil habens malum dicere de te. Prætereà , bonus pastor cùm proprias oves emisserit , ante eas vadit , & oves illum sequuntur , quia sciunt vocem ejus. Si fueris pastor juxta cor Dei , eris quidem potens in

sermone , sed potentior in opere ; nam si in Domino glorians , verè dicere possis : *In plateis , sicut cinnamomum & balsamum aromatisans , quasi myrrha electa , dedi suavitatem odoris* , tunc , quàmvis parùm prædicaveris , erit populus sanctus , quia tu Sacerdos sanctus es.

Attamen , modis omnibus efficias ut vita tua abscondita sit cum Christo in Deo , & ut coram illo sanctior sis quàm coram hominibus. Quapropter , sit opus tuum in publico quatenùs intentio maneat in occulto , ut & de bono opere proximis præbeas exemplum , & tamen , per intentionem , quâ Deo soli placere quæris , semper optes secretum. *S. Greg.*

ARTICULUS XI.


Canonum observatio.

S Ciant universi , sacratissimos Canones exactè ab omnibus , & quoad ejus fieri poterit , indistinctè observandos. Quòd siurgens justaque causa , & major quandòque utilitas postulaverit cum aliquibus dispensandum esse , id , causâ cognitâ , ac summâ maturitate , atque gratis à quibuscumque ad quos dispensatio pertinebit , erit præstandum ; aliter facta dispensatio , subreptitia censeatur. Trid. Sess. 25. de ref. c. 18. Hæc ad nostram doctrinam scripta sunt , ad aliorum ædificationem.

Quot tamen sunt Clerici qui Canones non modò numquàm legerunt , sed etiam ,

qui neque si existant Canones , audierunt. Quot sunt qui , ut Filii Belial , id est , absque jugo , non erubescunt dicere in corde suo , & interdum palam omnibus : *projiciamus à nobis jugum ipsorum ; sequamur viam spatiosam ?* O frontosa temeritas ! Ecquid ? Ipse Dominus Jesus non venit solvere legem , sed adimplere ; numquid erit supra Magistrum servus ? Num erit impunitus Canonum & Statutorum transgressor ? Minime : Quare ? Quia Canones & Statuta sunt vitæ nostræ regula , & quia ex illorum transgressione , & præsertim ex illo contemptu , nascuntur tandem abominationes , scandala , vitia horrenda nimis in Ecclesiâ Dei. Hæc vitiorum monstra vident ipsi Laïci , & dolent ; Clerici verò , nec ea dolent , nec advertunt. O periculosa caligo !

Divinorum Canonum prævaricator , time hanc desolationem , hancque abominationem quæ à minimis incipit. *S. Bern.* Sic censebis in horâ mortis ? Tunc , heu ! præ angustia gemes & ululabis. Erit-ne tunc lugendi tempus ? Ingemisce nunc , & lege hos Canones qui ad te spectant , eosque accuratè observa , simul & Statuta Dioceseos , quia obligant in conscientia. Fuiſti aliquandò tenebræ , nunc sis lux in Domino. Utinam id protinùs fiat !



ARTICULUS XII.

Ritus, Cæremoniæ, & Rubricæ.

Audite, Sacerdotes, verbum Dei.

C*U*stodi præcepta & cæremonias, atque iudicia quæ ego mando tibi hodiè ut facias. Deuter. 7. Quòd si nolueris audire vocem Domini Dei tui, ut custodias & facias mandata ejus, & cæremonias quas ego præcipio tibi hodiè, venient super te omnes maledictiones, & apprehendent te. Ibid. 28. Hæ maledictiones venerunt super Nadab & Abiu, filios Aaron, eosque apprehenderunt; nam, arreptis thuribulis, posuerunt ignem & incensum desuper, offerentes coram Domino ignem alienum, quod eis præceptum non erat; egressusque ignis à Domino, devoravit eos, & mortui sunt coram Domino. Lev. 10. Hæc in figuris contigerunt illis. Quid fiet de Sacerdotibus novæ legis?

Si quis dixerit, receptos & approbatos Ecclesiæ Dei Catholicæ ritus, in solemni Sacramentorum administratione adhiberi consuetos, aut contemni, aut sine peccato à Ministris, pro libito omitti, aut in novos & alios, per quemcumque Ecclesiarum Pastorem mutari posse, anathema sit. Trid. Sess. 7. can. 13.

Qui legit intelligat & paveat; præsertim, si ex rituum transgressione, oriatur contemptus, scandalum, &c.

Videte, Fratres modicæ fidei, videte quâ reverentiâ & magnificentiâ serviatur

Regibus terræ. *Si pater ego sum, dicit Dominus exercituum, ubi est honor meus? Et si Dominus ego sum, ubi est timor meus? ad vos, ô Sacerdotes, qui despicitis nomen meum. Malach. 1.*

Quòusque tandem ansam dabimus gentibus dicendi: *ubi est Deus eorum?* Inhonoramus siquidem Deum ipsismet nostris obsequiis. Maledictus tamen qui facit opus Dei negligenter: Deus non irridetur.

Prætereà, fides est argumentum non apparentium. Si ergò nos Sacerdotes non demus operam ut invisibilia Dei, per rituum, cæremoniarum, & rubricarum observationem intellecta conspiciantur, quomodò fideles docebuntur res divinas? quomodò ad earum amorem, & ad eas dignè tractandas excitabuntur fervidi?

Eia ergò, studeamus rubricis & cæremoniis, easque adeò fideliter custodiamus, ut iota unum, aut unus apex non prætereat à lege. Luceant sanctimonia & magnificentia in sanctificatione Dei nostri. Sancta sanctè. Omnia honestè & secundum ordinem fiant, in gloriam Dei, & in ædificationem Corporis Christi, ut in omnibus honorificetur Deus per Jesum Christum.

Verùm, satagamus ut dùm ritibus & rubricis fideliter inhæremus, adoremus Patrem in spiritu & veritate, ne simus similes sepulchris dealbatis.



ARTICULUS XIII.

Vestis clericalis. Tonsura, & coma congruentes.

ET si habitus non faciat monachum, oportet tamen Clericos veste proprio congruentes Ordini semper deferre, ut per decentiam habitus extrinseci, morum honestatem intrinsecam ostendant. *Trid. Sess. 14. de ref. c. 6.*

Vide in eodem capite, pœnas transgressoribus imminentes.

Totus Clericalis vestitus, ostentationem, luxum, & quidquid novum, inane, exquisitum, sumptuosum est, nesciat. *Conc. Nuceri.* Non pannosi, sordidi, aut laceri vestibus incedant. *Hier. conv. medol.* In omni vestitu color niger adhibeatur. *Conc. Mediol. & alia passim.* Habitu talari, tum domi, tum foris utantur. *Concil. Mediol.* Undique clausa desuper deferant vestimenta, tam retrò, quàm à lateribus, & ante. *Conc. Later. IV.* Comam & tonsuram, patentibus auribus, habeant congruentem. *Conc. passim.* Crines calamistratos & tetortos non habeant. *Conc. Bitur.* Comam nestudiosè nutriant; capillis simplicem cultum adhibeant. *Conc. Mediol.*

Ecce tibi quomodo Concilia & Statuta, decentiam, & simplicitatem Evangelicam commendant & præcipiunt. Quid est ergò cur eorum documenta & iussa parvipendis? Forsan, quia contraria consuetu-

do jam multum viget? Misera & pestifera defensio! Commentitium vanitatis tuæ firmamentum! An idcirco consuetudini adhærendum est? Minimè. Quarè? Quia Christus se veritatem dixit, non verò consuetudinem. *Tert.* Si ergò salutem tuam in tuto collocare velis, certam veritatem omninò inquirere debes, & non respicere quid multi hoc tempore dicant aut faciant. *Bellar.* Quarè? Quia consuetudo sine veritate, vetustas erroris est. *S. Cypr.* & spatiosa via ad perditionem ducens.

Intelligite etiam hæc, vos omnes qui erubescetes evangelium, non timetis conformari huic sæculo cui in Baptismate & in sacrâ Unctione renuntiastis. Nonne fatiùs esset in sæculo manere, quàm in ipso sanctuario, & sub paupere ac nudo Christo, fatuum vanarum mulierum luxum ostentare, histrionum personam gerere, & vanitatem publicam ac ostentationem confirmare ac fovere? Nonne publicum subeuntes, compositi & circumornati ut similitudo templi, vos ipsi rudi populo ridiculos præbetis?

Verum, ô insensati, quis vos fascinavit adhærere vanitati, veritati autem non obedire non induendo modestiam Electorum Dei, & Pastorum juxta cor ejus? Nonne expoliastis vos tunicâ vestrâ? Quomodò adhuc induimini eâ? Verum, audite oraculum Dei: & erit in die hostiæ, visitabo super omnes qui induti sunt veste peregrinâ. *Soph. 8.* Super quem visitabit? Super actualem lectorem, si lectis & auditis

his Ecclesiasticis Sanctionibus , fatuas vestium pompas adhuc sectari temerarius velit. Numquid has pompas post mortem secum sumet? Heu! minimè; eas alienis, aut tineæ relinquet. Væ illi, si virtutum ornamenta ante tribunal Christi secum non portet! Quid sua sibi tunc proderit fatuitas? Hoc seriò secum cogitet.

ARTICULUS XIV.

Reverentia in Ecclesiis.

Sanctuarium meum metuite, dicit Dominus. Pavete ad Sanctuarium meum. Dignum & justum est; quippè terribilis est locus iste; non est hic alius nisi domus Dei, domus orationis, & porta cœli. Locus iste sanctus est, in quo orat Sacerdos pro delictis & peccatis populi. Nonne ergò decet hanc Dei domum sanctitudo in longitudinem dierum? Quis ambigat? Verùm, quis Deo, in Ecclesiis reverentiam præcipienti, non obediat?

Hæc & alia sæpè legunt & proclamant ipsimet Sacerdotes; nonne & tu, charissime Frater, eadem legis & proclamas? Nonne Laicos in Ecclesiâ garrientes molestè interdum fers & acriter objurgas? Profectò. Quâ ergò temeritate domum Dei ipse facis domum negotiationis, & speluncam latronum, ac scandalizas in Dei tui sanctuario eosdem Laicos? Quodnam, supra illos, ibi garriendi privilegium habes? Nullum. Si ergò garrere velis, numquid

non habes domos ad confabulandum ? Quid est cur ipse , Dei dilectus , Ecclesiam ejusdem Dei contemnis ? Parùmne est quòd alibi pecces in Dominum Deum tuum , & delinquere facias populum ejus ?

Verùm , quâ fronte sic interdùm psallis : *Introibo , Domine , in domum tuam ; adorabo ad templum sanctum tuum in timore tuo ?* Nonne reprehendit te cor tuum ? Deus , cui irridere videris , patienter nunc agit ; sed veniet tandem dies ultionis ; ipsius sanctuarii lapides clamabunt adversus te. Ecquandò ergò aberit à loco sancto illa desolationis abominatio ?

Sed , undè fit ut sanctuarium Dei jam non amplius dijudices , & ut tandem vilescat tibi terribilis ille locus ? Undè ? nonne hinc quia in illud non intras nisi ex arido usu , aut nisi propter temporale lucrum ? Ita sanè. Id experienciâ constat.

Tuam ergò excita fidem. Si mediteris hæc omnia , charissime Frater , nonne tunc ages poenitentiam , & fies in animo contrito , reconciliatio pro te & pro aliis quos in templo Dei scandalifasti ? Nonne in posterum pavebis ad sanctuarium Dei , ubi tremunt Angelicæ potestates ? Annon modestia tua nota erit omnibus hominibus ; maximè in Ecclesiâ , ut cæteri etiam paveant & glorificent Deum in hoc præsertim orationis loco ? Imò , ad hæc omnia te viva ductura est fides.



ARTICULUS XV,

ARTICULUS XV.

Ecclesiarum nitor.

Dilige decorem domûs Dei. Quapropter, sollicitus sis si niteat altare; si parietes & pavimenta purgentur; si vasa luceant; si sacrarium, si lintheamina sacra, fontes baptismales, & vestes sacerdotales sint munda & decora. *S. Hier.* Hæc enim sunt imagines fidei, & incitamenta pietatis. *Trid.*

Interdum accidit ut privata domus Parochorum & aliorum Clëricorum, eorumque vestes reluceant, intereadum Domus Dei, purificatoria, & alia lintheamina sacra, ac vestes quæ sacrificio divino serviunt, sint pannosa, lacerata, & sordescant incuriâ eorundem Parochorum & aliorum Presbyterorum. Proh pudor! Quid sapit illa negligentia? Quid redolet ille contemptus? Tu videris.

O charissime Frater! si fidem haberes, si Deum timeres, nihil certè negligeres. Igitur, resipisce, & da operam ut tota Ecclesia, vestes sacerdotales, & alia omnia ad cultum Dei tantillum spectantia, perluceant: Quantum poteris, tantum aude. Quid hâc curâ diligentiaque dignius?



ARTICULUS XVI.

Eleëmosyna.

Quid sunt Ecclesiæ redditus ? Quid ? Vota Fidelium , pretia peccatorum , & patrimonium pauperum. *Concilia passim.* Quis hoc ignorat ? Nemo. Hoc omnes proclamant Clerici. Nonne ergò sciunt se mortaliter peccare , saltem contra charitatem & contra Religionem , si partem fructuum honestæ sustentationi superfluum , in pauperes , vel in alios pios usus non impendant ? Hoc quidem sciunt ; attamen quot inter illos sunt qui illusionibus impleti , & qui aliis , sibi que imponentes , se illius peccati mortalis , conscios numquàm credunt , quàmvis illis etiam specialiter dicatur : *Tibi derelictus est pauper , orphano tu eris adiutor.*

Has tu , charissime Frater , illusiones cave. Quapropter eleëmosynam in sinu pauperis conclude , & hæc orabit pro te. Si multum tibi fuerit , abundanter tribue ; si exiguum , & illud libenter impertire. Cave ne ex redditibus Ecclesiæ , consanguineos , familiaresve tuos augere studeas , cum & Apostolorum Canones prohibeant ne res Ecclesiasticas , quæ Dei sunt , consanguineis dones ; nec eas , eorum causâ , dissipēs. Sed , si pauperes sint , eis ut pauperibus distribue. *Trid. Sess. 25. de ref. c. 1.* Absit etiam ne easdem res Ecclesiasticas , luxu , comestationibus , aleis , choreis & lusibus dissipēs ; hoc tibi omninò interdi-

citur. Undè, quot Clerici periclitantur ? Cave ne cum illis in falsam conscientiam, & in damnationis æternæ periculum prolabaris.

Memineris tuum esse, pauperum, aliarumque personarum paternam curam gere. *Trid. Sess. 23. de ref. c. 1.* Væ tibi, si videns jacentes in januâ tuâ Lazaros, viscera misericordiæ ab eis inclemens clauderis ! Nonne hi egeni & pauperes, quos occidis quia hos non pascis, stabunt in magnâ constantiâ adversus te qui eos angustiaxisti ? Nonne stabit pro eis Pater orphanorum & iudex viduarum ? Nonne te confringent & conturbabunt hæc formidolosa verba quæ incogitanter legis, nimirum : *Quamdiu non fecistis uni de his minimis, nec mihi fecistis ; discedite in ignem æternum ; esurivi enim ?* &c. Quid cogitas ? Quid agis, si hanc capiti tuo imminentem sententiam avertere non satagas ?

Hanc ut evadas ultionem, declara in confessione tuam bonorum Ecclesiæ dilapidationem, tuamque in pauperes crudelitatem. Sis deinceps verus pater pauperum. Aufer, aufer superflua, & nulli deerunt necessaria. *S. Bern.* Duritiam tuam præteritam, & alia peccata, eleëmofynis redime ; eleëmofynas tuas enarrabit Ecclesia Sanctorum ; & de te verè dicetur : *Dispersit, dedit pauperibus, justitia ejus manet in sæculum sæculi.* O verba bona ! O verba consolatoria ! O nimis beatus qui intelligit super egenum & pauperem !

ARTICULUS XVII.

Animarum zelus.

Quid sublimius eorum vocatione qui ad salutem vel unius animæ procurandam feliciter destinantur? Quid enim est anima? Quam Deus ad imaginem & similitudinem suam creavit, & quam Christus Dominus, ex ardentissimo amoris sui zelo, in sanguine suo emit, desponsavit & abluit. Quid est gratia Dei, in quâ salus animæ, hæc in vitâ consistit? Quid sempiterna felicitas, in quâ, post hanc vitam, consummata salus sita est? Quid verò, ex aliâ parte, est offensa Dei & peccatum? Quid pœna sensûs? Quid pœna damni? Quis hæc omnia perfectè intelligat? Ergone, ignem devorantem & ardores sempiternos ab animâ avertere, eique perfectam & interminabilem Dei fruitionem procurare, exigui potest esse momenti? Verius dicamus: quid hoc opere nobilius? Quid Deo charius? Quid tantæ satisfactionis, tantique meriti? Si magnam illi mercedem percipiunt, qui operibus misericordiæ corporalis se impendunt; quantò maiorem, qui admonendo & docendo, in viam salutis æternæ alios perducunt? Quantò enim anima corpore præstantior est, tantò maioris meriti est auxilium quod animæ impenditur. Undè rectè asserit D. Dionysius: *Omniū divinorum est divinissimum, Deo cooperari in salute animarum.*

Undè, administratori Spiritûs, Apostoli, & alii veri homines Dei, zelo zelati pro Domino Deo exercituum, & in ministerium missi propter eos qui hæreditatem capiunt salutis, non faciebant animam suam pretiosiores quàm se, dummodò consummarent ministerium suum, renovarent faciem terræ, & pararent Domino plebem perfectam. Væ mihi, inquit Apostolus, si non evangelisavero: necessitas mihi incumbit! Undè incitabatur spiritus in ipso, videns idololatriæ deditam civitatem.

Tandem, quicumque spiritum Christi habuerunt, animas, in Christo, magnâ charitate dilexerunt; & pro eisdem, utpotè sanguine Christi redemptis, sanguinem suum ultrò fuderunt. *Quale mihi damnum*, dicebat ex ardenti animarum zelo, sancta Theresia, *quale mihi damnum, aut cur conqueri debeo, licet usque ad diem judicii pœnas Purgatorii sustinere mihi oporteat, modò per illud consequar quòd anima una salvetur; quantò ergò magis si agatur de plurium animarum lucro, id vereri nequaquàm deberem?*

Verùm, quonam fato refrigescit in nobis charitas & zelus Patrum nostrorum, quos zelus domûs Dei comedebat? Messis quidem multa, operarii autem pauci; cadit asina, & est qui sublevet; cadit anima, & non est qui reputet. *S. Bern.* Perit justus, & non est qui recogitet in corde suo! Proh dolor!

Tu verò, charissime Frater, vide & in-

tellige quanti valeat anima pretioso Agni immaculati sanguine redempta. Nonne tunc zelans zelum Dei, erues eos qui ducuntur ad mortem? Num, eos qui trahuntur ad infernum, liberare cessabis? Quantâ alacritate quæres Fratres tuos, & oves quæ perierunt? Quo fervore docebis iniquos vias Dei, catechisabis infantes & rudes? Quâ simplicitate, quo candore parvulus fies in medio eorum, tanquàm nutrix fovens filios suos? Quantâ benignitate, patientiâ, & doctrinâ argues, obsecrabis, & increpabis ipsos lumini rebelles? Quàm suaviter & fortiter omnibus omnia factus?

Domine, qui amas animas, da mihi amorem tui, ut postea ferventer dicam: *Dâ mihi animas; cætera tolle tibi.* Excita insuper torpescientes Sacerdotes ad te sincero cordis affectu amandum; si enim amaverint te, nonne animas à te ita dilectas & in amorosis tuis visceribus pretiosas, ardentè amabunt? Nonne hunc prævium habentes amorem, illarum conversioni, sanctificationi, & saluti totis viribus vacabunt? Omnia siquidem vincit amor; nescit molimina amor. Utinam ergò, tuo excitati amore & adusti, agonizemur omnes pro justitiâ tuâ, consumamur certatim pro gloriâ tuâ, pro nostrâ omniumque salute. Amen.



ARTICULUS XVIII.

Signa puri gloriæ divinæ zeli.

I. **S**I in ministerium verbi te ipse non ingeras ; uno verbo , si nihil nisi vocante Deo , & suadente Directore tuo , suscipias , aut agas. Quidquid enim ex propriâ fit electione , propriam voluntatem redolet. Quò ducit propria voluntas ? Ad illusionum abyssum ; & hinc , quò ? Ad infernum , teste D. Bernardo.

II. Si pueris , rudibus , & pauperibus æquè libenter evangelizes , ac senioribus , doctis , & eximiis viris. Item , si horum omnium confessiones audiendi , omnesque infirmos & agonizantes tuis adhortationibus & precibus adjuvandi æqualiter avidus sis. Reverà , est-ne apud Deum personarum acceptio ? Nonne tanto emptus est pretio pauper quanto dives ?

III. Si ob audientium paucitatem aut duritiem , animo non cadas ; præsertim , quandò ex tuâ parte egisti quidquid ad istorum conversionem necessarium existimasti. Numquid curationem à te exigit Deus , Minimè. Cur ergò curâ tuâ contentus non esses ?

IV. Si zelus tuus sit pacificus , quietus , mansuetudine ac compassione plenus ; si verò in auditores acriter insurgas ; si eorum infirmitatibus compati & condolere nescias , numquid Dei spiritum habes ? Minimè. Quare ? Quia non in commotio-

ne Dominus. Quid illo erga peccatores mansuetius fuit ? Quid benignius ?

V. Si Deo placere quærens , & non hominibus ; si Jesum-Christum crucifixum prædicare intendens , & non teipsum , te auditorum captui , omnibus omnia factus , accommodes , quidquid dixerint magistri auribus prurientes ; quidquid exigant auditores , lenociniis delectari & demulceri cupientes.

VI. Si æquè libenter prædicaveris quando tibi datur retributio & stipendium , quàm quando non datur. Et verò , quidni tibi sufficiat Deus , pro cuius gloriâ laboras ? Nonne satis honorificum tibi est eadem procurandæ gloriæ vacare ?

VII. Si animæ tuæ saluti & perfectioni , priùsquàm alienæ , provideas. Undè , si propter instituendas , ediscendas & prædicandas conciones ; te ipsum sensuum ac cupiditatum tuarum mortificationem negligas ; si ob eandem causam , exercitia spiritualia , scientiam , casuum conscientiae , rubricarum , &c. fastidias ; nonne claudicat , malè olet , & suspectus est zelus tuus ? Debes quidem diligere proximum tuum sicut teipsum , sed non magis quàm teipsum. *Prior est regula quàm regulatum.* Prætereà , quid prodest homini si , &c.

VIII. Si in ovium tibi commissarum curam ferventiùs quàm alienarum incumbas. Undè , si pro salvandis extraneis , populum tibi demandatum derelinquas & negligas , nonne deplorandus est zelus tuus ? Memineris Parochiam esse villicationem

illam de quâ , & non de aliis , strictissimam rationem reddes. Quid ergò ad te de his qui foris sunt , in tuorum detrimentum , judicare ?

IX. Si aliorum concionibus non intersis ob curiositatem , vel eos in sermone capiendi , te ipsis præferendi , eosque aspernandi causâ ; sed in simplicitate & humilitate parvuli , te ædificandi gratiâ.

X. Si læteris quòd focii in ministerium verbi jungantur tecum ; præsertim , si ob aliorum eminentiorem eloquentiam & uberiorem fructum , invidiæ livore non tabescas ; è contra , si exemplo Moysis , Præcursoris , & Apostoli Pauli , de his omnibus similiter , & plus si opus sit , gaudeas , quasi de datis tibi talentis , & de fructibus quos iisdem talentis ipse affers. Item , si fortiter & sincerè asseveres te nihil aliud cupere , nisi ut omnes prophetent , & ut inde , qualicumque modo , cognoscatur , ametur , & honorificetur Deus ; & si ob eam causam , testificeris coram Deo & hominibus , te esse semper paratum ad media confratribus tuis exhibenda ut gloriam Dei promoveant ; ita ut hæc media petentibus , hilari & aperto corde suppedites , quàmvis id non nisi cum gloriæ tuæ detrimento fieri certò scias. Durus est hic sermo ; durior praxis ; sed quibus ? Illis , qui Evangelicæ abnegationis excellentiam & meritum ignorant , ejusque usum non habent. O insanum gloriæ propriæ desiderium ! Quot Clericos & concionatores il ludis , fascinas & perdis ?

XI. Si confratrum tuorum consilia, con-
 ciones, aliaque opera, utpotè rationi &
 recto proborum Deique judicio consenta-
 nea, & ut talia ab illis approbata, permag-
 ni tu etiam, ut propria facias, plurimùm-
 que, si se dederit occasio, exaltes; tua
 verò opera defectibus referta existimans,
 parvi facias, aut saltem ea silentio præte-
 reas, eaque abscondita esse desideres, ne
 scandalum pariant; & ut te servum inuti-
 lem, ore, corde, & animo omnes repu-
 tent, ac in minimis habeant. E contrà, si
 confratrum consilia, opera, &c. quàmvis
 à majori & saniori parte laudata, lividis &
 torvis oculis respiciens, improbes, eaque
 clam & palam asperneris: tua autem dum-
 taxat, quàmvis forsan deformia, ad sydera
 usque exaltes; nonne petulans Pharisei tibi
 dominatur arrogantia? Annon serpentina
 Cain & non moritura, constrictum te tenet
 invidia?

XII. Si propter infirmitatem, obedi-
 tiam, aut ob alia impedimenta, ab honori-
 fico ministerio lætanter desistas, ut super
 doloris lecto patiaris multa, vel ut infima
 ministeria obeas, quàmvis hinc oblivioni
 dandus sis tanquàm mortuus à corde; quin-
 imò, quàmvis si ita loqui liceat, faciendus
 postea sis opprobrium hominum & abjec-
 tio plebis, feliciter ratus tuam perfectio-
 nem, omnesque cordis tui delicias, con-
 sistere in adimplendâ, juxta beneplacitum
 Christi, voluntate Dei, quoquo modo id
 fieri debeat.

XIII. Si vel vanitatis vel confusionis sti-

mulo, eò quod benè aut malè successeris non pungaris; nec benedictione movearis, nec maledictione. Quod si propter plausus tibi blandiaris & ad prædicationem anheles avidius; aut si propter aliquam quam passus es humiliationem, prædicationem fastidias, & ab eâ desistere cures; verè te ipsum, non Deum quæris.

XIV. Si in omnibus consiliis, propositis, & actibus tuis, beneplacitum Dei magis intendas quàm felicem exitum. Enim verò; si illud Dei beneplacitum quæsieris, quid tuâ interest, ut consilia tua infeliciter ceciderint? Nonne Deus tuâ contentus voluntate, hoc infausto exitu glorificari vult? Nonne tutius est tibi bonæ voluntatis homini, de fausto decidere exitu?

XV. Si ea quæ ex obedientiâ facienda sunt, æquè hilariter exequaris, ac ea quæ ex electione fiunt.

XVI. Si munia & exercitia tua non minùs diligenter & sanctè coram Deo solo adimpleas, quàm coram hominibus.

XVII. Si, quàmvis bonum exemplum præbere debeas, secretum tamen optans, modis omnibus efficias ut soli Deo innotescant opera tua, & molestè feras quòd populo nota fiant.

Vide nunc, charissime Frater, utrùm Deo placere hucusque satageris an tibi & hominibus; utrùm thesauros tibi in cœlis thesaurizaveris, an paleas tibi coacervaveris ad comburendum igni in inferno, aut saltem in purgatorio. Nonne super ipsis bonis operibus tuis poenitentiam agere forsan te-

neris? Si res ita sit, hanc protinus poenitentiam age, & semitas tuas rectiores in posterum facito. Quid quæris præter Deum tuum, & animæ tuæ perfectionem & salutem?

ARTICULUS XIX.

Prædicatio verbi divini.

QUàm speciosi pedes evangelisantium pacem, evangelisantium bona? Quis non properet prædicare verbum omni creaturæ, ut ad Deum, ipso Domino cooperante, impios convertat, ad iustitiam multos erudiat, & ut ipse, post confirmatos fratres, sicut stellæ, in perpetuas æternitates fulgeat? O utinam in omnem terram exiret Christi Ministrorum sonus, & in fines orbis terræ verba eorum! Quomodo enim audient populi sine prædicante? Verum, post enucleata & inculcata, ubi de animarum zelo, ad hanc verbi divini prædicationem incitamenta, quid nunc superest, nisi ut piè & fructuosè prædicandi exhibeamus praxim?

P A R A G R A P H U S I.

Regulæ ante concionem observandæ.

I. Cùm ad prædicationem Evangelii exigatur industria personarum pollentium ætate, gravitate morum, vitæ sanctitate, & sermone, juxta Conc. Ravennat. & cùm

periculosum sit neophytis & nondum in sanctâ Religione formatis, in publicum exire, & perfectorum officia usurpare, ut loquitur Petrus Blesensis; cave, charissime Frater, ne ad prædicationis ministerium admittaris, si trigesimum non attingas annum. *Conc. Raven.* Illud insinuat Apostolus, qui Timotheum instruens, qualem in ministerium verbi Dei eligere deberet, dicit: *non neophytum, ne elatus, in superbiam incidat, & in laqueum Diaboli.* Idipsum confirmat exemplo suo Redemptor noster, qui cum in cœlis sit conditor, & ostensione suæ potentiae semper doctor Angelorum, ante trigesimum ætatis suæ annum in terrâ magister noluit fieri hominum, ut videlicet, præcipitatis vim saluberrimi timoris infunderet, cum ipse etiam, qui labi non posset, perfectæ vitæ gratiam non nisi perfectâ ætate prædicaret. S. Greg. Papa.

Quid ad hæc respondes, præsumptuose, & præmature nimis concionator; qui multò veriùs quàm Jeremias dicere tenebris: *a, a, a, Domine Deus: ecce nescia loqui, quia puer ego sum?* Tu præsertim, qui è pestilentiae cathedrâ, ad seniorum cathedram, stimulante superbiâ, effrænate protinùs convolas? Nonne hoc exemplo devoratur sapientia tua? Nonne hunc intempestivum & voracem prædicandi zelum ægrè ferre & dolere coguntur saltem interiores viri? Sed heu! Cum te teneat superbia, iudicio tuo pertinaciter adhæres. Proh cæcitas? Nonne hæc te parvulum ad petram allidet præsumptio? *Vide dicta, ubi de Seminario. pag. 5.*

II. Quàmvis jam competentem habeas ætatem , cave ne in ministerium verbi te ipse ingeras. Quapropter , audi attentè divina oracula. *Pauperibus evangelizare misit me.* Luc 4. *Ego vos elegi ut eatis & fructum afferatis , & fructus vester maneat.* Joan. 15. *Quomodò prædicabunt , nisi mittantur?* Rom. 10. Innumera alia hùc spectantia omittimus testimonia.

Quâ ergò fronte prædices , nisi missus fueris ? Quâ temeritate , legem pro Apostolis & pro ipso Dei Filio conditam , transgrediaris ? Numquid ad animarum salutem illo aptior es ? Si non acceperis Apostolatam & gratiam à Jesu Christo , qui hos ad se vocat quos vult ; è contrà , si stimulante desiderio teipsum mundo manifestandi , lucrandi , & loculos habendi , prædices Evangelium , an speras te multum allaturum esse fructum ? Erras , præsumptuose , erras. Reverà , clama , ne cesses ad ravim usque vociferare , eris velut æs sonans aut cymbalum tinniens ; planta & riga quoad volueris , Deus qui te non vocavit , non dabit incrementum ; prædicationes & fatigationes tuæ cadent in sterilitatem & confusionem animæ tuæ , & in populorum detrimentum. Ne credideris id à nobis gratis asseri ; ipse Dominus sic loquitur : *Prophetae fuerunt inventum locuti.* Jer. 5. *Quare ? Quia cum ego non misissem eos , nec mandassem eis , nihil profuerunt populo huic , dicit Dominus.* Ibid. 23. *Insuper , nisi Dominus ædificaverit domum , in vanum laboraverunt qui ædificant eam.* Ps. 126.

Unde , si non accepisti à Jesu-Christo Apostolatum , in vanum & tu laborabis. Quare ? Quia non accipies ab illo gratiam ad conversionem & salutem plebis adeò necessariam. Hæc omnia luce clariora sunt ; quibus si non adhæseris , certè amore tui omninò excæcaris.

O ! si humilitatem haberes , quantò verius & fortiùs sic te cum Moyse excusares ? *Quis sum ego ut vadam ad Pharaonem , & educam filios Israël de Ægypto ? Obsecro , Domine , mitte quem missurus es ; non sum eloquens ab heri & nūdiustertius , & ex quo locutus es ad servum tuum , impeditioris & tardioris linguæ sum.* Exod. 3. & 4.

Igitur , intra te placidus sede & quiesce , donec Dominus eligat te , & ponat super te spiritum suum , ac te vel suis inspirationibus , vel per sui vicarios in vineam suam vocet ; & interim , ad pietatem & ad humilitatem te alacriter exerce , ut deinde te efficacius salvum facias , & eos qui te audient. Quare ? Quia tunc Deus ipse dabit verba sua in ore tuo , voci tuæ vocem dabit virtutis ; dabit & sapientiam cui non poterunt resistere omnes adversarii tui ; non timebis à facie eorum , quia tecum erit ut eruat te. Tandem , in nomine ejus facies mirabilia magna , & in templo ejus omnes dicent gloriam. Quid amplius exoptes ?

III. Quis dubitet an ignorantia cunctorum errorum sit mater ? Nonne ergò , maxime in Sacerdotibus vitanda est qui do-

cendi officium in populo susceperunt ? *Conc. Tolet. 4.* Undè , *quamtùmvīs irreprehensibilis sit Sacerdos , desinat locum docendi suscipere , si docere nesciat ? S. Isid.* Quare ? Quia si cæcus cæco ducatum præstet , ambo in foveam cadunt.

Vis , charissime Frater , verbi ministerium dignè Deo adimplere ? Attende priùs lectioni & studio ; custodiant scientiam labia tua , ut potens sis exhortari in doctrinâ sanâ , & eos qui contradicunt arguere ; si verò scientiam repellas , certè periclitaris , & auditores tecum in exitium trahis. Hoc advertat Deus. Quidni & tu hæc exitia avertere satagas ?

IV. Antequàm verbum prædices , teipsum ad pietatem exerce , ut teipsum præbeas exemplum bonorum operum. Cœpit Jesus facere , & docere ; quidni & tu similiter facies , ut sic te existimet homo ut Ministrum Christi ? Si dicis & non facis , quàmvis linguis hominum loquaris & Angelorum , quid eris ? Æs sonans , & cymbalum tinniens. Prætereà , quâ libertate Laicos corripere poteris , cùm ipsi respondeant taciti , eadem te admittere quæ corripis ? *Trid. Sess. 14. de ref.*

Quâ ergò fronte enarras justitias Dei , cùm ipse oderis disciplinam ? Ejice , hypocrita , ejice primum trabem de oculo tuo , & tunc videbis ejicere festucam fratris tui. Sis quidem potens in sermone , sed in opere potentior ; validior est enim vox operis quàm vox oris. *S. Ber.* Quinimò , bonum exemplum est veluti perpetuum quoddam

prædicandi genus. *Trid. Sess. 25. de ref. c. 1.* Hinc , quàm multos , verbo veritatis efficaciter & facilè gignes ? Tandem , sicut qui fecerit & docuerit , hic magnus vocabitur in regno cœlorum ; ita è contrà , qui docuerit & non fecerit , hic minimus vocabitur in regno cœlorum. Quid loquimur ? Nonnè servus nequam de ore suo iudicabitur simul & condemnabitur ? Hoc te in speculo inspicias , velimus , charissime Frater.

V. Ad prædicationis officium exigitur gustatio spiritûs per contemplationem ; alioquin , quâ fronte ad æternorum desideria cæteros accendere præsumpseris , si frigidus in te totus & algidus remanseris ? *Joan. Gerson.* Quapropter , insta orationi , ut audias ex ore Dei verbum , & ex eo annunties populis. *Ezech. 3.* Non estis vos qui loquimini , sed Spiritus Patris vestri qui loquitur in vobis , dicit Magister bonus ; neque qui plantat , neque qui rigat , est aliquid ; sed qui incrementum dat Deus. Abundantiùs omnibus laboravi , inquit Apostolus ; non ego , sed gratia Dei mecum. Quapropter ora , sine intermissione ora ; sis homo internus ; & quàmvis non sis sufficiens aliquid cogitare ex te ; licet puer sis , infirmus mundi , & servus inutilis ; sperans tamen in Domino , mutabis fortitudinem , in Deo facies virtutem ; jam Domino cooperante & sermones tuos confirmante , confringes cedros libani. Gusta & videbis quantò aptior sit ad verbi divini efficax ministerium scientia sufficiens , vitæ interioris

indivisa comes ; quàm eximia scientia , vitæ spiritualis expers ; nonne id in rudibus visum est ? Undè exclamare licet : *Confiteor tibi Pater, Domine cæli & terræ, &c.* Matth.

13.

VI. Habeas puram intentionem , ita ut nullum verbum nisi ad gloriam Dei , & salutem animarum referas. Oportet itaque ut præviâ oratione offeras Domino Jesu , ejusque spiritui ; omnia dicenda ; omnia illi subicere , ut dirigat , amet , applicet juxta beneplacitum voluntatis suæ. Et quàmvis æquum sit ut Evangelium prædicans , de Evangelio vivas , istorum interdum memineris : *Quàndiu fecistis uni ex his fratribus meis minimis , mihi fecistis. Beatius est magis dare quàm accipere. Gratis accepistis , gratis date : ecce merces vestra copiosa est in cælis. Gaudete ergò & exultate, &c.* Quid ad persuadendum efficacius quàm istud : *Non quæro quæ vestra sunt , sed vos ?*

VII. Esto sit , turpis lucri gratiâ prædicationem non intendas ; nonne tibi occurrit & alius periculosior scopulus ? Adest & alius crudelior latro , superbia scilicet & jactantia. Heu ! quantùm hinc periclitantur concionatores ! Hei tibi , charissime Frater , si videri ab hominibus , eisque placere , & te ipsum glorificare cupias ! Quid est tunc gloria tua ? Nihil. Quam accipies mercedem ? Nullam. Parùm est illud ; audias quod scriptum est : *Abominatio Domini est omnis arrogans.* Prov. 16. Quid mirum , si justo judicio dissipet ossa eo-

rum qui hominibus placent ; si spernat & confundat hos gloriæ suæ raptores ? Igitur, væ tibi, si superbiæ inflatus spiritu, & quanta scias auditoribus notificare volens, laudes eorum concupiscas ? Verum, si sermones Dei locuturus sis, cur quasi de propriis tumes ? *S. Greg. Papa.* Nescis, insane, nescis te nihil habere quod non acceperis ? Si autem acceperis, quid gloriaris quasi non acceperis ? Nonne præstaret te in lecto ægrum & humilem jacere, quàm super cathedram superbum ascendere, & hinc fœdiori lapsu ad inferos detrahi ?

VIII. Cùm pro Christo legatione fungaris, propone tibi, in compositione concionis, loqui quæ decent sanam doctrinam, & docere secundum beneplacitum ejus ; & in cordis tui simplicitate, non subtiliora, non curiosa, non incerta, *Trid. Sess. 25* ; sed quæ scire omnibus necessarium est ad salutem, annuntiareque fidelibus, cum brevitate & facilitate sermonis, vitia quæ eos declinare, & virtutes quas sectari oporteat, ut pœnam æternam evadere, & cœlestem gloriam consequi valeant. *Idem. Sess. 5. de ref. c. 2.* Talis erat Apostoli scopus, simul & prædicandi modus. *Misit me Christus evangelizare*, inquit, *non in sapientiâ verbi, ut non evacuetur crux Christi.* 1. Cor. 1. Quapropter, *veni non in sublimitate sermonis & sapientiæ* ; undè *sermo meus & prædicatio mea, non in persuasibilibus humanæ sapientiæ verbis, sed in ostensione Spiritûs & virtutis.* 1. Cor. 2. •

Ecce quomodò Apostolus hic, qui Spiritum Dei habebat, prædicavit in omni Evangelicâ simplicitate Jesum-Christum, & hunc crucifixum. Numquid es tu doctior, peritior, aut sapientior illo? Eandem & tu sequere formam. Quapropter, rationes morales & argumenta interdum adhibe, quæ vel ex proprii ingenii meditatione, vel ex sanctorum Doctorum lectione peti possunt; necnon exempla & historias quasdam selectas, & ad movendum vel ad persuadendum debite applicatas; eas præsertim quæ in sacris Scripturis, & in Actis Sanctorum leguntur. Non te pigeat etiam quasdam interferere similitudines ex naturalibus rebus depromptas, in quibus mirificus est D. Chrysostomus, & ad imitandum copiosissimus & aptissimus, ut in ejus homiliis & orationibus videri potest.

Ecquid? Ipse Dominus Jesus, inspirator Prophetarum & Evangelistarum doctor, sine parabolis non loquebatur; an te pudebit servum, iisdem uti exemplis, easdemque adhibere comparationes? Numquid persuadendi rationes melius calles quàm ille in quo sunt omnes thesauri scientiæ & sapientiæ Dei? Verius dicamus: nonne hanc divinâ sapientiâ devoratur carnalis tui sapientia, qui elaboratæ declamationis pompâ, & sermonis immensitate, populos rudes potius opprimis quàm instruis? *Conc. Aquisgr.* Nonne hoc est te ipsum prædicare, adulterare verbum Dei, evacuare Christi crucem, & strictissimo judicio ac severissimæ ultionis te exponere periculo?

Verùm , subjiciet ille proprius quo ex-
cæcaris amor : nonne concionator etiam
delectet auditores oportet ? Si delectatio-
nem intelligas eam quæ procedit ex cog-
nitione veritatis , & amore virtutis , con-
cedimus ; si verò aliam , quæ ex munda-
nâ quâdam & sæculari eloquentiâ , sermo-
numque artificiosâ concinnatione , quæ ad
demulcendas aures , ad veritatum Evange-
lii vim enervandam , & Sanctionum Ec-
clesiasticarum perspicuitatem obumbran-
dam , solummodò apta est ; absit hæc va-
niloquentia omnis à concionatore christia-
no , qui Christum crucifixum prædicaturus
est ; quique *sectari debet , non lenocinia
verborum , sed virtutes piscatorum.* 1. Tim.
4. Procul à sacris exedris ejusmodi *Ma-
gistri auribus prurientes.* Sanè , finitâ ora-
tione , non expedit audire : *ô quàm diser-
tus Orator ! quàm doctus ! quàm copiosus !
Audiatur potius : ô quàm præclara virtus ?
quàm necessaria pænitentia ! quàm magnus
& tremendus Deus ! quàm bonus & ama-
bilis !* Cave tibi , charissime Frater , si non
audiantur illa ! Quarè ? Quia aures demul-
fisti , cor autem non movisti. Auditorum
lacrymæ , tui laudes esse debent. *S. Hier.*
Reverà dic , amabimus , quisnam est finis
artis oratoriæ ? Nonne , juxta omnes , est
persuadere dicendo ? Ita sanè.

Sed quomodò persuadebis , si auribus
prurientia dicens , cor non moveas ; imò ,
non intelligaris ? Et quomodò à populis in-
telligendus es , si pomposa & parerga , il-
lusorio eos ad concionem alliciendi prætex-

tu , buccis crepitantibus loquaris ? Nonne perspicuitas est prima oratoris dos ? Annon ergò melius est ut nos reprehendant grammatici , quàm ut non intelligant populi , inquit D. Augustinus ? Quid ad hæc respondet tuus ille quo illuderis amor ?

Attamen , juxta varietatem materiæ vel personæ , stylum sermonis variare debes ; ait enim Apostolus : *Sapientiam loquimur inter perfectos ; inter vos autem , nihil judicavi me scire , nisi Christum , & hunc crucifixum.* Et iterum : *non potui vobis loqui quasi spiritualibus , sed quasi carnalibus ; tanquàm parvulis in Christo lac vobis potum dedi , non escam.* Sapientibus quoque & perfectis ait veritas increata : *Vobis datum est nosse mysteria regni Dei.* E contrà , infirmis & rudibus ait : *Multa habeo vobis dicere , sed non potestis portare modò.* Hinc ipsa prudenter injungit : *Nolite sanctum dare canibus , nec margaritas mittatis ante porcos ; sed mundis animalibus estote similes , quæ ruminant pariter , & ungulam findunt.* Sic debes & tu , ejusdem Domini concionator , habere vinum & oleum , virgam & manna , ignem & aquam ; singula suo loco congruè proferenda. *Innoc. Papa. 3.* id est , sapias oportet cum sapientibus , balbutias cum balbutientibus , rudis sis cum rudibus , &c. An tibi vile nimis & abjectum videri potest quod ipse Dominus Jesus docuit & egit ! Stupenda superbia tua ! Hinc tandem disce , omnibus , sive doctis , sive rudibus , prædicare , gravi quidem & ignito zelo , juxta uniuscujusque captum & statum præ-

sentem; sed perspicuâ etiam & simplici methodo. Ecce tibi conformius Spiritui Christi ejusque Evangelio prædicandi genus, proindèque aptissimus persuadendi modus.

Optimus præparandæ concionis modus esset, præmisso aliquo studio, ea quæ aliis dicenda sunt, coram Deo attentè perpendere, & devotè meditari. Quod quidem, si coram Sanctissimo Sacramento, aut coram sacrâ Jesu-Christi è cruce pendentis imagine, fiat, vix dici potest quanta, quàmque mirabilis virtus & efficacia inde hauriatur. D. Thomæ & D. Bonaventuræ id expertis, crede.

IX. Post elaboratam & memoriæ mandatam concionem, te conjicias, velimus, in suavissimum Jesu-Christi cor; hauri ex hoc saluberrimo fonte sacram illius unctionem animas convertentem, & piam aliquam orationem funde: v. g. *Munda cor meum & labia mea, omnipotens Deus, qui labia Isaïæ, &c. Veni, Sancte Spiritus, reple, &c. Sub tuum præsidium confugimus, sancta Dei Genitrix, &c.*

Cæterùm, consultissimum esset tibi nunquàm ad populum edocendum exedram conscendere, nisi post sanctissimum Missæ sacrificium celebratum, aut cum intentione celebrandi: dici enim vix potest, quantum dæmones perhorrescant os illud quod sanctissimum Christi Corpus suscepit. Tunc siquidem cum Apostolo dicere potest: *An experimentum quæritis ejus qui in me loquitur Christus? 2. Cor. 3.*

X. Exedram ascensurus , da operam ut modestia in vestibus , in totius corporis compositione , & in cæteris aliis reluceat , & ut hinc emicet interior tui morum honestas. Nihil ergò in te reperire sit quod factum , pompam sæcularem , & novitatem spiret ; absint à te crines cirrati , calamistrati , & odorifero pulvere respersi ; abigantur rugosæ , denticulatæ , & tumidæ manicellæ , splendidi annuli , collaria pretiosiora & vana ; eliminetur omnis affectatio & artificiosa declamatio , omnis ineptagesticulatio , adulatoria fermocinatio , ridicula histrionum forma , quidquid tandem mundanum & aulicum redolet ; hæc enim omnia , utpotè à vero concionatore Christum pauperem & humilem prædicaturo prorsus aliena , rident , dolent , & horrent auditores. Omnia quidem quæ præ te fers , libera sint , oportet , nobilia , generosa , fortia & gravia ; sed naturalia etiam , simplicia , modesta , moderata , & religione plena , secundum ea quæ à Deo accepisti talenta ; nihil magis ad ædificationem confert quàm hæc in omnibus simplicitas & ingenuitas candida. Porro , quàmvis à concionatorum vestitu & habitu eliminandæ sint vanitates , incuriæ , & sordes ; aliqualis tamen in his neglectus non dedecet. Auditorum benevolentiam & docilitatem tibi cupientibus , crede. Ad omnimodam ergò simplicitatem ante prædicationem te exerceas , optamus & suademus.

XI. Tandem , post renovatam puram placendi Deo intentionem , protestare quòd
hanc

hanc per cuncta prædicationis momenta ratam & præsentem habere velis, & quòd nullum verbum nisi ex præviâ illâ intentione proloqui desideres. Hujus bonæ voluntatis scuto, & Domini exercituum auxilio armatus, exedram ascende, bellum humani generis hosti illaturus.

PARAGRAPHUS II.

Regulæ in ipso Prædicationis exercitio observandæ.

I. Siste tibi Christum præsentem, eumque in terris prædicantem reverearis; nam, sicut verum est: licet Petrus baptiset, tamen Christus est qui propriè baptizat; sic ipse est non solum qui prædicat, sed & qui in nobis prædicat, & interiùs afficit animam & prædicantis & audientis. Ex hoc intuitu loquentes Apostoli, magnâ vîrtute testimonium reddebant resurrectionis Jesu-Christi. Ex eodem intuitu loquere & tu. Quo zelo, quâ reverentiâ & efficaciâ loqueris?

II. Peccatores liberè & importunè argue & increpa, sed opportunè etiam obsecra; opus quidem est ut sis prudens sicut serpens; sed simplex etiam ut columba sis; oportet. Eructans suavitatis abundantiam, instrue in spiritu lenitatis & in omni patientiâ; quòd si interdum tabescere te faciat zelus tuus, & necesse sit ut irascaris, cave ne pecces; imitare S. Franciscum Salesium, & alios magnos Sacerdotes, quos Deus in fide & lenitate ipsorum sanctos fecit. Scias

H

ergò adimplere charitatem Christi ; hinc disces auditorum infirmitatibus compati & condolere , ne & tu tenteris. Nonne erga te patienter egit miserator Dominus ? Ita sanè. Quid est ergò cum fratri tuo nimium irascaris , quasi velles ut ignis descendens de cœlo consumeret eum ? Cujus Spiritûs es ? Jesu-Christi ? Minimè. Quarè ? Quia Filius hominis non venit perdere , sed salvare. Nonne oportet te fratris tui miseri , sicut bonus Dominus tui misertus est , & à Domino Jesu discere quia mitis est & humilis corde ? Hanc deinceps disciplinam tene , ¹cùm plus agat benevolentia quàm austeritas ; plus exhortatio quàm comminatio ; plus charitas quàm potestas. *Trid.* Quòd si vigore opus fuerit , hunc mansuetudine statim temperes oportet , ut veritate & misericordiâ , justitiâ & pace sibi obviantibus & mirificè osculantibus invicem , fulgura in pluviam facias. Quid ad peccatores Christo lucrificandos efficacius ?

III. Sermo tuus sit sale conditus : undè cave ne peccatum particulare & secretum fiat , tuâ imprudentiâ , publicum ; quinimò quàmvis unius auditoris peccatum sit publicum , rarò accidit ut in illud insurgere prudenter possis ; nonne hinc confunditur , & vehementiùs interdùm inardescit irâ ipse peccator ? Scias quia eadem charitas , quæ benigna est & patiens , dissimulare etiam scit , simul & observare tempus & modum fructuosæ correctioni consentanea. Nonne tamen in his omnibus sæpè peccasti ? Habuisti-ne charitatem & spiritum Dei ? Te

ipse scruteris, velimus, & coercere amoris proprii & imprudentiæ tuæ rapidos fluctus. Absit etiam ut susurris facile credas, & ut ex eis audita imprudenter palàm referas. Nullum pariter tibi inter prædicandum irrepat verbum quod aut populari adulationem, aut tui laudem, aut adversus inimicos tuos vindictam, aut in ipsum peccatorem odium redoleat. Quid vilius? Quid detestabilius? Eliminenter à Cathedrâ Evangelicâ hæ omnes foetidæ nimis puerilitates, imprudentiæ, &c. quæ te hoc divino ministerio indignum omnino præberent.

IV. In fine concionis, da operam ut fervor & affectus tuus auditoribus tuis ardentè patefcat, eosque simul vehementius afficiat. Quapropter, præstat brevem veluti recapitulationem proponere eorum quæ audientium animis firmitus hæere debent; postque illam, paucis aliquot verbis & documentis spiritu & fervore animatis, totam concludere orationem, omnesque auditores in pace dimittere, eosque inter amorosa Christi brachia commendare.

P A R A G R A P H U S III.

Regulæ post concionem observandæ.

I. Concionem tuam, Deo ejusque gratiæ commenda; eumque enixè roga ut ei incrementum dare dignetur, simul & confirmare quod in te & in auditoribus operatus est.

Hij

II. Si vanitatis stimulo pungaris quòd rectè successeris ; vel confusionis , quia non rectè , statim Domino Jesu quidquid boni fuerit , refer ; quidquid verò incongrui , cum humiliatione animi tribue tibi. Et verò , an tuum est quidquid in concione pii rectique expresseris ? A quo descendit peccatorum conversio ? Nonne à Patre luminum , qui dat verbum evangelisantibus virtute multà ? Quà ergò fronte , servus inutilis , gloriam dabis tibi , & non nomini Domini , cujus manus fecit hæc omnia ? Numquid gloriam suam alteri dabit ?

Inter has proprii amoris titillationes & illecebras , sic suadente D. Xaverio , dicito tibi : *Quot concionatores apud inferos cruciantur , qui plus habuerunt vel copiae , vel leporis in dicendo quàm ego , pluresque à sceleratâ vitâ ad piam honestamque traduxerunt ? Sed heu ! quoniam elatione & arrogantia insolentes , divina dona non Deo retulerunt accepta , sed vindicarunt sibi , in opprobrium & exitium sempiternum præcipientes ruerunt ? Quid eis nunc superbia prodest ? Nonne idem & mihi , gloriam meam quærenti , imminet opprobrium , imminet & idem exitium ? Quid mihi tunc proderit jactantia ? His & aliis reflexionibus , insanæ gloriæ desiderium coercere & exinanire contende. Quid aptius ? Verùm jugiter vigila & ora ut non intres in vanitatis tentationem ; vigila. Quapropter , laborem tuum Deo ejusque gloriæ statim post concionem offer ; ut venientibus latronibus dicere queas : *Jam Deo , cui soli debetur honor & gloria ,**

datum est totum ; vade retrò , Satanas , recedite , fures.

Attamen , tuam jampridem fragilitatem expertus , cave ne de concione tuâ gloriose aut sinistrè umquàm loquaris ; nec de eâ , præsertim coram te , verba fieri cupias ; has elimina occasiones. Ne scisciteris utrùm auditoribus placuerit aut eos commoverit concio tua ; illud enim est fœdos mendicare plausus. Quinimò , scire nolis quid de illâ sentiant ; illud est etiam vanitatis indicium , aut proditorium ad eam incitamentum. Adulatorum plausibus , & dæmonum illecebris te ad vanam gloriam fraudulenter & multifariàm allicientium , proindèque te deprædari cupientium , aures obtura. Nimiram præterea fatigationis affectationem diligenter vites , suademus. Quid redoleret puerilis illa affectatio ? Quò te duceret ? Facile est illud intelligere , nisi tibi imponere velis. Si solius Dei gloriam quæras , sufficit ut illi soli innotescant fatigationes tuæ.

Porro , ad hanc indefessam vigilantiam adde has aut alias ferventes & assiduas preces : *Domine Jesu , qui es principium & finis , averte oculos meos ne videant vanitatem ; non nobis , Domine , non nobis qui nihil sumus , sed tibi , à quo descendit omne donum perfectum , & in quo omnis nostra sufficientia est , dæ gloriam : adhæreat lingua mea faucibus meis , si tui , soliusque gloriæ tuæ non meminero , &c. Adjuva me , Deus salutaris meus ; si enim à me discesseris , te gloriâ tuâ defraudabo , quod absit.*

H iij

III. Quòd si ex auditorum conversione tibi blandiri non debeas ; nec etiam , propter eorum duritiem , à prædicationis officio desistere decet ; *Nam sicut malignus factor peccati , etiamsi non persuaserit , meritò pœnam deceptionis incurrit ; ita fidelis justitiæ prædicator , etiamsi ab omnibus respuitur , absit ut apud Deum sui officii mercede non fruatur.* S. Aug. Nihil ergò de merito decidis , sed pax quam indignis apprecaris , ad te revertitur. *Fac quod tuum est ; nam Deus , quod suum est , curabit. Planta , riga , & tuas implevisti partes ; sanè incrementum , ubi volueris , dabit Deus ; ubi fortè noluerit , tibi deperit nihil. Medici est medicamenta adhibere ; non est in medico semper ut relevetur æger. En plaga tibi incumbit , curam exigens , non curationem.* S. Bern.

Igitur , quàmvis tibi videantur auditores durâ cervice , & incircumcisus cordibus Spiritui sancto resistere , absis ut dicas : *non loquar , non nominabo nomen Domini.* Jer. 9. Verè à Satanâ , qui nihil aliud quàm ut à prædicatione desistas , ardentius exoptat , te tentari finis. Si agricola protinùs ab agriculturâ resiliret quòd semel atque iterùm , aut sæpiùs acciderit aëris inæqualitas , brevi fame periremus omnes. Idem de cæteris artibus dicendum est. Verùm , si opifices & mercatores , licet semel atque iterùm aut sæpiùs frustrati fuerint optato negotiorum in quibus versantur exitu , ab opere non desistant , sed denuò paricum alacritate , ad idem opus redeant ; si illi tantam adhibeant curam studiumque

circa res ad præsentis usum vitæ pertinentes, licet exitus sit incertus; tu, si loquens non auditus fueris, illicò desines? Et quam obtinebis veniam? Quid excusationis afferes? *D. Chrysost.*

Prætereà, vix fieri potest ut sermo omni fructu vacet; nam illi ipsi qui ad peccatum redeunt, cum aliquo timore, & non cum tantâ libertate id faciunt. Ulterius, si non prodest sermo malis, bonos tamen in bonis confirmat propositis. Denique, si secundâ vel tertiâ vice non persuades, forsitan quartâ aut quintâ id facies: *Si percussisses terram quinquies, aut sexties, aut septies*, dicebat Elisæus ad Regem Israël, *percussisses Syriam usque ad consumptionem; nunc autem tribus vicibus percuties eam.* 4. Reg. 13.

Fac tu similiter pro exterminando peccato & peccatore salvando. Non est abbreviata manus Domini; tuum non est nosse tempora vel momenta quæ Pater posuit in suâ potestate; tuum est clamare & non cessare. Licet piscator per totum penè diem in vacuum laborarit, nihil per rete attrahens; quandòque sub noctem piscem quæsitum involvit. Venator pariter diù perseverat, & tandem prædam capit quæ sæpiùs effugerat. *D. Chrysost.* Argue & tu, piscator hominum & animarum venator, obsecra, increpa in omni patientiâ & doctrinâ; & sicut Apostolus Petrus se ad Jesum non convertit post primum aut secundum galli cantum, sed post tertium; sic & tu, Deo adjuvante, tandem fra-

trem tuum forsan lucraturus es. Hos imitare medicos qui convitia & ineptias phrenetici tolerant, nec de ægritudine desperant.


Interim, omnem charitatis benignitatem & compassionem erga peccatores affectu paterno demonstra, sic eos interdum alloquens cum D. Chrysostomo : *Vellem, si fieri posset, vestris oculis ostendere quam in vos habeo charitatem. Nihil est mihi, vobis, jucundius & desiderabilius, ne hæc ipsa quidem lux. Millies enim optarem ipse esse cæcus, si per hoc liceret vestras animas convertere : implete desiderium meum, animas vestras salvare conando, &c.*

Vis autem, Frater, efficacius corrigere? lacrymare, ora Deum ex corde. S. Chrysost. Sic se gerebant veri Patres & Pastores; ubi erant inutiles sermones, ibi suspiria edebant; orationes fundebant & lacrymas; diris se cruentabant flagellis, ut Deus peccatores benigno suo vultu illustrare & reducere dignaretur. O veros Dei homines! O quàm magni faciebant vel unam convertere animam & salvare! Ubi est nunc zelus eorum? Væ nobis, idolis & simulachris! Hanc ingeniosam charitatem pro nostrâ salute non habemus; quid mirum, si hanc pro alienâ non habeamus? Nam qui sibi nequam, cui bonus erit? O ignavos & indignos Evangelii præcones! Misereatur nostri Deus, misereatur nostri, & nos flammam ignis facere dignetur.

IV. Quod verbis prædicasti, hoc factis confirmare contende, ut te primum salvum

facias , & eos qui te audierint. Quapropter , inhæreant animo hæc divina oracula : *Tandem ego , imò ego ipse concionator moriar ; post ista quæ nunc obo magisteria , manifestandus sum ante tribunal Christi , strictam villicationis meæ ei rationem redditurus. Ecquid proderit mihi si universum mundum lucrer , animæ verò meæ detrimentum patiar ? Quam , stultus , quam pro animâ meâ commutationem dabo ? Quam multi concionatores eximii , præclarè quidem dicentes , sed non facientes , detracti sunt è Cathedrâ Evangelicâ in profundum tartari ? Quid monstri similis , quàm quòd , cùm plurimi salvi fuerint , ipsi miserrimè perierint ? Proh pudor ! Proh dolor ! Proh desperatio ! Nonne tamen sicut patres mei , ita & ego fieri periclitor ?*

Si his & aliis tantillùm movearis , charissime Frater , nonne , placens Deo , misereberis animæ tuæ ? Quo fervore castigabis corpus tuum ? Quâ animi alacritate laborabis , dùm tempus habes , sicut bonus miles Christi , & operaberis bonum usque ad mortem ; ne fortè , cùm aliis prædicaveris , ipse reprobus efficiaris ? Sic se gerebat , ex propriæ damnationis periculo , Apostolus Paulus , quàmvis vas electionis esset ; nos verò qui aliter agimus , quid sumus ? Quid erimus ?



H v

ARTICULUS XX.

Studiosa puerorum catechizandorum cura.

PRæter eximium illud concionandi munus, est & aliud, quod quidem licet paulò demissius videatur, non ideò tamen negligendum est, catechizandi scilicet officium, & prima fidei rudimenta parvulis assiduè tradendi; imò, tantò potiori studio & affectu ei incumbendum est, quantò uberiores, ut plurimùm fructus animarumque proventus colligi possunt; ex hâc enim catechisticâ puerorum instructione pendet omnis posterioris ætatis fructus, sicut messis à femine. Quis ergò, pietatis & divini timoris semen in his tenellis cordibus seminare, illudque frequenti & familiari exhortationis rore rigare non curabit, ut germinans germinet & fructum afferat, eumque suo tempore videat & lætanter gustet?

Vide, charissime Frater, vide quomodò Dominus Jesus, in quo thesauri sapientiæ & scientiæ Dei absconditi erant, parvulos ad se venientes blandè excipere & erudire solebat: *Sinite, inquit, parvulos, & nolite eos prohibere ad me venire; talium est enim regnum cœlorum.* Matth. 9. Offerebant illi parvulos ut tangeret illos; Discipuli autem comminabantur offerentibus: quos cùm videret Jesus, indignè tulit, & ait illis: *Sinite parvulos venire ad me, & ne prohibeatis eos; talium est enim regnum cœlorum.* Marc. 10. Ex eodem erga pueros zelo, di-

- xit Simoni Petro : *Simon Joannis , diligis me plus his ? Dicit ei : etiam , Domine , tu scis quia amo te. Dicit ei : pascere agnos meos. Joan. 21.*

Igitur , si ipsa æterni Patris sapientia in terram descendit ut , in carnis nostræ humilitate , cœlestis vitæ præcepta nobis traderet ; quem non compellat charitas Christi ut parvulus fiat in medio fratrum suorum , & tanquàm nutrix fovens filios suos ? *Catech. Conc. Trid.*

- O piissime Jesu , exclamabat doctus & pius Gerson , quis ultrà post te verecundabitur esse humilis ad parvulos ? Quis tumescens & elatus de suâ vel magnitudine vel scientiâ , parvitatem deinceps parvulorum , eorum ignorantiam vel imbecillitatem audebit aspernari , quandò tu , qui es Deus benedictus in sæcula , in quo sunt omnes thesauri sapientiæ & scientiæ Dei absconditi , usque ad castissimos parvulorum amplexus beata brachia mansuetus inclinas atque circumligas ? Procul ergò , procul ex hinc omnis elatio , seorsùm sit omnis indignabunda quælibet parvulorum effusio.

Deindè , sermonem ad parvulos convertens , eos sic amorosè allicit : usquequò parvuli diligitis infantiam ? Ut quid diligitis vanitatem & quæritis mendacium ? Venite fidenter , nullæ viarum insidiæ , nullus latet anguis in herbâ ; communicabimus mutuò bona spiritualia , quia temporalia vestra nulla requiro : ego vobis doctrinam , vos mihi orationem impendetis ; imò , orabimus pro

invicem, ut salvemur; sic Angelos nostros vicissim lætificabimus; sic misericordiam inveniemus apud Patrem nostrum dùm obediemus voci suæ in accessu nostro ad eum, ego provocando, vos exequendo, qui spiritu parvuli esse debetis: invitat ipse Jesus spirituali colloctione, & affatu jugiter inspirans & dicens: finite parvulos venire ad me.

Hinc, non obstantibus amplissimis honoribus, doctissimus ille vir parvulorum gregem ad se in Ecclesiam advocare & erudire, scriptisque & exemplo alios ad idem invitare solebat.

Quâ ergò fronte eosdem parvulos instruere dedignaberis, fastidiose Frater? Gemebundos eorum, aut saltem matris Ecclesiæ audi clamores: *Parvuli petunt panem, & non est qui frangat eis.* Thren. 4. Ecce clamant post te; uberibus te jampridem lacrymis sustinent; quousque eos, gravi corde, jejunos dimittes? Nonne, præduriâ tuâ, deficient in viâ? Annon, absque ductore positi, in viâ lubricâ & tenebrosâ ex facili cadent? *Gerson.*

Verùm, dic, amabimus, quæ tua mens? Quæ tua excusatio? An dices te necessariis ad id munus carere dotibus? Misera & pestifera defensio? Numquid eximiâ eges scientiâ ut fidei rudimenta Deique mandata pueros interrogationibus doceas? Verius dicas te omni prorsus carere zelo.

Occupatio mea, subicies forsan, in majoribus esse debet. Quid sibi hoc vult, nisi: *Aquila non capit muscas?* Certè, nec te

Deus superbum. Et verò, nonne hinc patet, foetet, & serpit profunda, insolens, & contumax illa quæ te tenet superbia, & quæ, ex Angelo, diabolum fecit? Nonne, præsumptuose nimis, nonne vidisti ipsum Dominum Jesum hanc Deo & hominibus odibilem tuam profligare & confundere superbiam? An illo sapientior es, aut ad sublimiora vocatus? Quid majus esse potest quàm parvulorum animas plantare, rigare, easque ad virtutem pro reliquo vitæ tempore dirigere? Nonne scriptum est: *Adolescens, juxta viam suam, etiam cum senuerit, non recedet ab eâ?* Prov. 26.

Sublime quidem est, his rationibus convictus, inquires, & zelo meo dignum, pueros catechisandi & instruendi munus; verum, nonne ista publicis prædicationibus meis magnificentius & efficacius præstare possum? Nos verò respondemus, id quidem fortè pomposius; sed, nostro judicio, nec adeò efficaciter & fructuosè. Quarè? Quia hujusmodi prædicationes puerorum captum superant; instructiones verò catechisticæ interrogationibus & familiaribus exemplis ac parabolis intermixtæ, imbutæ, & conditæ, proindèque eorum captui magis accommodatæ, imbecilli eorum memoriæ & tenello animo facilius & altius inculcantur. Prætereà, catechisandi, sese frequentius, quàm concionandi offert occasio, sive quia ad catechisandum non requiritur tanta præparatio prævia; sive quia parvulos ubique invenis, & imbuedos habes; hos enim non solum in Eccle-

fiâ, sed domi etiam, in vicis, in agris, in sylvis, in tuguriis; imò, medias inter eorum tui manuum occupationes, medias inter deambulationes & animi relaxationes erudire faciliè potes. Si ergò, propter prædicationes etiam pro ipsis erudiendis pueris elaborandas, hanc familiarem & sese ubique offerentem instructionem fastidias, aut certè negligenter, perfunctoriè, & obiter peragas; quinimò, si idem munus quasi vile & abjectum respuas, ut ad splendida & honorifica, pueris tamen ferè omninò inutilia officia, libentiùs incumbas, verè te ipsum, non Deum quæris, & variis cor tuum illusionibus imples. Nonne vides quantum in exedris, inter audientium plausus, plerùmque periclitetur humilitas? Quot præclari concionatores, postquam pomposè prophetaverunt, tamen tot laboribus propter vanam gloriam frustrà exhaustis, audierunt miseri, & ad æternam ignominiam suam experti sunt & sentiunt istam formidabilem Domini sententiam: *nescio vos?* Nonne & tu superbiâ tumens & ebrius, idipsum periclitaris?

Absit ut te à prædicatione avertere velimus. Verùm, si Dei gloriam purè quæras, certè has novellas puerorum plantationes, absque prædicationis præjudicio, assidue & hilariter rigabis; id est, in medio parvulorum parvulus fies; tanquàm si nutrix foveat filios suos, his utpotè in Christo parvulis, lac potum dabis, non escam; nondùm enim hanc sustinere possent. Quòd illam escam, adultis jam validis, robustis,

& viris factis, proindèque hanc sustinere valentibus, prædicatione tuâ suppedites, hoc concedimus, & in hoc laudamus te; verùm, quòd his in Christo parvulis lac illud inclementer deneges, hoc respuimus, & in hoc non laudamus te. Isto quidem molesto & obscuro exercitio non splendet coram hominibus gloria tua; Verùm, quid tuâ interest, modò ut splendet coram Deo, cui securius places, & cui, Angelisq; ejus spectaculum sis? Idcirco, huic instructioni quam plerique nequidem attendunt, eò libentiùs vacare debes, quò magis id fieri scis absque humilitatis dispendio, & cum ingenti ac tutissimo merito. Sileat ergò & absterreatur proprius ille qui te hucusque fascinavit amor; incipe ex nunc fieri parvulus, imò & stultus propter Christum, erudiens infantes, & illos à pueritiâ studiosè, sine tædio curans. *Eccl. 7.* Eisque, præsertim si Parochus sis, ad Ecclesiam convocatis, fidei initia, singulis Dominicis, & aliis festis diebus sollicitus trade. *Conc. Mediol.* Et cum, per novæ legis sacramenta, omnis vera justitia vel incipiat, vel incepta augeatur, vel amissa recupere-
tur, (*Trid. Sess. 7.*) nihil zelo tuo tuâque curâ dignius quàm pueros fidei rudimentis jam imbutos docere, eisque explicare vim sacramentorum, simul & dispositiones ad ea ritè & fructuosè recipienda; præsertim quandò ad primam instruuntur & ordinantur communionem, cum ex eâ interdum pendeat totius vitæ pia ad salutem directio. Quapropter, inhæreat animo istud ejus-

dem Concilii decretum. Sess. 24.

Ut fidelis populus ad suscipienda sacramenta majori cum reverentiâ atque animi demissione accedat , præcipit sancta Synodus Episcopis omnibus , ut non solum cum hæc per seipsos erunt Populo administranda , prius illorum vim & usum , pro suscipientium captu , explicent ; sed etiam , idem à singulis Parochis piè prudenterque , etiam linguâ vernaculâ si opus sit , & commodè fieri possit , servari studeant , juxta formam à sanctâ Synodo , in catechesi , singulis Sacramentis præscribendam ; quam Episcopi in vulgarem linguam fideliter verti , atque à Parochis omnibus Populo exponi curabunt.

Verùm , ut hæc omnia officia catechistica efficacius peragas , hoc præsertim tibi proponere debes , ut eo animo eadem exequaris quo Apostolici viri , imò , quo ipsemet Christus Dominus ea præstitit ; undè hæc sequere documenta.

1°. Oportet ut pueros perfectâ humilitate , invictâ patientiâ , blandâ charitate , amorosâ affabilitate & mansuetudine , ac variis ingeniosisque illecebris ad catechismum suaviter allicias.

2°. Opus est ut , licet doctor , magister , & senex sis , repuefcas cum pueris , balbutias cum illis , eosque quasi modo infantes genitos humeris portes. *S. Hier.* Hoc est : oportet ut verba & conceptus mentis ad eorum captum accommodes. Quod ut assequaris , longa requiritur exercitatio prævia , crebræ & ferventes ad Deum qui linguas infantium disertas facit , fundendæ

sunt preces. Hujusce prævixæ & seriæ exercitationis & ad Deum recursûs defectu, plures Clerici, imò & Parochi, aliundè doctissimi, nihil, aut ferè nihil in catechisandis pueris proficiunt, eosque & se ab hâc instructione tandem fastidiosi avertunt.

3°. Cave quorundam catechisantium methodum & praxim, qui continuato, prolixo, & rapido sermone pueros edocent; illud non est infantes illuminare & erudire, sed excæcare & opprimere. *Conc. Aquisgr.*; proindèque tempus & laborum perdere meritum, & vanitati fomitem interdum præbere. At contrà, experienciâ compertum est, familiares & breves interrogationes in catechisticâ institutione multò utiliores esse; ac proindè, pueros longè magis in eo disciplinæ genere proficere, si sæpè, non quidem coacervatim, sed sigillatim & per partes ac vicissim interrogentur. Hanc tu, si fidelis catechista esse cupias, regulam tene. Eos tamen quos acriori adverteris pollere ingenio, primùm interroga; exindè, eadem ab iis qui minùs ingenio valent exquire; nec in iis sæpè repetendis & inculcandis fatigeris; ac præsertim rudioribus & magis hebetibus animum patienter adde; ita ut ad ulteriorem articulum non transeas, nisi priorem perfectè calleant. Operæ etiam pretium est ut cuncti sciant, & responsiones, simul & interrogationes, ut peractâ catechisticâ instructione, se deinceps vicissim & alterutrum interrogare, & hinc ediscita altius retinere queant.

4°. Ubi autem , rerum omnium quas scitu eis necessarias existimaveris , simul & interrogationes & responsiones rectè didicerint ; opus est ut non tantùm verba , sed etiam sensum illis aperias ; quod ut efficaciter & facilè agas , necesse est ut breves aliquas comparationes , pias historias , & familiaria exempla interdùm adhibeas ; quas repetere indecorum non erit , donec eos te intelligere , mutatis ad hoc verbis , ipse noveris. Porro , eis apprimè suade & comenda ut eadem documenta & exempla , tùm domi , tùm alibi , parentibus , domesticis , fratribus , & sociis narrent ; & si id expediat , piis aliquibus munusculis , v. g. imaginibus , rosariis , libellis , &c. ad hanc æmulationem & fervorem allice & excita.

5°. Ex instructione catechisticâ aliquem particularem pietatis fructum colligere , & aliquam tenere praxim , aut saltem unam , tenellos eorum animos edoce , de quâ reddendam tibi postea esse rationem curabis , ut maximè à vitiis ætati illi teneræ affinis , à mendacio scilicèt , inobedientiâ , furto , verbis obscœnis , &c. maturè absterreantur , & ut ad quædam christianæ religionis officia , præcipuè ad vespertinam & matutinam orationem , & ad Missam piè audiendam tuis excitentur monitis.

His piis quas adhibebis industriis , Dominus Jesus benedicet , easque fovendabit. Cùm enim mollia sint , & instar ceræ , infantium ingenia , sigillum quod primò eis imprefferis , facilè , & quidem pro reliquo

vitæ tempore , ipso Domino Jesu coope-
rante simulque confirmante , suscipient ;
& postquàm tu ipse his pueris doctrinam
christianam clarè , & ad eorum captum ac-
commodatè , patienter & benignè , cum
gaudio , fervore , & perseverantiâ tradide-
ris , huncque cursum , quàmvis obscurum
& molestum , consummaveris , ipse Domi-
nus qui justis mercedem laborum suorum
reddit , deducet te in viâ mirabili , refrige-
rabit te , dabit quoque delicias animæ tuæ ,
te de fructu oris tui replebit bonis ; & tan-
dem , factus in medio parvulorum parvu-
lus & absconditus , magnus vocaberis in
regno cœlorum , & in æternâ eris memo-
riâ. Amen.

ARTICULUS XXI.

Diligens rudium & pauperum instructio.

QUOD de adolescentibus in superiori ar-
ticulo diximus , de quibusdam rudiori-
bus etiam intelligendum esse censemus ;
hos , inter parvulos , jure merito adscribi-
mus. Illis ergò , utpotè solidioris cibi in-
capacibus , doctrinæ panis frangendus est ,
imò mastigandus , imò & in faucibus infe-
rendus , & lacte , hoc est , simplicissimâ in
doctrinæ rudimentis instructione pascendi
sunt. Quid zelo nostro dignius ? Nobiles
& divites , cæterique urbium incolæ per-
sæpè abundant panibus ; pauperes verò &
miserabiles personæ in agris & sylvis com-
morantes ab Ecclesiis remotæ , aut ad eas

absque decenti habitu, proindèque pudore affecti, inter alios discipulos publicè accedere non audentes, pecoribus interdùm pascendis divinorum etiam officiorum tempore detenti, persæpè fame pereunt, ideòque doctrinæ fidei incurii, in tenebris sedent, cæcâ ignorantiae nocte delitescunt, & in paupertatis sordibus, & vitiis paupertati affinibus hærent miseri. Quis ergò hos eodem Jesu-Christi sanguine æquè ac divites redemptos, in salutis viâ instruere sollicitâ curâ non satagat?

Ad hanc indefessam & piam curam excitat nos ipsius Jesu Christi exemplum, de se dicentis: *Spiritus Domini super me, pauperibus evangelizare misit me.* Luc 4. Hinc nullum, quantumlibet vilem & abjectum, à se rejecit; quin potius benignè accepit omnes; quinimò, vel unicam Samaritanam, licèt extraneam, licèt conditione vilem, licèt conversatione impuram, catechizare, exhortari, & convertere non dedignatus est. *Cogitemus*, inquit S. Augustinus, *quid nobis prærogatum sit ab illo qui demonstravit nobis exemplum, ut sequamur vestigia ejus.* Cogitemus quâ charitate, quo zelo Salvator ille hominum, in quo thesauri sapientiæ & scientiæ Dei erant absconditi, circuibat pagos & villas, ignarum & rudem populum, nunc in littore, nunc in montibus, nunc in locis campestribus erudiens; quomodò se ad eorum qui audiebant captum demittebat, familiari loquendi modo utens, eadem sæpiùs repetens & inculcans, similitudines

& parabolas vulgares adhibens? Quâ patientiâ, quo amore, turbas comprimentes se sustinebat? Quâ lenitate & mansuetudine, illorum quos alloquebatur tarditatem & stupiditatem juvaret, duritiem & contumaciam ferebat, & omnia omnibus fiebat, ut omnes redimeret & salvos faceret? *Sacer. Christ.* Quem non trahat adeò eximium Dei sapientiæ exemplum? Quis in hunc non currat odorem & zelum? Quis ad rudes & pauperes se demittere recundabitur? Procul hinc, tumida superbia, procul odibilis præsumptio; nonne utraque hoc satis confunditur exemplo?

Ad hunc prætereà erga rudes & pauperes zelum invitat & allicit exemplum Apostolorum, qui quàmvis eximiâ sapientiâ, & Spiritus sancti charismatibus repleti, nihilominus cum rudibus agebant, cum vilibus conversabantur, illisque se omnimodè adaptabant, omnibus omnia facti, ut omnes Christo lucrifacerent. D. Petrus, apud Simonem coriarium in Joppe commoratus est. D. Paulus, licet Doctor gentium esset, & Angelis sapientiâ æqualis, apud eos qui scenofactoriæ artis erant, hoc est, tabernaculorum & pellicum artifices, libenter habitavit.

His præviis excitati exemplis & ardenti zelati zelo, alii, quibus dignus non erat mundus, Apostolici viri doctrinâ & sanctitate conspicui, quàmvis concionatores celeberrimi hætenus fuissent, neglectis tamen urbibus & populosis civitatibus, rudium & pauperum instructionem libenti & hilari ani-

mo susceperunt. Hinc , prærupta , invia ; solitaria , & horrida loca , quò non conveniebant concionatores , alacriter ipsi , inter nives , grandines , & glacies properarunt , ut ad inaccessos , rudes , imò & barbaros populos pertingerent. In his ergò montuosis locis , cum rudibus rudes & humiles ipsi facti , vulgaribus utentes vocibus , verba & conceptus mentis ad eorum captũ deprimebant ; se inter eos exhibebant non solum ut spiritu patres ; sed etiam , ut matres & nutrices , ubera eis exhibentes veritatis , pietatis , & amoris plena , docentes quomodò se cruce signarent , quomodò Orationem Dominicam , Salutationem Angelicam , fidei Symbolum enuntiarent , quomodò mandata Dei servarent , Sacramentum Pœnitentiæ adirent , quomodò laborem diurnum , paupertatem , aliasque corporis & animi ægritudines ad Dei gloriam dirigerent & patienter ferrent , &c. Hâc mirificâ catechisandi & instruendi simplicitate & benignitate , hos rudes & pauperes ad admirabile fidei lumen & pietatis ardorem suaviter & fortiter alliciebant , & Jesu-Christo Incrifaciebant , patientiæ & amoris spectaculum facti , & Angelis & hominibus.

In hoc rudes & pauperes catechisandi & instruendi zelo se præcipuè commendarunt S. Carolus Borromeus , S. Franciscus Xaverius , S. Norbertus , S. Franciscus Salesius , S. Vincentius à Paulo , S. Joannes-Franciscus Regis , & alii innumeri qui spiritum Christi habuerunt ; ad hanc familiarè & humilem tantò libentiùs incubue-

runt instructionem , quò uberiores fructus ex eà colligi sciebant , & quò firmioribus ad hanc impellebantur rationibus , quales sunt sequentes.

I. Cùm rudes & pauperes in postremis habeantur ; hinc fit , ut quàmvis instructionis pane egeant , eumque avidè petant ; his tamen derelictis , ab Ecclesiâ interdum distantibus , inter pecora detentis , nullus persæpè est qui in tantâ necessitate frangat eum , & sic in ignorantia tenebris jacent , ac miserè pereunt.

II. Quia familiares illæ exhortationes , comparationibus , parabolis , & vulgaribus exemplis intertextæ , quibus hos rudes imbuebant , ad instruendum & persuadendum efficaciores sunt quàm pomposæ conciones sublimibus humanæ sapientiæ verbis ornatæ. Reverà , Apostoli orbem converterunt , non eximiis concionibus , sed simplici & catechistico sermone , cum Spiritûs virtute. Hoc patet in sancto Petro , qui in die Pentecostes , simplici exhortatione & catechismo , tria hominum millia ad pœnitentiam convertit , & ad hunc numerum quinque millia sequenti die adjecit. Idem præstitit Apostolus Paulus , in medio rudium , infirmorum & parvulorum , factus ipse rudis , infirmus & parvulus. His exemplis , & experientiâ suâ , confortati illi de quibus loquimur Apostolici viri , ad hanc simplicem erga rudes & pauperes se libentissimè demittebant instructionem.

III. Quia hos ruricolos , utpotè simplices , rudes , pauperes , & docibiliores cor-

de quàm divites & urbanos, faciliùs, liberiùs, fiducialiùs, & efficacius catechifari & instrui certò sciebant.

IV. Quia ad hoc ministerium, utpotè obscurum & molestum, nihil aliud sæpissimè allicit quàm purus Dei zelus. Hinc tantò ardentius huic humili vacabant ministerio, quantò tutius humilitas, in exedris pomposis inter audientium plausus multum & persæpè periclitans, hinc servatur illæsa; quantò etiam securius servatur & ingens meritum huic ministerio annexum.

Charissime Frater, si ad hæc audita & lecta non inardescat zelus tuus, cujus spiritus sis nescimus. Verùm, ecquandò senties in te quod & in Christo Jesu? Ecquandò amorosa pietatis erga rudes & pauperes, sicut electi, viscera sollicitus indues? Ecquandò saltem perfectioni & saluti tuæ hinc securius providere satages? Si hæc tandem sit mens tua, quid moraris? An non vides esse periculum in morâ? Nonne ergó tempus est tam altum, tam diuturnum, tamque periculosum excutere teporem? Exere nunc animum & ardorem, exere vires; zelum tuum erga hos pauperes & rudes protinùs depromas oportet; charitas Christi te nunc vehementius urget. Ne ergó te pigeat per vicos, per agros, sepes, sylvas, mappalia, agrestia, & deserta loca si necesse sit, pertransire; aut saltem hos quos in tuâ Parochiâ, vel in villis huic affinibus, pauperes & rudes habes, assiduè catechisa, & ardenter instrue, non solum in Ecclesiâ, sed etiam domi tuæ, si illud
exigat

exigat necessitas & permittat prudentia ; præsertim quandò rudes , jam adulti & ætate provecti , sed multùm ignari , publicis Ecclesiæ conventibus , propter summam illam quâ laborant ignorantiam , interesse non audeant , ne pudore & confusione coram populo afficiantur. Hos & illos benignus amplectere , & patienter sustine , simul & imbue , ut doctrinæ veritatem , gratiæ lucem , pacis benedictionem omnibus impertiri , tibi etiam thesauros in cœlis thesaurisare valeas.

Vide in superiori articulo profligatas & funditùs everfas proprii illusiones amoris , ab hoc , utpotè humili & molesto ministerio , te avertere conantis. Vide etiam in eodem articulo , & in alio ubi de prædicatione verbi divini , p. 152 , regulas in hoc ministerio , proportionem servatâ , observandas.

ARTICULUS XXII.

Zelus , & modus administrandi Pœnitentiæ Sacramentum.

CUm Sacramentum Pœnitentiæ lapsis post Baptismum , ad salutem necessarium sit , ut nondùm regeneratis ipse Baptismus ; (*Trid. Sess. 14. c. 2.*) ideòque à sanctis Patribus vocetur secunda post naufragium tabula ; & cùm per idem Sacramentum , non solum liberemur à peccatis , sed etiam his præservemur ; & insuper , conscientiæ pacem ac serenitatem ;

cum vehementi spiritûs consolatione percipiamus, (*Ibid. c. 3.*) nihil Sacerdotum, & præsertim Parochorum zelo dignius, quàm animas ad hoc allicere Sacramentum, easque in illud benignè accipere; gaudium enim est super uno peccatore pœnitentiam agente, quàm supra nonaginta-novem justis qui non indigent pœnitentiâ.

Attamen: pudet dicere, sed necesse est non tacere: plures Sacerdotes, quinimò Parochi, adeo à confessionibus audiendis abhorrent, ut pœnitentes, quàmvis bonæ voluntatis, ab hoc Sacramento arceant, eosque tandem in laqueum diaboli, & in damnationis æternæ periculum injiciant. Proh dolor! Væ illis tepidis, fastidiosis, & mercenariis Ministris! Væ illis Pastorum cæcorum idolis & simulachris, qui ad propria commoda, non ad labores & sollicitudines pro Dei gloriâ & animarum salute, sibi videntur vocati.

Tu verò, charissime Frater, si quem domûs Dei zelum habeas, libentissimè impendas & superimpendaris ipse pro peccatoribus ejus legem derelinentibus, & sub peccati ac dæmonis servitute miserabiliter gementibus; aut saltem, pro animabus curæ tuæ commissis. In hoc apparebit benignitas tua & ferventior zelus tuus, si confessionum audiendarum avidissimus sis. Quapropter, misericordiâ motus, & accurrens, cadas, si necesse sit, super colum peccatorum, ut te suaviter & fortiter trahente, adeant cum fiduciâ ad thronum gratiæ. Quid enim prodest ut eos prædica-

tionibus & exhortationibus tuis ad conversionem & pœnitentiam impuleris, si, præ fastidio & negligentia, eos pœnitentes postea audire nolis, & si eos, tanquam molestos & importunos repellens, misericordiæ januam ipsis præcludas? Memineris te ovibus tibi commissis Sacramenta administrare teneri quoties indigent & rationabiliter illa petunt.

Cave etiam ne hujusmodi pœnitentes, in te, tanquam Ananiâ fidentes, & tibi, gravem ob causam, confidendi cupidos, ad extraneos, imò & vicarios, præ nauseâ & desidia remittas. Nonne tu es pastor ovium? Nonne de iis tibi specialiter commissis tu præsertim redditurus es rationem? Bonus Pastor cognoscit oves suas, & suæ eum pariter cognoscunt; illa autem mutua cognitio ad tutam animæ salutem adeò idonea, per confessionem aptius exurgit. Si ergò ad mercenarios, ineptos, & nondum exercitados confessarios, pœnitentes, præ ignaviâ & turpi quiete remiseris, nonne periclitaris? An dignus es vocari bonus Pastor? Numquid hi extranei quorum humeris totum onus tuum, non verò honorem & emolumentum imponis, te de manibus Dei viventis liberabunt, aut te in inferno opitulabuntur, si ministerium quod illis, ignavus, imposuisti, perfunctoriè peragant? Minimè.

Renova ergò zelum tuum, aut ab officio desiste, ut ministerium tuum accipiat & dignius impleat alter; si verò resipiscere velis & tuam salvare animam, pœnitentiæ

tribunal tanquàm centrum tuum deinceps habeas necesse est. Verùm, cùm id non sufficiat, ecce tibi & aliis securæ hujus Sacramenti dignè administrandi praxis.

P A R A G R A P H U S I.

Regulæ ante administrationem Pœnitentiæ Sacramenti observandæ.

I. Ne te ingeras in hoc ministerium, humeris Angelicis formidandum, præsertim si ad illud non acceperis talenta. *Noli quærere fieri judex, nisi valeas virtute irrumperere iniquitates*, dicit Dominus. Eccle. 7. *Vide quid facias; non enim hominis exerces judicium, sed Domini, & quodcumque judicabis, in te redundabit.* 2. Paralip. 19. Quis ad hæc lecta non formidet?

Verùm, si Dominus vocaverit te, tibi-que talenta dederit; quid est cur ministerium hoc fastidis & horres? An quia periclitaris ipse? O homo modicæ fidei! quare dubitas? Nonne idem Deus qui vocat te, spiritu intelligentiæ te abundè replebit? Nonne tecum erit, ut te de tot tantisque periculis eruat, & ut te salvum faciat, & eos quos confitentes audies? An ministerium hoc reformidas, & accepta à Deo talenta, in terrâ, vel sub modio abscondita habes, quia Dominus austerus est judex? O misera defensio! Nonne de ore tuo judicaberis, servus piger & nequam? Cui enim multa data sunt talenta, strictior ab eo exigetur eorundem talentorum ratio. Dominus locutus est; nūmq̃uid ejus

verba præteribunt ? Cave ergò ne à spiritu Satanæ ab hoc ministerio te avertendi cupidi , te deinceps tentari finas , ut angustias te undique vallantes securus evadas.

II. Cùm sis , aut fieri debeas judex & medicus , eminens tibi necessaria est scientia , juxta illud : *Erudimini qui judicatis terram.* Ps. 2. Prætereà , nùmquid medicina curare potest quod ignorat ? Minimè. *S. Hier.* Ars artium est regimen animarum. In quantâ ergò temeritate ab imperitis suscipitur ministerium Pastorale , *S. Greg.* ! Si enim cæcus cæco ducatum præstet , nonne ambo in foveam cadunt ? Grande periculum ! eò formidabilius periculum quò frequentius ! Quod ut evadas , charissime Frater , volve & comede volumina scientiam tibi ad hoc ministerium necessariam insinuantia. Vide dicta ubi de studio & scientiâ , pag. 153. Porro , casus reservatos , in promptu habe ; ita ut rectè scias qui , jure Canonum , Summo Pontifici , qui Episcopo reservati sunt. Item , Censurarum rationem & vim rectè intelligas , & quibus criminibus annexæ illæ sint. Prætereà , cùm poenitentium medicus sis , collige tibi poenitentias medicinales , documenta & remedia unicuique consentanea , ut ea opportuno tempore ad manum semper habeas ; hæc enim particulâria remedia mirificè profunt ad extirpandas vitiorum radices , quia contraria contrariis curantur. *S. Greg.*

III. Cave ne eadem agas quæ judicas ;

in quo enim alterum judicas, te ipsum condemnas, & in te jacitur istud: *Medice, cura te ipsum*. Alioquin, quomodo effugies judicium Dei. Vide dicta ubi de pravo exemplo, *pag. 58*; de bono exemplo, *pag. 135*; & de prædicatione verbi divini, *pag. 156*.

IV. Vis existimari ut verus Christi Minister, fidelis inveniri hujus Sacramenti dispensator, & fructum afferre? Insta orationi, meditare in lege Domini, sis prius internus homo & mortificationi addictus. Vide dicta infra ubi de Meditatione. (*Index paginam indicabit.*) De prædicatione verbi divini, *pag. 156*, & alia passim huc spectantia.

V. Da operam ut maxima in te reluceat prudentia; non quidem prudentia carnis, quæ mors est; sed prudentia spiritus, quæ est vita. Ne innitaris prudentiæ tuæ. Ne dubites ergo in multitudine stare Presbyterorum, & sapientiæ illorum ex corde conjungi, ut ab illis, jam probatis & peritis, libenter erudiaris, & ut jam in te habens sal, scias quomodo interrogandi & audiendi sint pœnitentes; quando absolutionem dare, denegare, aut differre debeas; qualis & quanta injungenda sit pœnitentia; quæ adhibenda remedia; quomodo agendum sit, sive cum viris & mulieribus; quæ cum piis, timidis, & verecundis, aut scrupulosis; sive cum pertinacibus, effrænatis, & obduratis, &c. quâ discretione infundendum sit modò oleum, modò vinum, modò utrumque; quâ cau-

telâ servandum sit sigillum, &c. A Patre luminum descendit ista cœlestis prudentia. Si ergò optaveris sensum, dabitur tibi. Invoca, & veniet in te spiritus sapientiæ; venient tibi cum illo pariter omnia bona; sed contende & tu hanc ex fontibus Salvatoris haurire sapientiam.

VI. His præmissis dispositionibus præditus, necnon ab Episcopo approbatus, & jurisdictione ordinariâ aut delegatâ munitus, hunc judicalem actum graviter & decenter exercere debes, in habitu sacerdotali, cum veste talari & superpelliceo, cui conveniens esset superimponi stolam. Cave inprimis ne aliorum conscientias purgare & mundare intendens, propriam negligas. Puritatem verò illius & munditiem, præcipuo curare debes studio. Quare, antequàm in Tribunali pœnitentiæ sedeas, prius teipsum dijudica, & vel sacramentali absolutione, si opus sit, vel actu contritionis præmisso, humili prece opem divinam tibi aliisque quibus aderis implora; & abdicatâ prorsus omni curiositate, vanitate, avaritiâ, fragilitate, aliisque dæmonis suggestionibus inter audiendas confessiones irrepere solitis, puram intentionem dirige, & zelum promovendæ gloriæ Dei, salutisque animarum procurandæ in te ipso diligenter exfuscita, & jugiter fove.

Porro, cave ne in privatis ædibus, nisi urgentis necessitatis causâ, confessiones, five maris, five foeminæ, præterquàm ægrotantium, excipias. *Concil. Mediol.* sed in Ecclesiis duntaxat, & in confessionalibus

bus , quæ in aperto & non in obscuro loco collocanda sunt. *Concil. Aquens.* Mulieres autem , nisi ex causâ necessitatis , ante solis ortum , vel post ejus occasum , quàmvis in Ecclesiâ sint , confitentes non audias. *Concil. Mediol.*

Quinimò , earumdem mulierum confessiones non audies nisi in sede pœnitentiali , quæ crateribus ferreis vel ligneis sit munita , exceptis quibusdam festivis diebus in quibus , occasione concursûs populi , plures adhibendi fuerint Confessarii , quàm in dictis Ecclesiis sint pœnitentiales sedes. Eandem cautelam serva dùm ipsæ ægrotant , cujuscumque illæ fuerint ætatis. Ne ergò eas confitentes audias ostio cubiculi ubi illæ decumbunt clauso , locove obscuro.

VII. Ad confessiones audiendas comparatus , istas , vel alias effunde preces :

Veni, sancte Spiritus , reple , &c.

Cor mundum crea in me , Deus , & spiritum rectum innova in visceribus meis.

Ne projicias me à facie tuâ , & spiritum sanctum tuum ne auferas à me.

Redde mihi lætitiâ salutaris tui , & spiritu principali confirma me.

Docebo iniquos vias tuas , & impii ad te convertentur.

Libera me de sanguinibus , Deus , Deus salutis meæ , & exultabit lingua mea justitiam tuam.

O R A T I O.

Domine Deus omnipotens , propitius esio mihi peccatori , ut dignè possim

tibi gratias agere qui me indignum , propter tuam magnam misericordiam , ministrum fecisti officii Sacerdotalis , & me exiguum humilemque mediatorem constituisti ad orandum & intercedendum ad Dominum nostrum Jesum - Christum Filium tuum , pro peccatoribus & ad pœnitentiam revertentibus. Ideòque , Dominator Dominus , qui omnes homines vis salvos fieri , & ad agnitionem veritatis venire , qui non vis mortem peccatorum , sed ut convertantur & vivant , suscipe orationem meam quam fundo pro famulis & famulabus tuis qui ad pœnitentiam venerunt , ut des illis spiritum compunctionis , & resipiscant à diaboli laqueis quibus adstricti tenentur , ut ad te per dignam satisfactionem revertantur. Per eundem Dominum nostrum , &c.

PARAGRAPHUS II.

Regulæ inter audiendas Confessiones observandæ.

I. Sede pro tribunali , caput birreto opertus , vultumque præ te feras placidum ac benignâ quâdam gravitate temperatum ; quem , quidquid tibi in confessione dicatur , nullatenus immutabis , ne vel minimum sigillo confessionis præjudicium afferas. Modestiam autem singularem in totâ corporis compositione serva ; oculos ne huc & illuc circumferas , inprimis in mulierum pœnitentium faciem , ne & tu & illæ pariter tentemini.

II. Memento non esse apud Deum acceptionem personarum, nec esse distinctionem Judæi & Græci; nam idem Dominus omnium. Igitur, si puram Dei gloriam quæsieris, *personarum distinctionem minimè facies*; unde *parvum audies ut magnum, nec accipies cujusquam personam, quia iudicium Dei est.* Deuter. 1. Attamen, pauperum, rusticorum, & agricolarum, in sudore vultûs pane vefcentium, confessiones libentiùs diebus festivis audias, quàm mulierum, multò minùs per hebdomadam occupatarum; vel minimam hâc in re te illusuram proprii amoris illusionem cave.

Sed quoniam ad Sacramentum Pœnitentiæ cum humilitate animi, & demissione corporis accedendum est, ideò quovis nobiles & milites, armis præcinctos accedentes, nisi depositis priùs armis, non admittas; neque etiam mulieres vano cultu ornatas, fucatas, pulvere pigmentario conspersas; eas tamen suaviter & graviter reprehensas, hortare ut pœnitentis Magdalenæ vestigia legant; & fracto veluti alabaastro, caput Christi in pauperibus & pedes, odoribus vitæ æternæ perfundant, & velo capita, ex Apostoli præcepto, obumbrent. *Concil. Burdigal.*

III. Memineris etiam pœnitentes te in Confessionis exordio vocare patrem; proindèque, corde, & amore paterno ipsos excipere & amplecti debes, eorumque ignorantiam, tarditatem, imbecillitatem, aliasque imperfectiones, exemplo Christi, cujus personam geris, patienter ferre. To-

lerandus quidem non est abusus illorum qui , nisi à Confessario interrogati , nullum unquàm faterentur peccatum ; non obstat tamen quin , postquàm sese utcùmque explicaverint , eos ipse interrogationibus ad Confessionem perficiendam juvare possis , & etiam interdùm debeas , quandò scilicet eòrum accusationem insufficientem judicas ad Confessionis integritatem.

Quandò pœnitentes seipsos accusant ; licèt verbis interdùm minùs decentibus utantur , vel excusationes , narrationes inutilis , aliave similia Confessioni immisceant , eos patienter audi , nec ullo modo interturba ; sed postea eos benignè commoneas quâ ratione inposterùm decenter magis ac simpliciter peccata explicare debeant. Interim defectus illorum , si quis fuerit , interrogationibus supplendus , charitati incumbit tuæ.

Eâdem charitate & discretionem mulieres adjuva in iis declarandis peccatis quæ pudorem afferunt , ut scilicet neque retineant ea quæ explicanda sunt , neque plus ab eis quæras quàm necessarium sit , ne illæ doceantur quod ignorant & ignorare debent , & ne ipse in periculosas curiositates , foedas tentationes , & in laqueum Diaboli te imprudens detrudas , quod avertat Deus. Elimina prorsùs hinc inutilia , & multò magis , tenera nimis & adulatoria verba , quæ tuum & illarum cor emollire , & ad obscœnas saltem cogitationes te & illas allicere possent. Quid hâc cautelâ necessarium magis.

Illos autem qui peccatis gravissimis implicati, conscientiae terroribus exagitantur, ac in desperationem jamjam videntur prolapsuri, peculiari charitate adjuva, consolare, & viriliter, suaviterque conforta, eorumque spem in Deum, qui non vult mortem peccatoris, piis considerationibus quas tibi suggeret spiritus unctio, pro viribus exfuscita, ut ex illo horrendo & infelici statu emergere valeant.

Quòd si pœnitens, meretricis frontem induens, nullo neque pudore, neque timore permotus videatur, eum tunc acrioribus stimulis, quos semper ad manum habebis, variè & fortiter excita; cave tamen ne acerbis & duris increpationibus eum exacerbes, & ad desperationem adigas. Cujus spiritus esses? Certè non Jesu-Christi, qui Publicanos & peccatores, non irâ exæstuans, sed in benignitatem erumpens, excipiebat. Quidni & tu hanc indues benignitatem? Nonne majorem in te demonstravit Dominus Jesus?

IV. Inter audiendas Confessiones sis Deo intentus; oculos & mentem in cœlum interdum leva, undè tibi congruum veniet auxilium. Quapropter, elice actus jaculatorios juxta varias quæ sese offerent occasiones & difficultates, ut molestias huic ministerio annexas fortiter superes, & ut tentationes agminatim insurgentes illæsus evadas.

O quanta tibi necessaria est patientia; ut iis qui ignorant & errant, compati & condolere possis! Memineris te ideò mi-

sericordiam assecutum esse, ut in te primo ostenderet Christus Jesus omnem patientiam, ad informationem eorum qui credituri sunt in vitam æternam. Hanc patientiam postula, & viriliter ostende; ita ut nullam impatientiæ suspicionem pœnitentibus præbeas; patientia tua non peribit in finem; tuam verè pœnitentiumque animam hâc securè possidebis patientiâ.

V. Ille est verè pœnitens qui dignos facit pœnitentiæ fructus; verùm, qui adhuc agit id quod pœnitet, irrisor est, & non pœnitens. *Trid.* Cave ergò & iterùm cave ne des sanctum his canibus qui toto affectu ad vomitum suum revertuntur, & quorum novissima fiunt semper pejora prioribus; quàmvis tibi videantur contriti, ne eis facilè credas, præsertim si jam pridem promissis non stent, si vim in illud non faciant ut *violentia pœnitendi cedat consuetudo peccandi*. S. Aug. Si ergò emendationis media sibi jam toties data adhibere non curaverint, prudenter judicare debes eos, tamquàm pigrum illum de quo Scripturâ, velle & nolle, eosque proindè pœnitentiam fœdissimè agentes, à desideriis suis brevè occidendos esse. Quarè? quia *ubi emendatio nulla, pœnitentia necessariò vana*. Tert. & quia sine verâ pœnitentiâ omnes similiter peribunt, asseverat ipsa Veritas. Ut autem tu cum illis non occidas & in æternùm pereas, istam ejusdem Veritatis regulam tene, scilicet: *A fructibus eorum cognoscetis eos*. Math. 7.

Eandem, proportionem servatâ, regulam

tene circa quosdam quos D. Augustinus falsos fallentesque sanctos vocat ; circa etiam mulierculas quasdam , imò & nonnullos Clericos , qui non nisi peccata venialia , quæ velut aquam bibunt , ex arido usu , absque vero dolore & sincero proposito confitentes , in falsam conscientiam & in sacrilegia prolabi imprudenter periclitantur. Ut autem hâc in re cautior evadas , memento & ne obliviscaris listorum , nimirum : *Væ qui consuunt pulvillos sub omni cubito manûs , & faciunt cervicalia sub capite universæ ætatis ad capiendas animas.* Ezech. 13. *Claves Sacerdotum , non ad solvendum duntaxat , sed ad ligandum concessas , etiam antiqui Patres credunt & docent.* Trid. Sess. 14. c. 8. *Facilitas veniæ incentivum tribuit delinquenti.* S. Ambros. Nonne idipsum experientiâ constat ? Unde non esset tanta facilitas peccandi , si non esset tanta facilitas absolvendi. Bellar. Dimittuntur quidem in pace plures pœnitentes ; sed quoniam non est pax in terrâ nisi hominibus bonæ voluntatis , sæpissimè *irrita & falsa pax est , periculosa dantibus , & nihil accipientibus profutura.* S. Cypr.

Obsecramus te , charissime Frater , per viscera misericordiæ Dei nostri , ut tuæ pœnitentiumque animæ , quam Christus redemit & lavit in sanguine suo , miserearis. Cave ergò ne præcipitanter & indulgentiùs agens , te & pœnitentes interimere velis. Nullum quantumvis importunum absolvas , de cujus verâ pœnitiâ non sis moraliter certus. Confortare , pusillanimis , confor-

tarè : noli timere eos qui occidunt corpus ; sed potius eum time qui potest corpus & animam perdere in gehennam ; hunc time ; & ille tunc erit tanquàm bellator fortis ut confortet te , nequandò dicat inimicus tuus : *prævalui adversus eum.*

Circa hæc & alia hùc spectantia , vide morales & spirituales auctores , ut te ad majorem deinceps cautelam excitare valeas , eamque viriliter promas.

Quòd si pœnitentem ad percipiendam absolutionem idoneum judices ; tunc , per actâ confessione , ad veram de peccatis contritionem concipiendam , si ita expediat , piis aliquibus motivis excita ; ac tandem , salutarem & convenientem , pro qualitate criminum & ipsius pœnitentis facultate , quantum spiritus & prudentia suggererit , injunge pœnitentiam ; ne si fortè peccatis conniveas , & indulgentiùs cùm pœnitente agas , levissima quædam opera pro gravissimis delictis , injungendo , alienorum peccatorum particeps efficiaris. *Trid. Sess. 14. c. 8.*

Pœnitentias insuper medicinales adhibere sollicitus sis : *Proculdubio enim magnoperè à peccato revocant , & quasi fræno quodam coërcent hæ satisfactoriæ pœnæ , cautioresque & vigilantiores in futurum pœnitentes efficiunt ; medentur quoque peccatorum reliquiis , & vitiosos habitus malè vivendo comparatos , contrariis virtutum actionibus tollunt.* Ibid. Hinc , sapientis medici instar ages , si , ut habetur in Rituali Romano , avaris eleëmofynas injungas , libidinosi je-

junia vel alias carnis afflictiones , superbis humilitatis officia , desidiosis devotionis studia , &c. Illud tamen præcipuo studio cavere debes ne tales imponas pœnitentias ex quibus alii , v. g. maritus , parentes , vel domestici in suspensionem peccati alicujus in confessione declarati venire possint.

Ut autem , non solum crimine , sed ipsâ criminis suspensione careas , nihil unquam in confessione , aut confessionis occasione petas à pœnitente , etiam charitatis aut pii alicujus operis prætextu.

Eleëmofynas pariter pœnitentibus injunctas , neque tibi , neque tuæ Ecclesiæ applices ; sed , pœnitentis arbitrio , sive Ecclesiis , sive piis locis applicandas relinque ; quinimò , Missarum stipendia etiam ultrò oblata , in ipsâ pœnitentiæ sede accipere non expedit. Injunctâ tandem & à pœnitente acceptatâ pœnitentiâ quæ ad præteritorum peccatorum vindictam & castigationem , necnon ad novæ vitæ custodiam & infirmitatis medicamentum conferre possit , absolutionem illi cum debitâ intentione & reverentiâ confer ; & post illam , vel ante , prout magis expedire videbitur , pia aliqua & salutaria monita ipsi pœnitenti suggeres , tum ad vitæ emendationem , tum ad profectum in virtute faciendum , & sic illum in pace dimittes.



PARAGRAPHUS III.

Regulæ post auditas Confessiones observandæ.

I. Gratias age Deo quòd te , licèt infirmum & inutilem servum ; eligere voluerit ut tam sublimi ministerio vacares. Eum enixè roga ut defectus aut culpas quas pro tuâ fragilitate in hoc formidabili ministerio contraxisti , tibi dimittere dignetur. Ipsi Deo & gratiæ ejus , qui potens est ædificare & confirmare in finem sine crimine , commenda , præsertim in sacrificio Missæ , quos audivisti pœnitentes , ut pariter quod in te & in eis operatus est , confirmare , ac te & eos sub umbrâ alarum suarum usque ad mortem protegere dignetur. Virginis etiam Mariæ , & Angeli Custodis præsidis , eos & te fidenter committe.

II. Cave ne verbo , vel signo , vel alio quovis modo peccatorem prodas ; quin potius , omnia peccata quæ in confessione audivisti , perpetuo & religioso silentio comprehensa teneas , quàmvis juramento vel censurâ aut aliquâ aliâ violentiâ manifestare jubearis. Quòd si quandòque , absolutâ confessione , necessarium erit de re aliquâ ad ipsum pertinente pœnitentem admovere , id absque ejus facultate & obtentâ licentiâ non exequaris. Cave etiam ne publicè vel privatim de defectibus pœnitentium de quibus extra confessionem notitiam habes , aliquomodo loquaris ; plebs enim rudis , ignorans qualiter scias quæ refers , fa-

cilè decipietur, existimans te confessionem revelare, & exindè scandali occasionem sumet.

Schedulæ autem quas à te exigunt pœnitentes quos vel absolveris, vel non, uniformes esse debent; undè, si te priores absolvisse, posteriores verò confitentes dumtaxat audivisse affirmares, nonne inæqualem horum pœnitentium dispositionem, proindèque sigillum, hoc schedularum discrimine revelares? Annon etiam hîc innotesceret profunda quâ laborares ignorantia, aut deploranda illa quâ excæcareris præsumptio?

III. Circa mulieres quas confitentes audis, quasve dirigis, opus est ut sis quidem simplex sicut columba; sed majorem da operam ut sis prudens sicut serpens, ne illæ sint tibi, & tu illis exitii & ruinæ causa. Quàmvis enim mulieres præclaro devoti sexûs nomine ab Ecclesiâ donentur; ex eo tamen quòd nimîa fragilitate & proclivitate suâ, placere & demulceri naturaliter cupiant, laqueus venatorum, ipsorumque Confessariorum, & Directorum interdum sunt; sagma est earum cor; venenum aspidum earum labia & oculi, earum scilicet blanditiæ, suspiria, fletus & lacrymæ; manus illarum vincula sunt imprudentium & incautorum, cor turpiter tandem trahentia simul & emollientia. Illis ergò jugiter fortiterque diffidas; scriptum est enim: *Brevi omnis malitia super malitiam mulieris. Eccli. 25. ipsa siquidem, etsi voce syren, visu basiliscus; utroque*

perdit & necat. Cornelius à Lapide.

Nec refert quòd sanctæ sint : *Quàmvis sanctæ sint , non minùs cavendæ sunt ; quòd enim sanctiores sunt , eò magis alliciunt.* S. Aug. Ex mutuis siquidem colloquiis , ex assiduïs , familiaribus , reciprocisque visitationibus , & ex vicariâ epistolarum relatione , erumperent tandem in eas & in te abominations pessimæ ; aut saltem , affectus humani à verâ pietate alieni. Undè cautè sancitum est ne quisquam confessarius , absque speciali licentiâ , mulieres confitentes audiat , nisi quadragesimum annum attigerit , ne incautus & nondùm probatus , in laqueum & in foveam quam sibi faceret , infelicitè incidat.

Quàmvis eas tu , charissime Frater , tandem dirigas , cave ne cum illis familiariter , etiam devotionis prætextu agas ; nec permiseris ut te extra sedem pœnitentiæ adeant , & te alloquantur , nisi urgente causâ ; quæ si vera adsit , tunc *brevis & rigidus cum illis sermo est habendus.* S. Amb. Tu quoque eas , nisi necessitatis causâ , non adeas ; magnâ etiam tunc cautelâ utaris necesse est. Cave prætereà ne illas in aliquod tibi , sive benè valenti , sive ægro-tanti necessarium aut utile opus assumas ; indè enim ingenerari facilè possent periculosi affectus , quibus , non Deo , sed tibi placere studerent , ac se & te seducere quærerent. Si quem , etsi levem , cujusquam erga te affectum adverteris , hunc protinùs quasi pestem eradicare & exterminare coneris , ut huic lethali principio

monstra parituro viriliter obstes. Quòd si non obstantibus monitis & increpationibus tuis, videris talem perseverare affectum, quinimò in dies crescere, eam ad alium Confessarium & Directorem doctum & pium statim & fortiter remitte, eandemque poenitentem ab ipso animo tuo eliminare contende, ut eam à pestiferis illusionibus tutam præstes, & te ab imminenti lue vindices.

Tandem, hanc Conc. Maclin. sanctionem attende : *Nemo aliquem ad perpetuò sibi soli confitendum obliget ; ejusmodi promissionem, etiam juratam, tanquàm irrationabilem & indiscretam hæc Synodus irritam esse declarat, &, quatenùs opus est, irritat.*

ARTICULUS XXIII.

Zelosa Ægrotorum, præsertim Agonisantium visitatio & cura.

Pasce oves meas, dixit Simoni Petro ejusque successoribus Dominus Jesus. Oves autem, eo præsertim temporis articulo pascendæ sunt, quo de summâ rei decertandum est, & ex quo totius pendet æternitatis causa. O res plena discriminis ! Ecquid, si æger in arenam solus descendat, congruis destitutus auxiliis ?

Undè meminisse debet Parochus non postremas esse sui muneris partes ægrotantium curam habere. *Ritual. Rom.* Nonne ergó Pastor ille qui videns lupum venientem periclitantes dimittit oves & fugit, suo

deest officio & mercenarius est ? Non est dubium quin in tam difficili luctâ descendat ad eas diabolus , magnam habens iram , sciens quòd modicum tempus habeat. His in angustiis , adversarius ille , tanquàm leo rugiens , eas tunc acriùs circuit ut eas crudeliter devoret. Quis hoc ignorat ?

Quid prodest , charissime Frater , ut oves tuas per vitam assiduè pascas , & superimpendaris ipse pro animabus earum , si , urgente summo periculo , id est , si , quando eas mortis circumdant dolores , si , dùm eas inveniunt inferni pericula , si , dùm infestior morbus , caput debile , corpus languidum , ratio non perindè lucida , crebræ & feriores tentationum procellæ , facilem & liberum non dant pœnitentiæ agendæ , virtutum & salubrium exercendorum operum , nec de Deo cogitandi locum , frigeat zelus tuus , easque in tempore malo durè nimis deferas ?

Quid de exercitûs Præfecto diceret , qui milites toto pacis tempore ad pugnam exerceret assiduus , sed , instante bello , ignavè fugeret , & derelictum exercitum , hostibus trucidandum traderet ? Nonne hunc desertorem acriter deprehenderes , eumque gravi supplicio dignum putares ? Quid pariter de gregum custode censeret , qui oves , capellas , &c. dùm sanæ sunt & procul à lupo , sollicitè pasceret earumque diligentem curam haberet ; sed ægrotas non sanaret , confractas non alligaret , easque , veniente lupo , dereliqueret & ab eo vorari sine-
ret ? Numquid eum fidelem gregum custo-

dem reputares ? Minimè profectò ? Nonne tamen es tu ille vir, & quidem tantò magis illo ignavo Præfecto & isto mercenario gregum custode reprehendendus & damnabilis, quantò præ cæteris mundi rebus præstantior est periclitans ægrotantium anima ?

Quoties tamen contingit ut, præ tædio, otio, ignaviâ, comeffationibus, confabulationibus, & præ nimio quietis amore, manum periclitanti porrigere nolis, quàmvis totâ die gemebundus clamet: *Miseremini mei, miseremini mei, saltem vos, amici & pastores mei, quoniam tribulatio proxima est, & non est qui adjuvet ?* Quoties auxilium pro morituro obsecrantes asperè dimisisti, imò & scandalifasti, ita ut te deinceps vocare dubitent, & minimè audeant ? Quoties personarum acceptionem fecisti, visitando quidem nobiles, divites & notos ; rusticos verò, & inopes fastidiosos deferens ? Memineris quòd Dei Filius ad filium Reguli corporaliter ire noluerit ; ad salutem verò servi venire paratus fuerit. O idolum zeli tui ! Nonne pretioso Agni immaculati sanguine redemptus est pauper, sicut & dives ? Bonus Pastor animam suam, si necesse sit, pro ovibus suis ponere debet ; verùm, numquid pro illis tuam poneres animam, dum in summo periculo versantibus, opitulandi gratiâ, ab ædibus tuis exire renuis ?

Verùm, hæc tremenda Dei oracula trepidus audi, & attentus meditare : *Custodi virum istum, quia si lapsus fuerit, erit ani-*

ma tua pro animâ illius. 3. Reg. 20. Si igitur, præ ignaviâ tuâ, ipse in iniquitate suâ moriatur, nonne sanguis ejus de manu tuâ requiretur? In illis esto, & in istis attende: Quod infirmum fuit non consolidastis, & quod ægrotum non sanastis, & quod confractum non alligastis. Ezech. 34. Oculum pro oculo, dentem pro dente restitues. Levit. 24. In quâ mensurâ mensi fueritis, remetietur vobis. Math. 7. Infirmus eram, & non visitastis me; discedite à me maledicti in ignem æternum. Ibid. 25.

Quibus hæc imminet pœna? Nonne his Parochis qui postquàm infirmis sacramenta administrarunt, eos inter inimicorum impetus, solos & periclitantes deserunt? Nonne his etiam imminet Clericis quos, totâ die otiosos, infirmos visitare piget? Quomodò charitas Dei manet in eis? Nonne manent in morte? Profectò. Quare? Quia non diligunt. In quo charitatem Dei erga nos cognovimus? In hoc quoniam ille animam suam pro nobis posuit. Nonne & illi, ut charitatem dignoscantur habere, animas pro fratribus, quàmvis Pastores non sint, ponere parati esse debent præsertim quando instat periculum, & non adest proprius Pastor? In hoc etiam positi ipsi sunt. Sed heu! diligunt verbo & linguâ, non opere & veritate. Hinc, quantus gemitus! quantæ quorundam blasphemiae de Ministrorum tepidorum absentia! Ecquandò tandem fratrum suorum zelum zelantes, illis facere ferventer properabunt quod sibi, præsertim in horâ mortis, fieri volent? Si illud fin-

cerè velint; si idem & tu, charissime Frater, toto mentis & cordis affectu concupiscas, hoc factis, & præcipuè istorum documentorum praxi, protinùs ostende.

1°. Ulula Pastor, simul & Clericus, & de tuo frigido zelo pœnitentiam age.

2°. Ne te inposterum pigeat visitare infirmos, ex hoc in charitate firmaberis. Undè, si diligas proximum tuum sicut teipsum, ecce quem amas infirmatur, ecce nunc opportunius charitatem tuam in eum demonstrandi tempus.


3°. Hoc sentias in te quod & in Christo Jesu, qui visitavit infirmos, & qui ægrotationes nostras ipse portavit. Divi Pauli imitator sis, sicut & ille Christi. Quis, inquit, infirmatur inter vos, & ego non infirmor? Indue te, sicut electi Dei, Sancti, & dilecti, viscera misericordiæ; inprimis sicut D. Carolus, qui, grassante peste, nihil verebatur, nec faciebat animam suam pretiosiore quàm se, omnibus omnia factus, ut omnes faceret salvos.

4°. Visita præsertim pauperes, & in nosocomiis agonisantes; isti siquidem interdum magis deseruntur; in hoc enim purum præ te fers zelum. Quod si, propter infirmitatem, &c. in hæc per te non possis incumbere officia, roga alium misericordiæ virum, cujus pietas agonisanti non desit.

5°. Si in charitate maneat, hæc suggeret tibi verba bona, verba consolatoria. Memento tamen, hæc apud infirmos, non temerè & confertim, sed sensim, leniter, & per intervalla suggerenda esse; multum
hæc

hâc in re peccant apud ægros illi qui, nimium legendo & alloquendo, sæpè etiam parerga, & quæ minùs ad rem ingerendo, caput eis obtundunt. *Vide ad hoc libros Spiritu Dei & cœlesti unctiōe refertos; sed præsertim consule librum vitæ, scilicet Jesum crucifixum.*

Igitur, charissime Frater, per viscera misericordiæ Dei nostri qui visitavit nos oriens ex alto, visita infirmos secundum beneplacitum Christi, cujus unctio loquitur in te; ut in horâ mortis fiducialiter, & Deo, non tibi dans gloriam, dicere possis: *Domine, cùm essem cum eis, ego servabam eos in nomine tuo; quos dedisti mihi custodiri, & nemo ex eis periit.* Joan. 17. & ut tu vicissim lætanter audias: *infirmus eram, & visitasti me: veni benedicte Patris mei, posside paratum tibi regnum à constitutione mundi.* Matth. 25. Amen.



CAPUT QUINTUM

Obligationes particulares.

ARTICULUS I.

Munia Syndicorum & Præpositorum Capituli & Communitatum Ecclesiasticarum.

SI sis Syndicus aut Præpositus Capituli vel Communitatis Ecclesiasticæ, memento tui esse muneris præesse in sollicitu-

K

dine verbis & exemplo ; ac dare operam ut regularis disciplina ac statuta observentur , ut omnia honestè secundùm ordinem fiant , ut sancta sanctè tractentur , & ut fideles ad pietatem , & ad Dei cultum assidue instruantur. Non licet tibi erubescere Evangelium , nec quærere hominibus placere , quapropter argue , increpa in omni sapientiâ delinquentes. Quòd si virgâ opus fuerit , tunc rebelles & morosos ad disciplinam ecclesiasticam multis pecuniariis , juxta potestatem tibi à summis Pontificibus traditam , coerce. Cave ne facias acceptionem personarum ; non est apud Deum talis acceptio.

Cogita , & iterùm cogita te communicare peccatis alienis , si præ ignaviâ , tempore , respectu humano , vanâ absentia , ac pravo exemplo , regularis observantia destruat , ac si indè irrepant scandala. Nonne Deus requiret ista ? Profectò , & quidem strictissimè ; & adhuc accuratius non vigilas ? Officii tui honori & utilitati magis consulis , quàm obligationibus illi annexis & rationi de illo reddendæ ? Grande periculum ! Quis tuam intelligat cæcitatem.

Teneris insuper defendere & tueri jura , redditus , & emolumenta Capituli vel Communitatis cui præes , si eorum cura in te incumbat.

Memineris te forsan juramento teneri ad disciplinam Ecclesiasticam tuendam , & ad alia munia præstanda.

Igitur , si sis cæcus speculator , & canis

mutus. ; si blasphemans quodcumque ignoras, sis simulachrum habens os & non loquens, oculos habens & non videns, aures & non audiens ; si propter te fideles scandalisentur in lege, opus Dei fiat negligenter ; si propter incuriam tuam periclitentur ac pereant jura & redditus Capituli & Communitatis, ac fidelium legata & foundationes, nonne perjurus es ? Nonne peccata aliena, & forsan sacrilegia ac iniquitates quasi aquam hæcenus bibisti ?

Idipsum seriò cogita ; appende te in staterâ. Utinam salutari timore percussus, confitearis adversum te injustitias tuas Domino, facias dignos pœnitentiæ fructus, & diligentius deinceps attendas tibi & aliis quibus præes ! In his esto, si velis in tuto tuam ponere salutem.

ARTICULUS II.

Munia Pastoralia.

SUſcepistiſtine animarum curam ? O quàm gravem & periculosaſam tibi impoſuiſti ſarcinam ! O utinam ſaltem onus hoc humeris Angelicis, ut loquitur Tridentina Synodus, formidandum, à Deo vocatus & electus, ac à tuis Præpoſitis diù probatus, ad majorem Dei gloriam, & ad animarum ſalutem, non niſi invitus ſuſceperis ! Memineris ſemper te ad fortia miſiſſe manum, & te in altitudinem maris veniſſe ; cave ne tempeſtas demergat te ; nam hoc eſt maximum periculum te de factis alterius red-

K ij

dere rationem, qui pro tuis non sufficis: *S. Thom.* Undè fit verum istud: *Interdum dominatur homo homini in malum suum. Eccl. 8.*

Quapropter, in omnibus labora sicut bonus miles Christi. Pensa, & iterum pensa, præcepto divino mandatum esse omnibus quibus animarum cura commissa est; oves suas agnoscere, pro his sacrificium offerre, verbique divini prædicatione, sacramentorum administratione, ac bonorum operum exemplo pascere; pauperum, aliarumque miserabilium personarum paternam curam gerere, & in cætera munera pastoralia incumbere. *Trid. Sess. 23. de ref. c. 1.* Si aliter agas, quid es? Idolum Pastoris, laqueus in ruinam multorum positus. Quid eris? Ipse videris.

Adimplere autem tuum ministerium te nequaquam posse scias, si gregem tibi commissum mercenariorum more deferas, oviumque tuarum, quarum sanguis de tuis est manibus à supremo Iudice requirendus, custodiæ minime incumbas, cum certissimum sit non admitti Pastoris excusationem si lupo oves comedit, & Pastor nesciat. *Idem Sess. 6. de ref. c. 1.* O Pastor vagus! Intellexisti hæc omnia?

In te ergo reversus, attende tibi & universo gregi in quo te Spiritus sanctus posuit regere Ecclesiam Dei quam acquisivit sanguine suo. Gravissimum his qui præsunt iudicium fiet. Formidabile iudicium! Anima pro animâ. Terribilis sententia! Hæc seriò meditare, charissime Frater; ut accu-

ratius deinceps pervigilans , quasi rationem pro animabus tibi commissis redditurus , ac factus forma gregis ex animo , fias Pastor juxta cor Dei , & in domo ejus non servus inutilis , somno , luxui , quieti , jocis , avaritiæ & epulis deditus ; non simulachrum & phantasma , sed oliva fructifera , lucerna lucens & ardens , in gloriam Dei & animarum salutem consumenda , ne in te vertatur istud : *Ut quid terram Sanctorum , sibi & aliis nequam , occupat ? Fiant dies ejus pauci , & Episcopatum ejus accipiat alter.*

Error cui non resistitur , approbatur ; & veritas , cum non defensatur , opprimitur. *Jus. Can.. dist. 83.* Undè , si non annuntiaveris ut avertatur impius à viâ suâ impiâ , ipse impius in iniquitate suâ morietur ; sanguinem autem ejus de manu tuâ requireret justus Judex.

Credis hoc ? Si illud credas , quid est cur populo scelera eorum incessanter non annuntias ? Ecquandò eris canis mutus latrare non valens ? Væ tibi quia taces !

Delinquentes verò , in misericordiâ sicut justus , corripe & increpa ; superveniente enim mansuetudine , omnes corripientur. Quod si virgâ opus fuerit , da tunc operam ut vigor à mansuetudine numquàm separetur , nec justitia à misericordiâ ; & quàmvis ex utrâque faciendum sit temperamentum , ut neque multâ asperitate exulcerentur subditi , neque nimîâ benignitate solvantur , ut loquitur D. Gregorius ; expedit tamen ut ad lenitatem proclivior sis

quàm ad severitatem ; plures enim melle capiuntur muscæ, quàm aceto. Talis erat sancti Francisci Salesii melliflua regula & praxis. Et verò, est-ne verus Pastor, qui ovium infirmitatibus condolere & compati nescit ?

Discordantium & periclitantium pedes in viam pacis & salutis dirigere contende ; ac proindè habeas oculos ante & retrò. Quare ? Quia speculatorem dedit te Dominus domui Israël. Igitur, vae tibi si sis cæcus speculator, videns vana & amans somnia ?

Circa studiosam puerorum catechisandorum curam, vide dicta, pag. 178. Hoc munus ad te præcipuè spectat, & eidem, tamquàm salutis ovium tuarum fundamento, accuratissimè vacare debes.

Verùm, sufficit-ne studiosa illa puerorum catechisandorum cura ? Minimè ; jam enim vidisti præcepto divino mandatum esse omnibus quibus animarum cura commissa est, oves suas verbi divini prædicatione pascere. *Trid. Sess. 23. de ref. c. 1.* Igitur, per se, vel per alios idoneos, si legitime impediti fuerint, diebus saltem Dominicis & Festis solemnibus, plebes sibi commissas, pro suâ & earum capacitate, pascant salutaribus verbis, docendo quæ scire omnibus necessaria sunt ad salutem, annuntiandoque eis, cum brevitate & facilitate sermonis, vitia quæ eos declinare, & virtutes quas sectari oporteat ut pœnam æternam evadere & cælestem gloriam consequi valeant. Id verò si quis eorum præstare negligat, per cen-

suras Ecclesiasticas , seu alias ad Episcopi arbitrium , cogatur ; ita ut , si ei expedire visum fuerit , ex beneficiorum fructibus , alteri qui id præstet , honesta aliqua merces persolvatur , donec principalis ipse resipiscens , officium suum impleat. Idem Sess. 5. de ref. c. 2.

Reverà , hæc est vita æterna ut cognoscant Patrem , & quem misit , Jesum Christum ; sed quomodò cognoscent Patrem & Filium ? Quomodò mandata servabunt , nisi audiant ? Et quomodò audient sine prædicante ? Quid ad hæc respondes cæcus speculator , Pastor teipsum , non oves pascens ; Pastor tuæ utilitati , non ovium saluti consulens ; idolum Pastoris , simulachrum os habens & non loquens ? Nonne audis parvulos & adultos post te clamantes , panemque avidè petentes ? Quid est cur fame pereuntibus non frangis eis ? Quòusque tandem eos jejunos , immisericors dimittes ? Nonne in viâ miseri deficient ? Annon & tu , præ duritiâ tuâ , pariter deficies & in æternum peribis ?

Verum , dic , amabimus , quare talentum in sudario repositum habes ? An quia Dominus est austerus iudex ? O infelix ! Ideò præcisè ad populum tibi commissum instruendum te alacrius impellere debes , ne de ore tuo judiceris servus inutilis & nequam.

An instructionem fastidis & hanc Populo denegas quia non est talis instruendi consuetudo ? O pestifera defensio ! Numquid ignoras , consuetudinem sine veritate ,

vetustatem erroris esse? *S. Cypr.* An tempor & negligentia aliorum Parochorum adversus Evangelium, & Concilii Trid. Sanctionem prævalere umquàm poterunt? Verius dicamus, nonne cum his otiosis, repidis, & mercenariis Pastoribus in eadem es damnatione? Profectò. Dominus locutus est.

Iterum quærimus, quare hanc populis necessariam instructionem negligis? An quia credis te huic officio sufficienter satisfacere pueros catechizando? Erras.

Quomodò enim adulti servabunt mandata, & sacramenta dignè suscipient? Quomodò vitia declinabunt, & virtutes sectabuntur, si hæc omnia, ut præcipit Trid. loco citato, facilitate & brevitate sermonis eis familiariter non expendas, mastices, & inculces? Si catechises infantes, optimè facis, & in hoc laudamus te; si verò adultum & rudem populum non instruas, certè in illusionum & peccatorum alienorum foveam, quam tibi imprudens facis, brevi casurus es. Absit ergò ut te in hoc laudemus. An ignoras adultos catechisinum interdum fastidire, & ab eo ferè semper abesse, præsertim si post expleta officia ille fiat? Quare? Quia iidem adulti sibi facile persuadent se hoc catechismo non egere; ideòque illum ad solos pueros remittunt. Nonne illud tibi experientiâ compertum est?

Forſan non habes talentum ut sis Pastor, cùm instruendi dotibus careas. O insipiens! Si res ita sit, cur Pastoris suscepisti no-

men & onus? Cur in novissimo ovium loco non recubuisti, ut grex aptiori demandatus Pastori, salvaretur, & ut te quoque ovis nomine & loco contentus, teipsum securius salvum faceres?

Erubescere ergò, chiarissime Frater, erubescere excusare excusationes in peccatis; hæ omnes & aliæ excusationes quibus te illudit diabolus, & teipsum fascinas, Dominum tuum acrius exacerbabunt; quinimò, omnes oves quas occidisti, quia non pavisti, stabunt in magnâ constantiâ adversus te, vindictam requirentes, & condemnantes te. Proh desperatio! Tunc subfuisse & fodisse, quàm præfuisse sine dubio malles, sed frustra.

Has ut justissimas evadere possis vindictas & desperationes, ulula Pastor mutus & inutilis, ac poenitentiam age; lectioni in posterum accuratius attende. Ut in doctrinâ potens sis exhortari & oves tuas verbi divini prædicatione pascere, instructiones familiares & breves infrà hebdomadam institue. Crede nobis, si Spiritum & zelum Dei habeas, has parare, & populo annuntiare facile poteris, quàmvis modicis talentis præditus sis. Numquid eximiis eges talentis ut populum imprimis rudem & pauperem erudias?

Attamen Deus, cui omne cor patet & omnis voluntas loquitur, supplebit quidquid tuæ deerit infirmitati; præsertim postquam ex parte tuâ feceris quidquid ejus gratiâ adjutus facere potuisti. Quòd si id per te præstare nullomodò possis, tunc idoneum

K v.

coadjutorem sumptibus tuis adhibe tibi, aut oneri & honori cedas, ut Deus Pastorem juxta cor suum populo suo periclitanti det.

Vide dicta ubi de prædicatione verbi divini, *pag.* 156. Item de diligenti rudium & pauperum instructione, *pag.* 187.

Cùm Sacramenta sint fontes Salvatoris, & instrumenta gratiæ, ad eorum frequentem usum fideles tibi commissos, juxta uniuscujusque statum, modis omnibus allice; ea tu quoque, præsertim rationabiliter petentibus, prompto, paterno, & hilari affectu ministra. Væ tibi si eos ab hoc usu, præ fastidio & otio arceas! Attamen esto fidelis minister Christi, & prudens mysteriorum Dei, & præcipuè Sacramenti Poenitentiae, dispensator. Vide dicta, ubi de zelo & modo hujus Sacramenti administrandi, *pag.* 193.

Cùm præceptum sumendi Eucharistiam obliget adultos in quovis probabili mortis periculo, vide nùm pueri qui numquam eam ante sumpserunt, sed qui in hoc mortis periculo versantur, sat discretionis habeant ut ad illam sumendam tunc obligentur, ne tuâ culpâ tantum transgrediantur præceptum.

Plora idemtidem inter vestibulum & altare, ut fias in tempore iracundiæ reconciliatio; apprehende disciplinam nequando in te irascatur Dominus, pereas ipse de viâ justâ, & reprobis efficiaris.

Quid est parochus sine oratione? est miles sine armis; est animalis homo, non percipiens ea quæ spiritûs Dei sunt. Insta

ergò, charissime Frater, insta orationi, & fies idoneus & potens instare ministerio verbi; hauri ex fontibus Salvatoris, & præcipuè ex ejus suavissimo corde, lumina flammantia & sacram illius unctionem animas convertentem.

Benevolentiam & fiduciam animarum tibi modis omnibus concilia. Quapropter, curam habe de bono nomine; ne agas familiarius cum Laïcis, nec apud illos comedas; sed præsertim opus est ut nuptiarum evites convivium. *Conc. Agath.* Ne exigas debita nimis asperè; erga pauperes & ægrotos, præsertim verecundos, indue viscera misericordiæ. Vide dicta ubi de eleëmofynâ, pag. 146.

Cùm è duobus malis minus sit eligendum, necesse est interdum tolerare aut dissimulare, saltem ad tempus, aliquid mali ad præcavendum gravius. Qui dissimulare nescit, præesse nescit. Cave, ne attendens exhortationi, prolixior sis, ne ingeneres fastidium, & ut auditores sint semper ad te audiendum parati. Cave etiam ne cum fidelibus tibi commissis litiges, saltem quoad fieri poterit; nihil est quod à fiduciâ magis avertat; &, sublatâ fiduciâ, nihil prodest.

Doce obstetrices modum administrandi Baptismi Sacramentum; ex hoc pendet interdum æterna infantium salus. Quid ergò hâc tuâ diligentia dignius?

Species Eucharistiæ idemtidem renova; & sæpius per æstatem. Huc spectant munia tua.

Invigila ut præceptor suo fungatur officio. Heu ! Quot quantaque mala ex negligentia , ignorantia , & pravo exemplo paedagogorum oriuntur in Republicâ , & in Ecclesiâ Dei ? Tuum est hæc prævenire mala.

Ne te pigeat visitare infirmos , ut per verba bona , per verba consolatoria , percipiant immarcessibilem gloriæ coronam. Væ tibi , si in tam difficili luctâ , & in hoc tempore malo ex quo pendet tota æternitatis causa , illos deserueris ! Iterum moneamus & obsecramus te per misericordiæ viscera , ut agonisantes dirigas in viam salutis æternæ ; hinc tu ipse in charitate Christi & fidelium firmaberis. Vide dicta ubi de visitatione & curâ ægrotorum & agonisantium , pag. 212.

Vide, ne redditus Fabricæ & Sodalitatum dissipentur. Exige quotannis rationem ab his qui eorum administrationem habent , præsertim si ita præcipiat Episcopus.

Da operam ut Statuta Diœceseos & decreta Visitationis observentur ; obligant enim in conscientia. Inter sis ipse collationi singulis mensibus fieri solitæ ; hæc enim est Clericis desidiosus & ignarus studendi incitamentum.

Defende jura tui beneficii , & fidelium foundationes. Cura pariter ut pia legata impleantur.

Tandem , si Deum timueris , cætera quantumvis levia munia non negliges : in his esto ; in his siquidem sita est sanctificatio tua.

Quapropter , inhæreant animo hæc verba consolationis plena : *Qui benè præsumt Presbyteri , duplici honore digni sunt. Qui benè ministraverint , bonum gradum sibi acquirunt & multam fiduciam , quæ est in Christo Jesu.*

Igitur viriliter age & confortetur cor tuum ; & licet populi quos erudies ad justitiam , durâ cervice & incircumcisis cordibus Spiritui Sancto resistent , nec obediunt veritati , percipies tamen coronam justitiæ ; Deus enim à te non exigit curationem , sed curam. *S. Bern.*

Beatus populus qui talem habet qualem hîc descripsimus Pastorem ! Nam sicut Sacerdotes & Pastores mali , sunt laqueus ruinæ Populi Dei , juxta *Ezech. c. 44.* ita , Pastores boni , ardenti zelo zelati , forma gregis ex animo , & omnibus ovibus omnia facti , ejusdem Populi sunt efficacissima falx , inquiunt passim sancti Patres & Concilia , & ipsa confirmat experientia. Utinam ergò de his juxta cor Dei Pastoribus cunctæ accuratiùs providerentur Ecclesiæ Dei ! Certè , tot tantaque mala quæ per finistræ promotionis ostium intrarunt , & quotidie in Ecclesiam Dei agminatim irruunt , non sentiremus. *Conc. Colon.* Videant hujusmodi beneficiorum collatores dicta ubi de Probatione ante ordines , *pag. 19.* & de Ambitione , *pag. 37.*



ARTICULUS III.

Munia Canonorum & Beneficiatorum circa residentiam in Choro, & scientiam cantûs.

SCiant universi, ex Constitutione Bonifacii VIII. & ex Concilio Tridentino, *Sess. 24. de ref. c. 12.* illos qui non assunt Horis Canonicis in choro, non acquirere dominium distributionum, exceptis illis quos infirmitas, seu justa & rationalis corporis necessitas, aut evidens Ecclesiæ utilitas excusat.

Verum, si hæ causæ non adsint, si quæ interveniat fraus, quâ fronte fructus facis tuos? Numquid fraus & dolus debent alicui patrocinari? Minimè. *Innoc. III.* Quare? Quia qui facit in fraudem legis, contra ipsam legem videtur facere. *Glosa in C. Quanto.* Unde, non obstante quâvis remissione & collusionem, his fructibus carere debes. *Trid.* Quòd si eos acceperis, hos restituere debes.

Insuper, cùm teneantur omnes, in Choro ad psallendum instituto, hymnis & canticis reverenter & distinctè devotèque laudare Deum, *Trid.* & cùm cantus & soni graves & pii esse debeant, ut ad pietatem auditores excitentur, (*Concil. Mediol.*) nonne facilè contingere potest ut tenearis ad restitutionem, si officium irreverenter persolvas, ac si in cantandis Horis tibi nimium blandiaris; si huc illuc rotans ocu-

los, & confabulans, vel præ tædio dormitans, vel diligens verba præcipitationis & voces inordinatas, recites aut cantes Horas Canonicas, & assistas Missis pro defunctis, & aliis functionibus, absque debitâ attentione? An tibi latet orationem absque attentione non esse veram orationem, sed orationis simulationem, sicut homo pictus non est verus homo, sed hominis simulachrum? Quoties etiam contingit ut Punctator, qui absentes absque causâ à Choro, aut perfunctoriè præsentes non notat, periclitetur ipse multum, & teneatur ipse ad restitutionem?

Redi ad cor, charissime Frater; hæc omnia peccata districtius scrutare, & sincerius confitere, eaque restitutionibus & eleëmofynis redime ac remedium adhibe; judicia Dei abyssus multa.

Quid sentis de pravâ consuetudine quorundam Clericorum, qui, desinente campanarum sonitu, ad Ecclesiam accurrunt, &, instar venatoris canis, hiant ore spiritum trahunt? Qui gloriâ Dei nullatenus allecti, sed potius, ut loquitur Isaias, diligentes munera, & sequentes retributionem, in Chorum non intrant, nisi inchoato officio, nisi cursim, irreligiosè, mente vagâ, nec tantillum ad orationem præparatâ animâ, quasi in coenaculum intrarent, aut ad circulos convolarent? Quid de his sentis?

Quid de his qui, inter psallendum, sæpè sæpius exeunt è Choro, non necessitate, sed animi levitate, & rerum divina,

rum fastidio? Quid de his qui ex eodem Choro & ex Ecclesiâ festinanter egrediuntur nondum persolutis horis? Nonne, ipso tuo iudicio, illud est tepidi, fastidiosi, negligentis, otiosique animi indicium? Annon hoc est avari, mercenarii & irreligiosi personam præ se ferre, scandalum & risum movere? Ita sanè. Reverà, hæc omnia vident & dolent ipsi Laïci, simul & horrent, & blasphemant; super his obstupefcunt cœli, & irascitur Deus; numquid impunè irrideri potest? Nonne tamen ex illis es qui, ipso tuo iudicio, reprehendendi & vituperandi sunt? Vide nùm opera tua te manifestum faciant, nec ne?

Igitur, charissime Frater, ab hâc pravâ consuetudine abhorreas, velimus. Cùm itaque hora Divini Officii celebrandi aderit, cum omni alacritate primus in excubiis Domini inveniri studeas. Ecclesiam ingrediens, frontem aquâ benedictâ asperge, & te signo crucis devotè muni. *Conc. Bituric.* &, adorato Deo, præpara animam tuam ad orationem.

Ne umquàm Chorum ingrediaris, nisi Chori vestibus indutus, non quidem fordidis & laceratis, aut vanitatem redolentibus, sed mundis, decoris & modestis.

Dùm superpelliceum induis, cogita quam personam sustineas, nempe à fordibus laqueque puram, qualem vestibus illis indicas. *Conc. Mediol.*

Ne properanter in Chorum, quasi distributionum questu incitatus, accedas, sed gravi incessu. *Idem.*

Cùm in Choro fueris, gravitatem serva quam locus & officium exposcit. *Conc. Senon.* Pro temporis & officii ratione, ex instituto & more Ecclesiæ sede, sta, flecte genua, caput aperi, submitte, cæteraque hujus generis adhibeas. *Conc. Mediol.*

Cave ne confabuleris nec rideas in Choro, nec ibi sis somnolentus, nec vageris oculis, nec litteras, libros, aliave scripta legas; incomposito .i. ne stes aut sedeas; ne hùc illùc movearis. *Conc. Aquens.*

Ne Horas Canonicas privatim absolvere audeas, sed concine, ac unà cum Fratribus Deum honorifica; contrarium faciens, tamquàm absens habendus es. *Conc. Trev.*

Psallens Deo tuo, ante cujus conspectum stas, psalle sapienter; id est, non cursim, non perturbatè, non oscitanter, sed leniter, distinctè, ac studiosè; non ad vanam gloriam & popularem adulationem, sed ad gloriam Dei & populi ædificationem; canta Domino, canta canticum novum, id est, piè, graviter, strenuè & religiosè; ut in omnibus honorificetur Deus, ac dirigatur oratio tua sicut incensum in conspectu ejus.

Cave ne ex Choro exeas nisi persolutis horis; & in genua ante Dominum pronus, eum adora, ac enixè roga ut animi tui divagationes cæterasque culpas tibi ignoscere dignetur, & ut ad orationem te deinceps alacriorem & ferventiorum efficere velit. E templo egrediens, ambula coram Deo; da operam ut sis homo ubique internus ad orationem semper paratus.

Tandem, cùm ad cantum pium & gravem tenearis, necesse est ut ad illum te assiduè exerceas. Ipsi sutores ad artem suam, quàmvis infimam, non admittuntur, nisi ad illam se diù exercuerint, & nisi illius post probationem periti agnoscantur; tu autem, qui Angelico ministerio te mancipasti, Ecclesiasticum cantum studiosè addiscere negligeres? Proh pudor! Annon à Choro eliminandus, & distributionibus privandus esses? Jure meritò. Quare? Quia cantûs inscius, & inordinato cantandi modo Deum inhonoras, populo tædium affers, eumque à divinis avertis. Proh scelus!

Da te ergò virum qui psallendi sit sciens; scias & tu cantum, charissime Frater. Si habueris fidem, illum quotidie adibis, illumque tandem, quantum talenta permiserint, callebis, ut virili sonitu & affectu voces Sancti Spiritûs depromens, ad flammam pietatis animos ardentius movens, suavitate lectionis ac melodiæ doctos demulcens & minùs doctos erudiens, & ut ipse convenientissimâ modulatione commotus & liquefactus in hâc vitâ, canticum novum ante sedem Agni cantare possis.

ARTICULUS IV.

Modus canendi vel recitandi Horas Canonicas. Ex Psalt. Rom.

I. **P**Urâ mentis elevatione, id est, intellectualiter, quia stas in conspectu Judicis, Angeli Custodis, & inimici tui persequentis.

II. Plenâ cordis attentione, id est, affectualiter, desiderando ut Deus laudetur, cœlestis curia lætetur, totus mundus juvetur.

III. Perfectâ oris pronuntiatione, id est, integraliter, ut nihil prætermittas dicendum, superaddas, inordinatum hinc inde transponas.

ARTICULUS V.

Exhortatio ad Psallentes. Ex eod. Psalt.

CUm Domino psalles, psallendo hæc omnia serves.

Dirige cor sursùm, benè profer, percipe sensum.

Spires in medio, pede juncto, deprime vultum.

Versus posterior videat finem anterioris.

Non vox, sed votum, non consona musica, sed cor.

Non clamor, sed amor, Domini per-tingit ad aures.





CAPUT SEXTUM.

*Media Clericis omnibus perutilia ad
perfectionem & salutem æternam
consequendam.*

ARTICULUS I.

Solitudinis amor.

NOn in commotione Dominus ; quapropter , quandò ad cor sponsæ loqui dignatur , eam in solitudinem ducit , ut ipsa claudens aurem ad vocem foris sonantem , audiat veritatem ejus intùs docentem ; & ut clausis oculis ad exteriora , cœlestia penetret & interiora. In montem sæpè ascendens Jesus , discipulos suos in hâc solitudine docebat. Hinc , Propheta Regius elongans se , manebat in solitudine ; ibi fiebat sicut passer solitarius in tecto. Hinc Job & alii sanctissimi viri , tùm veteris , tùm novi Testamenti , faciebant sibi solitudines ubi gaudia futura jam prægustabant.

Eia ergò , Sacerdotes , qui orationi & ministerio verbi instantes esse debetis , fugite de medio Babylonis , salvamini à generatione istâ pravâ , excutite pulverem pedum vestrorum , venite in solitudinem , & ibi audite quid loquatur in vobis Dominus Deus ; audietis siquidem arcana verba quæ non licet homini loqui. Venite , gens sancta,

ut repleamini Spiritu Sancto, sicut discipuli Domini, & renovemini spiritu mentis vestræ; vos præsertim mortui estis, & vita vestra abscondita est cum Christo in Deo.

Sed heu! Quidquid loquamur, dispersi sunt lapides sanctuarii in capite omnium platearum, id est, ipsimet Sacerdotes huc & illuc vagantur; ad consortia Laïcorum, imò & mulierum, sæpè convolant, ubi ad nihil aliud vacant nisi aut dicere, aut audire aliquid novi; ibi narrant fabulationes, sed non ut lex Dei; ibi dant offensionem & vituperari sinunt ministerium suum. Quàmvis ergò ministerio verbi instantes sint, quid ipsi sunt? Cymbalum tinniens. Quid hoc est mirum, si à solitudine & à semet-ipsis absentes, orationem fastidiant? Si in multis, singulis momentis, offendant; si pereant fame, si cor eorum areat sicut terra sine aquâ? Quoniam sunt quasi sydera errantia, ideò non cognoscunt peccata quibus contristant Spiritum Sanctum, ne quid deterius dicamus.

Sed saltem, quia sicut aqua effusi sunt, non crescunt; nam, ex conversatione sæculi, frequenter pulvere terreno contingit etiam pia corda fordescere, & spiritum sopiri.

Iterum admonemus vos, charissimi Fratres, ut resuscitetis gratiam quæ data est vobis. Huic renovationi confert multum vita solitaria: gustate & videte. Attamen, si charitas Christi urgeat vos ut exeatis de solitudine, & ut sic confirmetis Fratres vestros, non vos pigeat exire; Dominus

enim & Magister adest, & vocat vos ut faciatis ejus voluntatem. Providete tamen Dominum in conspectu vestro semper; regnum ejus intra vos est.

Eia, mi Jesu, qui fugisti in montem ipse solus, & pernoctasti in oratione Dei, trahe nos: post te curremus in odorem tuum. Sit nobis oppidum carcer, solitudo Paradisus. *S. Hier.* Quis dabit nobis penas sicut columbæ; volabimus & requiescemus. Absit tamen, mi Jesu, ut in ipsâ solitudine absentes simus spiritu, aut ibi ignaviâ marceamus; sed potius, sanctum otium quærat amor veritatis. *S. Aug.*

ARTICULUS II.

Exercitium Meditationis.

U Ndè fit ut deficiat sanctus? Quoniam diminutæ sunt veritates à filiis hominum. Quorsùm desolatione desolata est terra? Undè stat & in dies serpit abominatio desolationis in loco sancto? Undè? Quia nullus est qui recogitet corde. O inconsideratio defectuum & vitiorum quibus scatent Clerici fœcunda nimium patens!

O si seriâ meditatione recogitare velent quàm horrendum sit incidere in manus Dei viventis, & quàm durum facendum sit judicium his qui præsumunt, nonne semetipsos districtius dijudicarent, & essent sicut Angeli in cœlo, ferventes? Sed quoniam merâ vecordiâ meditationem fastidiunt & negligunt, non percipiunt, tan-

quàm muti & cæci animales , ea quæ spiritûs Dei sunt ; quàmvis enim venturi sæculi veritates sæpè legant , easque sciant , ac aliis prædicent , eas tamen non intelligunt , sed in his corrumpuntur. Væ illis ! quia in viâ Caïn abierunt & abeunt.

At contrà , beatus vir , & præsertim Clericus , qui in lege Domini meditatur die ac nocte ; fit tanquàm lignum quod plantatum secùs decursus aquarum , dat fructum in tempore suo ; concalet cor ejus intra se , & in meditatione suâ exardescit ignis ; ita ut resuscitans gratiam quæ data est sibi per manuum impositionem , jam in fide invenitur stabilis , & in opere efficax ; jam potens fit multos Christo lucrificare. Tu ergò , charissime Frater , qui inter sublimia mysteria quotidie versaris , scito quia illa vix dignè tractare vales , neque muneri tuo dignè satisfacere , nisi per frequens sacræ meditationis studium.

Quapropter , da operam ut meditatio tua sit in conspectu Domini quotidie , manè & vespere , aut saltem diluculo. Ut autem tibi sit fructuosa meditatio , abstrahe cor tuum à rebus omnibus ; lege ante cubitum puncta meditationis , hæc recale diluculo ; & in presentiâ Dei constitutus , præmitte actus fidei & contritionis ; pete gratiam & cor docile ad divina eloquia ; recogita attentè , seriò , & corde , veritatem aut virtutem quam in exordio meditationis tibi proposuisti. Cave ne sis similis viro consideranti vultum nativitatis suæ in speculo ; quique abiens , statim oblitus

est qualis fuerit. Excita piis affectibus voluntatem ad odium hujus vitii quo laboras, & ad amorem hujus virtutis quæ tibi necessaria est; propone, pauca tamen ac diffidens tibi & in Deo sperans; proposita strenuè exequere; viriliter age; ne sis quasi homo qui tentat Deum.

Præter orationem mentalem, suademus tibi & vocalem. Militia est vita hominis super terram; ipse circumdatus es infirmitate; in sortem Domini vocatus es, & ad onera periculosa natus; undè, & pro temetipso, & pro populo oportet te semper orare, & numquàm deficere, ut non intres in tentationem, & ut Deus populo suo per te benedicat in pace; undè, ad cælum manus, oculos, & mentem levabat Moïses, Deum placaturus; undè, sanctus Martinus invictum ab oratione spiritum non relaxabat nec in vitâ nec in morte. Falleris profectò, charissime Frater, si grande ministerium tuum, absque orationis pabulo & præsidio, prout decet, consummare te putes. *B. Laurentius Justinianus.*

Quid ergò sentis de his Clericis, & præfertim Pastoribus, qui post recitatas coactè, cursim, & inordinatè Horas Canonicas, nullum temporis momentum orationi destinant, & qui numquàm orarent, si ad Horas, sub mortali non tenerentur? Quid de te sentis, si, unà cum illis, orationem fastidias? Quid redolet illorum neglectus? Quid sapit tuum fastidium? Quid vobis minatur? Sterilitatem animæ vestræ, & populi

populi illiusque animæ perdendæ periculum. O periculosa negligentia !

ARTICULUS III.

Exercitium præsentiæ Dei.

PRæsentiæ Dei exercitium, est pia ad Deum præsentem attentio ; hæc est ad perfectionem tuta & brevis via, juxta illud : *ambula coram me, & esto perfectus.* Porro, ambulare cum Deo intus, & nullâ re teneri foris, status est hominis perfecti. *Imit. Christi.*

O Minister Christi, qui ad perfectionem incessanter anhelare deberes, quære Dominum ut confarmeris ; quære faciem ejus semper ; non longè est à te. Indè, continuam Dei fovendi memoriam, dicere licebit cum Psalmistâ : *Providebam Dominum in conspectu meo semper ; oculi mei semper ad Dominum ; apud me oratio Deo vitæ meæ.* Apud te illa debet adesse, tamquàm omnium functionum tuarum socia & comes indivisa.

Hâc de re Religiosum instruens Thomas à Kempis, sic ait : *Surgat tecum oratio nocte de lectulo ; vigilet & cantet tecum psalmos de psalterio ; quiescat tecum in dormitorio ; præcedat & sequatur te in choro ; sedeat tecum in refectorio ; gratias agat, cibo sobriè sumpto ; transeat tecum in agrum in labore diurno ; plantet tecum sepes in horto ; redeat tecum & adsit in cubiculo ; mundet tecum pedes à luto verborum ; lavet tecum manus.*

à sorde operum ; comitetur tecum in omni loco privato & aperto ; habitet tecum in silentio.

Hæc autem oratio non est nisi quædam continua in Deum reflexio : hæc est urbs fortitudinis nostræ.

Huic animi recollectioni intende , charissime Frater ; hæc enim externa alia opera aut functiones non impedit , sed dirigit ; hinc semper orabis , & numquàm deficies. Quapropter , solitudini , silentio , sensuumque omnium moderationi sollicitè incumbere , caveasque à curis superfluis , à negotiis secularibus , & ab iniquorum fabulationibus ; studeas puritati conscientiæ & cordis. Hæc sunt murus & antemurale in urbe fortitudinis nostræ ponenda , scilicet recollectionis animæ.

Hujus recollectionis adminiculo in Deum facile affurges , eique corde puro & inflammato adhærebis , vibrando hæc & alia in cor dilecti jacula : *Quàm bonus Israël Deus ! O totus amabilis ! Quis mihi det ut diligam te ex toto corde meo , ô dilecte mi ? O pulchritudo antiqua , serò te amavi ! O Deus cordis mei ! O Deus charitas ! Quis me separabit à charitate tuâ , ô Rex meus & Deus meus ? Utinam numquàm peccassem tibi ! Quandò veniam & apparebo antè faciem tuam , ô requies animæ meæ ? &c.*

Ecce tibi compendiosa methodus semper orandi , & numquàm deficiendi. His crebris & ignitis actibus , magis fervet , exurgit , & conditur perfectionis opus , quàm multis

corporis macerationibus , si sanctæ Theresiæ à Jesu credendum sit.

O nimium felix , charissime Frater , si hanc sacram animi recollectionem expertus , exclamare possis : *Propter hoc lætatum est cor meum , & exultavit lingua mea.* Ps. 15.

Notandum tamen has & alias aspirationes , corde potius quàm ore , emittendas esse , & satius esse , si spiritus spiraret , unitantum acquiescere , ut in corde altius figatur , & magis condatur devotio interna.

ARTICULUS IV.

Exercitium Mortificationis.

O Portuit pati Christum , & ita intrare in gloriam suam ; quapropter , posito sibi gaudio sustinuit crucem ; passus est , nobis relinquens exemplum ut nos , præsertim Sacerdotes , sequamur vestigia ejus. Ubi sum ego , inquit , illic & minister meus erit. Est-ne servus supra Magistrum ? Numquid prædestinandi sunt illi qui imagini Filii Dei conformes fieri renuunt ? Minimè. Rom. 8.

Hinc D. Paulus , fidelis imitator Christi , non judicavit se scire inter fratres , nisi Jesum-Christum , & hunc crucifixum. Hinc illius stigmata in corpore suo portans , suumque corpus castigans , illud in servitutem redegit. Hinc cæteri Apostoli ibant gaudentes à conspectu concilii , quoniam digni habiti erant pro nomine Jesu contu-

meliam pati, & plantaverunt Ecclesiam sanguine suo. Hinc Sanctus Carolus Borromæus, mortificationem Jesu in corpore suo semper circumferens, adeò sobrius erat, ut verè dici potuerit *non manducans neque bibens*.

Sed & nos non poterimus bibere calicem quem ipse Dominus bibit, quem & Apostoli biberunt? In hoc tamen positi sumus. Numquid Fratres nostri ibunt ad pugnam, & nos hîc ignavè sedebimus? Proh pudor!

Prætereà, si ipsi non adimpleamus ea quæ defunt passionum Christi in carne nostrâ, quâ fronte adhortari valemus populos ut crucifigant carnem suam cum vitiis & concupiscentiis, & ut faciant fructus dignos pœnitentiæ? An credent nobis? Annon potius adhortationes nostras iridebunt? Prætereà, quomodò fîemus in tempore iracundiæ reconciliatio? Quonam ausu, inimici crucis Christi, gloriamur nos diligere Jesum-Christum crucifixum? Quâ temeritate ejus delicias & vitam spiritualem statui nostro adeò congruam, speramus? Quid mirum, si, à mortificatione abhorrentes, vivamus velut animales?

Resipiscamus, Fratres charissimi, aspicimus in auctorem fidei & consummatorum Jesum; charitas ejus & exemplum urgent nos. Æstimati ergò sicut oves occisionis, mortificemur propter eum totâ die; ac in flagella parati, in cinere, cilicio & jejuniis pœnitentiam agamus; præsertim, si ita suadeat vitæ nostræ dux. Sed saltem,

sobriè , & justè , & piè vivamus ; utamur parciùs verbis , cibis , potibus , somno & jocis. Propheta David multùm extollitur quòd aquam de cisternâ Bethlehem sibi allatam , in ardentissimâ siti nolens bibere , libaverit eam Domino. Similes occasiones nobis sæpissimè offert Deus ; has nos , utpotè Sacerdotes tepidi & ignavî , elabîsinimus. Proh socordia ! Nos soli sumus , qui cum hominibus* non flagellamur , nec cum Apostolis , nec cum ipso Dei Filio. O miseros nos !

Bellum aliquandò tandem inferamus corpori nostro , tamquàm infensissimo hosti , & abstineamus nos à carnalibus desideriis quæ militant adversùs animam ; præsertim , abnegemus nosmetipsos , & propriæ quotidie resistamus voluntati. Denique licèt ab hominibus colaphisemur , sufferamus , patienter sustinentes ; per multas tribulationes oportet nos intrare in regnum cœlorum. Non est alia ad vitam via.

Verùm , si acriori egeamus calcari , adhæreant animo hæc omnia gravissima verba : *Si spiritu , facta carnis mortificaveritis , vivetis ; si compatimur , conglorificabimur ; si verò secundum carnem vixeritis , moriemini. Qui invenit animam suam in hoc mundo , perdet eam. Recordare quia accepisti bona in vitâ tuâ ; ideò cruciaris. Quantum fuit in deliciis , tantùm date illi tormentum. Nunc eligamus.*



A R T I C U L U S V.

Leſtio Librorum pietatis.

Quis de ſacrorum Librorum leſtione fructum ſatis explicare queat? Etenim verum eſt quod de illis Thomas à Kempis dicit: *Docent ignaros, arguunt otioſos, excitant torpentes, ſtimulant dormientes, corrigunt errantes, erigunt corruentes, terrent ridentes, conſolantur lugentes, laudant humiles, vituperant superbientes, conſortant debiles, reprimunt præſumentes, mitigant turbatos, lætificant tristes, juſtificant pios, damnant perversos.*

Quot tamen ſunt Clerici qui, curioſa, ſecularia, & faceta legunt avidi; utilia verò & ſalutaria legere faſtidiunt?

Tu verò, chariſſime Frater, cur non illa tempora quibus ab Eccleſiâ vacas, leſtioni impendas ut Chriſtum audias? Illum alloquimur cùm dramus; illum audimus cùm divina legimus oracula. Quid nobis cum fabulis? Miniſterium, altari Chriſti, non hominibus deferendum, accepimus. *S. Ambr.*

Attende leſtioni, iterùm monemus cum Apoſtolo, & præſertim illorum Librorum qui de his quæ ad Sacerdotale munus ſpectant, & te inſtruere poſſunt. Scrutare Scripturam Sacram, quæ, utpotè divinitùs inſpirata, ad omnia utilis eſt. Tolle hos libros & lege; hujusmodi leſtiones multos Chriſto pepererunt. Teſtis eſt S. Igna-

tius ; testis S. Columbanus ; testes Aulici illi de quibus Sanctus Augustinus. Idipsum experire.

Optimè uteris lectione divinâ , si tibi eam adhibeas speculi vice , ut tibi , velut ad imaginem suam , anima respiciat , & , vel fœda quæque corrigat , vel pulchra plus ornet. *S. Aug.*

Quapropter , 1°. Pete gratiam à Patre luminum.

2°. Certa sit & ordinata lectio ; vagam & desultoriam fuge. Fastidiosi stomachi est , multa degustare , nulli certo ferculo acquiescere ; sic inquinatur magis corpus , quàm sanatur. Illa tamen quæ te magis concernunt , & affectus , moresque tuos propiùs attingunt , relegere nihil vetat.

3°. Pauca lege , lecta recale , non quidem cursim , perfunctoriè , vel studii & recreationis causâ , vel curiosè agens , ut quidam , & nihil operans ; sed tractim , seriò , attentè , & animo discendi & probandi quæ sit voluntas Dei bona , beneplacens & perfecta , & custodiendi verbum illius , ut Ministerium implere , & te ipsum ædificare possis.

4°. Pios affectus lectioni congruentes elicere stude , ut fructum det in tempore suo ; aliàs inanis erit lectio , quæ quidem intellectum illuminat , sed affectum non inflamat.

5°. Eloquia Dei absconde in corde tuo , & para sagittas in pharetrâ , ut per diem sagittes & elicias , cùm opus fuerit , actus jaculatorios.

6°. Claude lectionem brevi aspiratione in Deum, ut semen in terram bonam cordis tui jactam, fervet ac foecundet.

A R T I C U L U S V I.

Pia frequentatio Sacramenti Pœnitentiæ.

Quid magis ad perfectionem confert, quàm frequentare sæpè & piè Sacramentum Pœnitentiæ? Hâc frequentatione, non solum liberamur à peccatis, sed etiam ab his præservamur; insuper, conscientiæ pacem ac serenitatem cum vehementi spiritûs consolatione percipimus; & quàmvis peccata venialia in quæ frequentius labimur, taceri citra culpam possint, rectè tamen & utiliter citraque omnem præsumptionem, in confessione dicuntur, quod piorum hominum usus demonstrat. *Trid. Sess. 14. c. 3.* Hinc, conscientiam teneram & delicatam sibi parant.

Undè tamen fit ut tot Clerici hunc thronum gratiæ non nisi raró adeant? Undè? Quia se ipsi seducentes, sibi & aliis liberè dicunt: *Peccatum non habeo.* Est-ne in eis veritas? Heu! In multis quotidie offendimus omnes; septies in die cadit ipse justus; ipsi autem, quàmvis tepidi & effusi, nihil sibi per totum mensem conscii sunt! O beati viri, si illis Deus nullum imputaret peccatum, nullumque in eorum spiritu & corde videret dolum!

O! si onera sua, humeris Angelicis formidanda, diligentius excutere vellent, &

conscientiæ suæ sinus & latebras explorare, ut præcipit Trid. viderent reptilia quorum non est numerus; viderent forsitan abominationes pessimas; sed quoniam extra se errant, nec cogitant corde, se ipsi libenter excæcant, & multa peccata ut meros scrupulos, deponunt, imò & respuunt; hinc ad altare securi nimis convolant. O periculosa cæcitas! O fallax securitas! Nonne & tu es ille vir, à te, & à Dæmone illusus? Redi ad cor.

Alii quidem hoc Sacramentum frequentant; sed heu! aridâ consuetudine; cursum, & perfunctoriè, absque vero dolore & firmo proposito. O quàm metuumdum est, ne, fœdè pœnitentes, & hâc secundâ post naufragium tabulâ abutentes, miserè in æternum pereant.

Tu verò, charissime Frater, confitere quidem sæpè, sed semper, quasi post confessionem moriturus. Da ergò operam ut ex fructibus tuis cognoscaris verè pœnitens & homo bonæ voluntatis; quàm serena pax dabitur tibi! Quapropter, quàm diligentissimè poteris, ad verum dolorem & ad amarissimam animæ tuæ amaritudinem te excita. Insuper adhibe omnia emendationis media quæ tu ipse pœnitentibus suggeris; & sic, Medice, cura te ipsum, ne de ore tuo judiceris.

Utere semper, quoad poteris, eodem Confessario, qui animæ tuæ vulnera experientiâ suâ cognoscens, his efficacius medebitur. Quod ignorat medicina, non curat. *S. Hier.* Attamen, si commodè fieri

potest , ne eligas , neque assumas in Confessarium tuum vel in ducem , illum Sacerdotem cujus tu audis confessiones , vel quem dirigis , ut ille te liberè corrigere & dirigere possit.

A R T I C U L U S V I I.

Habere Directorem , & illi in omnibus obedire.

ITinera insipientium recta sunt in conspectu eorum , sed à Domino reprobantur. *Prov. 12.* Sunt viæ quæ videntur homini rectæ , & novissima eorum ducunt ad mortem. *Ibid. 16.* Quoniam naturaliter quisque seipsum amat , & quia in se ipsum quisque propensus est , ideò , in veritatis judicio fallitur. *S. Basil.* Undè sic de se loquebatur S. Bernardus : *Amor privatus , quem erga meipsum habeo , aufert mihi verum judicium de me ipso ; idcirco , parùm mihi credo de meipso , utpotè homini mendaci.* Undè , unus & solus error latet in viâ , scilicèt sui ipsius gubernatio , cùm quisque sibi idoneus ad se regendum & moderandum videtur. *S. Joan. Clim.* Undè , consiliariis omnes opus habent , etiam si Moïsi conferri possent. *S. Chrisost.*

1°. Tirones , ut doceantur quæ ignorant , ut exerceantur in operibus virtutum , custodiantur ne in peccatum labantur , & ut lapsi corrigantur. *S. Bonavent.*

2°. Clerici & Sacerdotes , ne incidant in tentationem & in laqueum Diaboli , &

ne infructuosè Ministerium suum exerçant , neque honorem Dei zelent imprudentes.

3°. Ipsi Magistri & Prælati , quia Angelus Satanæ , qui nemini parcit , se transfiguratur sæpissimè in Angelum lucis , ut ipsos Magistros & Prælatos , aliundè doctissimos viros , periculosius seducat. Undè , ad illos etiam spectat monitum istud : *Fili , sine consilio nihil facias , & post factum non pœnitebis.* Eccli. 32.

Undè , prudenter judicamus cum D. Bernardo , Sacerdotale onus , Episcopale onus , curamque Pastoralem dignè non posse administrari sine consilio. Hanc viam tenuere omnes Sancti ; & breviter , omnes qui ad perfectionem attigerunt. *S. Vincen. Ferrer.*

Huic legi Deus doctissimos & sanctissimos , ad eorum humiliationem subdidit. Illud , exemplo Moïsis , Job , & Cornelii manifestè comprobatur ; & quidem manifestiùs exemplo Pauli ; Christus enim eum per semetipsum vocans & alloquens , cùm posset ei perfectionis viam reserare confestim , dirigere ad Ananiam mavult , & ab eo jubet viam veritatis agnoscere , dicens : *Surge & ingredere civitatem ; & ibi tibi dicetur quid te oporteat facere.* Cassian.

Væ ergò illi qui hanc legem servare nō lens , sibi confidit , & solus , sine ductore , incedit ; nam leviter incidit in venatorum laqueos , & cùm inciderit , non habet sublevantem. *D. Gebhar.* Hinc fit , ut plures Clerici , Sacerdotes , animarum Pastores , & Prælati , totâ vitâ tepeſcant , defectibus

fordeant, in errores labantur, & ut tandem, illusione diabolicâ à summis ad ima dejecti, & incorrigibiles facti, moriantur, suâ præsumptione excæcati, in peccatis suis.

Sed & tu, charissime Frater, quid fecisti miser quandò te tibi Magistrum constituisti? Stulto te discipulum tradidisti; *S. Ber.*

Quid insuper fecisti quandò tibi dux factus es? Heu! Cùm tibi dæmon factus fueris, jam non indiges dæmone tentante. *S. Joan.*

Clim. Quid es sine ductore? Navigium rectore carens, ventorum flatibus commissum, & ad scopulos allidendum; es cæcus sine duce, grex sine pastore, infans sine patre, & ægrotus sine medico, *S. Joan.*

Clim. Es dux in præceps. *S. Aug.* Verùm, quò te ductura est illa prudentia, cui firmiter inniteris? Quò! Ad illusionum abyssum, ad fœdos lapsus, ad cæcitatem spiritûs, ad duritiam cordis, & ad secundam mortem; abyssus siquidem abyssum invocat. Vide nunc, vide barathrum tibi imminens. Ecquandò ergò cavebis tui judicii superbissimas & periculosissimas tentationes? *S. Aug.* Quòdusque tandem respues directionis legem pro ipsis eruditissimis & sanctissimis viris conditam?

Huic legi ex nunc acquiesce, quàmvis Sacerdos sis, potens in opere & sermone, aliosque dirigere optimè valens, cùm aliundè sis homo fictilis, & ad tibi adulandum pronus; elige tibi vitæ ducem; elige, si fieri potest, unum ex millibus, ut suadet *S. Theresia* à Jesu; Deum enixè roga ut ostendat tibi hunc Ananiam doctum, sanum

in fide , irreprehensibilem , interiorem , maturum , & peritum. Simul ac inveneris hunc ducem juxta cor Dei , aperi illi candidè & ingenuè sinus & latebras conscientiae tuæ , tuique cordis vel minimas inclinationes ; & tuæ prorsus voluntati renuntians , ejus te gubernationi omninò committe ; tu autem sis ei in omnibus docibilis corde , ut parvulus. Profectò ille , à Deo illuminatus & confortatus , diriget pedes tuos in viam pacis , ad animæ requiem temporalem & æternam.

O felix solatium vitæ ! *S. Ambr.* optanda tranquillitas animæ ! O beata servitus , imò gloriosa libertas ! *S. Bonav.* O regia via , obedientiæ via , quia homines inoffenso pede ducit ad summitatem ! *S. Vinc. Fer.* O certum prædestinationis indicium , habere Directorem sanctum & peritum , eique in omnibus obedire ! Charissime Frater , *S. Francisco Salesio* , & *S. Theresiæ à Jesu* , id fortiter asseverantibus & expertis , crede.

Nonne ad hæc audita inardescit animus tuus ? Hoc nos quidem credimus ; sed , heu mihi ! forsan anxius respondebis nobis : *Hominem non habeo.* Non turbetur cor tuum , charissime Frater ; non est abbreviata manus Domini ; habeas bonam voluntatem ; & idem Dominus qui Cornelium Petro tradidit imbuendum , & Paulum Ananiæ , providebit & tibi vitæ ducem ; tu verò , *si quæris , quære.* Hæc est via quæ ducit ad vitam.



A R T I C U L U S V I I I .

Examen particulare.

VIs , charissime Frater , defectus tuos-
tuaque vitia plenius cognoscere , eaq;
ad fundamentum usque exinanire ? Utere
quotidiano examine particulari ; Dominus
ipse , Dominus exercituum , dans tibi for-
titudinem , consumet nationes has in consp-
ectu tuo paulatim atque per partes ; non
enim tu posses eas delere pariter.

Quot Clerici tandiù in tenebris non
federent , & post multas confessiones , ad
vomitum non reverterentur , nec pejores
fierent , si hoc exercitium non negligerent
aut parvipenderent ? Tu verò , charissime
Frater , sapientior sis ; aggredere illud vi-
tium ad quod magis pronus es , & à quo
cætera pullulant. Adhibe aliquam mortifi-
cationem , contraria contrariis curare con-
tendens. Exempli causâ : si superbus sis ,
humilia te in omnibus ; si avarus , uberio-
res eleëmofynas conclude in sinu paupe-
ris ; si luxuriosus , humilia in oratione &
jejunio animam tuam ; si iracundus , si-
lentium ferva , ut irascens non pecces ,
sis verò mitis corde , &c.

Si his clypeis & scutis bonæ voluntatis
munitus , adversus hunc Amaleccitam le-
gitimè certaveris , Deus dabit tibi victo-
riam per Jesum-Christum ; invenies re-
quiem animæ tuæ , & coronaberis. Ex nunc
ergò incipe.

ARTICULUS IX.

Recollectio annua per octiduum, vel unius diei ex singulis mensibus.

QUàm fructuosa sit hæc mentis solitudo ac recollectio ad totius vitæ directionem, non nisi experti intelligere valent. Undè, non est mirum quòd, ut ad sacram illam recollectionem nos alliciant summi Pontifices; copiosas, huic vacantibus, impertiantur indulgentias, & præcipuè Benedictus XIV, ut constat ex ejus diplomate, dato die 16. Decembris 1746. Christus ipse elegit recollectiones & adamavit, illarum nobis relinquens exemplum, sive in deserto per quadraginta dies commorans, à Spiritu illuc ductus, sive in montibus pernoctans in oratione. Hanc adamarunt Apostoli, & in eâ repleti sunt Spiritu Sancto. Hanc elegerunt S. Carolus Borromæus, S. Franciscus Salesius, & alii magni Sacerdotes ac Pastores juxta cor Dei. In illâ, spoliati veteri homine, induerunt novum, & facti sunt lucerna lucens & ardens.

Hanc elige & adama, charissime Frater. Quid facis in turbâ? *S. Hier.* Veni in desertum locum, & acquiesce pusillum; aut saltem fac tibi solitudinem in conclavi tuo, ac piis exercitationibus per aliquod tempus in hoc secessu animum excole; ibi aër est purior, liber scilicet à peccatorum lue, à tentationum contagio,

à sæculi illecebris , à Dæmonum halitu pestilenti ; ibi cœlum est apertius ; ibi , familiarior Deus , facilius invenitur ; ibi omne bonum in suo fonte gustatur ; ibi tandem anima semetipsam cognoscit , remissum fervorem refarcit , quæ sit voluntas Dei perspicit , ad Clericalis virtutis apicem pervenit. Veni ergò , propera , fedesolitarie & tace , & levabis te supra te.

Vos præcipuè , Rectores animarum , summi Pastoris Christi vestigia imitemini ; interdum declinate tumultum fragoremque exteriorum actionum , quæ procul dubio animum distrahunt , eumque per diversa rapiunt ; redite verò ad vos & subitè orare in monte , vel in aliquo secessu , vel cœnobio , & spirituali consolatione perceptâ , ad Ministerium vestrum revertentes , eritis in labore alacriores , in administratione sollicitiores , & in omni vestrà exercitatione devotiores. Nolite excusare excusationes : omnia tempus habent. Quòd si in vestro conclavi non possitis huic divino vacare operi , non vos pigeat exire de Parochiâ , in aliquod sodalitium secessuri , quandoquidem ex eâ , propter recreationes & vana negotia exire non dubitatis. Si bonam voluntatem habueritis , non deerit vobis fidelis Minister quem in locum vestrum substituatis.

Depositis ergò omnibus excusationibus , eliminatis Dæmonum vos seducentium dolis , accedite & illuminamini ; gustate & videte ; ipse Dominus qui vocat & ducit

vos in solitudinem ut loquatur ad cor vestrum, spiritu intelligentiæ replebit vos; renovabimini spiritu mentis vestræ, & mutabimini in alios viros.

Et verò, finis hujus recollectionis est investigatio, cognitio, ac emendatio defectuum, eorumque radicum extirpatio, efficax renovatio mentis & fervoris, absoluta totius vitæ ad unum necessarium directio, & seria ad mortem præparatio.

Habetis in hoc libello, & in præparatione proximâ ad mortem, varia quæ meditemini puncta; aut si ita expedierit vobis, eligite alios libros, devotioni vestræ magis congruos. Operæ tamen pretium ducimus, hîc suppeditare vobis aliquot documenta, tum præparationi ad recollectionem, tum ipsi recollectioni, tum ejus conclusioni aptatas.

PARAGRAPHUS I.

Præparatio ad Recollectionem.

I. Necessarium est ab omnibus objectis mentem & cor distrahere, & à curis etiam licitis se segregare; quid enim prodesset solitudo corporis, si deesset cordis solitudo & mentis. *S. Greg.*

II. Attamen, juvat locum solitarium eligere, & ibi claudere ostium oculorum, oris, & aliorum sensuum, ut cum solo Jesu in silentio conversans, audire & gustare possis quid loquatur in te Dominus Deus.

III. Expedit ut instituas pugnam specialem contra quasdam inclinationes quæ sunt

origo aliarum imperfectionum & vitiorum.

IV. Cogita salutem & perfectionem esse opus Dei misericordis ; quare , diffidens tibi , & fidens in Deo , sine quo nihil potes , & in quo omnia potes , postula enixè ejus auxiliùm ; invoca etiam Sanctorum patrocinia , præsertim Virginis Mariæ , & Angeli Custodis , ut eorum præfidiis , omnem metum vel tædii , vel molestiæ & difficultatis , expellas ; visita etiam , in eum finem , Christum Dominum in Eucharistiâ , eique commenda fructum hujus recollectionis , & conjice te in sinum Beatæ Virginis.

V. Memineris necessarium esse ut habeas desiderium efficax tuæ perfectionis , dicens ex abundantia cordis : *Domine , quid me vis facere ? Ecce ego quia vocasti me. Loquere , Domine , quia audit servus tuus ; paratum cor meum ut faciam voluntatem tuam.* Hoc desiderium absolutum & sincerum , est necessarium ut obtineas gratiam , & felicem recollectionis exitum. Si non habueris hoc verum & efficax desiderium , in vanum laboras , quàmvis tibi ædifices solitudines. *Qui te fecit sine te , non te salvabit sine te.* S. Aug. Stude ergò ut ex fructibus cognoscaris velle sincerè tuam perfectionem.

VI. Fideliter observa omnia hujus recollectionis exercitia , eorumque methodum & ordinem ; nec reputes leve quod ad tuam perfectionem conducere potest.

VII. Propone tibi aliquem finem particularem , scilicèt , hunc defectum corri-

gendum, vel hanc virtutem acquirendam.

VIII. Quò ferventiùs huic recollectio-
ni incumbas, cogita., hanc occasionem
quam tibi Deus offert, esse fortassè postre-
mam; quare, eodem fervore & animo ei-
dem incumbere, ac si sub finem illius diei
moriendum tibi esset.

PARAGRAPHUS II.

Ordo Recollectionis.

Horâ 5. Surges.

Sesqui-quintâ. Oratio matutina, Medi-
tatio, Prima & Tertia.

Horâ 7. Præparatio ad confessionem to-
tius mensis præteriti, si recollectio sit tan-
tùm unius diei; si verò sit sex vel octo
dierum, expedit ut in decursu recollectio-
nis recogites omnia peccata totius anni,
eaque ultimo die confitearis. Post confes-
sionem autem, Missa aut Communio.

Horâ 9. Meditatio, Sexta, Nona, Lec-
tio, Prandium, & Recreatio.

Horâ 1. post meridiem, Examen par-
ticulare, Rosarium, & Consideratio.

Horâ 2. Vesperæ, Completorium, ali-
quâ oratio pro defunctis, & consideratio
ad imaginem Crucifixi, ut habetur in Præ-
paratione proximâ ad mortem.

Horâ 3. Meditatio, Matutinum Offi-
cium pro crastinâ die.

Sesqui-quartâ. Aspirationes ad petendam
beatam mortem, Acceptatio mortis, Ac-
tus agonisantium, Protestationes, *si Recol-
lectio sit unius diei*; si autem plurium die.

rum , præfige ultimæ diei hæc mortis exercitia quæ tibi suppeditabimus in libro Præparationis proximæ ad mortem.

Ante cœnam , Visitatio Sanctissimi Sacramenti.

Post cœnam & recreationem , Scriptio . fructûs recollectionis , & lectio documentorum pro eo conservando.

Tandem , reliqua exercitia pro singulis diebus inferiùs assignata.

P A R A G R A P H U S III.

Documenta ad conservandum Recollectionis fructum utilia.

Claudens Recollectionis diem , gratias age Deo , qui te in solitudinem ducens , locutus est ad cor tuum eloquia ignita ; exeas ex hâc solitudine sicut Apostoli , spirans flammam ignis , & factus Diabolo terribilis ; sequere tamen ista documenta.

I. Offer Deo proposita tua ; eum enixè roga ut eis benedicat eaque fœcundet , confirmando quod operatus est in te , disponendo ascensiones in corde tuo , & te confortando contra impetus inimicorum , ut non prævaleant adversùs te , & ut victor usque in finem perseveres.

II. Cave tamen ne vaga & generalia sint proposita tua ; perscrutare & aggredere illud tuum radicale vitium à quo cætera pullulant , quodque tuam perfectionem retardat , & est relapsuum origo. Igitur , oportet ut continuò per totum sequentem mensem omnem curam impendas ad illud

eradicandum. Adhibe ad hunc finem examen particulare, vigilantiam, orationem, poenitentiam medicinalem, actus contrarios, tui diffidentiam, in Deo spem, & Sanctorum praesidium.

III. Ne animo concidas; imò ne mire-
ris si labaris, aut si non tantum proficias
quantum optas; terra tua, scilicet, cor
tuum ad malum pronum, dabit fructum
suum, & germinabit tibi identidem tri-
bulos & spinas peccatorum. Igitur, si lap-
sus sis, redeas cum fiducia ad Sacramen-
tum Poenitentiae; si opus sit, renova pro-
positum tuum; legitime certa; quotidie
incipere: *Tantum proficies, quantum tibi vim
intuleris* S. Hier. *Jugis conatus ad perfec-
tionem, perfectio reputatur*, S. Ber. *Quin-
imò, ipsa est perfectio hominis, invenisse se
non esse perfectum*, S. Aug.

ARTICULUS X.

*Collationes frequentes habere de rebus ad
pietatem, & ad disciplinam Ecclesiasti-
cam pertinentibus.*

HUJUSMODI Collationes conducunt ad
gloriam Dei; stans enim in Synagoga
Deorum, glorificatur in concilio Sancto-
rum. Hinc, ubi sunt duo vel tres congre-
gati in nomine ejus, ibi est in medio eo-
rum. Conferunt etiam ad profectum Cle-
ricorum; inter illas siquidem, auditur vox
alarum animalium percutientium alteram
ad alteram; ibi mutuò ardens fit differen-

tium cor, dùm sibi Scripturas aperiunt; & sicut lapis, licèt frigidus, sæpè ad lapidem concussus, scintillas exilire facit, sic animæ quæ mutuò atteruntur, igne Spiritûs coalescunt.

Prætereà, quàmvis utilis sit ad instruendum lectio, adhibitâ tamen Collatione, majorem intelligentiam præbet. Undè, melius est conferre quàm legere; Collatio siquidem docibilitatem facit; nam, propositis interrogationibus, cunctatio rerum excluditur; & sæpè, objectionibus, latens approbatur veritas; quod enim obscurum & dubium est, conferendo citò perspici-
tur. S. Isid. Hisp.

Hinc Christus, cum Apostolis congregatis, de Regno Dei differens, Collationem dici potest cum illis habuisse. *Math. 16. v. 23, &c. 13. &c. Item Act. v. 3.* Collationes habuerunt Apostoli inter se; illi enim & seniores convenerunt videre de verbo hoc. *Act. 15. v. 6.* Hinc gratissima erat Fratribus Antiochenis Pauli & Barnabæ præsentia corporalis, quorum Collatione firmabantur in fide. *Cassiod.* Hac quoque secum habuerunt viri sancti, ut patet *ex Regulâ S. Pach. ex S. Athan. ex Cassian. & Honor.*

Hinc varia Concilia præcipiunt Clericis, & præsertim Parochis, ut crebras habeant Collationes de casibus conscientiae, de muniis pastoralibus, & de cæteris rebus ad pietatem & disciplinam Ecclesiasticam pertinentibus; & contumaces pœnis acribus addicunt.

Hinc Collationes Dæmonibus sunt invisæ ; Licinius enim , hostis piæ religionis , cùm vidisset in Ecclesiasticis Conventibus summa esse posita præsidia ad tuendam , ornandamque Religionem , Dæmonis impulsu , lege prohibuit ne Antistites ullos Conventus , aut Concilia , aut Deliberationes de utilibus rebus instituerent. *Euseb.*

Hinc , cùm nulla penè res disciplinæ mores ab Ecclesiâ Christi magis depulerit , quàm Sacerdotum negligentia , qui , contemptis Canonibus , ad corrigendos Ecclesiasticos mores Synodum facere negligunt ; idem fraudulentus Dæmon omnia molitur ut Clericos & Parochos ab his Collationibus avertat ; & cùm plerosque hâc in re inveniat docibiliores , jam ipsi Clerici & Parochi , diabolicâ fraude illusi , has fastidiunt Collationes. Quare ? Quia à pietate alieni , & aliquâ scientiâ præditi , vel potius inani doctrinâ tumidi , sibi persuadent quòd possint Collatione alterius non egere ; & si judiciorum eorum diabolica non fallat illusio , elationis tamen & superbiæ graviores laqueos non evadent. Quinimò , derident procaciter simplicitatem Pastorum juxta cor Dei , qui mutuis se invicem sermonibus consolantur ; quique vicariâ de divinis Collatione , ad scientiam , ad cultum divinum , ad pietatem , & ad efficacem sui & animarum salutem se suaviter & fortiter inflammant.

Illi autem torpidi , fastidiosi , elati , & animales Clerici & Parochi , si interdum conveniant : quibus de rebus conferunt in-

ter se ? De pretio escarum , & de numero panum. *S. Ber.* De aleis , de commestationibus , de luxu , de otiosis fabulis , histrionum more , differunt ; conventicula faciunt ut buccis crepitantibus detrahant & invicem mordeant , indecorè rideant & rideantur , ad sui & audientium subversionem. O præclaræ & sumptuosæ Collationes quas habent inter se hi diaboli fautores , ac spiritualium Collationum impugnatores & irrisores acerrimi ! Beatus vir qui non abiit in concilio hujus generis Clericorum , & in viâ eorum non stetit , & in hac pestilentia cathedrâ non sedit !


Judica nos , Deus , & discerne causam nostram de hac gente nomine sanctâ , sed opere non sanctâ ; erue nos de congregatione & de manu horum Ministrorum alienorum , quorum os loquitur vanitatem ; dextera eorum , dextera iniquitatis.

Hanc orationem , charissime Frater , frequenter effunde ; & ex nunc , hos torpidos & otiosos Clericos , ac stultas eorum & sine disciplinâ quæstiones devitans , in multitudine Presbyterorum prudentium sta , & sapientiæ illorum ex corde conjungere , ut omnem narrationem Dei possis audire , & ut proverbia laudis non effugiant à te. *Eccl. 6.*

Quapropter , non solùm intersis Collationibus , singulis mensibus , juxta statuta Dioceseos faciendis ; verùm etiam frequenter Clericos qui sint boni testimonii viri , & Christi bonus odor , quibuscum disseras de casibus conscientia , de observandis & fugiendis

giendis circa animarum curam , & de adminiculis acquirendæ Sanctorum scientiæ. Noli tamen , inter has Collationes , contendere verbis ; altercationes inanes & pueriles non patitur simplicitas ; & arrogans vincendi desiderium reprobatur ingenua humilitas. Sis ergò velox & attentus ad audiendum , tardus autem ad loquendum , semper paratus ad resistendum proprio iudicio , ad sequendam saniores doctrinam & salubriora consilia , & ad agendum in omnibus ordinatè & modestè , secundum beneplacitum Christi , ædificationem Fratrum , & ad fidelium tuique profectum.

Insuper , memineris istius : *Amico fideli nulla est comparatio auri & argenti. Eccli. 6.* Elige & concilia tibi hunc fidelem , licet rarum , probatæ & firmæ virtutis amicum , qui te fiducialiter in eo agentem , suaviter & fortiter corripiat , ac te docibilem corde , monitis suis & exemplis ad virtutem inflammet. Nonne cum hoc fideli & sancto socio & amico sanctus eris ? Amicos verò mercenarios , morosos , vagos , adulatores , fastidiosos , in viis suis inconstantes , ac velut lunam mutantes , & ab Ecclesiasticâ disciplinâ abhorrentes , quasi pestem fuge. Annon cum perversis pervertereris ?



ARTICULUS XI.

*Visitatio frequens & sancta Christi Domini
in Eucharistiæ Sacramento.*

Christus Dominus, cum dilexisset suos, in finem dilexit eos; ita ut, jam eis reconciliatio factus, & ad Patrem ex hoc mundo discessurus, noluerit eos relinquere orphanos; voluerit. verò esse cum illis in hoc Sacramento usque ad consummationem sæculi; & quàmvis lateat absconditus sub specie Panis, est tamen idem verus Deus, idem Filius Dei vivi qui visitavit nos in salutari suo, dives in omnes qui illum visitant & invocant. O quàm suavis est Spiritus ejus! Quapropter, divitias sui ergà nos amoris, velut effundere & omnibus affluenter dare, ardentè desiderans, amantè & jugiter ad suum Sanctuarium, his nos mellifluis verbis invitat: *Venite ad me omnes qui laboratis & onerati estis, & ego reficiam vos; venite; properate, haurietis aquas in gaudio de fontibus Salvatoris. Venite, effundite coram me corda vestra; sicut fluit cera à facie ignis, sic liquefiet cor vestrum amoris igne ante ardentem cordis mei fornacem. Venite, mecum conversaturi; scietis quàm vehementer ignitum sit eloquium meum. Hic jam conversatio vestra in cœlis sapidiùs erit; hic prægustabitis torrentem quo ex meâ præsentia inebriantur Beati in patriâ. Venite, filii mei, venite; an nescitis quia deliciae meæ sunt esse cum filiis hominum? Quid ergò moramini?*

Sed imprimis , ô vos Sacerdotes , quos elegi ut stetis coram me velut amici ; vos Ministri mei , vultis etiam abire ? O tardi corde ad credendum ! unâ horâ non potestis vigilare mecum ? O tardi ad amandum ! O ! si sciretis donum Dei , & quis sit ille qui vos ad Sanctuarium suaviter invitat , nonne pennas columbæ peteretis , ut volantes requiesceretis in me , & cæteros ad me attraheretis ? Sed heu ! Vos ipsimet Ministri mei , quos ad regale Sacerdotium exaltavi , & quos quotidiano corporis & sanguinis mei pabulo enutrio , non recogitatis corde tantum pietatis meæ Sacramentum ; hinc me spernitis ; hinc , post expleta cursim & turpis lucri gratiâ , officia , & post celebratum oscitanter Missæ Sacrificium , vos , me relicto , omnes , sicut discipuli , turmatim & ore hiantes fugitis , non amplius reversuri , nisi propter utilitatem vestram.

Hinc statis totâ die otiosi , & laicos à Sanctuario meo , vestrà negligentia , vestroque fastidio , arcetis. Sto medius vestrum ; vos verò , præ nausæâ , & præ arido usu , nescitis me. Ipsæ viæ Sion lugent eò quòd non veniatis ad templum sanctum meum nisi coactè & perfunctoriè ; ad secularia consortia libenter convolatis ; me autem oblivioni datis tanquàm mortuum à corde. Heu vobis ! Inter vanas , detractorias , & turpes conversationes me in multis offenditis , & pusillos scandalisatis ; ibi facitis vobis cisternas dissipatas quæ continere non valent aquas ; meam autem conversatio-

M ij

nem animas consolantem & sanctificantem, fastiditis; me fontem aquarum viventium, derelinquitis. O, cæcitas vestra!

Nonne à sæculi amatoribus nimium derelinquor? Quid est cur vos qui estis cives Sanctorum & domestici mei, festinatis in domum vestram, dum domus mea est deserta? Laïci quidem, sæculi curis, proli educationi, mercimoniae addicti, & erga alia plurima turbati, facilius excusantur; vos verò qui segregati estis in opus ad quod assumpsi vos, ut militetis mihi, ideòque non implicemini negotiis secularibus, quam excusationem habetis? Quòd libidinosi & inimici homines me derelinquant, sustineo utique; vos verò noti mei, dulcem corporis mei cibum capientes! O quàm acerbè vulneratis cor meum!

Videte, Ministri fastidiosi, homines modicæ fidei, videte quàm assiduo & humili obsequio visitentur Reges terræ! Ego verò, Rex Regum, qui ultra quod debui facere, feci; licèt nullius bonorum egeam, ego Dominus dominantium, factus sum sicut passer solitarius in tecto.

Proh pudor! At vos, ô Sacerdotes qui despicitis Sanctuarium meum, qui vix ad altare meum introïretis, & ad thronum gratiæ, nisi necessitas vos huc cogeret, nisi alliceret mos mercenariorum foetidus; ecquandò pigebit vos fungi, tanquàm hilares dadores, Sacerdotio meo, & adolere mihi orationum & obsequiorum incensum?

O corda duriora saxis, si his justis & suavis Christi Domini querimoniis non mo-

veamur; si ad visitandum Dominum gloriæ, in quem desiderant Angeli prospicere, & quem ipsi, proni & tremantes in hoc Sacramento adorant, non inflammemur, & alios ad idem obsequium, exempli nostri funiculis, non trahamus! Procul à nobis excusationes: nullam habemus.

Excusso ergò tepore fastidium nostrum ingenerante, venite, Fratres, venite; charitas Christi urget nos. Venite, adoremus, procidamus ante Deum qui visitavit nos oriens ex alto; ploremus pro nobis & pro peccatoribus derelinentibus legem Domini; in hoc positi sumus, ut inter vestibulum & altare plorantes, fiamus reconciliatio. Veniamus ergò, fiducialiter agamus in Jesu Deo nostro, pauca loquentes, & multa meditantes cum simplicitate cordis nostri, sicut solet amicus ad amicum loqui; eum utpotè magni consilii Angelum, familiariter consulamus. Habemus pariter hîc Deum totius consolationis; tribulationem ergò nostram ante ipsum pronuntiemus solliciti & fidentes.

Ibi tandem firmiter credamus, adoremus reverenter, enixè petamus, securè speremus, ardentè amemus, vehementer doleamus, & ab altari, non nisi molestè & invitè, recedamus. Sed ecce brevem hujus visitationis praxim, quam multi etiam rustici, ad confusionem nostram, sequuntur.

I. Veni in Sanctuarium Dei quando est magis desertum & adoratoribus vacuum; & pro certo habens Ecclesiam esse domum Dei & domum orationis, reverenter ingredi, di-

M iij

ecens cum Psalmistâ : Domine Jesu , introibo in domum tuam , adorabo ad templum sanctum tuum in timore tuo , & cum fiduciâ confitebor nomini tuo. Munda cor meum ab omnibus vanis , perversis , & alienis cogitationibus ; intellectum illumina , affectum inflamma , ut in spiritu & veritate te adorare valeam , & ut jucundum sit tibi rationabile obsequium meum.

II. *Accede ad Dominum Jesum eâdem fide & devotione quâ Pastores & Magi ad eum recens natum festinantes venerunt ; & procidens ante eum in cujus nomine omne genu flectitur , in hos affectus erumpe.* O Jesu , quàmvis in hoc Sacramento nullum majestatis tuæ splendorem oculis videam , attamen , credo firmiter quia tu es verè Deus absconditus , Deus Salvator , Christus Filius Dei vivi , Judex vivorum & mortuorum ; hoc credo , quia tu ipsa veritas dixisti : *hoc est corpus meum.* Adjuva incredulitatem meam.

Tu es Dominus meus , & Deus meus ; Rex regum , & Dominus dominantium ; tu solus Altissimus , & substantia mea tanquàm nihilum ante te ; adoro te ut primum principium & ultimum finem , ut Dominatorem cœli & terræ , & ut Dominum vitæ & mortis. O Jesu , mi Jesu , quàm magnus & laudabilis es ! Nonne tibi subiecta jugiter erit anima mea ? Dignum & justum est.

O sancti Angeli qui hunc Regem in præsepio jacentem cum stupore adorastis , & jam regnanti in cœlo ad ministerium semper assistitis , quin etiam ipsum altare frequentes & venerabundi cingitis ; ô Angeli Dei ,

adorate pro me Jesum meum, quoniam tanto muneri impar nimis sum ego, & ille major omni laude; quàmvis imbecillis sim puer, dicam semper: *tantum ergò Sacramentum veneremur cernui*, &c.

III. *Accede, sicut Publicanus, in animo contrito & confusione sauciato, præ dolore singultiens, & pectus præ amaritudine percutiendo, dicens: Peccavi, Domine, peccavi; scio quòd ita sit. O detestabile monstrum! Idèd non sum dignus nec oculos in cœlum levare. Verùm, ô Jesu mi, ô Jesu misericordia mea, ô Jesu dives in misericordiâ, ô Jesu præstabilis super malitiâ meâ, propitius esto mihi peccatori; & quoniam nefandissimus peccator sum ego & peccatorum primus, supplex oro ut miserearis mei secundùm magnam misericordiam tuam; doleo propter te summè dilectum, doleo quòd tibi soli peccaverim; totâ vitâ deficiat in gemitibus anima mea, &c. Hoc sacrificio spiritûs tui contribulati, ac cordis tui contriti & humiliati mirificè delectatus Dominus Jesus, te justificatum in pace dimittet.*

IV. *Centurionis humilitatem indue, sic ex abundantia cordis proclamans: Domine Jesu, quàmvis ego te frequenter recipiam, confiteor tamen quòd non sim dignus ut intres sub tectum meum; sed saltem permitas, quæso, ut sæpius hîc effundam cor meum coram te qui facis Angelos tuos spiritus, & Ministros tuos flammam ignis; accipe mea adorationum obsequia in supplementum defectuum in frequenti Missæ celebratione commissorum. O nimis felix, si tibi*

altissimo Deo, vota mea reddendi studiosus, dignus tuis altaribus Minister gratiâ tuâ efficiar !

V. *Hunc divinum Sponsum & animarum Zelotem, velut Magdalena contempleris plurimum juvat.* O Deus cordis mei, Rex meus, & Deus meus, beati qui habitant in domo tuâ ! Melior est dies una in atriis tuis super millia. Heu vagis illis qui elongant se à te ! An non peribunt ? Ego verò hoc periculum evadendi cupidus, venio ad te, ô sponse sanguinum & refugium meum ; hîc securius habitabo ; hîc requies mea multa nimis. Convolent alii ad mundanas conversationes ; ego autem coram te, quoad vixero, assiduus & lætus assistam. Ecquid mihi est in cœlo, & à te, ô Jesu dilecte mi, quid volui super terram ? Unus ergò sit dolor meus à te separari, ô centrum animæ meæ ; à te, inquam, quem ex toto corde meo diligo. Quis mihi det ut te ardentius diligam, ô Deus charitas ! ô totus amabilis ! Ex corde tuo erumpat in cor meum perennis amor ; tu siquidem venisti ignem mittere in terram ; & quid vis nisi ut accendatur ?

VI. *Adeas cum fiduciâ, ut cæcus, ut leprosus, & alii ægri ; & quàmvis velut importunus increperis, multò magis clama : Domine, Fili David, miserere mei ; ecce quem amas infirmatur.* Ille propter quem homo factus es, ille quem pretioso sanguine redemisti, ille pro cuius amore jugiter in hoc altari resides, ille quem tuo sacro corpore in hoc Sacramento quotidie satias, ecce me peccatorum leprâ foedatum ; ipse vides quo-

modò teneat & angat me febris superbix, iracundiæ, &c.

Sed, si vis, potes me mundare. Ergò, ô pie Medice qui languores nostros tuo livore sanasti, & qui es salus mea, sana animam meam quia peccavi tibi; da Domine ut videam, quatenus detegam quid tibi in me displiceat & desit mihi.

Hic aperi illi tuas infirmitates spirituales, scilicet, hanc superbiam, hunc teporem, &c.

VII. *Expedit etiam ut, instar adolescentis qui monita salutis à Domino Jesu petebat, sed eas secus pedes ejus, ut pariter audias loquentis intus veritatem & documenta.*

O Jesu, qui venisti à Deo Magister, & qui viam Dei in veritate doces, doce me facere voluntatem tuam, &c. Beatus homo quem tu erudieris, &c. Da mihi servo tuo cor docile, ut non tantum auditor sim verbi tui, sed libentius factor, &c.

Hic attentus audi, &, docibilis corde, custodire contende quid loquatur in te Præceptor bonus.

VIII. *Multum proderit ut, instante temptationum procellâ, ad eum cum Apostolis trepidus confugias.*

Domine, salva me, ecce pereor; impera ventis & mari, & fiet tranquillitas magna; teneat & deducat me dextera tua, ut de tot tantisque periculis erutus, ad portum felicitatis securius perveniam. O salutaris Hostia, quæ cæli pandis ostium, &c.

IX. *Sed præsertim accede & festina, oraturus fidenter cum Chananæâ. Tu scis, Domine, quia nescio sæpissimè quid pe-*

M v

tam ; eia ergò , Jesu mi , doce me orare ; recordare , Jesu pie , istius dulcissimi verbi tui : *petite & accipietis*. Da mihi saltem micæ mensæ tuæ , scilicet , cor paupertatis & humilitatis amans , &c.

Hic avidè pete quod Dominus Jesus tibi magis expedire scit ad suam gloriam & tui salutem.

X. Recogitans in amaritudine animæ tuæ quàm justè iram Patris æterni , ejusque flagella , propter nimia peccata tua merueris , offer illi dilectum Filium in propitiationem delictorum tuorum , & in plenam cum illo reconciliationem.

O Pater Æterne , peccavi ! Iniquitates meæ , quibus iram tuam merui , clamant de terrâ ad te vindictam ; sed sanguis Filii tui efficacius misericordiam proclamat. Peccavi ! Sed ecce Agnus Dei qui tollit peccata mundi. Peccavi ! Sed ecce Filius tuus dilectus in quo tibi benè complacuiisti. Respice ergò in faciem Christi tui , qui factus pro me reconciliatio , se in arâ crucis obtulit quia ipse voluit , & se quotidie in hoc altari offert in remissionem peccatorum totius mundi ; per hunc , supplex oro , Filium tuum , indignationem tuam averte à me , & concede mihi gratias quibus indigeo , ut placeam tibi omnibus diebus vitæ meæ. Quid mihi in nomine Filii tui petenti denegabis ?

XI. Ecce tibi ingentis meriti satisfactio , cui , Feriâ V. cujuslibet hebdomadæ incumbere opere pretium erit. Ad genua ergò pronus ante altaris Sacramentum , & reconciliatio

pro te & pro Populo faciendus, sic, in animo contrito ingemiscens, ora veniam.

O Jesu! Quando ex unâ parte recogito corde hanc tuorum mirabilium quàm fecisti memoriam; & ex alterâ, abominationem desolationis stantem in loco sancto tuo, & hanc stupendam & adeo abundantem iniquitatem tot ingratorum hominum, & præsertim tot Clericorum & Sacerdotum, fio mihi metipsi gravis, confundor, obstupesco, fremo in memetipso.

Verùm, ô Jesu mi, qui hæc impropria in horto recogitans, factus es, præ dolore, in agoniâ, reple cor meum amaritudine amarissimâ, ut vero & amaro contritus dolore, possim tibi ineffabiliter offenso satisfacere.

O Jesu! Tabescere me facit zelus meus, quia tot infideles & hæretici hoc divinum Sacramentum vel nolint pertinaciter credere, vel illud fervire faciant iniquitatibus & abominationibus suis pessimis. Proh dolor! Tabesco, quia, ô Rex excelsæ præ omnibus regibus terræ, es in hoc Sacramento ab ipsis fidelibus tuis derelictus, oblivioni datus tanquàm mortuus à corde; doleo quia in templis pauperibus habitas, intereadum privatæ domus splendide ornantur; amare plango, quia Filio tuo ibi præsentem, Sacrosancto Missæ Sacrificio non nisi irreverenter assistant, faciendo domum tuam domum negotiationis & speluncam latronum; tristis est anima mea, quia iidem ingrati filii sacrum hoc convivium tanquàm levissimum cibum fastidientes, ad Ægypti convertun-

tur cæpas, & filiquis porcorum delectantur; exitus aquarum deducant oculi mei, quòd plerique, velut proditor Judas, manducant & bibant indignè, fiant rei corporis tui, & sic judicium sibi manducant & bibant.

Sed heu! Quantò vehementiùs doleo & dolere cogor, quia ipsi Ministri & noti tui, adeò exaltati & quotidie enutriti, magnificent super te supplantationem, spernant te, Rex meus & Deus meus, celebrando Missæ Sacrificium cursim, oscitanter, & turpis lucri gratiâ; utendo vestibus pannosis & sordidis, non dijudicando corpus tuum, faciendo in domo tuâ sacrilegia multa.

Verùm, ô Domine Jesu, quod acerbius urit & excruciat cor meum, illud est quia ego sum unus & primus ex his ingratissimis hominibus & ministris tuis; ego, ego sum qui peccavi, & nefandiùs præ cæteris peccavi in te & coram te, & coram hîc congregatâ plebe tuâ. Vertatur, obsecro, manus tua contra me, qui præ omnibus fui nequam quia tu bonus fuisti.

Attamen, quod me his in angustiis consolatur, illud est quod nunquàm despicias cor contritum & humiliatum, & quòd misericordia tua præstabilis sit super malitiâ meâ.

Igitur, de tuâ pietate confusus, lachrymis perfusus, faciei meæ coopertus confusione, & contritus corde, oro supplex veniam. Parce, Domine, parce Populo tuo; ubi superabundavit delictum, ibi superabun-

det & gratia; ne memineris iniquitatum nostrarum antiquarum in tuum Sacramentum commissarum; anticipent nos misericordiæ tuæ, misericors & miserator Jesu.

Sed inprimis propitius esto mihi peccatori & indignissimo Ministro tuo non habenti fiduciam nisi in tuâ magnâ misericordiâ; pœnitet me peccasse; maximè doleo, & quidem in unione illius doloris quo dulcissimum cor tuum in recogitatione abominationum mearum anxiatum fuit, & usque ad mortem triste; propono non amplius peccare tibi; quin etiam, plenâ & immobili fide, spe vivâ, charitate fervidâ, hoc magnum mysterium venerari, ejusque devotionem cæteris ferventer jugiterque insinuare. Da ut hujus Sacramenti fides, devotio, & reverentia in dies crescat, ac proficiat in animâ nostrâ, donec te facie ad faciem videamus, & torrente voluptatis tuæ potemur in Patriâ.

XI. Dominus Jesus, orationes suas, dicta, facta, & seipsum Deo Patri jugiter offerebat. Fac tu similiter, in unione ejus intentionis.

O Jesu, qui es principium & finis, offero tibi cogitationes meas, eloquia, opera mea, & totum meipsum in hostiam viventem: rationabile & sempiternum obsequium meum, &c. Et quidem, in unione illius divinæ intentionis quâ Filius tuus in terris operatus est.

XII. Tandem, ab altari non nisi ægrè discessurus, posce ab illo benedictionem, sicut Jacob ab Angelo poposcit. Domine Jesu,

II. *Surge circa horam quintam, quoad fieri potest; sed surge velociter, ut jam diluculo dicere possis: Domine Jesu! propter te mortificabor totâ die; jam hora est me de somno surgere; ego dormivi & somnum cepi; sed ecce nunc surgo propter te, quoniam tu, Domine, suscepisti me.*

O lux vera! Abjicio opera tenebrarum; jam induor arma lucis, ut jam in die honestè ambulem. Utinam dirigantur hodiè viæ meæ ad custodiendas justificationes tuas.

III. *Induens vestes, sic ora: Domine Jesu! indue me, sicut electos tuos, viscera misericordiæ, benignitatem, modestiam, & patientiam, &c.*

IV. *Ante orationem matutinam. O Jesu! Magister bone, doce me orare, ut jam manè audias vocem meam, & auditam mihi manè facias misericordiam tuam.*

Verùm, charissime Frater, ante orationem præpara animam tuam, ne sis quasi homo qui tentat Deum, & ne oratio tua fiat in peccatum. Tu autem cùm oraveris, intra in cubiculum animæ tuæ, & clauso sensuum & vanarum cogitationum ostio, ora Patrem tuum; si ores linguâ, mens tua sine fructu est; ora spiritu & mente, ora reverenter & devotè, in animo contrito, & in spiritu humilitatis, ut Publicanus, qui longè stans, nolebat nec oculos ad cælum levare, sed percutiebat pectus suum, dicens: propitius esto mihi peccatori. Sed & tu pauper & inops, tu pulvis, cinis, & homo peccator, loquens ad Dominum, fac similiter: ecce

Dominus , ad cujus conspectum stas , & quem tremunt Potestates , respicit in orationem humilium , eisquę dat gratiam ; postulat in fide , nihil hæsitans ; omnia possible sunt credenti. Ora sine intermissione , ora opportunè , obsecra importunè , ut Chanaana ; quodcumque petieris , dabitur tibi , & fides tua te salvum faciet.

ORATIO MATUTINA.

Veni , Sancte Spiritus , &c.

Actus Fidei.

Credo , Domine , te esse hîc & ubique præsentem , & te scrutari profunda cordis mei. Eâdem firmitate credo cæteras veritates quas Ecclesia Apostolica & Romana mihi proposuit credendas , quia tu ipse , tu ipsa veritas Deus , eas revelasti ; da ut opere compleam quod fide teneo.

Actus Adorationis.

O Deus , majestatis Domine ! obsequen-
tissimâ quâ possum submissione adoro te
ut primum principium & ultimum finem.
Confiteor coram te & coram omnibus vi-
ventibus , te esse Dominatorem cœli &
terræ , Dominum vitæ & mortis , ac in di-
tione tuâ cuncta esse posita.

Actus Amoris erga Deum & Proximum.

O Deus charitas ! diligo te super om-
nia , & toto corde meo , quia es summè
bonus & summè amabilis ; diligo etiam
Proximum meum sicut meipsum , & ini-
micos meos propter te.

Actus Spei.

Deus meus, misericordia mea, in te spero, non confundar in æternum; veniam verò, gratiam, & gloriam, ut confido, dabis mihi, quia tu misericors & miserator Dominus, ac in promissis tuis fidelissimus, has promifisti mihi.

Gratiarum Actio.

Largitor omnium bonorum, Deus, quid retribuam tibi pro omnibus quæ retribuisti mihi? Pauper & inops sum ego; quapropter, in unione Filii tui, gratias ex intimis cordis mei visceribus ago tibi, quia me ad imaginem tuam creasti, pretioso Filii tui sanguine me redemisti, ad admirabile fidei lumen, & ad dignitatem Sacerdotalem me indignum vocasti; sed & præter alia innumera beneficia, huc usque tam clementer conservasti me, & hanc nocte, (hanc die) à periculis & malis me custodiens, ad hujus diei initium, (finem) incolumem perduxisti.

Actus Oblationis.

Ecce Domine, totum libens offero tibi à quo profluxit omne quod habeo, corpus, animam, utriusque vires, & omnes hujus diei cogitationes, verba, & opera, ad majorem nominis tui gloriam purè & planè refero, idque in unione perfectissimæ charitatis Filii tui in quo tibi benè complacuiisti, ut ex abundantia ejus charitatis, mea juvetur infirmitas, & meus suppleatur defectus.

Discussio conscientia.

O scrutator rerum & cordium Deus!

Notum fac mihi quidquid hâc nocte (hâc die) cogitatione , omissione , verbo , & opere peccaverim ; da ut omnia hâc plenè recogitem tibi in amaritudine animæ meæ ; ego verò dignos pœnitentiæ fructus facere contendam ; tu quoque , si meipsum dijudicaverim , parces peccatis meis , & ab occultis , me , ut confido , mundabis.

*Actus Contritionis post conscientiae
discussionem.*

O Pater misericordiarum , propitius esto mihi peccatori ; doleo de peccatis , propter te summè bonum & summè dilectum ; propono , tuâ gratiâ adjutus , non amplius peccare , & omnia peccandi pericula fugere.

Proposita nimis generalia sunt interdum infructuosa. Igitur , particulatim expende vitium quod tibi dominatur & aliorum est origo ; adversus hoc vitium instituere specialem & acriorem pugnam necesse est , ut illud , pro te & tecum pugnante Domino Deo exercituum , exterminare queas. Adhibe & tu aliquam mortificationem huic exterminationi congruam. Quid si per diem relabaris , cave ne animo concidas ; sed surge , pugnam alacrius perge , & vinces. Proponè tibi pariter hanc virtutem N. idemtidem per diem colendam , utpotè tibi admodum necessariam ; incipe diei cursum quasi vespere moriturus. O si hâc mortis propinquitas in tuum altè descenderet animum , quâ alacritate & sanctitate omnia perageres ? Sed heu , ipsimet Clerici hoc non cogitant corde ! O cæcitas antiqua , simul & dam-nosa !

*Exercitium ingentis meriti & efficaciae, seu
Actus heroicus & pactum cum Deo, ine-
undum manè, vel ante, vel post Sacrum.*

Charissime Frater, Deum indefinenter laudare, &, modico labore, plurimum mereri cupis? hujusmodi pactum cum Deo inire potes, nempe quòd ad certa quædam signa, v. g. sonitum campanæ, aspectum cœli, tunctionem pectoris, inclinationem capitis, genuflectionem, &c. velis & gratum habeas quodvis opus bonum & Deo gratum, quod umquàm factum est, seu hodiè fit, aut umquàm futurum est, aut fieri posset; item, toties teipsum velle Deo offerre, dolere de peccatis, renovare proposita & vota, Deum adorare, laudare, &c.

Item, quòd si propter sterilitatem cordis angustias animæ, divagationes mentis, sollicitudines ministerii tui, & morbos corporis, &c. non possis orare, cogitare de Deo, & operari quantum optas & quanto optas fervore; tunc velis offerre Deo adorationes, orationes, sacrificia, &c. quæ assidue offerunt viri pii, & quæ illi obtulerunt Sancti, & ipse Dominus Jesus.

Item, quòd inter tentationes contra fidem, spem, humilitatem, castitatem, &c. velis ratos & gratos habere omnes actus fidei, spei, humilitatis, & castitatis ab initio mundi hætenus elicitos, & quòd de illis summoperè gaudeas.

Vim & valorem à contrario colligere licet. Si quis statueret secum, quoties audit

campanam, cœlum respicit, &c. toties se velle ratum & gratum habere quidquid unquam mali actum vel agendum est, optaretque se ejus esse participem, quantæ is se culpæ obstringeret? Hoc itaque si in malo tam efficax est, quidni idem, bono applicatum, immensæ virtutis & meriti erit? Quid tamen hoc exercitio facilius? Non ad illud ineundum requiritur prolixitas temporis, cum solâ & unicâ mentis directione seu reflexione, inter ipsa ministeria fieri possit.

Formulam hujusmodi pacti hic consultò omittimus; intelligentibus siquidem, & præcipuè, bonæ voluntatis Clericis pauca sufficiunt. Porro, hujus exercitii praxis parvulis revelatur, sapientibus autem & prudentibus hujus sæculi & omne quodcumque ignorant blasphemantibus, absconditur.

De præstantiâ & vi hujusmodi exercitii plenius consulendi sunt humiles corde in Deo absconditi, & quibus dignus non est mundus.

Actus petitionis.

Domine Deus, dives in omnes qui invocant te, supplex oro te ut mihi largiaris gratias quas tu scis esse mihi magis necessarias ad majorem tui gloriam, ad salutem animæ meæ, & ad profectum mihi commissorum fidelium; sed præsertim da ut anima mea moriatur morte justorum, & ut misericordias tuas, unâ cum illis, in æternum cantem.

Tu quoque, ô sanctissima Mater Dei, Virgo, quam elegi & iterum eligo in patronam meam singularem, impetra mihi

Spiritum Filii tui dilecti , & pretiosam Sanctorum mortem.

Tuque , sancte Angele custos mei , me tibi commissum , hodiè illumina , custodi , rege , & gubernare me.

Et vos , Patroni mei dilecti , clientem vestrum dirigite hodiè vestris precibus & meritis in viam salutis , ut vobiscum vivam , gaudeam , Deumque laudem in æternitate. Amen.

Pater , Ave , Credo , Salve Regina , Litanie SS. Nominis Jesu , Angelus Domini , &c.

V. Post Orationem matutinam , attende aliquantulum orationi mentali , cujus heri ante cubitum legeris puncta.

Cæterum , quàmvis habeas passim in hoc opusculo varia quæ mediteris puncta ; hîc tamen tibi libenter instituimus breves meditationes de hominis novissimis : quoniam , si assiduâ & seriâ recogitatione animo tuo aliè hæreant , erunt tibi efficax ad pœnitentiam & ad fervorem incitamentum , juxta illud , Eccli. 7. Memorare novissima tua , & in æternum non peccabis. Utinam & tu huic seriæ recogitationi incumbere velis ! Id ipsum experiri licebit.

MEDITATIO

De Mortē.

Memento & ne obliviscaris horum Domini oraculorum.

I. Statutum est omnibus semel mori ;

post hoc autem , judicium. In quocumque loco fuerit lignum , ibi erit. Nonne tamen vivo quasi numquàm moriturus ?

II. Quà horâ non putatis , Filius hominis tamquàm fur veniet. Ecce venio citò , dicit Judex vivorum & mortuorum ; ecce jam pulsat ; at ego nondùm festino prædari ? O cæcitas mea ! Quæ nugacitatis fascinatio obscurat intellectum meum ? Nonne cum morte pactum fecisse videor ? Nonne saltem his similis sum , qui , jam instante morte , sibi dicebant : *Edamus & bibamus ; cras enim moriemur* ? Quinimò , nonne similis sum jumentis insipientibus , quibus non est intellectus ? Imò , hæc est vera mei imago , hæc stupiditas mea.

III. Beatus ille servus quem cùm venerit Dominus , invenerit vigilantem ; sed è contrà , væ tepidis & somno deditis , qui per vitam nec sapiunt , nec festinant maturè novissima providere ; differentes enim de die in diem , venit subitò super illos mors , venit & ira Dei , ac in tempore vindictæ disperdit illos , & moriuntur improvisò morte peccatorum pessimâ. Quid frequentius ? Nonne & ego ex illis sum , quàmvis hæc oracula sæpissimè legam , aliisque prædicem ? Ita sanè ; effrænata negligentia mea me manifestum facit. O excors !

Charissime Frater , si hæc novissima sæpè & seriò in omnibus operibus tuis memorareris , numquid peccares ? An divitiis , & tot fascinationibus cor apponeres ? Nonne , instar moribundi , totum mundum

fastidires ? Si vespere , mane , & meridiè tibi , quasi jamjam morituro diceres : *Stulte ! cras , hodiè , hâc nocte , post hoc opus , animam meam repetent à me ; quâ animi alacritate redimeres tempus & malos dies ? thesaurifares tibi thesauros in cœlis ? Quo fervore omnia opera tua perageres ? In his tandem totus esto ; quid moraris ? Usquequò claudicabis in duas partes ? O quàm verè dictum est : Desolatione desolata est terra , quia nullus est qui recogitet corde !*

MEDITATIO

De terribili malorum Sacerdotum morte.

Cogita te jam versari super lecto dolorum mortis , à medicis derelictum , ex hoc mundo jam profecturum , ante tribunal Christi manifestandum , & in beatam aut infelicem æternitatem mox casurum. Quò te verteris , undique tibi erunt angustiae.

Intùs erit conscientia , accusans & urens ; à dextris erit mundus , quem dilexisti & scandalifasti , & à quo te separabit amara mors ; à sinistris erunt infinita daemonia , ad judicium & ad supplicia te trahentia ; superiùs , erit Judex iratus ; inferiùs , erit horrendum chaos. Quò fugies , charissime , sic deprehensus ? S. Aug. In quantam maris altitudinem devenies ? Nonne amaritudinum amarissimarum tempestas demerget te ?

I. Tunc recogitabis in crudeli amaritudine animæ tuæ , non solùm coacervatim , sed figillatim , delicta juventutis tuæ , mil-

lia peccata propria & occulta, peccata haftenus excusata, pro nihilo reputata, & vix notata; at praesertim, falsam qua excacatus es conscientiam. Haec autem peccata reputabuntur, non tamquam minutula, sed ut monstra. Heu mihi! tunc dices, accusatione conscientiae tuae convictus, & timore horribili turbatus: *Nunc reminiscor malorum quae feci; nunc comprehendunt me iniquitates meae; non possum quin illas invitus videam; non est pax ossibus meis à facie peccatorum meorum, quibus iram merui. In quantam tribulationem deveni? Quid faciam miser, tot peccatorum funibus constrictus?*

II. Aderit saeviens in te defectuosa vocatio, sinistra beneficiorum resignatio, fraudulenta ad ordines, ad beneficia, & ad animarum curam assumptio & ascensio; stabunt adversus te peccata aliena, quibus in statu tuo communicasti, negligentia, ignorantia, scandalo, & respectu humano, vel non arguendo populum de peccato, vel non pascendo oves tuas verbi divini praedicatione, vel citò imponendo manus, vel conferendo indignis beoeficia, absolutionem, &c.

Crudelis animae tuae carnificina! Acerbum, sed veridicum conscientiae tuae testimonium! Quid narrabis ut justificeris? Nonne iniquitas tua oppilabit os tuum?

Verum, si quid loquaris, haec, praë angustiatu cordis tui timore, clamabis: *Heu mihi! morior? Ego Sacerdos? Ego Pastor animarum? Ego Episcopus? Ego peccatorum*

tum

rum meorum & alienorum sarcinâ oneratus ?
O gravissimum & formidandum onus ! O
quanta tribulatio terret & torquet cor meum !
O quàm clarè nunc intelligo istam sententiam
D. Augustino dignam , & quam toties legi :
 Episcopi , aut Presbyteri , aut Diaconi officio , si perfunctoriè & adulatoriè res agatur , nihil apud Deum miserabilius , nihil tristius & damnabilius ? *Nonne fodisse præstitisset mihi ?*

III. Quid respondebis quandò conscientia tua tibi , instante morte , objiciet jacturam temporis & tot dierum salutis , dilapidationem proventuum Ecclesiasticorum , neglectum tot inspirationum te ad perfectiora vocantium , contemptum tot mediorum ad sanctitatem & salutem tuam adeò congruentium ? Quam præsertim habebis allocutionem quandò tibi exprobrabit abusum Sacramenti Pœnitentiæ , tot Missarum & Communiorum , illam stupendam negligentiam satisfaciendi Deo pro tot peccatis contra ipsum Deum , contra proximum , & teipsum , commissis ; illam diuturnam stupiditatem quâ in ipsâ Sanctorum terrâ vixisti ? Quid ad hæc & ad alia respondebis , nisi istud ? *Scio quòd ita sit.* Quid de te senties ? Quid de te dices ? Quæ in teipsum indignatio ? Quanta te vallabit angustia ?

IV. Insuper , magnus erit velut mare , mœror tuus , quandò tibi tandem invito dicetur : *Proficiscere de hoc mundo* , quem non obstantibus Dei oraculis , & Conciliorum prohibitionibus , adeò ardentè di-

N

lexisti : hæc divitiæ , hæc suppellectilia , & alia vanitatis monimenta quæ parasti , cuius erunt ? Ecce tibi extranei , ecce amici , imò & parentes tui , quasi latrones & lupi rapaces , hæc omnia invasuri sunt , & jam invadunt , non parcentes gregi tuo , nec animæ tuæ ; tibi verò solum supererit sepulchrum. Quàm amara tunc erit tibi mortis memoria ? tibi , inquam , qui habueris pacem in substantiis tuis ?

V. Quantus timor , quantusque tremor veniet super te quandò jamjam rapiendus es ante tribunal Christi , redditurus ei strictissimam totius vitæ tuæ & formidandi ministerii tui rationem ? Si Hilariones , Hieronymi , Gregorii , & alii vigilantissimi Pastores , instante illâ discussione timuerint valdè , in quantam timoris abyssum demergeris tu idolum Pastoris , tu Sacerdos qui inextricabilibus peccatis , propriis & alienis implicatus , jamjam cogendus es ante thronum hujus Judicis severissimi & sanctissimi , qui in Angelis reperit pravitatem ?

VI. Præstò erit diabolus tanquàm leo tunc acriùs rugiens , ut tibi peccatorum monstra objiciat , quæ tibi antea quasi minutula illusor infufurrabat ; stabit ut te ad desperationem adigat , & animam tuam devoret , postquàm per vitam , vanâ & præsumptuosâ in Deum fiduciâ , te in viam spatiosam , & in vitiorum barathrum fraudulentus projecit ; quomodò stabis antè tot accusatores , testes & inimicos ?

VII. Servire nunc facis Deum tuum iniquitatibus tuis , eum in ipso Sanctuario exa-

terbas ; ille quoque te in interitu tuo ridebit & subsannabit te ; tunc invocabis eum , & non exaudiet ; tunc scies quia malum & amarum est reliquisse te Dominum Deum tuum. Proh dolor ! Quis præ angustia gementi medebitur tibi ? O si tempus haberes ! Sed heu ! tempus non erit amplius : eundem erit in diem æternitatis , ubi erunt tibi amarissimæ lachrymæ , dùm dicetur tibi : *Ubi est Deus tuus ?*

VIII. Quantò acerbius senties tandem quàm horrendum sit incidere in manus Dei viventis , cum pericula inferni jam imminuentis invenient te ? Quantus luctus ! quantò videbis infernum jam aperientem & dilatantem os suum ut te rapiat , & te in ignem inextinguibilem , ac in ardores sempiternos absorbeat ? O angustia morte amarior ! ô angustia , desperationis & damnationis anticipatæ proxima ! O mors peccatorum , mors pessima ! ô mors malorum Sacerdotum , mors terribilis ! ô mors tantò terribilior quantò frequentior ! Quot præterea sunt inter Sacerdotes tepidos & malos , qui occulto , sed justo Dei judicio , moriuntur velut Judas , æquè excæcati & obdurati ac vixerunt ? Securi sunt ubi omnia sunt terribilium periculorum plena. Lethalis tranquillitas ! Justus es , Domine , & rectum judicium tuum !

Charissime Frater , qui te in hoc speculo contemplatus es , quique in mortis conflictum tandem devenies , redi ad cor tuum obduratum ; vide , & quidem seriò & coram Christo crucifixo , nùm tu futurus sis

ille Sacerdos cujus horrendam mortem forsan obiter & oscitanter legisti, quasi hæc tibi non immineret. Væ tibi, si hos non prævenias luctus amaros! Hujus meditationis recordatio torquebit & laniabit cor tuum. Si habeas bonam voluntatem hanc terribilem evadendi mortem, & moriendi pretiosâ Sanctorum morte, adhibebis millia ad hoc salutaria media, in hoc libro passim sparsa. Noli amplius obdurare cor tuum. *Talis vita, finis ita.* S. Ber.

M E D I T A T I O

De pretiosâ bonorum Sacerdotum morte.

Considera hujus suavis & pretiosæ mortis firmamenta.

I. Pii & boni Sacerdotes non torquentur in horâ mortis, sicut tepidi & mali Sacerdotes, à facie peccatorum suorum; sive, quia saltem gravia, miserante Deo non commiserint, sive quia ea, eodem propitio Deo, dignis pœnitentiæ fructibus deleverint, eaque laboriosis operibus redeemerint; testimonium illis reddente conscientia quod sint filii Dei. Suave bonæ conscientiae testimonium!

II. Cùm in hoc mundo se tanquàm peregrinos & exules habuerint; & cùm, velut Apostolus, quotidie mortui fuerint, non formidant in horâ mortis separationem ab omnibus rebus creatis, sive quia illis cor numquàm apposuerunt, iisque tanquàm non utentes usi fuerunt, sive quia iis, propter

Deum, ut hilares datores, voluntariè & libenter tunc valedicunt. O beati Nazaræi qui in vanitates & insanias falsas numquàm respexerunt! O quàm lætè moriuntur!

III. Multa alia sunt quæ tranquillam, suavem, & placidam efficiunt piorum Sacerdotum mortem; nam frequens & pia Missæ celebratio, tot ferventes Communiones, quibus in Christo, tanquàm palmites in vite, manserunt; imago Jesu-Christi è cruce pendentis, cujus mortificationem in corpore suo jugiter circumtulerunt, & cui in omnibus, abdicatis sæculi vanitatibus, se conformarunt; zelus domûs Dei, quo multifariàm adusti, multos Jesu-Christo lucrifecerunt; tot alia bona opera se tunc offerentia, non quidem tanquàm vanitatis & præsumptionis motiva, sed ut tot ad profundiorum humilitatem, & ad firmiorem in Deo fiduciam incitamenta; amaræ & suaves lachrymæ quibus & stratum suum & pedes crucifixi Domini rigant solliciti; frequentissima amoris jacula quæ in cor dilecti vibrarunt, & nunc ardentius vibrant; sacrum & optatissimum viaticum quo ad beatam mortem armantur contra acriores hostis rugientis impetus; Extrema-unctio tepidis Sacerdotibus molesta, sed illis, utpotè piis & poenitentibus, desiderabilis; internæ Spiritûs Sancti consolationes; pax quæ exuperat omnem sensum; Beatissimæ Virginis patrocinium; Angelorum protectio; Sanctorum præsidia; piorum virorum quos zelo suo Christo lucrifecerunt oratio-

nes ; ardens gloriæ desiderium ; prægustatio ejusdem gloriæ deliciarum ; seria & continua ad mortem præparatio ; tandem gratiæ multæ quas à Deo recipiunt , mortis dolores leniunt , judicii timorem excutunt , aut saltem minuunt , augent eorum spem , inflammant charitatem , & desiderium possidendi Deum ; & quidem eò ardentius , quò propius ad ipsum accedunt , eosque ad exclamandum suaviter impellunt : *Veni , Domine Jesu , qui dixisti : ubi sum ego , illic & Minister meus erit ; non fui quidem fidelis servus & Minister tuus ; quinimò , fui servus inutilis ; verum , ô Jesu mi ! suppleat misericordia tua quidquid deest infirmitati meæ ; non sum dignus gloriæ tuæ ; scio enim quia , quandò coronas merita nostra , coronas dona tua ; ergò corona me in misericordiâ & miserationibus , & veni ; cupio dissolvi & esse tecum ; educ de custodiâ animam meam , ad confitendum nomini tuo ; veni & noli tardare ; amore tui & desiderio gloriæ tuæ jamdudum langueo ; ecce me expectant justi , ut , unâ cum illis , misericordias tuas in æternum cantem.*

Tandem , pii voti compos factus fidelis ille Christi Minister , moritur potius amoris vi & incendio , quàm dolore mortis ; moritur in sinu Christi , in æternum victurus.

O beata mors ! O suavis somnus ! O segura quies ! O felicissimus transitus ! O quàm verè dictum est : *Timenti Deum benè erit in extremis ; beati qui in Domino mo-*

riuntur ! Quis mihi det ut moriatur anima mea morte fratrum meorum justorum , Martini , Gregorii , & fiant novissima mea horum similia ? Sed vae mihi ! Quid prodest desiderare mori pretiosâ eorum morte , si non induam eorum sanctitatem , &c. Quid est cur non ago quod ipsi egerunt , & quod , appropinquante morte , egisse vellem , ego ignavus Sacerdos , qui hæc consolatoria verba sæpè lego & prædico : *Beatus ille servus , quem cum venerit Dominus , invenerit vigilantem.*

Dixi , nunc cœpi : volo ex nunc vigilare.

Domine Jesu , qui hanc mihi vigilantiam sæpè sæpius insinuas , adjuva me ; offero tibi actum contritionis & amoris , tanquàm meæ bonæ voluntatis arrham ; doleo , Domine , &c. amo te , &c.

MEDITATIO

De Judicio Particulari.

I. **S**Tatim post mortem , in ictu oculi ; judicium fiet , & quidem judicium sine misericordiâ. Omne verbum otiosum quod locuti fuerimus , de eo reddemus rationem. Ecquis sustinebit , si iniquitates observaverit justus Judex qui scrutatur renes & corda , & qui in Angelis reperit pravitatem ? Quis vivens in conspectu ejus justificabitur ? Quam & ego allocutionem habebo ?

II. Reddemus rationem villicationis nostræ. Heu ! Quot ignorantia ? Quot negligentia & omissiones ? Quid tunc sentiam

de ministerio meo humeris Angelicis formidando? Quid de tot animabus culpâ meâ perditis, & in magnâ adversum me stantibus constantiâ?

III. Multum nobis datum est, multum ergo quæretur à nobis; cum enim augentur dona, rationes etiam crescunt donorum; plus cæteris quidem in hoc mundo accepisse cernimur; sed heu! Quantò gravius indè judicabimur! Quot gratiæ in vacuum receptæ? Quot talenta in terrâ abscondita? &c.

IV. Ipsæmet justitiæ judicabuntur. Heu! Quot paleæ ad comburendum igni? Quoties enim, inquit D. Gregorius, sordet in conspectu Judicis quod splendet in conspectu operantis? Væ ergo laudabili vitæ, si, remotâ misericordiâ, discutiatur! S. Aug. Quantò terribilius tunc sentiam ego ista formidolosa verba quæ nunc oscitans lego: *maledictus qui facit opus Dei negligenter?*

Quæ cum ita sint, quis poterit cogitare diem adventus ejus? Et quis stabit ad videndum eum? Responde, simul & vide quomodo oporteat te ambulare ut misericordiam invenias, & cum fiduciâ stes ante tremendum ejus tribunal. Hoc ipsum aliis suades; nonne hujus moniti ipse indiges? Cur ergo non misereris animæ tuæ, placens Deo? Curans alios, te ipse non curares? O medice insipiens! Nonne jure meritò de ore tuo judicareris, serve nequam?



MEDITATIO

De Iudicio Universali.

I. **E**Runt signa in sole & lunâ & stellis ; armabuntur creaturæ omnes ad ultionem inimicorum ; undè arescent homines præ timore & expectatione quæ superveniet universo orbi ; erit enim tunc tribulatio qualis non fuit ab initio mundi usque modò , neque fiet. Propter hæc signa sic inclamat Joël : *magnus dies Domini , & quis poterit sustinere illum ?*

II. Parebit signum Filii hominis in cœlo ; tunc videbunt impii in quem transfixerunt ; Sanguis Jesu Christi exquiretur , & vehementius clamabit vindictam quàm sanguis Abel. Verùm , si crux terreat , quis consolabitur ? si sanguis ejus contra nos vociferetur , quis pro nobis clamabit ? Væ ergò mihi Sacerdoti si nunc non crucifigam carnem cum vitiis & concupiscentiis ! Væ mihi , si nunc bibens indignè , polluam sanguinem testamenti ! Nonne hic sanguis erit super me ? Nonne me ipsa crux condemnabit ?

III. Audi & meditare hanc horrendam tubæ & tonitruï vocem : *surgite mortui , venite ad judicium.*

Quis non horreat ? Jam hæc cogitantem timor & tremor veniunt super me ; surgent Laïci & indocti , sed meritis pleni ; surgam & ego Sacerdos , surgam ego Pastor ; sed heu ! Laïcis deterior ; surgam ego dilectus

N v

Dei, ego qui non modò non fui in ejus domo oliva fructifera, verùm potiùs feci in eâdem domo scelera multa ! O quàm bonum mihi tunc esset si natus non fuisset, aut saltem si tunc montes caderent super me ?

IV. Exibunt Angeli, & separabunt malos de medio justorum, & tunc consummabitur illud : *erunt duo in agro ; unus assumetur, & alter relinquetur*. Mirabilis mutatio & luctus, dùm qui in mundo primi fuerunt, ibi erunt novissimi ! Separabor fortè ego Pastor ab ovibus quas ducebam, factus ipse reprobus. Proh pudor ! Sed heu ! Proh dolor ! Proh desperatio !

V. Tunc videbunt Filium hominis venientem in nubibus cœli cum virtute & majestate. In primo adventu apparuit mansuetus ; in secundo autem terribilis apparebit. Grandis & horrenda mutatio ! Si ista melliflua vox hujus Agni jamjam ad occisionem ducendi, nimirum ; *Ego sum*, prostravit milites ; quantam formidinem injiciet, quandò ab eodem Jesu judice, & in leonem de Tribu Judâ mutato, proferetur ? &c.

Tunc accipiens tempus suum, & incipiens judicium à domo suâ, manifestabit consilia cordium ; nihil opertum quod non fciatur, & nihil occultum quod non reveletur ; tunc implebitur illud : *revelabo pudenda tua in faciem tuam, & ostendam gentibus nuditatem tuam, & regnis nuditatem tuam* ; tunc videbo reptilia quorum non est numerus, videbo & abominationes pessimas quas in loco sancto patravi, & quas parvi feci, ac quasi minutula reputavi ; data

quidem fuit mihi potestas ligandi atque solvendi ; sed heu ! ipsa judicia mea , in staterâ appensa , judicabuntur ; ecquid si condemnentur ? Væ , væ mihi , si condemer & ego infidelis dispensator & dissipator pessimus ? Hoc tamen periclitor , & non vereor , non vereor omnia opera mea ? Et adhuc non sum humilior , atque ad serviendum Deo promptior ? O vana fides mea ! Nonne tandem incidam in manus Dei viventis ? Quis , hæc meditans , non se ipse statuet contra faciem suam , se ipse dijudicans , & omnia delicta Confessario cognita faciens , ut non judicetur nec confundatur in novissimo die ?

Domine Jesu ! Quis mihi hoc tribuat ut in inferno protegas me , donec pertranseat furor tuus , & constituas mihi tempus in quo recorderis mei ?

MEDITATIO.

De Sententiâ erga electos & reprobos.

I. *V*enite , benedicti Patris mei , possidete paratum vobis regnum à constitutione mundi.

Melliflua verba , affectione & exultatione plena ! O anima mea , hæc omnia figillatim meditare , habent enim singula pondus suum ; lætare in his quæ dicta sunt ; festina accipere hanc à Domino benedictionem ; venient tibi pariter cum illâ omnia bona ; festina ingredi in illam requiem ; spera in Deo , & fac bonitatem ; audies

tandem , eo propitio , dulcisonam Patris tui vocem , & ibis in domum Domini ; inebriaberis ab ubertate domûs illius.

II. *Discedite à me , maledicti , in ignem æternum.*

O discessio ! O maledictio ! O ignis ! O formidanda æternitas ! Heu ! Hæc omnia terrore & luctu adeò sunt plena , ut tribularer nisi scirem misericordias Domini. Quis mihi det ut liberer à verbo malo ? Ego verò dixi : *Nunc cæpi ; hæc mutatio dexteræ Excelsi.*

Sed & tu , charissime Frater , hîc siste , & meditare nocte cum corde tuo hæc verborum fulmina & tonitrua , cedros libani confringentia , & usque ad divisionem animæ pertingentia ; disce per hæc converti ad Deum in toto corde tuo , servire Domino in timore , facere uberes , assiduos & dignos pœnitentiæ fructus , & perseverare usque in finem ; ab auditione malâ non timebis. Iterùm monemus , intellige hæc qui oblivisceris Deum tuum & animam tuam. Anteverte hanc sententiam , nequandò rapiat & non sit qui eripiat. Si autem hæc audiens & meditans , non surgas de fomno , non dormis , sed mortuus es. S. *Aug.* Quia , si vix justus salvabitur , ubi parebis , impius & peccator ? Quid tamen hâc cordis duritiâ inter Clericos frequentius ? Nam , quàmvis hæc tremenda Dei oracula legant & sciant ; attamen , adeò alto demerguntur oblivionis somno , ut ad nullum Dominicæ comminationis tonitru expergiscantur , & ut

vel ipsum suum periculum non expavescant. Nonne & tu ex illis es, benevole lector? Quid tua tibi vaticinatur duritia? Interroga Pharaones, Judæos, & ipsum Judam.

MEDITATIO

De Inferno.

Siste gradum viator, audi attentè Isaïam sic interrogantem:

Quis poterit habitare de vobis cum igne devorante? Quis habitabit ex vobis cum ardoribus sempiternis?

Responde, delicate homo, qui vermis pulicisve infestationem ferre non potes; dic mihi, quæso, insensate, quomodò ergò hunc ignem devorantem, quomodò hos ardores sempiternos sustinere poteris? Iterùm responde, nùmquid illud poteris? Heu tamen! Ducens in bonis dies tuos, nonne ad hæc inferna, ad hunc tormentorum locum in puncto descendes? Nonne jamdudum in hoc inferno habitaret anima tua nisi Dominus adjuvisset te? Nonne pericula inferni te jam inveniunt? Nonne infernus jam aperit & dilatat os suum, ut te in hoc profundum absorbeat? Ita sanè; & non recogitas corde? Te ipse definias.

Verùm, memineris intolerabilius malis Sacerdotibus paratum esse in inferis supplicium, sive quia præ aliis superno lumine collustrantur, sive quia ad altiorem gradum provehuntur, sive quia majoribus gratiæ do-

nis ditantur, fivè quia suis & alienis peccatis onerantur, ac proindè, quia profundius præ Laïcis peccant. Hinc profundius cadunt in infernum quàm aliquis alius, ut beatæ Birgittæ revelatum est. Hinc disce quàm pauci sint Sacerdotes qui salvi fiant, ut loquitur D. Chrysostomus. Hujus gravioris supplicii terror, hujus æternæ damnationis tibi imminens periculum, animum tibi assiduè non concutit? Quid censes de cæcitate intellectûs tui? Quid de cordis tui durtiâ?

Sed saltem, descende ipse in infernum vivens, ut non descendas moriens? Siste, inconsiderate, siste; cogita seriò dies antiquos, & annos æternos in mente habe; vide quàm horrendum sit Sacerdoti incidere, ex Angelorum mensâ, ex cathedrâ Evangelicâ, ex medio plebis, ex culmine honorum & divitiarum, in manus Dei viventis; detrudi cum diabolo in infernum, volutari cum sceleratis inter flammâs, & potari felle draconum, veneno insanabili. Terribile discrimen! Disce hâc jugi meditatione scopere, ut Propheta, spiritum tuum, & agere in his diebus salutis pœnitentiam salutarem, ne in his flammis in æternum & frustra crucieris. Quid, insipiens corde, quid de die in diem differs? Nonne jam hora est de somno surgere? Pensa, & iterum pensa, quòd ex momento pendeat æternitas. Sic censet, sic ululat, sic experitur in inferno infinitus stultorum numerus. Nùmquid idipsum, ô insensate, experiri velles? Eò tamen sese fert effrænata impru-

dentia tua. Et verò, respondeat cor tuum, & dicet tibi: *Infernus domus tua est, si ex nunc salutem tuam cum timore & tremore non opereris.*

Quapropter, inhæreant animo hæc gravissima verba: *quid prodest homini si universum mundum lucretur, animæ verò suæ detrimentum patiatur?* Interroga majores tuos in inferno sepultos, & dicent tibi: *ô insensati! Quid nobis profuit superbia?* &c. *Jam non possumus hinc transmeare! Væ nobis! Sed væ vobis si maturè non sapiatis!* Hæc meditare, ô anima mea, die ac nocte. Ecquid? Tu alios doces quærere primum regnum Dei, & illud teipsam non doceres? Non ordinares in te charitatem. Absit.

M E D I T A T I O

De damnatorum luctibus.

A Udi damnatos sic in inferno, præ angustia spiritûs gementes, & ululantes.

O insensati! Lassati sumus in viâ iniquitatis & perditionis; ambulavimus vias difficiles; vias autem Domini ignoravimus. Quid nobis profuit superbia, aut divitiarum jactantia quid contulit nobis? Transferunt illa omnia tamquam umbra & præcurrens nuntius; nos verò in iniquitate nostrâ consumpti, igneis & æternis vinculis sub istâ caligine reservati sumus!

Væ nobis! Propter multitudinem iniquitatis nostræ in inferno positi sumus, in hoc tormentorum loco ubi umbra mortis

& nullus ordo , sed sempiternus horror inhabitat , ubi est fletus & stridor dentium , supplicium æternum , ignis inextinguibilis , nulla redemptio ; hi sunt iniquitatum nostrarum , in quibus nunc erubescimus , amarissimi fructus.

Væ nobis quia peccavimus ! Heu , heu ! quis nos fascinavit non obedire veritati , non sequi arctam viam ? Potuimus in vitam æternam ingredi , & quidem facile ; quid enim ultra debuit facere pro nostrâ salute Dominus Deus quod non fecerit ? Sed heu ! Quia noluimus obedire mandatis ejus , venit subito super nos mors secunda , mors æterna , & sepulti sumus in inferno. Verè ex nobis perditio nostra ; exquirimus hîc assiduis lachrymis salutaris poenitentiae locum , & non invenimus ; desideramus mori , & mors fugit à nobis ; propter hæc omnia in desperationem acti , carnem brachii nostri morfu amarissimo voramus , & in æternum vorabimus , dicentes semper intra nos , rabie & timore horribili turbati : *Ergò erravimus ; noluimus benedictionem , & ecce elongatur à nobis ; & quia dileximus maledictionem , idcirco venit super nos maledictio , venit maledictio æterna.*

O miserum me , ululat Ecclesiae Pastor ! In sortem Domini vocatus , sciens bonum & malum , contendebar parare Domino plebem perfectam , & dare plebi scientiam salutis , omnibus omnia factus. Reverà , cooperante Domino , alios salvos faciebam ; sed , proh pudor ! Potui ego pariter salvus fieri. Sciebam salutis & perfectionis media ;

habebam ubertim gratias salutare, ipsum, gratiarum Auctorem & fontem ferè quotidie recipiebam, & tamen meipsum salvum facere nolui. Vocabat me affectu paterno Dominus Jesus; at ego semper renui; in croceis enutritus, amplexatus sum stercora; cum in honore essem, non intellexi; jumentis insipientibus similis factus sum. Quot Laici computati sunt zelo meo inter filios Dei? At ego, dicens & non faciens; at ego infelix minister; at ego monstruosum Pastoris idolum, quia sciens & pertinaciter volens, secutus sum viam spatiosam, quam verbo tenus expugnabam, ductus tamen in perditionem, crucior nunc & in æternum cruciabor in hâc flammâ. Habens præ manibus claves regni cœlorum, illud aliis aperui; mihi verò, stultus clausi. O stupiditatem meam! Quæ me dementia fascinabat? Pereat ergo dies in quâ natus sum & sacris initiatus; maledicta quæ ambii beneficia; maledicta ambitio; maledictus Prælati qui me ad ordines & ad beneficia promovit; maledicta vanitas & superbia mea; maledictæ creaturæ; maledictus ego quia nolui benedictionem quam aliis toties elargitus sum; maledictus Deus, mihi in severissimum ultorem mutatus! Sed heu! inutiles gemitus! Proh desperatio!

Talia dixerunt & dicunt in inferno ii qui peccaverunt. Sic rabidi ululant Clerici latrones, qui ad Sacerdotium accesserunt non vocati à Deo; hi Clerici mundani, qui, quàmvis à Deo ad illud vocati, gratiam vocationis neglexerunt; hi Pastores

mercenarii , qui , incuriâ , negligentia , & aliis indecoris modis communicarunt peccatis alienis.

Nonne & ego , secundum carnem vivens , sic in æternum ululabo ? Quid mihi vaticinatur vita animalis præterita ? Quid poenitentia foedè hætenus acta ? Quid tot gratiarum abusus ? Quid præsens mea vita tepida ? Prophetisa , anima mea. Quidni nunc recogito in salutari amaritudine animæ meæ & annos meos , & hos damnatorum amaros planctus ? Quidni hos prævenio luctus ? Domine Jesu ! quis novit potestatem iræ tuæ ? Sed quis novit dementiam meam ?

M E D I T A T I O

De mercede multâ nimis & æternâ bonis Sacerdotibus in Cœlis paratâ.

Fidelis servus & prudens , quem constituit Dominus super familiam suam , & qui hætenus terribili oraculorum tonitru perterritus es , consolare nunc his mellifluis Jesu-Christi promissionibus , quibus Apostolos ad pugnam & ad labores excitabat , & quibus teipsum ad contemptum mundi , ad certamina , & ad gloriæ desiderium adhuc inflammat.

Vos qui reliquistis omnia , & secuti estis me , centuplum accipietis , & vitam æternam possidebitis. Nec oculus vidit , nec auris audivit , nec in cor hominis ascendit quæ vobis in cœlo à constitutione mundi

præparo.

Fidelis sermo , & omni acceptione dignus ! Usquequò , anima mea , diliges vanitatem , & quæres mendacium ? Quousque habebis pro nihilo terram desiderabilem ?

Beati estis cùm maledixerint vobis homines , & persecuti vos fuerint propter me ; vos enim benedicemini à Domino qui fecit cœlum & terram ; jam omnes qui viderint vos , cognoscent quia estis vos semen cui benedixit Dominus. Festinate hanc à Domino accipere benedictionem ; venient vobis cum illâ pariter omnia bona.

Gaudete & exultate , Ministri mei & fideles dispensatores Mysteriorum Dei , qui dignè ambulantes vocatione quâ vocati estis , multùm laborastis , & exhibuistis corpora animosque vestros hostiam viventem , sanctam , placentem , rationabile obsequium vestrum. Scitote quia labor vester non erit inanis apud me ; erit siquidem merces vestra copiosa in cœlis , quandòquidem ipse ero merces vestra in cœlis. Ecquis intellectus hanc intelligere valeat ?

Gaudete , quia ut veri homines Dei & boni milites mei , fortes in fide , legitime certatis ; sedebitis in throno quia vincitis ; percipietis coronam justitiæ , quia zelo zelati , non facitis animas vestras pretiosiores quàm vos ; dummodò cursum vestrum consummetis , & fidem servetis , sedebitis super sedes duodecim , judicantes duodecim Tribus Israël , quia sequentes me & dealbantes stolas vestras in sanguine meo ;

plantatis Ecclesiam meam sanguine vestro.

Gaudete, Angeli & coadjutores mei, qui in opere & sermone potentes, datis plebi meæ scientiam salutis; fulgebitis sicut stellæ in perpetuas æternitates, quia eruditis multos ad justitiam, eosque mihi lucrificatis; tantò copiosior & eminentior erit merces vestra, quantò pretiosior est anima sanguine meo redempta; macti estote, & in ministerio ad quod assumpsi vos, usque in finem perseverate.

Gaudete, discipuli mei, qui mecum in tentationibus permanetis, & qui patimini propter justitiam; percipietis immarcescibilem gloriæ coronam, quam ego, Princeps Pastorum promitto vobis; scitote quia ego potens sum depositum vestrum servare in illum diem, justus Judex; confortamini interim, fortes estote in bello, & pugnate cum antiquo serpente.

Gaudete & exultate, focii Passionis meæ, qui nunc lugetis, quoniam consolabimini, gaudete, quia nunc abnegantes vosmetipsos, ac tollentes crucem vestram, bibitis læti calicem quem ego bibi; cohæredes mei eritis; hyems tandem transibit; & vix dederò vobis electis meis somnum; ecce hæreditas mea. Gaudete, iterum dico, gaudete, intrabitis in gaudium meum; abstergam lachrymas ab oculis vestris; jam non erit amplius neque luctus, neque clamor; priora transibunt; metetis in æternâ exultatione quod nunc in lachrymis seminatis; inebriamini ab ubertate domus meæ, & torrente voluptatis meæ potabi-

mini ; gaudium vestrum nemo tollet à vobis ; ecce , ô amici , ecce quomodò momentaneum hoc & leve tribulationis vestræ , æternum gloriæ pondus operabitur in vobis ; gustabitis & videbitis quàm suavis sit Dominus , & quàm bonus his qui recto sunt corde , & qui pro ejus gloriâ laborant , ac propter justitiam patiuntur.

Quis ad hæc audita non inardescat ? Convertere , anima mea , convertere in requiem tuam ; vide quid sit inter justum & impium ; inter fervientem Deo , & non fervientem ; inter fideles Christi Ministros , & inter tepidos ac malos. Jam vidisti *nihil esse apud Deum difficilius , laboriosius , periculosius , & damnabilius officio Episcopi & Presbyteri si persunctoriè agatur ; sed nunc vides nihil esse apud ipsum Deum beatius , si eodem modo militatur quo Imperator noster jubet.* S. Aug.

Quidni ergò satagas esse in omnibus fidelis Minister Christi ? Nonne scis regnum cœlorum vim pati , & solos violentos rapere illud ? Nonne jam meditata es paucos esse Sacerdotes qui salvi fiant ? S. Chrysost. Quarè ? Sivè quia non ambulant dignè vocatione quâ vocati sunt , bonum non operantur nec secundùm mensuram supernorum luminum quibus illustrantur , nec secundùm altiorem gradum ad quem provecti sunt , nec secundùm majora gratiarum dona quibus ditantur ; sivè quia ferè omnes impinguati , dilatati , in labore hominum non sunt , & cum hominibus non flagellantur ; vivunt verò secundùm carnem , & parùm

sunt de suâ & aliorum salute solliciti. Nonne & tu , anima mea , ex illis es ? Quâ fronte speras te intraturam esse in hanc gloriam , in quam Apostoli & ipse Christus non intrarunt nisi patiando , laborando , & animam pro ovibus suis ponendo ? Vis ergò donari coronâ vitæ ? Ministerium tuum perfectissimo quo poteris modo imple ; esto fidelis usque ad mortem , & Christus Dominus erit tibi in promissis fidelissimus.

Quis ergò , ô Jesu mi , quis mihi det ut mundo , ubi nihil est nisi vanitas & afflictio spiritûs , renuntiem ; ut te Deum meum & omnia possideam ? Quis mihi det ut propter te , quoad vixero , mortificer totâ die , ut compatiens conglorificer ? Quis mihi hoc tribuat ut zelans zelum legis & animarum sicut Elias , Apostoli , & alii Pastores juxta cor tuum , recipiar sicut illi in cœlum , & te facie ad faciem videam ? Hoc quidem volo , sed perficere non invenio. O Jesu , fortitudo mea , da mihi gratiam , ut deindè des mihi gloriam.

M E D I T A T I O

De Humilitate.

I. **A**D quem respiciam , dicit Dominus ; nisi ad pauperculum corde ? Quia respexit humilitatem ancillæ suæ , decantat beata Virgo Maria , ex hoc beatam me dicent omnes generationes. Ecce quomodo humilia respicit Dominus Jesus , veræ humilitatis exemplar & præmium ; ecce quo-

modò humilibus dat gratiam, & humiles spiritu salvabit.

Sed è contrà, alta à longè cognoscit, superbis resistit, & seipsos exaltantes humiliabit usque ad passionem ignominiae, & ad inferni novissima; scriptum est enim: *nisi efficiamini sicut parvuli, non intrabitis in regnum cælorum*; & evidentissimum reproborum signum, teste D. Gregorio, est superbia, quia initium omnis peccati superbia est. Indè liquet quàm placens sit Deo humilitas, & quàm odibilis sit coram ipso Deo & hominibus superbia. Nùmquid Deus gloriam suam alteri dabit?

II. Si quæras, inquit D. Augustinus, quæ sit via ad obtinendam veritatem, quidque primum sit in religione & disciplinâ Christi? Respondebo: primum, humilitas. Quid secundum? Humilitas. Quid tertium? Humilitas. Et quoties interrogabis, toties respondebo, toties dicam: humilitas. Quod Demosthenes, in scholâ eloquentiæ, pronuntiationi dedit, ego dabo humilitati in scholâ Christi. Qui ergò sine humilitate virtutes congregat, inquit D. Gregorius, quasi in ventum pulverem portat; mercedes congregat, sed mittit eas in sacculum pertusum; seminat multum, sed parum infert. Hinc fit ut præclari concionatores, sapientiæ suæ fidentes, persuasibilibus humanæ sapientiæ verbis se oblectantes, seipsos prædicantes, & hominibus placere cupientes, sint velut æs sonans, cymbalum tinniens, nubes sine aquâ, arbores autumnales, & fructum non afferant; ita ut, adul-

terantibus verbum Dei, contingat illis in poenam istud Osee : *Da illis Domine : quid dabit eis ? Da illis vulvam sine liberis , & ubera arentia.*

Grandis dignitas mea ! Sed grandis ruina mea si altum sapiam. Vidit Dominus fatanam sicut fulgur de cœlo cadentem ; nonne & ego superbè sapiens & glorians, sublimia aliundè loquendo & agendo, cadam è pinnaculo templi ad foediorem lapsum ; demergar indè in profundum ignominiae & tartari ; scriptum est enim : *qui se exaltat humiliabitur : non habitabit in domo meâ qui facit superbiam.* Et licèt nunc vir divitiarum appaream ; cupiens tamen videri ab hominibus, dormiens tandem somnum meum, nihil inveniam in manibus meis ; & dùm sic stultè gloriabor : *dives sum ;* terribiliter respondebitur mihi : *miser & miserabilis es.*

Charissime Frater, rectorem te posuerunt ; noli extolli ; esto in illis quasi unus ex ipsis ; quantò major es , tantò magis te in omnibus humilia ; gravissimum iudicium his qui præsunt fiet, & potentes potenter tormenta sustinebunt. Christus Dominus, cujus Minister es, exinanivit semetipsum ; non quæsivit gloriam suam, sed Patris. Estne servus super Magistrum ? Nonne ergò eris humilis in oculis tuis ; sive vestitu, victu & suppellectili ; sive sermone, & præsertim corde & opere ? Undè hoc monstrum ? Ubi superbus parebis ? Tu videris.

ALIA

ALIA MEDITATIO

De Humilitate & Timore ;

Super hæc verba : *Humiliatio tua in medio
tui.*

Accipe lucernam , & sic te ipse scrutare :

I. Quid fui ? Heu ! De limo terræ formatus , in iniquitatibus conceptus sum , & ad malum ab adolescentiâ meâ pronus , pronior ad illud in dies factus sum. Præterea , ab ipsis incunabulis immolavi animam meam Dæmoniis & non Deo. Quid feci ? Obstupescite cœli super hoc ! Quinimodò , infelix ego homo , apposui iniquitatem super iniquitatem , & hanc quasi aquam bibi ; delicta juventutis meæ supergressa sunt caput meum ; ossa mea adhuc implentur vitiis adolescentiæ meæ , ita ut funibus peccatorum constrictus , & in profundum peccatorum veniens , non sensi ; & , quod pejus est , contempsi. Frons meretricis facta est mihi. Hæc fuit hætenus nefanda vita mea ; quid vilius ? Quid est cur oculos in cœlum levare audeo ?

II. Quid sum ? Homuncio , pulvis , vermis , sperma foetidum , vapor ad modicum parens. Quid sum ? Instabilis homo , arundo ventis agitata , spiritus vadens & non rediens. Ecquis potest scire figmentum meum , nisi solus Deus ? Quid sum ? Nihilum ; & , quod detestabilius est , nihilum rebelle in Deum armatum. Quid

O

tandem sum? Heu! Homo peccator sum; & adhuc superbio; pulvis & cinis ac servus, peccavi? Proh odibilis superbia mea! Sum quidem Minister Christi, & notus ejus; nonne tamen in ejus domo facio scelera multa? Nonne edens panes ejus magnifico super eum supplantationem? Aut saltem, nonne sum servus inutilis in ipsâ Sanctorum terrâ? Facio quidem interdum bonum; sed, proh pudor! Quo tempore? Quâ negligentia? Quâ sinistra intentione? Nonne ipsæmet justitiæ meæ sunt quasi pannus menstruatae? Quid habeo quod non acceperim? Quid autem de meo habeo, nisi peccatum & mendacium? *Conc. Arausic.* Quid ergo glorior, miser & miserabilis?

Prætereà, licet nihil mihi conscius sim, numquid tamen omnino justificatus sum? Heu! Minimè! Nescio utrum amore an odio dignus sim. Peccavi quidem nimis; verè scio quòd ita sit; sed num feci dignos poenitentiae fructus? Nescio. O incertum terribile! Quâ ergo fronte in Cleris dominor? Quonam ausu, in me confidens tanquàm justus, cæteros aspernor?

III. Quid tandem ero? Quid? Vermium corrodentium esca, intuentibus horror, pulvis & cinis; incedentium pedibus conculcatus, ero quasi non fuisset, ita ut, de utero translatus ad tumulum, oblivioni dandus sim tanquàm mortuus à corde.

Quid ero? An beatus, an reprobus? Nescio. Quàmvis enim ex speciali Dei revelatione scirem me ejus amore nunc dignum esse; an perseverabo usque in finem?

Nescio. Nonne, è contrà, singulis periclitor momentis à statu gratiæ declinare, & statim, occulto sed justo Dei judicio, in peccato mori, & è pinnaculo templi in quo statutus sum, ad inferna, sicut ipse Judas, è latere Christi in puncto descendere?

Reverà, hoc quotidie periclitor, sive ob infirmitatem meam & ad malum vehementem proclivitatem, sive propter millia populi & leonis rugientis circumdantium me ut devorent animam meam, sive propter animi tumorem & arrogantiam. Quot enim sunt qui in vitam æternam jamjam ingressuri, miserè tamen ob præsumptionem lapsi, in æternum perierunt? Sed si in viridi ligno id factum est, in arido quid fiet? Undè ergò hæc monstruosa spiritus mei præsumptio? Undè tanta securitas? Ubi tandem parebo? ego, inquam, tot peccatorum occultorum & alienorum conscius? O inscrutabile cor meum! O altitudo Dei! quàm incomprehensibilia sunt judicia tua! Quis non timeat te?

Ergò, charissime Frater, qui in hoc te contemplaris speculo, humilia te in omnibus; & licet Sacerdos sis, salutem tuam cum timore & tremore operare. Multum tibi datum est, multum quæretur à te. Periclitaris pro te & pro animabus tibi commissis. Grande periculum! Iterum moneamus, humilia te in omnibus. Cave tamen ne ex illis sis qui nequiter humiliant se. Quapropter, nec gloriosè, nec sinistrè de te loquaris. Vilior fias plus quàm factus es; sis humilis in oculis tuis; abominare

ipsa superbiæ signa ; ama nesciri & pro nihilo reputari. Ille erit verus humilis , inquit D. Bernardus , qui non humilis , sed vilis reputari vult ; & quàmvis iniquitates tuæ multiplicatæ sint super arenam maris , invenies gratiam coram oculis Domini , & exaltaberis. Hoc visum est in Manasse , in Publicano , in Filio Prodigio , & aliis. Undè hæc est altissima & utilissima lectio , teste Thomâ à Kempis , *vera sua ipsius despectio*. Hanc & tu disciplinam tene , & sic sæpissimè ora :

Domine Jesu ! averte oculos meos ne videam vanitatem ; da mihi Spiritum tuum , & discam à te esse humilis corde. Minister tuus sum ; sentiam ergò in me quod & in te , ô Magister bone ! Noverim te , noverim me , ut exaltem te & humiliem me , ac misericordias tuas in æternùm cantem.

SERIES EXERCITIORUM ;

tùm proprii statûs , tùm pietatis.

Aspiratio horaria pro felice morte.

Domine Jesu , unam petii à te , hanc requiram ; ut moriatur anima mea morte justorum ; ut novissima mea fiant horum similia ; & ut inhabitem in domo tuâ omnibus diebus meis.

O Jesu , fons vitæ ! O Jesu , requies mea , merces mea magna nimis , & centrum animæ meæ ! cupio dissolvi , & esse tecum ; quandò veniam & apparebo ante faciem tuam ?

VI Peractâ Meditatione , recita Horas Canonicas , sive in Choro , sive extra Chorum , juxta tuum statum.

Egrediens è domo.

Domine Jesu ! qui es via , dirige in conspectu tuo viam meam , ut non veniat mihi pes superbiæ.

Perfice gressus meos in semitis tuis , ut non moveantur vestigia mea.

Vias tuas , Domine , demonstra mihi , & semitas tuas edoce me , quia tu es Deus Salvator meus , ut , te duce , dirigantur pedes mei in viam pacis.

Ingrediens Templum.

Domine Jesu ! in multitudine misericordiæ tuæ introibo in domum tuam ; adorabo ad Templum sanctum tuum in timore tuo ; pavebo ad Sanctuarium tuum. Quid justius ?

O Jesu , misericordia mea ! da gloriam in loco isto ; exaudi , Domine , vocem deprecationis meæ dùm oro ad te , dùm extollo manus meas ad Templum sanctum tuum.

Induens Superpelliceum.

Indue me , Domine , novum hominem , qui secundum Deum creatus est in justitiâ & sanctitate veritatis.

VII. Persolutis Horis , præpara animam tuam ad grande opus Missæ & Communionis. Vide ad hunc finem copiosa & pia exercitia , pag. 81. In adventu summi Regis qui venit tibi mansuetus , eructet cor tuum toto manè ; aut saltem idemtidem , verbum bonum , & aliquem ex his actibus jaculato-

O iij

riis & ignitis quos tibi ibidem suggerimus ; pone custodiam ori tuo , & ostium circumstantiæ labiis tuis ; imò nec loquaris verbum otiosum , ut recollectione animi internâ , ferveat & condatur toto manè , medias inter tui muneris functiones , tantum opus Missæ & Communionis. Idipsum tibi suademus pro gratiarum actione post Missam , pag. 101.

VIII. Auditio Confessionum. *Orationes congruæ , pag. 200.*

IX. Recitatio Horarum Tertiæ , Sextæ , & Nonæ.

X. Lectio Scripturæ Sacræ , aut libri pietatis.

XI. Refectio. *Sed ante ipsum prandium ; adhibe benedictionem mensæ , ut habetur in Breviario , si ita tibi expedierit ; ac inter prandendum , hæc tecum cogita.*

1. Christus jejunavit , esuriit , & sitivit ; dederunt in escam ejus fel , & in siti potaverunt eum aceto. Suspirabat Job antequàm comederet. Præcursor Domini dicitur *non manducans neque bibens.*

2. Plus occidit gula quàm gladius. Quot fuere , qui , inimici Crucis , qui ventri , tanquàm Deo servientes , ac splendide quotidie epulantes , tandem mortui , sepulti sunt in inferno ? Sed heu ! in hoc tormentorum loco clamant & postulant gementes guttulam aquæ ut refrigerentur in hâc quâ cruciantur flammâ ; hoc tamen leve refrigerium eis semper denegabitur , & felle draconum potabuntur ; insanabilis siquidem est dolor eorum. Quid eis profuere lautæ ac splendidæ epulæ ?

3. Quot mendici jacent ad januas, saturari cupientes, & nemo illis dat? Ego verò peccator, & Minister Christi felle & aceto potati, abundo panibus, in deliciis sum, in croceis enutrior inter epulas, & lautis ingurgitor escis!

4. Ferè quotidie manduco panem Angelorum, omne delectamentum saporis in se habentem, quique Beatæ Catharinæ Senensis vitam etiam aluit temporalem; jam ergò nauseet anima mea super cibis his levissimis.

5. Servus hic qui mihi ministrat, licet indoctus, fortasse tamen, jam amicus Dei, rapiet cœlum, dum ego qui ministro, quique Minister Christi sum, carne tamen volutatus & sanguine, reprobus tandem forsan efficiar. *Hæ & aliæ piæ considerationes erunt tibi tanquàm calcaria sobrietatis, humilitatis, & aliarum virtutum, & præsertim ad Dei præsentiam fovendam incitamenta. Igitur attende tibi ne crapulâ gravetur cor tuum; sobrius esto; alimenta tanquàm medicamenta sume; manduca & bibe in gloriam Dei, quò alacrius Domino servias; in eum siquidem finem dat escam esurientibus. Frange esurienti panem tuum, & ex ferculis tuis ciba fratrem tuum, præsertim ægrotum & verecundum; & cum non in solo pane vivat homo, sed in omni verbo quod procedit de ore Dei, prandium, piæ lectionis auditu, si locus sit, vel piâ meditatione condire satage, ut dum reficitur corpus, repleatur anima tua adipe & pinguedine cœlesti.*

6. *Erumpant ex corde tuo & medias inter epulas istæ vel aliæ aspirationes* : Ecquandò erues me , Domine , de necessitatibus meis ? Ecquandò , ô vita animæ meæ , satiabor in gloriâ tuâ ? Ecquandò , ô fons vitæ , inebriabor ab ubertate domûs tuæ , ac torrente voluptatis tuæ potabor , ut non esuriam , nec sitiam in æternum ? O quandò hæc erunt ?

XII. *Post prandium , age Deo gratias , ut habentur in Breviario , si tibi placuerit.*

XIII. *Recreatio.* Ab illâ absint vaniloquia , scurrilitates , contentiones , detractones & contumeliæ , aspectus & tactus incauti , colloquia turpia , &c. His omnibus delectari dedecet Sanctos ; eorum enim recreatio debet quidem hilaris esse , sed honesta , sancta , & sobria. Quapropter , aspice interdum in cœlum ubi gaudium est plenum ; ibi fixum sit cor tuum ubi vera sunt gaudia , ut dum corpus recreatur , mens delectetur in Domino , vel canticis spiritualibus , vel pio eloquio ac exercitio quod lætificet cor tuum.

XIV. *Examen particulare.*

XV. *Conversatio.* Si hanc exigit necessitas , utilitas , christiana urbanitas , ac salus animæ & corporis proximi tui. Hæc tua tamen conversatio in cœlis sit.

Aspirationes ante conversationem.

Tu scis , Domine , quia narrant mihi iniqui fabulationes , sed non ut lex tua. De terrâ sunt ; & quoniam ex abundantia cordis os loquitur , de terrâ loquuntur. Judica me , Deus , & discerne causam meam

de gente non sanctâ ; ab homine iniquo & doloſo erue me.

Ne perdas cum impiis , Deus , animam meam , & cum viris sanguinum vitam meam.

Erue me de manu filiorum alienorum quorum os locutum eſt vanitatem ; dextera eorum , dextera iniquitatis.

Sed quoniam neceſſitas mihi incumbit ut cum hominibus converſer , tuam facturum voluntatem ; pone cuſtodiam ori meo , ut non declinet cor meum in verba malitiæ ; cuſtodi cor meum , ut ſemper ſapiam quæ ſuſum ſunt , non quæ ſuper terram ; in cœlum ſim ſemper intentus , medios inter homines & labores , ut ſervi tui D. Xaverius , Martinus , &c.

XVI. Veſperæ & Completorium.

XVII. Studium.

Aspiratio ante ipſum ſtudium.

O Jeſu ! qui illuminas omnem hominem venientem in hunc mundum ; da mihi intellectum ut ſciam teſtimonia tua.

Deus , ſcientiarum Domine , qui doces hominem ſcientiam , da mihi ſedium tuarum aſſiſtricem ſapientiam , ut mecum laboret. Supplex oro ut ſcientiam meam ædificet charitas tua.

XVIII. Lectio libri pietatis.

XIX. Collatio de divinis , aut de difficultatibus Theologiæ , &c.

XX. Viſitatio ægrotorum & agonizantium , vel afflictorum , vel pauperum verecundorum , vel discordium , vel periclitantium , ſi illa quâ præes ſollicitudo , ſi

O. y.

charitas Christi urgeat te , ac suggerat prudentia spiritûs quæ vita est & pax , ut his charitatis officiis incumbas.

QUÆDAM ALIA EXERCITIA

ET ASPIRATIONES SELECTÆ

pro decursu diei.

Iter facturus.

Recita itinerarium Clericorum , ut habetur in Breviario. In viam pacis , &c.

Horâ tertiâ pomeridianâ.

Recita hanc devotissimam S. Augustini orationem de singulis articulis Passionis Jesu-Christi. Hanc piè recitantibus copiosæ conceduntur Indulgentiæ.

Domine Jesu-Christe , Fili Dei vivi , qui pro redemptione nostrâ nasci & circumcidi voluisti , à Judæis reprobari , à Judâ osculo tradi , capi , ligari , & cum vinculis , Annæ , Caiphæ , Herodi , & Pilato offerri , ac coram eis illudi , colaphis , alapis , flagellis , & arundine cædi , facie velari , sputis conspui , spinis coronari , à falsis quoque testibus accusari , à malis iudicibus judicari , & ut agnus innocens , crucem tuam ferendo , ad victimam duci , clavis perforari , felle & aceto potari , atque in cruce levari , inter latrones deputari , morte turpissimâ mori , & lanceâ vulnerari ; tu , Domine , per has sacratissimas poenas quas nos indigni famuli tui recolimus , & per sanctam crucem tuam , libera nos à poenis inferni , & per-

ducere digneris nos miseros peccatores quò perduxisti crucifixum tecum latronem poenitentem. Qui vivis, &c.

Ante quodlibet opus & exercitium.

O Jesu ! qui universa propter temetipsum operatus es, quique in gloriam tuam creasti me, protestor quòd velim incipere, pergere, & perficere hoc opus in gloriam tuam, & in unione illius divinæ intentionis quâ ipse in terris operatus es; hanc, quotiescumque respirabo, renovare desidero.

O Jesu ! à quo omnis nostra sufficientia est & gloriatio, opus manuum mearum dirige. Huic ergò operi tuam benignus impertire benedictionem, tuâ me semper salva virtute, ut ad tuam justitiam faciendam dirigantur cogitationes meæ & opera.

Oculos & mentem in cælum conjiciens.

O gloriosa civitas ! Quàm gloriosa dicuntur de te ! Quàm sordet tellus dùm te aspicio !

Quàm dilecta tabernacula tua, Domine virtutum ! Quàm magna multitudo dulcedinis tuæ quam abscondisti timentibus te ! Concupiscit & deficit anima mea in atria tua. Beati qui habitant in domo tuâ, Domine ! in sæcula sæculorum laudabunt te. Quis me liberabit de corpore mortis hujus, ut, unâ cum illis, cantem in æternum misericordias tuas ?

Aspiciens Jesum cruci affixum.

O Jesu ! Tu adeò cruentum torcular calcasti solus ? Tu languores nostros solus portasti ? Omnes noti tui fugerunt à te ?

Et ego tibi crucifixo numquàm compatiar ?
 Quì fieri potest ut conglorificer ? Nolo sine
 vulnere vivere , cùm te video vulneratum.
 Doce me , ô Jesu derelictè , non ponere
 carnem brachium meum , & non confidere
 in principibus , in filiis hominum in qui-
 bus non est salus.

O Jesu , flagellis cæse , spinis corona-
 te , clavis confosse , patibulo affixe , op-
 probriis saturate , & morte turpissimâ con-
 demnate ! Ecquandò me fœdissimum pec-
 catorem pudebit ducere in bonis dies meos ,
 vivere secundùm carnem , servire ventri ,
 voluptati , & superbiæ vitæ ? Ecquandò
 crucifigam carnem meam cum vitiis , &
 mortificationem tuam in corpore meo cir-
 cumferam ?

Ecquandò tandem discam à te esse mitis
 corde ? O Jesu ! hoc velle adjacet quidem
 mihi ; perficere autem non invenio. Ad-
 jûva me ut adimpleam quæ defunt Passio-
 num tui.

O Jesu ! pro me crucifixe , propitius esto
 mihi peccatori , & salva me , fons pietatis.

In tentatione.

Vide , Domine , quomodò multiplicati
 sunt qui tribulant me ; multi insurgunt ad-
 versum me ; usquequò exaltabuntur inimi-
 ci mei super me ? Exurge , Domine ; sal-
 vum me fac , Deus meus ; non timebo
 millia populi circumdantis me.

Domine , vim patior , responde pro me ;
 Domine , salvum me fac , ecce pereor ; ne
 inducas me in tentationem.

O defensor vitæ meæ , turris fortitudi-

nis à facie inimici, dic animæ meæ : salus tua ego sum ; si tu es pro me , non timebo mala , quoniam tu mecum es.

In adversitate & afflictione.

O quàm bonum mihi quia humiliasti me , ut discam justificationes tuas ! Igitur , quod bonum est in oculis tuis , supplex oro , facias semper ; paratus sum & non sum turbatus ut bibam calicem quem tu bibisti : non mea voluntas , sed tua fiat. O quanto superabundabo gaudio !

Hinc , gratias tibi libens ago , Domine Jesu , quoniam dignus habeor pati pro te. Scio quia non sunt condignæ passionēs hujus temporis ad futuram gloriam.

Quàmvis sim vir dolorum , opprobrium hominum , abjectio plebis , meritò hæc patiar , quia peccavi tibi ; hîc ure , hîc seca , hîc non parcas , ut in æternum parcas. *S. Aug.*

O Jesu ! Tu scis quàm promptus sit spiritus meus , & quàm infirma caro mea ; nonne tamen es tu patientia & fortitudo mea ? Ergò , si tibi placuerit , adauge laborem ; sed adauge patientiam. Patientia pauperis animæ meæ non peribit in finem , & in patientiâ meâ possidebo animam meam.

O Jesu ! Tu es spes suspirantis animæ meæ ; ideò spero quia secundum multitudinem dolorum meorum in corde meo , consolationes tuæ lætificabunt animam meam. Utinam hæc melliflua verba in hora mortis audire possim : *Jam imber abiit & recessit , surge amica mea & veni , intra*

in gaudium Domini tui.

Audiens aut videns pravaricantes, blasphemantes, &c. corripe eos, si locus sit, aut saltem sic in te tabesce.

O Jesu, summè amabilis ! O Jesu, summè dilectus ! Quomodò fieri potest ut tam parùm diligaris ; quinimò, ut adeò graviter offendaris ? O utinam omnia mundi peccata impedire possem ! Sed cùm id præstare nequeam, & quoniam ubique abundat iniquitas, melius est me mori quàm videre mala gentis meæ & Sanctorum ; malo tibi dilecto mori, quàm tibi offenso vivere ; interim protestor quia continuus dolor est cordi meo quandò audio & video pravaricantes ; non cessabit dolor meus donec transeat populi tui iniquitas.

Tabescere me facit zelus meus, quia obliviscuntur verba tua inimici tui. Exitus aquarum deducant oculi mei, quia non custodiunt legem tuam. Comedat me zelus domûs tuæ & opprobria exprobrantium tibi cadant super me. O nimis felix, si factus ipse reconciliatio, tibi satisfacere queam !

Igitur, inter vestibulum & altare plorabo ; imò jugi & amaro fletu plorabo dicens : *Parce Domine, parce populo tuo ;* continuo plorabo donec audiero hanc dulcissonam misericordiæ tuæ vocem : *remittuntur tibi & populo meo peccata multa.*

Ut autem hanc audire valeam, offero tibi cor contritum & humiliatum : da ergò ut in spiritu humilitatis, & in animo contrito ; suscipiar à te, Domine, pro peccatoribus derelinentibus legem tuam.

Diligo te, ô sancte & totus amabilis Deus; adoro te, Rex meus & Deus meus; ideò ardenter desidero ut sanctificetur nomen tuum; ideò cupio anathema esse pro fratribus meis; ideò usque ad novissimum spiritum docebo iniquos vias tuas, ut impij ad te convertantur.

Quis mihi det ut, quoad vixero, crucier sicut Job, & tristis sim ac pro justitiâ agoniser usque ad mortem, & quidem exemplo tui, ô Jesu mi, qui videns civitatem flevisti super illam, & qui mortuus es ut Deo Patri pro nobis satisfaceres? Hanc ab amantissimo & amarissimo corde tuo spero amaritudinem. O quàm benè reposita est spes mea!

Ante Crucem pertransiens.

O Crux, ave, spes unica, &c. Adoramus te, Christe, & benedicimus tibi, quia per Crucem tuam redemisti mundum.

O Jesu! Quis mihi tribuat ut tibi confixus sim Cruci, & in amplexu tuæ Crucis moriar? Tu solus. Da ergò ut sitiam Calicem tuum, & ut illum lætus bibam.

Ante cæmeterium transiens.

O Jesu, protector in te sperantium! O Deus totius consolationis! Te revelante, scio quia sancta & salubris est cogitatio pro defunctis exorare ut à peccatis solvantur, & non esse superfluum orare pro mortuis; ergò memento, quæso, congregationis tuæ quam possedisti ab initio, & animas pauperum tuorum ne obliviscaris in finem.

O Jesu! vide afflictionem earum quam ante te pronuntio. Ecce clamant ad te de

profundis : exaudi vocem meam. Educ eas in refrigerium , & per misericordiam tuam requiescant in pace.

XXI. Visitatio Christi in Eucharistiæ Sacramento. Vide hujus visitationis praxim , pag. 266.

XXII. Recitatio Matutini & Laudum pro crastinâ die.

XXIII. Brevis recollectio mentalis , recitatio Rosarii Beatæ Virginis Mariæ , cœna , & animi relaxatio.

Oratio vespertina.

Hæc Oratio eadem est ac matutina ; attamen conscientiæ discussio debet esse & proluxior & strictior. Exemplum sume à nummulariis & mercatoribus , seriò quotidie explorantibus quid lucrentur , quidve amittant. Undè fit verum istud : *Filii hujus sæculi prudentiores filiis lucis in generatione suâ sunt.* Luc 16. Nùm illud tolerandum est quòd ipsi Sacerdotibus sapientiores sint.

Ergò , charissime Frater , examina & explora sinus & latebras conscientiæ tuæ ; eoque , totius diei decursum repete ; ubi fueris , quibuscum egeris , quid cogitaveris , dixeris , feceris , expende ; sed memento , pro ratione sublimis statûs tui & formidandi ministerii tui functionum , examen instituere ; sic facile , quid commissione , quid omissione peccaveris , agnosces. Item , quid in exercitio virtutis N. tibi magis necessariæ , quid in exterminatione vitii N. tibi magis infesti , profeceris , dispice , &c.

Verùm , ô quàm temerarius esses , si ,
offenso & non reconciliato Deo , te nocti
& somno credere auderes ?

*Post Orationem vespertinam , reflexio &
aspiratio pro crastinâ Communione.*

Hodiè , scito , anima mea , quia veniet
Dominus , & manè videbis gloriam ejus.

Crastinâ die delebitur iniquitas mea , &
regnabit super me Salvator mundi in quo
sibi Pater benè complacuit.

O Jesu , requies mea ! irrequietum est
cor meum donec requiescat in te ; undè
jam te in nocte desiderat anima mea.

Veni ergò , dilecte mi , veni , & jam
me nemo despiciat. Credo , Domine , sed
credam firmiùs : spero , Domine , sed spe-
rem securiùs ; amo te , Domine , sed amem
ardentiùs : doleo , Domine , sed doleam
vehementiùs ; munda cor meum , ampliùs
lava me , ut corpori tuo merear incorpo-
rari.

*XIX. Deindè , ante imaginem Crucifixi
provolutus , vel eam præ manibus tenens ,
sic mortem accepta.*

O Jesu ! qui vitæ & mortis potestatem
habes , tu scis quia forsan hâc nocte animam
meam repetent à me ; idcirco jam hodiè
voluntariè sacrifico tibi vitam meam , quia
in gloriam tuam creasti eam ; ita , Pater ,
non mea voluntas , sed tua fiat.

Volo mori , quia statutum est omnibus
hominibus semel mori.

Volo mori , in gratiarum actionem pro
omnibus quæ retribuisti mihi.

Volo mori ut faciam secundùm exem-

plar quod mihi in monte monstratum est.

Volo mori, quia ubique video prævaricantes, & quia ego ipse in multis te singulis diebus offendo; moriatur anima mea, ut jam non amplius peccem tibi, & ut in sæcula sæculorum laudem te.

Volo mori propter te, qui prior dilexisti me, & animam tuam posuisti pro me.

Volo mori in sacrificium justitiæ & satisfactionis, ac in spiritu humilitatis, quia dilexi mundum, & exhibui omnia membra mea servire immunditiæ & iniquitati.

Verum, ô Domine Jesu, da ut moriatur anima mea morte justorum, & ne permittas sanctum tuum videre corruptionem,

Credo, Domine, adjuva incredulitatem meam; in te, Domine, speravi, non confundar in æternum; diligo te, Domine, dilecte mi, & Deus cordis mei.

Heu mihi! Tibi soli peccavi! Sed poenitet me peccasse propter te, ô totus amabilis. Cupio emendare quod feci, & redimere peccata mea.

Diligo proximum meum sicut meipsum, & inimicos meos propter te, qui toties ignovisti mihi.

O Jesu! Judicia tua abyssus multa, & terrores tui conturbant me; sed hoc tuum caput inclinatum, hæ tuæ manus expansæ, hoc tuum cor apertum, hoc totum tuum corpus vulneribus fauciatum & sanguine conspersum certam spem faciunt mihi & misericordiæ & gloriæ tuæ.

O Jesu! Spes & portio mea in terrâ viventium, non confundas me ab expectatione meâ.

Veni ergò, Domine Jesu ; in manus tuas commendo spiritum meum ; redemisti me , Deus veritatis ; operi manuum tuarum porriges dexteram. Suscipe spiritum meum , dulcissime Plasmator & Redemptor mi ! Et misericordias tuas in æternum cantabo.

Maria , mater gratiæ , mater misericordiæ , monstra te esse matrem , ac me in horâ mortis suscipe.

Occurrite , Angeli Domini , suscipientes animam meam , offerentes eam in conspectu Altissimi.

XXV. *Lectio punctorum Meditationis pro crastinâ die.*

XXVI. *Exuens vestes , cogita quomodo te separabit amara mors à rebus omnibus. Nudus egressus es , nudus reverteris. Sola opera tua sequentur te ; quid tibi tunc proderit divitiarum jactantia ? Ex his disce uti moderatè mundo , tamquam non utens , & quærere primum totis viribus regnum Dei.*

Aspiratio congruens.

O Jesu ! qui vestibus exutus , nudus pro me in Cruce pependisti , & mortuus es , expolia me veterem hominem cum actibus suis ; discam à te & à Discipulis relinquere omnia , ut sequar & possideam te , ô Deus hæreditatis meæ , & portio mea in terrâ viventium.

XXVII. *Iniens lectum , sic te ad somnum compara , ac si quis auri insusurret : hæc nocte animam tuam repetent à te. Quid enim est ipse somnus , nisi frater & imago mortis ? Hæc igitur tecum cogita & meditare.*

Heu ! Læctus iste , mortis memoriam mihi jam ingerit , in quem , velut in sepulchrum nuda membra repono. Hei mihi ! subter me tandem sternetur tineæ , & operimentum meum erunt vermes. Horrendum discrimen !

O quàm multi dormientes jucundè somnum suum , descenderunt è lecto in infernum viventes ! O miserum me ! Nonne & ego idem periclitor ?

Dominus ac Magister meus Jesus in oratione pernoctavit , & tandem in arâ Crucis pendens , vir dolorum occubuit super lectum doloris sui. Multi ex Electis suis , post diurna & nocturna exercitia , & quidem asperrima , brevem somnum super nudo tabulo & humi carpsērunt ; at ego peccator , molliter cubo ! At ego , totâ die otia tus , vix vesperi precatus Deum , lascivio in strato meo ? Proh pudor ! Ecquandò saltem stratum ac lectum meum lachrymis meis rigare satagam ?

Aspiratio.

Domine Jesu ! illumina oculos meos , ne umquàm obdormiam in morte , nequandò dicat inimicus meus : prævalui adversus eum. Jam ex nunc abrenuntio ejusdem Diaboli nequitiis & suggestionibus. Undè , te miserante , in pace dormiam & requiescam.

O Jesu ! rogo te ut dùm ego dormiero , vigilet cor meum ; custodiant me Angeli tui , quibus mandasti de me ut custodiant me in omnibus viis meis. Protestor quòd dùm ego dēdero somnum oculis

meis, velim te adorare sicut Angeli tui in cœlo, & quòd offeram tibi eorum adorationes; simul & orationes, lachrymas, & flagellationes tot fervorum tuorum, qui inter hæc exercitia multam noctem insomnem agunt. O Jesu, cui omne cor patet, & omnis voluntas loquitur, accipe hoc desiderium & oblationem cordis mei, ut totâ die & nocte non taceam laudare nomen tuum.

Tandem obdormi in suavissimo Jesu-Christi corde; ubinam tutior & securior es? Munias ipse cor tuum aliquâ piâ cogitatione contra tenebras inferni & phantasmata Diaboli; & certè, pia cogitatio nocte in corde condita; est instar seminis sacri, quod manè germinat, reflorescit, & fructificat. Et sicut is qui vesperi carbones cineribus tegit, tantò faciliùs manè, cùm exurgit, focum potest exsuscitare; ita qui cum piâ consideratione vesperi incumbit, manè faciliùs fervorem in se potest accendere: reliquæ enim cogitationis nocturnæ statim incipiunt agere diem festum Domini.

Si per noctem expergiscaris, mentem in Deum eleva, renovando piam cogitationem nocte in corde conditam, aut emittendo ex intimo corde, si Spiritus spiret, jacula amoris, &c. ut semper ardeat cor tuum, ac ferveat pietatis opus.

Hæc sunt exercitia quotidiana, quibus si benè usus fueris, dies plenos semper invenies in te; & consummatus in brevi, explebis tempora multa.





CAPUT OCTAVUM.

Exercitia menstrua.

ARTICULUS I.

Recollectio unius diei.

PRæcipuum exercitium, est menstrua unius diei specialis recollectio, quâ renovetur animus, & quâ præsertim totius mensis defectus ad tribunal mentis vocentur, eorumque radices investigentur; & contra occurrentes difficultates animus obfirmetur. Prætereà, facilius forsan erit & utilius quibusdam Clericis, menstruæ unius diei recollectioni vacare, quàm annuæ per octiduum.

Charissime Frater, te per viscera misericordiæ obsecramus ut huic recollectioni totus intendas; nam si animæ tuæ præesse nescis, quomodò Ecclesiæ Dei, in quâ te Spiritus Sanctus posuit, diligentiam habebis? Hunc tandem teporem qui animum tuum adeò constrictum tenet, viriliter excutere opus est. An velles te ad negotia secularia, ad otium, ad nugas & fabulas, per totam vitam convertere? Absit tandem hæc torpida & protracta nimis oscitatio, vomitum Dei provocans, & secundæ mortis prænuntia.

Documenta ad hanc recollectionem per-

utilia , supra insinuavimus tibi , pag. 257. Praxim autem & methodum hîc obiter , sed prolixius in Præparatione ad mortem , huic recens adjunctâ volumini , aperto & libenti corde tibi exhibuimus. Quam ergo habes allocutionem ?

Quòd si huic divino exercitio nullatenus vacare queas , saltem per unam duasve horas unius ex singulis mensibus diei , in discutiendâ conscientîâ tuâ districtius viriliter incumbere.

Ut autem huic in temetipsum inquisitioni , & huic menstruæ omnium actionum discussioni accuratius studeas , hæc divina oracula seriò tecum recogita.

Omnes nos manifestari oportet ante tribunal Christi. 2. Cor. 5. Quâ horâ non putatis , Filius hominis veniet. Luc 12. Redde rationem villicationis tuæ. Ibid. 16. Cui multum datum est , multum quæretur ab eo. Ibid. 12. Scrutabor Jerusalem in lucernis. Soph. 1. Horrendè & citò apparebit vobis quoniam iudicium durissimum his qui præsumunt fiet. Sap. 6. Arguam te & statuam contra faciem tuam. Ps. 49. Cum accepero tempus , ego justitias judicabo. Ibid. 24. Nihil est opertum quod non revelabitur , & occultum quod non scietur. Matth. 10. Si justus vix salvabitur , impius & peccator ubi parebunt ? 1. Pet. 4. Arescent homines præ timore. Luc 27.

Harum clangore tubarum , & tot tantorumque oraculorum tonitru excitatus & ter-ritus , teipsum ante iudiciam interroga , & in conspectu Dei invenies propitiationem. Eccli. 18. Nam si temetipsum dijudicaveris :

non utiquè judicaberis 1. Cor. 4. Igitur, dum tempus est miserendi, in te tanquam severissimus judex sæviens, *statue tibi speculum, pone tibi amaritudines, dirige cor tuum in viâ rectâ.* Jer. 31. *Scrutare vias tuas, & revertere ad Dominum.* Thren. 3. Ipse Dominus miserator & misericors, qui non vult mortem peccatoris, & qui facienti quod est in se, vi prioris gratiæ, non denegat ulteriores, uberiores, & validiores gratias, faciet tecum misericordiam. Consolare in verbis illis. Ecce tibi hujusmodi discussionis praxim.

A R T I C U L U S II.

Reflexiones de statu conscientiaë, frequenter per vitam, aut saltem singulis mensibus faciendæ.

SANCTUARIUM Dei possideo, Minister Christi sum, & mysteriorum Dei dispensator, &c. Honor sublimis! Sed heu! formidandum onus! Sum Sacerdos in æternum; hoc verum est; verum character hic indelebilis quo insignitus sum, erit mihi in æternam gloriam, an in sempiternam ignominiam? In hanc tamen, vel illam, cadam necesse est. O quantum periclitor!

Quis me vocavit? An Pater cœlestis? An caro & sanguis?

Quomodò intravi? An per verum ostium? &c. An veste nuptiali indutus, an vitiis fœdatus? &c. Quo fine intravi? O inscrutabile cor meum! O infelix ego homo!

homo ! timor & tremor veniunt super me.

Tot abhinc annis quibus Sanctorum terram occupo, quomodo vixi ? Heu ! confusio faciei meae cooperit me. Quomodo vivo ? Væ ! Servus inutilis sum. Væ ! væ ! In terrâ Sanctorum iniqua gero ; millia sanctitatis quotidie elabi fino ; non modo non progredior ; sed in dies ipsis laicis deterior fio. Proh pudor !

Nûmq̃uid sum ad mortem paratus ? Heu mihi ! Qui essem ad mortem paratus , si ad hoc grande opus me serio exercere nondum didicerim ? Moriar tandem ; dies mei numerati sunt , & præteriri non possunt ; sed , si talis vita , finis ita , ubi parebo ? Respondeat cor meum.

Quale est cor meum contra peccatum mortale , præsertim contra superbiam , avaritiam , & luxuriam , contra hos tres infensissimos Clericorum hostes ? Qui offendit in uno , factus est omnium reus. Nonne alicujus , in uno saltem puncto , me conscium sentio ? Annon in falsam , imprudens , cecidi conscientiam ? O quantæ tenebræ ! Quoties lux inter tot tenebras luxit , & tenebræ eam non comprehendunt ? O in quam profundam me demergam abyssum !

Quale est cor meum erga peccatum veniale ? Nûm adhuc adhæreo huic vitio quo tandiù laboravi , & quo contristavi Spiritum Sanctum ? Quem conatum adhibui , ex præteritâ Confessione , ut illud ex corde meo extirparem ? Heu ! Nullum. Hoc mea mihi objicit conscientia. O igitur

tur irrisor, & non pœnitens !

Nonne proprio abundans sensu, reputo adhuc tanquàm levia, delicta quæ in Clericis, juxta pondus Sanctuarii, & Trid. maxima sunt ? O periculosa cæcitas mea !

Contendo conciliare conscientiae meae hanc optatissimam pacem quæ exuperat omnem sensum ; hoc quidem velle videor ; sed nolo, piger. Undè, infelix, hanc non habeo pacem ? Quare ? Quia non est pax in terrâ nisi hominibus bonæ voluntatis. An semper dies meos inter velleitates & Dæmonum dolos agam ? O effrons socordia mea ! Quò se feret ? Quò me ductura est ? Divina me terrent oracula ; sed heu ! Quàm parùm me ad teporem excutendum, & ad fructus sanctitatis dignos excitant ? Nonne ergò desideria mea, quibus illudor, me tandem occident ?

Acquiesco carni aut sanguini ? Distraho, propter consanguineos, res Ecclesiasticas quæ Dei sunt ? Si mei non fuerint dominati, & pauperes sint, tunc immaculatus ero ; si verò divites, periclitor.

Militans Deo, & in sortem Domini vocatus, implico me negotiis sæcularibus ? Nùm advocavit me à divinis, & dedit me populis contemptibilem hæc fœda sollicitudo, aut turpis aliqua negotiatio ?

Cuinam conformor ? An huic sæculo ? An imagini Filii Dei ? Si mundo, certè cum hoc mundo damnabor ; si Christo, prædestinandus sum : eligere meum est. Ecquid ? Renuntiasse mundo, & diligere mundum & ea quæ in mundo sunt ? Induisse

Christi characterem , & non induere ejus humilitatem , mansuetudinem , paupertatem , &c. ? O monstruosa res ! O certum reprobationis signum ! Quæ mea mens ?

Quale est cor meum erga munia & onera ministerii mei ? O quàm strictam de his reddam rationem ? An hoc recogito corde ?

Quomodò psallo in conspectu Angelorum , & tracto divina mysteria , quorum dispensator sum ? An usu , an affectu ? An purâ intentione , an torpidâ ? An sanctè & ferventer , an tepidè & perfunctoriè ? An vero , an ficto animo ?

Quomodò me gero ante celebrationem Missæ , in ipsâ celebratione , & post celebrationem ? Quomodò in choro ? Absum ab eo justâ causâ , an fraudulentâ ? Paveo ad sanctuarium Dei juxtâ eam quæ illud decet sanctitudinem ?

Quomodò tempus adeò pretiosum contero ? An ludis , aleis , choreis , comestationibus , somno , consortiis , fabulationibus , nugis , &c. illud consumo ? An studio & scientiæ casum conscientiæ , Canonum , Rubricarum , & aliis ministerii mei muniis ? Sunt omnes dies mei mali , an boni ? Quem fructum haurio ex fontibus Salvatoris , ex diebus salutis , & ex hoc acceptabili tempore ?

Nonne otio & ignaviâ marceo , ac ignorantia laboro ? Quis fuit , quis est illius otii , ignaviæ , & ignorantiae effectus ? Illum Deus scrutabitur , & forsan ad meam confusionem.

Incumbo strenuè & viriliter perfectioni

meæ ? Reverà , quale est cor meum circa exercitia spiritualia ? An jucunda mihi sunt , an molesta ? Impendo libenter meditationi , lectioni , & examini ? Delector sacrâ animi recollectione ? Studeo mortificationi sensuum , & propriæ voluntatis abnegationi ? Cogito frequenter & piè de Deo ? Complaceo mihi in Jesu , Deo & salutari meo , ac inter boni testimonii viros & Clericos ? Quâ alacritate inspirationibus Dei ad perfectiora vocantis respondeo ? Nonne hæc pia exercitia , eorumque unctiones fastidio , quia horum usum non habeo ? Quid redolet illud fastidium ? Hæc pia opera ad Religiosos , ad Moniales , & ad devotum foemineum sexum fastidiosus remitto , quasi ego sanctus non essem , quasi his ego adminiculis , medias inter mundi illecebras , & fragilis homo , non egerem. O vita tepida ! O periculosa febris ! O lues populo infesta ! Nonne tamen sum ego ille vir tepidus , ab ore Dei jamjam evomendus ? Opera mea me manifestum faciunt. Quid tandem facere volo ?

Quo zelo inardesco erga animas mihi commissas , pretioso sanguine Agni immaculati redemptas , & quarum sanguis de manu meâ est requirendus ? Sum Pastor bonus , an mercenarius ? Nonne idolum Pastoris sum ? Væ mihi ! Si res ita sit , bonum mihi erat si natus non fuisset.

Et verò , quo fervore instruo & corripiam populum ? Quâ benignitate rudes & infantes catechiso , convolo libenter ad tribunal pœnitentiæ , quotiescumque saltem

desideror ? Quomodo me gero inter audiendas Confessiones ? Sum severior , an indulgentior ? O detestandum monstrum , si , occasione Confessionis , ad venerea me & pœnitentem allicerem ! O lupe rapacissime , si compartem & complicem ad pedes meos absolvendam cogerem ! An decet hæc inter Sanctos nominare ? Pudet nos hic dicere quod nonnullos facere non pudet.

Quos in usus impendo partem fructuum Beneficii , honestæ sustentationi superfluum ? An in pauperes , & in alios pios usus ; an in luxum , ludum , comestationem ; in parentes divites , &c. Heu mihi , si pauperes , quos occidero quia hos non pavero , stent in magnâ constantiâ adversum me ! Nonne stabunt condemnantes me ? Quoties tamen contigit ut hanc rerum Dei dilapidationem nec quidem confessus fuerim ? Super quem descendet hæc tremenda nimis sententia : *Discedite à me , maledicti , esurivi* , &c ? Ipse viderim.

Quâ animi alacritate agonisantes adeo , ut eos in hoc tempore malo adjuvem , & ad portum salutis æternæ dirigam ? Quoties , hujus pietatis officii ministerio meo annexi , me tæduit ? O simulachrum Pastoris ! Nûmquid ergò darem animam meam pro ovibus meis , si in summo periculo versantibus , pedem unum dare nolim ?

Studeo in visceribus Christi omnibus omnia fieri , ut omnes salvos faciam ?

Incumbo in cætera ministerii mei munia , juxta Concilii Tridentini Sanctiones.


Si sim Syndicus , aut Præpositus Capituli , aut alicujus Communitatis Ecclesiasticæ , præsum verbo & exemplo , curo ut omnia fiant honestè & secundùm ordinem ? In hoc tamen positus sum. Do operam ut jura omnia servantur ? &c. Nonne fui forsan perjurus ? &c.

Denique provideo novissima ? Dijudico meipsum ? Habeo in mente annos æternos ? Descendo in infernum vivens ? Vigilo ? Habeo semper lucernas ardentes in manibus meis ? Si nunc animam meam repeterent à me , ubi parerem ? Quo irem ? ...

Heu tibi ! charissime Frater , timor & tremor non veniunt super te , ubi Hilariones & Hyeronimi timuerunt valdè ? Verè timor Domini non est ante oculos tuos.

His & aliis animo recogitatis , si cognoscas te profecisse , gratias age Deo à quo descendit omne donum optimum , & qui dedit tibi victoriam per Jesum-Christum. Si verò sentias te defecisse , cave ne animo concidas ; vide in quo peccaveris ; scito quid desit tibi , & erubescens , pœnitentiam age , resipiscere stude , remedium adhibe , alacrius labora sicut bonus miles Christi ; persequere fortius inimicos tuos , neque convertaris donec deficiant ; avidius negotiare dùm venit judex ; sanctius ac plenius transige tempus , dùm tempus habes. Væ tibi ; charissime Frater , si hodiè audiens vocem Domini , obdures cor tuum.





CAPUT NONUM.

Exercitia annua.

I. **P**Ræter recollectionem mensuram unius diei, expedit ut annuam, sex vel octo dierum, instituas, quò venturi sæculi veritates in animum altius descendant tuum, & quò efficacius ad puritatem conscientiæ, ad unum necessarium, & ad pretiosam Sanctorum mortem intendas. Pro quâ recollectione eligere potes ex isto libro, vel ex aliis, documenta & exercitia quæ statui tuo tuæque devotioni magis congruent.

II. Consulimus tibi generalem totius anni confessionem, in quâ recogitans in amaritudine animæ tuæ omnia peccata omnēsque defectus, securius novissima providebis; gaudium in cœlo, & tuæ conscientiæ pacem ac serenitatem paries.

III. Ultimâ anni die, recita in spiritu humilitatis & animo contrito, Psalmos Poenitentiales; & factus pro te & pro populis reconciliatio, exerce aliquam mortificationem viribus tuis, statui tuo, & Confessarii consilio congruentem, in expiationem tuorum & alienorum peccatorum, & ad bonorum opèrum ferventiolem, per annum sequentem, efficaciam assequendam.

IV. In principio anni, elige unum ex

tuâ professione Sanctorum , quem Patro-
num & Ducem fideliter singulis anni die-
bus adhibebis.

V. Præfige tibi unum particulare & ra-
dicale vitium , cui , utpotè infensissimo tuæ
perfectionis hosti , bellum per totum an-
num inferes , nec convertaris donec defi-
ciat ; eodem fervore virtutem huic vitio
contrariam alacriter exerce. Verùm , forti-
tudinem Jesu Christi qui vicit mundum ,
quique nova omnia fecit , ad te semper
sollicitus custodi.

VI. In anniversario Baptismi , renova
tuam mundo renuntiationem , fidei profes-
sionem , & pacta quæ spondidisti Domino
Jesu , cui in eodem Baptismo consepultus
es.

VII. In anniversario tuæ ad Sacerdo-
tium promotionis , resuscita gratiam quæ
data est tibi per impositionem manuum Pres-
byterii ; renova pariter votum castitatis ,
tuamque Deo consecrationem ; da operam
ut renoveris spiritu mentis tuæ , & ut cres-
cas de die in diem in illo qui est caput
Christus , qui quidem videns bonam volun-
tatem tuam , admirabiles ascensiones dispo-
net in corde tuo.

VIII. Lege quotannis Ritus & Rubricas ,
simul & Canones ac Statuta quæ ad te spec-
tant.


IX. Mysteria Jesu-Christi & Beatæ Vir-
ginis Mariæ , ac festa Sanctorum per annum
occurentia , celebrare contende juxtâ in-
tentionem & in unione sanctæ Ecclesiæ , &
piorum hominum praxim. Eandem devo-

tionem, si locus sit, cæteris suggerere decet.

X. Elige unum peculiarem diem quo largiores eleëmofynas in finu pauperum concludes, & de his, præsertim verecundis, catalogum institues, ut eos in necessitate, vel per te, vel per alios misericordiæ viros protegere, eisq̃ue opitulari possis.

Si sis animarum Pastor, institue singulis annis, aut saltem altero quoque anno, alium catalogum eorum qui juxta tuam prudentiam instruendi sunt ad primam communionem, quos totâ animi attentione, totoque cordis affectu ad hoc grande opus, ex quo interdum pendet totius vitæ recta directio, exercebis. Quid statui tuo congruentius? Quid Deo jucundius agere vales?

*Omittimus hîc consultò alia pia exercitia
tùm tibi, tùm aliis ad fervorem augendum &
fovendum utilissîma, & quæ per anni cursum
adhibere licet. Ama Deum, & fac quod vis;
ejus Spiritûs unctio tibi plura suggeret quàm
omnes libri.*



CAPUT DECIMUM.

*Modus peragendi bonum honestè, sanc-
tè, & dignè Deo.*

Quid prodest hanc regulam sequi, & quodcumque agere bonum, si id non fiat juxtà voluntatem Dei, & secundùm beneplacitum Christi? Undè, quàm multi erunt, qui post mirabilia facta, dicent;

P v.

quare jejunavimus & non aspexisti ? Humiliavimus animas nostras , & nescisti ? *Nescio vos* , eis terribiliter respondebitur ; ipsismet obsequiis vestris *inhonorastis me*. Cave tibi , charissime Frater. Quapropter sequentia adjuncta , cum omnibus operibus tuis conjunge.

ARTICULUS I.

Fervor.

Domino serviens , da operam ut spiritu fervens sis , in unione illius fervoris quo Dominus Jesus exultavit ut gigas accurrendam viam. Si interdum cor tuum derelinquat te , deficiat spiritus tuus , & dormire videatur anima tua præ tædio & nausæâ , his in angustiis , oculos conjice in Jesum , qui factus in agoniâ , victor tamen fui , oblatus est quia ipse voluit. Hoc exemplo confortetur cor tuum , & delectare in Domino qui hilarem datorem diligit ; aut saltem , scuto bonæ voluntatis munitus , hanc illi offer angustiam in unione ejus angustiae ; & hæc orabit & operabitur pro te.

Vis , charissime Frater , omnem animi excutere teporem ? Cogita te Regi regum & Domino dominantium servire ; maledictum eum appellari qui facit opus Dei negligenter ; sic intende operi quod hîc & nunc faciendum est , quasi nihil aliud faciendum incumberet ; attende illud antiquum monitum : *Age quod agis* ; omnia tempus habent , sufficit diei malitia sua ; sic in parti-

culari opus tuum perage , quasi vitæ tuæ ultimum esset ; undè illud Bernardi monitum : *In omni opere dicat sibi : si modò moriturus esses , faceres istud ?*

ARTICULUS II.

Devotio interna.

DEus spiritus est ; omnis gloria filiae Regis ab intus. Igitur , honora Dominum non labiis tantum , verbo , & linguâ , sed corde ; adora eum in spiritu & veritate , ut sis verus adorator , & des fructum in omni tempore.

Absit tamen ut negligas ceræmonias & mortificationes exteriores ; his enim Deus colitur & placatur , elevatur mens , & ædificantur fideles , quia invisibilia Dei , per ea quæ facta sunt , intellecta conspiciuntur. Prætereà animâ & corpore constans , nonne æquum est ut hæc & istud obsequium Deo præstent ?

Ut autem in omnibus servias Domino in justitiâ & veritate , stude recollectioni internæ , evacua à rebus omnibus mentem tuam , maximè ante orationem & quodcumque exercitium spirituale. Quapropter Sancti , ante orationem , conabantur exuere se ab omni cogitatione rerum externarum , soliusque Dei memoriam corde gerere. Sic de Sancto Francisco traditur , cùm Ecclesiam oraturus ingrederetur , solitum dicere : *Manete hic cogitationes meæ donec egrediar ;*

& ubi opus Dei implevero, si indigeam vobis, iterum vos assumam.

Eodem modo se hortabatur S. Bernardus, ante orationem dicens: *Intentiones, cogitationes, affectiones, & omnia interiora mea, venite, ascendamus ad montem, ubi Dominus videt & videtur; curæ & sollicitudines, anxietates, pænæ, servitutes, expectate me cum asino isto corpore, donec ego cum puero, intelligentiâ scilicet & oratione, usque illuc properantes, postquam adoraverimus, revertamur.*

Si inter sacras actiones distraharis, placidè mentem recollige, adama solitudinem, devotioni inernæ congruentem; idque exemplo Christi, qui, dimissâ turbâ, ascendit in montem solus orare; vespere autem facto; solus erat ibi. Quod si medios inter labores, medias inter turbas, orare & adorare debeas, fac tibi solitudinem in corde tuo, ut Sancta Catharina Senensis, & ut S. Franciscus Xaverius; & da operam ut, dum mens attendit exercitiis spiritualibus, cor repleatur devotionis pinguedine & fructu.

ARTICULUS III.

Puritas intentionis.

OMne quodcumque aut in verbo, aut in opere facis, omnia in gloriam Dei fac, non quærens placere hominibus, sed Deo qui est principium & finis. Hanc puram intentionem placendi Domino, renovare

opus est vespere, manè, meridie, in principio & decursu cujuslibet operis. Si oculus tuus sit semper simplex, totum corpus semper lucidum erit, sine intermissione orabis, ac consummatus in brevi, explebis tempora multa; & quàmvis sis in pauca fidelis, thesaurifabis tibi thesauros in cœlo, maxime si omnia opera facias in unione intentionum & meritorum Christi Jesu, à quo omnis nostra sufficientia est & gloriatio. Quòd si, cupiens videri ab hominibus, quæras gloriam tuam, quamtumvis vir divitiarum, cum dormies somnum tuum, in manibus tuis nihil invenies, etiamsi jejunaveris, daemonia ejeceris, ac in mundo mirabilia magna feceris; audies procul dubio illud formidabile verbum: *nescio te, jam mercedem accepisti.* Elige.

ARTICULUS IV.

Ordo temporis & actionum.

QUæ à Deo sunt, ordinata sunt. Deus omnia fecit in pondere, in numero, & mensurâ. Omnia secundum ordinem fiant; ordo ducit ad Deum *S. Aug.* Igitur, ordinem sequere, quoad ejus fieri poterit, toto vitæ tempore; observa tempus cuilibet actioni destinatum simul & consentaneum; observa pariter locum aptiorem, secundum beneplacitum Christi; hâc enim temporis, loci, & modi observatione, Deus, qui bonorum nostrorum non indiget, magis delectatur quàm ipsâ actione. Fidelis sermo,

acceptione dignus ! Quis placere Deo , quis thesaurizare sibi in coelo thesauros singulis momentis non properet ?

ARTICULUS V.

Perseverantia in bonis actibus.

DOminus , cui servis , idem ipse est & non mutatur. Christus , & heri , & hodiè ipse & in sæcula. Qui perseveraverit usque in finem , hic salvus erit. Quapropter , fidelis sis usque ad mortem. Et quoniam militia est vita hominis super terram , necesse est ut , insurgentibus undiquè difficultatibus , jugiter & fortiter resistas.

Igitur , hoc seriò considerandum est , perfectionem tuam in hoc consistere , ut quod justum est justè persequaris , & ut actiones , præsertim ex officio & ex vocatione tibi incumbentes , perfectè & constanter obeas. Si rem grandem diceremus tibi , certè facere deberes ; quantò magis quia nunc dicimus tibi ; *in pauca tui muneris fidelis sis ?* Si in hoc modico iniquus sis , nonne inexcusabilis es ? Arduum quidem opus est , sed Deus impossibilia non jubet ; sed jubendo , monet & facere quod possis , & petere quod non possis , & adjuvat ut possis. *Trid.*

Contende , charissime Frater , adeò honestè & perfectè omnia opera tua facere , ut proportionem servatâ , de te dicatur quod & de Christo Jesu : *benè omnia fecit.* Si omnia vel minutissima , dignè Deo , sanctè , or-

dinatim, & constanter opereris, particula boni diei non præteribit te, dies pleni invenientur in te, morieris plenus dierum, erit mors tua pretiosa in conspectu Domini; poteris tandem sic in Domino gloria-ri: *Domine, quinque talenta tradidisti mihi, ecce alia quinque superlucratus sum.*

Hoc est omnis homo; cætera, vanitas & afflictio spiritûs. Dic ergò: *Nunc capi, hæc mutatio dexteræ Excelsi.*

CONCLUSIO HUIUS REGULÆ;

ET ADSACERDOTES EXHORTATIO.

EN, Genus electum, regale Sacerdotium, Gens sancta, & Populus acquisitionis, en Regula Cleri, & ad vitam via. Iterum dicimus: *Quicumque hanc Regulam secuti fuerint, pax super illos & misericordia.*

Comedite ergò istud volumen, hoc conferentes in corde vestro; ut abnegantes impietatem & secularia desideria, sobriè & justè & piè vivatis in hoc sæculo, expectantes beatam spem, & adventum gloriæ magni Dei & Salvatoris nostri Jesu-Christi. Hæc omnia facientes, & vosmetipsos salvos facietis, & eos qui vos audient.

Pax, quæ exuperat omnem sensum, custodiat intelligentias vestras & corda vestra in Christo Jesu; ita ut, in charitate radicati, & in fide confirmati, abundetis & crescatis per omnia in illo qui est caput, Christus. Si Laïci, imò & Fratres vestri

detrahant vobis quoniam bonitatem & viam arctam sequimini, vestramque derideant simplicitatem, viriliter agite, & confortetur cor vestrum; hi enim quaecumque ignorant blasphemant. Date operam ut nemo vos seducat inanibus verbis; quin etiam, qui sanctus est, sanctificetur adhuc.

Memineritis eos tantum salvos fieri qui usque in finem perseveraturi sunt. Sic ergo currite ut comprehendatis, ne jure in vos jaciatur istud: *hic homo coepit aedificare, & non potuit consummare; hic est filius Ephrem, qui intendens & mittens arcum, conversus est in die belli.* Quid Judæ proditori benè incepisse profuit? Discite, hoc exemplo, fideles esse usque ad mortem, & dabitur vobis corona vitæ. Nos verò confidimus quidem hoc ipsum, quia qui incepit opus bonum, perficiet usque in diem Christi Jesu. Sed & vos cavete ne vobis ipsis sapientes, gratiam Dei in vacuum recipiatis; efficiamini verò sicut parvuli, ut vos exaltet in tempore visitationis; & cum ille apparuerit Princeps Pastorum, percipietis hanc immarcessibilem gloriæ coronam. O nimis beati!

Utinam, Fratres charissimi, sustineatis modicum quid insipientiæ nostræ; non ut confundamus vos hæc scripsimus; sed monuimus tantum, ut, cum sitis Ministri Christi, fiatis conformes imagini ejus; & ut, sicut ille ambulavit, ita & vos ambuletis.

Eia ergo, benedicite incessanter Dominum omnes vos qui statis in domo ejus,

ut ipsimet Laici in vestrum odorem bonum currentes, laudent pariter & benedicant Dominum in omni tempore.

Attamen, cùm feceritis omnia quæ præcepta sunt vobis, dicite: *servi inutiles sumus; quod debuimus facere, fecimus; non nobis, Domine, non nobis, sed Nomini tuo da gloriam*; quandò enim ipse Deus coronabit merita nostra, dona sua ut rectè loquitur D. Augustinus coronabit. Quis non humiliet se? Quis non det gloriam Deo, ut ejus misericordiam in æternum cantare possit?

Dominus noster Jesus-Christus, qui est fons omnium bonorum, tales faciat Sacerdotes quales descripti sunt. D. Thom.

PROTESTATIO

Auctorum.

HOc opus de Regulâ Cleri & subsequens de Præparatione ad mortem, animosque nostros judicio & censuræ Romanæ Ecclesiæ Ecclesiarum Matri & Magistræ, Ecclesiæ Dei vivi, columnæ & firmamento veritatis, humiliter, devotè, & sincerè, ac eidem Ecclesiæ usque ad mortem in omnibus obediens, subjicimus.

SIMON SALAMO & MELCHIOR
GELABERT, Presbyteri Diœcesis
Elnensis.



PRÆPARATIO
PROXIMA
AD MORTEM,

AD USUM CLERICORUM,
POPULO ETIAM PERUTILIS;

*Compendiosæ Regulæ Cleri , ab iisdem
auctoribus addita , ut sanctam vitam
sequatur & coronet pretiosa Mors.*

Estote parati , quia quâ horâ non
putatis , Filius Hominis veniet.
Luc 12.

1922

1922

1922

1922

1922

1922

1922

1922



BEATÆ MARIÆ VIRGINI,

PRETIOSÆ MORTIS

EXEMPLO ET PATRONÆ.

Post dicatam Christo Jesu, Regum Regi, & Altissimi Filio, Regulam Cleri, æquum est, ô benedicta inter mulieres, Regina Cœli, ac Mater pulchræ dilectionis & sanctæ spei, ut tibi, de quâ natus est Jesus, dicemus hanc ad mortem præparationem, quia & sanctæ vitæ, & pretiosæ mortis es tutissimum præsidium, & perfectissimum exemplar.

Mirabilis Deus in Sanctis suis ! sed quânto in te mirabilior, ô Regina Sanctorum ?

Ave ergo, Mater Dei, pulchra ut luna, electa ut sol, speculum sine maculâ, pulchritudo justitiæ, hortus conclusus, fons signatus, gratia omnis viæ & virtutis, gloria Jerusalem, lætitia Israël, magnificentia populi. Ad tuos pedes provoluti, te supplices & fidenter rogamus, ut hoc sacrificium justitiæ, quod tibi in rationabile obsequium nostrum offerimus, acceptare

digneris. Tu es gratiâ plena : ecquid mirum ? Dominus tecum , & fecit tibi magna qui potens est ; ex tuâ obedientiâ & humilitate , beatam te dicent omnes generationes. Tu terribilis es hosti , in horâ mortis nostræ , ut castrorum acies ordinata , ut leoni rugienti fortes in fide resistamus , & ut legitime certantes , coronemur in gloriâ.

Eïa ergò , Advocata nostra , opus manuum nostrarum dirige secundum beneplacitum dilecti Filii tui ; impetra nobis ejus spiritum , ut ipso scientiarum Domino cooperante , loquamur in simplicitate cordis nostri verba vitæ æternæ , eloquia ignita ad pretiosam sanctorum mortem plebem parantia. Interveni pro Clero , ad quem hanc beatæ mortis methodum dirigimus , ut ipsi filii tui Ministri discant vigilare , lucernas ardentes in ejus adventu tenere , & ut facti forma gregis ex animo , ad mortem , unâ cum commisso sibi grege semper parati , moriantur morte justorum , & simul accipiant coronam vitæ.

Sed præsertim ad hos servos & clientes tuos , te amare , te à juven-

tute exquirere desiderantes , & hoc opus in signum sui erga te amoris offerentes , misericordes oculos converte : memento hujus quod Filius tuus in cruce pendens suggessit : ecce Mater tua. Eia ergo , Mater misericordiae , accipe nos in filios tuos , ut observantes vias tuas , & te in hoc exilio inveniētes , inveniamus vitam in hora mortis , hauriamus post mortem salutem à Domino , & gustemus in Caelis dulcissimum & benedictum fructum ventris tui Jesum , ejusque misericordias in æternū cantemus. Hæc sunt vota nostra , hæc est spes in sinu pauperum servorum tuorum reposita.




A P P R O B A T I O.

E Go, infra scriptus, Ordinis Minorum S. Francisci Conventualium, semel & iterum Minister Provincialis in alma Avenionensi Academia, Doctor Theologus aggregatus; ac pro Sanctâ Sede Apostolicâ, librorum Censor, quâ ineffabili voluptate librum legeram: *Præparatio proxima ad mortem*, eâdem & hunc, cui titulus: *Regula Cleri*, lustravi. Et sicut priorem, ita & ultimum, non Auctorum quorum nomen aut silent aut astruunt, sed Christi, sed Apostoli, sed Patrum, Librum reperi. Veniant ergo Ministri Christi & Dispensatores Mysteriorum Dei ad utrumque pietatis & eruditionis rivulum & fluvium, aquas vivas hausuri ex alterutro, in vitam æternam salientes. In fidem: Datum AVENIONE, die 27. Maii 1757.

Frat. Fr. *CASTAN.*

PRÆPARATIO



PRÆPARATIO

PROXIMA

AD MORTEM;


AD USUM CLERICORUM.

+++++

RECOLLECTIO

Unius ex singulis mensibus diei ;
præparationi ad mortem proximæ
accommodata.

*Viva ad Sacerdotes exhortatio , usque ad
divisionem animæ pertingere valens.*

 **M**ORIEMUR tandem, Fra-
tres charissimi ; sed heu ! se-
mel dumtaxat moriemur : quâ
horâ non putamus , Filius ho-
minis veniet ; post hoc autem ,
Judicium , & quidem Judicium sine mise-
ricordiâ. In quocumque loco ceciderit , lig-
num , ibi in æternum erit. O formidabile
momentum mortis , quo de summâ rei de-
certandum est ! Momentum ex quo pendet

Q

totius æternitatis causa ! O res plena periculi ! Ecquid , Fratres charissimi , si reverte Domino , non habeamus lucernas ardentes in manibus nostris ? Ecquid , si , pulsante Iudice ; si , diebus salutis & acceptabili tempore abusi , nihil in hoc tempore malo inveniamus in manibus nostris ? Tunc quidem invocabimus Deum ; verum , exaudiet nos ? Nonne potius nos meritò subfannabit ?

Estote parati , nos sæpissimè monuit ; sed si maturè non sapiamus ; nec novissima , dùm dies est , provideamus , quomodo in tam difficili luctâ præparabimus corda nostra ad nuptias , & ad pretiosam Sanctorum mortem ? in illâ , inquam , horâ ubi infestior morbus , caput debile , corpus languidum , ratio non perindè lucida , & dolores mortis non dabunt pœnitentiæ & salubrium operum locum ; in illâ horâ , quâ tot dies mali præteriti , tot gratiæ & salutis media in vacuum recepta , tot iniquitatis propriæ & alienæ torrentes , tot conscientiæ stimuli conturbabunt intellectum ; in illâ tandem horâ , ubi multa Iudiciorum Dei abyssus imminens , & pericula inferni nos invenientia , torquebunt cor nostrum ?

Heu nobis ! Si Hilariones & Hieronymi , quantumvis pœnitentes & ad mortem semper parati , timuerint valdè in hoc tribulationis tempore ; quid fiet de nobis , qui occupati erga plurima per vitam , negligimus unum necessarium , præparationem scilicet ad mortem , & vivimus simi-

les jumentis insipientibus quibus non est intellectus , vivimus quasi numquam morituri ?

Frequentissimè quidem legimus & prædicamus tremenda Dei oracula de periculis subitanæ & improvise mortis ; videmus ubique ægrotos & moribundos super lectum doloris , quos agonisantes adhortamur , & adjuvamus ad felicem mortem ; videmus defunctos in feretro , quos oscitanter comitamur ad tumulum ; sed heu ! hæc omnia usu vilescunt , & ex his parùm curamus mori quotidie , & sumere nobiscum oleum cum lampadibus in adventu sponsi ; & tandem , differentes de die in diem , venit mors super nos , tamquàm fur ; venit subito ira Dei , & in tempore vindictæ disperdit nos ; & morientes morte peccatorum pessimâ , morientes in peccato nostro , sepelimur in inferno. O socordiam nostram ! O cæcitatem lachrymis sanguineis deplorandam !

Eia ergò , Fratres charissimi , qui alios docemus , nos ipsos doceamus summam artem moriendi morte justorum ; quapropter , subindè moriamur dùm vivimus ; id est , moribundi quodammodò personam assumamus , dùm adhuc integræ sunt corpori animoque vires : voluntariè sacrificemus Domino , qui hilarem datorem diligit ; agamus nunc quæ faciemus , aut facta volumus jam morituri , quia nimirum facile occurrunt morienti quæ vivens amavit & libens exercuit ; at non facile præstò sunt , & sapida remedia , quorum per vitam exi-


Q ij

364 PRÆPARATIO PROXIMA
qua cura fuit vel memoria.

Nos veró, gens sancta, gustemus dum sani sumus & incolumes, exercitia ad beatam mortem perutilia, iisque singulis mensibus semel incumbamus libenter. Omnia tempus habent. Nonne sufficit tot annos ad nugas, & ad fabulas convertisse? O stulti! Quis nos adeò fascinator, ut excusantes excusationes, hoc breve annorum residuum, Deo animæque nostræ recusemus?

Heu, insipientes corde! si veritates venturi seculi, coram Christo Jesu misericorde, recogitare, & hæc exercitia salutaria gustare nolimus; illas & hæc, spiritu gementes, & desperatione acti, in æternum recogitabimus in crudeli amaritudine animæ nostræ, quod avertat Deus.

Misereamur ergo animæ nostræ; jam hora est nos de somno surgere; ecce Dominus adest & vocat nos, ducit nos in istam formosam solitudinem, ut loquatur ad cor nostrum, ut ibi spiritu intelligentiæ nos repleat, renovet nos spiritu mentis nostræ, mutet in alios viros, & ut ad beatam mortem & viam pacis pedes nostros dirigat. Festinemus ingredi in illam requiem, audituri & docibiles facturi quid loquetur in nobis Deus. Mors nostra poterit quidem esse repentina; ipso tamen propitio, non erit improvisa.



P R Æ P A R A T I O

Ad recollectionem unius ex singulis mensibus diei.

1°. **N**ecessarium est, ab omnibus objectis mentem & cor distrahere, & à curis etiam licitis se segregare.

2°. Juvat locum solitarium eligere, mortis imaginem præ oculis habere, eorumque, & aliorum sensuum, seculi vanitatibus ostium claudere, ut cum solo Jesu in silentio conversans, audire & gustare possis quid loquatur in te Dominus Deus.

3°. Quàmvis præcipuus hujus recollectionis fructus sit seria ad mortem præparatio, expedit tamen ut instituas pugnam contra quasdam inclinationes quæ sunt origo aliarum imperfectionum & vitiõrum.

4°. Memineris necessarium esse ut habeas desiderium efficax tuæ perfectionis, dicens ex abundantia cordis ? *Loquere, Domine, quia audit servus tuus.* Stude & tu, ut ex fructibus tuis cognoscaris sincerè velle tuam perfectionem & beatam mortem.

5°. Fideliter observa omnia hujus recollectionis exercitia, eorumque methodum & ordinem; nec reputes leve quod ad tuam perfectionem conducere potest. Verùm, quàmvis hinc quàmplurima tibi præfigamus exercitia, ea tamen elige quæ tuo statui, tuæ devotioni, & divinæ illustra-

366 PRÆPARATIO PROXIMA
tioni magis congruent.

6°. Quò ferventiùs huic recollectioni incumbas , cogita hanc occasionem , quam Deus tibi offert , esse fortassè postremam : quapropter , eodem fervore & animo eidem incumbere , ac si sub finem illius diei moriendum tibi esset.

7°. Cogita beatam mortem , salutem & perfectionem tuam , esse opus Dei misericordis : quapropter , enixè postula ejus auxilium , visita in eum finem Christum Dominum in Eucharistiâ ; invoca etiam Sanctorum patrocinia , præsertim Beatæ Virginis , Angeli Custodis , S. Joseph ; ut eorum præfidiis , animam tuam ad hæc salutaria exercitia & beatam mortem præpares.

Tandem , pervigilio recollectionis , & post vespertinam orationem , hæc tecum animo recogita.

REFLEXIONES

De Morte , & de ejus circumstantiis.

I. **A** Dhuc vivo ; sed tandem moriar : hoc statutum est. Paucitas dierum meorum , qui præteriri non possunt , finietur brevi. Uno tantùm gradu ego morsq; dividimur ; quid enim est vita mea , nisi ventus , & vapor ad modicum parens ? De me ergò brevè dicetur quod & de aliis : *Mortuus est.*

Quid sentiam in horâ mortis , de concupiscentiâ carnis , de concupiscentiâ oculorum , de superbiâ vitæ , de hâc fascina-

tione nugacitatis quæ obscurat intellectum , & quæ ducit ad perditionem ? Heu ! In illâ die peribunt cogitationes meæ. Quid sentiam tunc de simplicitate Justorum , & de viâ arctâ quæ ducit ad vitam ? Nûmquid eam deridebo ?

II. Quandonâm moriar ? Nescio ; moriar quâ horâ non puto : ergò revocari & mori possum in dimidio dierum meorum , cras , hâc nocte.

Attamen meum non est nosse tempora vel momenta quæ Pater posuit in suâ potestate : latet mihi ultimus dies , ut omnes observem dies. Meum ergò est redimere tempus , quia dies mali sunt , & laborare dum dies est , quia venit nox in quâ non potero operari. Meum est vigilare , attendere , & omni horâ esse paratum : verum , sum paratus ? Heu mihi ! Si nunc animam meam repeterent à me , ubi parerem ? Quò irem ? Timor & tremor veniunt super me , & conturbata sunt omnia ossa mea.

III. Cunctis diebus quibus nunc milito , expecto donec veniat immutatio mea ; jam spiritus meus attenuatur , dies mei breviantur , & solum mihi superest sepulchrum : ero quasi non essem , de utero translatus ad tumulum ; hæc domus mea erit ; ibi pater meus , mater mea , & proximi mei derelinquent me. Ecquid , si Dominus animam meam non assumpserit ; ibi ero intuentibus horror , vermium corrodentium esca ; ibi , pelli meæ , consumptis carnibus , adhærebit os meum ; illic

tandem in pulverem reversus, oblivioni labor tamquam mortuus à corde.

Cui tamen hucusque servivi? Ah! Domine Jesu, non tibi, sed huic ventri, quasi Deo; huic mortis corpori quod aggravat animam; huic foetido stercore; huic infensissimo hosti æternam mihi mortem minanti; scriptum est enim: Si secundum carnem vixeritis, moriemini.

IV. Statim post mortem, in ictu oculi, me manifestari oportet ante tribunal justiciæ, redditurus rationem villicationis meæ, rationem de omni verbo otioso, rationem ipsiusmet justitiæ & sanctitatis meæ; Judex ille vivorum & mortuorum, qui scrutatur renes & corda, statuet me contra faciem meam: numquid poterò respondere ei unum pro mille?

V. Post Judicium strictè factum, recipiam prout gessi in corpore meo, sive bonum, sive malum. Numquid recipiar in æterna tabernacula? an, deletus de libro viventium, descendam in infernum, habitaturus cum igne devorante, cum ardoribus sempiternis? In hanc tamen, vel illam æternitatem, cadam necesse est. In manibus Dei sortes meæ. Heu, heu! Hæc animo cogitans tribularer, nisi recogitarem misericordias Domini.

VI. Attamen, quàmvis ex pretiosâ & ex pessimâ morte pendeat beata vel infelix æternitas, quid hætenus feci, ut ad mortem essem semper paratus?... O si Deus Judæ proditori aliquot salutis dies concederet, ut ex hoc tormentorum loco libe-

ratetur, quos fructus pœnitentiæ dignos faceret? Nonne hoc acceptabile tempus plenissimè transigeret? Ipse Deus, propter nimiam charitatem suam, concedit mihi, licèt indigno, hos salutis dies; sed heu! ingratus & inutilis homo, nondùm cognovi tempus visitationis meæ. Quadraginta annis quibus proximus mihi fuit, vocavit me ad pœnitentiam, ad scientiam Sanctorum; sed infelix ego homo, semper renui, semper erravi corde; si nunc ergò peccatorum gravitate onustus, & meritis vacuus, morerer; nonne me in æternùm projiceret Deus? Quòdusque divitias bonitatis ejus contemnam?..... Si dùm tempus habeo, & dùm dies est, bonum non operor, nonne tandem, vindice Deo, veniet nox, in quâ nihil operari potero? Sed in me reversus, dico sicut homo bonæ voluntatis: Nunc cœpi; hæc mutatio dexteræ Excelsi.

His animo seriò recogitatis, & in corde altè fixis, somnum advoca.

E X E R C I T I A

Pro ipsâ recollectionis die.

ORDO DIEI.

HOrâ 5. surges.

Semi-quintâ, oratio, meditatio, Prima & Tertia.

Horâ 7. præparatio ad confessionem totius mensis præteriti, & ad Missam aut Communionem.

Q. v.

Horâ 9. dispositio testamenti , Sexta & Nona , prandium & recreatio.

Horâ 1. post meridiem , examen particulare , rosarium , & consideratio de angustiiis in horâ mortis.

Horâ 2. Vesperæ , Completorium , acceptatio mortis , actus religionis , & aliqua pro defunctis oratio.

Horâ 3. meditatio , matutinum Officium pro crastinâ die.

Semi-quartâ , consideratio ad Crucifixum , aspirationes ad felicem mortem postulandam , spiritualis administratio Extremæ-unctionis , protestatio , & visitatio Sanctissimi Sacramenti.

Post-cœnam & recreationem , commendatio animæ , scriptio fructûs recollectionis , & lectio documentorum pro eo conservando.

MONITA SALUTIS.

UBi primùm expergisceris , cogita Angelum percutientem , jubente Deo te sic alloqui & monere : dispone domui tuæ , morieris tu ; hâc nocte animam tuam repent à te : tempus non erit amplius , ecce venit citò Judex , jam pulsat.

Hoc fervoris stimulo excitatus , da operam ut particula hujus boni diei quam fecit tibi misericors Dominus , non te prætereat ; ita ut iniens vesperi lectum , sis ad mortem paratus.



MEDITATIO

De pessimâ pravorum Sacerdotum morte.

Quid frequentius quàm videre per vitam, Sacerdotes parùm sapere, nec novissima providere, apponentes quotidie iniquitatem super iniquitatem, aut saltem repentes humi; Sacerdotes vix curantes ad cor interdum redire, & thesaurizare sibi thesauros in cœlo; Sacerdotes opus Dei negligenter facientes, & justorum simplicitatem, ipsumque Deum deridentes?

Sed heu! ubi primum instat tempus resolutionis; vix intonantur ista formidolosa verba: *Dispone domui tuæ, morieris tu: Proficiscere de hoc mundo*; tunc, præ angustia spiritus gementes, dicunt in corde suo, timore horribili turbati: O quàm durus nuntius ad me hodiè missus est! Heu mihi! Nunc reminiscor malorum quæ feci; nunc millia peccata occulta & aliena quibus communicavi; millia monstra quæ fovebam in sinu meo, insurgunt in me, cor meum torquentia; nunc video hoc mare magnum & spatiosum manibus; illic reptilia quorum non est numerus. Væ mihi! Me ipse decipiens, dicebam: pax, pax; nunc heu! non est pax ossibus meis à facie peccatorum meorum! O miserum me! nunc undiquè mihi sunt angustiae; nomen habui quòd vixerim: nunc autem video quia mortuus fui coram oculis Domini... O insensate, ergò erravi; quæ fas-

cinatio obscurabat intellectum meum? Quæ me malitia excæcabat?

O si in pauca fidelis fuisset! O si divina Mysteria sanctius tractavisset! O si vanitatem gravi corde non dilexisset, & mendacium non quævisset! . . . O si zelans zelum Dei & animarum, diligentius attendisset mihi & universo gregi! Sed, proh pudor! Proh dolor! Plantatus in domo Domini, terram Sanctorum frustra occupavi! Jesu-Christi Sanguis, cujus reus factus sum, nunc exquiritur & clamat vindictam; ejus misericordiam servire feci iniquitatibus meis; nunc heu! desperationis turbine jactatum me sentio.

O, si ex hâc infirmitate recrearer! O si adhuc haberem dies salutis & acceptabile tempus, quàm alacriter & peccata, & dies malos redimerem! Sed, vae mihi! perit desiderium meum, quia tempus non erit amplius: ecce ego morior? jam incido in manus Dei viventis; jam pericula inferni inveniunt me: O in quantam tribulationem deveni! heu, heu! si sanctissimi Viri, & Pastores juxta cor Dei timuerint valdè in his angustiis, ubi parebo ego servus nequam?

Hæc & alia recogitant pravi Sacerdotes in interitu suo, in quo ridentur & subsannantur à Deo, quem in Sanctuario ejus exacerbaverunt per vitam; tunc irascuntur, fremunt, tabescunt; Judici pulsanti aperire, de corpore exire trepidant, & videre eum, quem contempsisse se meminerint, Judicem, formidant: sed heu! moriuntur.

tandem inviti, & fortassè morte peccatorum pessimâ.

Sed & ego qui hæc meditatus sum, quid egi per totam vitam?... Quid ago?... Nonne mihi thesauriso has amaritudines & angustias, quæ, Deo vindice, in horâ mortis conturbabunt me? Ecquandò tamen maturè sapiam, ac novissima providebo, faciendo omnia bona quæ facere possum?... Si velim pretiosâ Sanctorum morte mori, cur, dùm tempus habeo, non sequor viam justorum?

O Jesu mi! hoc est ante te omne desiderium meum; sed, ô bone Jesu! ô Jesu refugium meum! patientiam habe in me; ne revoces me in dimidio dierum meorum: dimitte ergò me, antequàm vadam ad terram tenebrosam & opertam mortis caligine, ut plangam paululùm dolorem meum, ut redimens peccata, & dies malos præteritos, præveniam tribulationes cordis mei, quæ in horâ mortis multiplicarentur super me; dies plenos amaritudine, & omnia reddam tibi.

O Jesu auxilii mei, qui operaris in nobis velle & perficere pro bonâ voluntate, adjuva me, ut perseverans usque in finem, accipiam coronam vitæ.

In his esto, charissime Frater; & quoniam hodiè audis vocem Domini, qui spatium veræ pænitiæ & latæ mortis tibi concedit, noli obdurare cor tuum: in brevi enim exardesceret ira ejus, & in furore suo conturbaret te; scito quia in horâ mortis gloria tua hæc erit, testimonium bonæ conscientiae,

*quòd in simplicitate cordis & sinceritate Dei ;
& non in sapientiâ carnali conversatus fue-
ris in hoc mundo : hanc ergò bonam con-
scientiam tibi modis omnibus concilia.*

ALIA MEDITATIO.

De Stricto in pravos Sacerdotes Judicio.

Vix anima de corpore egressa est , jam ,
in ictu oculi , eam manifestari oportet
ante tribunal Justitiæ divinæ ; ille Dominus
Iesus , qui constitutus est à Deo iudex vi-
vorum & mortuorum , qui scrutatur renes
& corda , & qui in Angelis reperit pravita-
tem , scrutabitur Jerusalem in lucernis ,
manifestabit consilia cordis nostri , fodiet
parietem , ostendet abominationes pessimas,
gravissima peccata occulta , & aliena , tam-
quàm minutula per vitam reputata ; quin
imò , omne verbum otiosum quod locuti
fuerimus , de eo exiget rationem in die
Judicii.

Credo hoc ? Credo quidem ; & tamen
heur ! Non solum de peccatis præteritis pœ-
nitentiam agere , eaque redimere recuso ;
verùm etiam , multiplico iniquitates super
capillos capitis mei ! Monstruosa delicta
nihili facio , thesauriso mihi iram Dei ! O
vana fides mea ! O dæmonum fides !

II. Prætereà , durissimum his qui præ-
sunt iudicium fiet ; anima pro animâ exige-
tur ; quis est ille Pastor qui resistat vultui
meo , dicit Dominus exercituum ?

Grande periculum ! Ecquid , ego de

factis alienis reddam rationem; ego qui pro meis non sufficio? (*S. Tho.*) Ovium sanguis de manu requiretur meâ? Certum hoc est; id ipsa veritas attestatur; hoc scio, & accuratiùs non vigilo? O idolum Pastoris, ô cæcus speculator! Quid ergò miser cogito?

III. Quid plura? Cùm accepero tempus, inquit justus Judex, ego justitias judicabo: examinabuntur enim bona, quâ intentione facta, quo fervore, quo modo: unde fit ut Job vereretur omnia opera sua, sciens quod Deus non parcat delinquenti.

Heu mihi! Jam me ipse in staterâ appendens, invenior minùs habens, miser & miserabilis: imperfectum operum meorum vident oculi tui, Domine Jesu, & illud in libro tuo scribis; undè, quàmvis vir divitiarum appaream, tunc in furore tuo confiteberis mihi: *non novi te*; hoc mihi minaris, & adhuc non vereor opera mea? Non studeo esse fervens spiritu? Et adhuc vivo?

IV. Tandem, cui multùm datum est; multùm quæretur ab eo.

Quid ergò respondebo ego Sacerdos; qui aquas Salvatoris sæpissimè haurio, de plenitudine ejus accipio, ipsumque Dominum, gratiarum fontem, quotidie manduco? Scio insuper bonum & malum, omnia quæ accepit à Patre Dominus Jesus, mihi notâ fecit.

Heu tamen! Quot bona torpidè omisâ; quot gratiæ in vacuum receptæ, quot talenta in terrâ abscondita? Quid respondebo, per totam vitam inutilis, quandò tot

gratiæ, sanguinis Agni immaculati pretium, exquirentur, & vehementiùs clamabunt vindictam quàm sanguis Abel? Quid verò audiam, nisi hæc tremenda nimis verba? *Discede à me, serve inutilis, operarie iniquitatis; in terrâ Sanctorum iniqua gessisti, non videbis gloriam Domini; discede à me in ignem æternum.*

O anima mea, si hæc audiens & meditans, non surgas de somno, non dormis, sed mortua es! Ubi te abscondes, misera, à vultu iræ ejus? Quæ est tamen nunc expectatio tua, nisi judicium sine misericordiâ? Quam tunc habebis allocutionem? Responde?

Domine Jesu, scio verè quòd ita sit, & quòd non justificetur homo compositus Deo: si voluerit contendere cum illo, non poterit ei respondere unum pro mille. Qui si habuero quidpiam justum, non respondebo, sed judicem meum deprecabor, quia quasi pannus menstruatae universæ justitiæ meæ; væ laudabili vitæ, si, remotâ misericordiâ, discutiatur! *S. Aug.* Eia ergò Domine Jesu, non intres in judicium cum servo tuo: confige timore tuo carnes meas: volo ex tunc tuum prævenire judicium; quapropter, contra meipsum armabor, & ero, præ cæteris, crudelior mihi & severissimus judex; & hoc faciens per singulos dies, stabo cum fiduciâ ante tremendum tuum Tribunal: adjuva me Deus salutis meæ.

Hanc tene disciplinam, charissime Frater, initium sapientiæ timor Domini: ô nimis bea-

tus, si semper es pavidus ! In omnibus consiliis, propositis, & operibus tuis, dicito tibi : si modò moriturus essem, & manifestari me oporteret ante Tribunal supremi Judicis, facerem istud ? Quid ille sentiret de hoc opere ? Quid ego ipse sentirem ? . . . Ergò, ante omnia opera tua verbum verax præcedat te, & nihil agas quod conscientiae rectoque Dei judicio non sit consentaneum. Quæ satis magna securitas, ubi periclitatur æternitas ?



PRÆPARATIO

Ad Confessionem totius mensis præteriti.

REFLEXIONES

De statu conscientiae, & præcipuè de muniis proprii statûs.

NOtandum, has Reflexiones sigillatim sumptas posse suppeditare Clericis materiam aliquantulum meditandi singulis mensis diebus, & toto anni-decursu : Pastoribus juxta cor Dei id expertis, crede, charissime Frater ; sed saltem in hâc recollectionis die, meditare puncta quæ magis ad te spectare noveris ; in his esto : statue te contra faciem tuam, dijudicans teipsum ut severissimus judex, ut non judiceris in novissimo die.

Siste ergò gradum, Viator.

REFLEXIO I.

Generalis annorum recogitatio.

Plantatus sum in domo Domini, ut floream sicut lilium, & multiplicer sicut Cedrus Libani; in sortem ejus vocatus sum, ut sim sanctus, quia ipse sanctus est, & ut adhuc in dies sanctificer, quàmvis sanctus sim.

Attamen, tot abhinc annis quibus terram Sanctorum occupo, quomodo vixi? ... Quos fructus sanctitatis feci? ... Quomodo vivo? ... Contendo viriliter esse perfectus, sicut Pater cœlestis, cujus mysteriorum dispensator sum, perfectus est? ... Sum ad pretiosam in conspectu Domini mortem paratus? ... E contrà, nonne, cum Doctrinis meis, carne volutor & sanguine? Nonne de die in diem ipsis Laïcis deterior fio? ... Proh pudor, quanta gemituum abyssus, quantus mortis secundæ timor! Confusio faciei meæ cooperit me.

Domine Jesu! Quid me vis facere, ut placeam tibi in regione vivorum; notam fac mihi viam in quâ ambulem, quia ad te levavi animam meam; tu es via & vita animæ meæ, tu es auxiliator meus, auxiliator fortis.



REFLEXIO II.

*Horror peccati mortalis , præsertim superbiæ ,
luxuriæ & avaritiæ.*

Clerici , ut potè Ministri Christi , & dispensatores mysteriorum Dei , debent quasi à facie colubri fugere peccatum ; ipsi siquidem sciunt bonum & malum ; sunt quodammodò Dii , & verè filii excelsi omnes , de plenitudine Christi accipiunt ; vos autem , de Sacerdotibus queritur Dominus , vos autem , irritum fecistis pactum meum. Si inimicus meus maledixisset mihi , sustinuissem utiquè ; tu verò homo unanimis , dux meus & notus meus , qui simul mecum dulces capiebas cibos ! Proh abominatio ! Cognoscis voluntatem meam ; hanc tamen non facis , serve nequam ; quin imò , polluis sanctuarium meum : ô quàm multis , in hac & alterâ vitâ , vapulabis ! Proh desolatio !

Verùm , quale est cor meum contra peccatum mortale , præsertim contra superbiam , luxuriam , & avaritiam ? . . . Propter hæc tria peccata stat abominatio desolationis in loco sancto.

Quantò major sum , tantò magis me in omnibus humiliare debeo : quid habeo quod non acceperim ? Si autem accepi , quid gloriator , quasi non acceperim ? Heu ! Ex eo quòd multum mihi datum sit , multum quæretur à me : non habeo de me nisi peccatum & mendacium ; (*Concil. Atræv.*) nonne tamen cogitatione , verbo , & opere ,

superbio , terra & cinis ?... Nonne , præ tumore , cæteros interdum aspernor ? ... Si lætor ad ascensum , cur non timeo ad foediorum lapsum ? (*S. Hier.*) Sed heu ! Nonne , me exaltans , quàmvis elegerim abjectus esse in domo Dei mei , horrendiùs humiliabor ? ... Nonne potentior potentiùs tormenta patiar ? ... Nonne , hominibus placere quærens , confundar & spernar à Deo ? Absit. Ecquandò ergò discam esse humilis corde ? Ecquandò amabo nesciri & pro nihilo reputari ? (*Imit. Chr.*) Ad hanc internam humilitatem me impellit humiliatio mea , quæ est in medio mei : quid enim fui ? Quid sum ? Quid ero ?

Prætereà , nonne , imprudens , à spiritu immundo me coinquinari , & ab Angelo Satanæ me colaphisari & possideri sino , dans ei locum , & reputans ut parum quod non est parum ?... Hoc vitio , parvitatem materiæ non admittente , periclitatur genus humanum ; (*S. Greg.*) nonne hoc foetido vitio periclitor ipse quotidie ? Ecquandò , à dextris & à sinistris armatus , contendam esse sanctus corpore & spiritu , & sequi Agnum quocùmque ierit ?

Tandem , nonne studens avaritiæ , incidi in laqueum Diaboli ? Quo fine impleo ministerium meum ? Congrego , & congregata conservo.... Accipere temporale , præcisè pro aliquâ functione spirituali , species simoniæ est. (*S. Tho.*) Nonne sic oculos habens , fur & latro sum ?... Nonne , ut mercator pessimus , clamare videor cum Judâ : Quid vultis mihi dare , & ego eum

vobis tradam ?.... Quoties saltem, ob inopiæ timorem, justitiam desero, & quasi egentium necator sum ?.... Quoties, propter avaritiam, implicui me negotiis secularibus, litigiosorum & procuratorum personam gessi, quàmvis hæc omnia militantibus Deo prohibeantur ?.... Quomodò, mammonæ serviens, liberè servirem Deo meo ?.... Nonne ubi thesaurus meus est, ibi est & cor meum ?.... Verùm, ô stulte ! quæ paravi & paro, cujus erunt ?.... Nonne hæc pecuniæ quibus inhio, erunt mihi in perditionem ?.... O quàm amara mihi erit mortis memoria pacem habenti in substantiis ! Nonne tandem, mortuus dives, sepeliar in inferno ?

Sed infelix avidus ego homo ! si Dominus est pars hæreditatis meæ, quidni sufficit mihi ? Nonne tanquàm nihil habens, omnia possiderem ? O quàm liber & lætus morerer !

R E F L E X I O I I I.

Intemperantia in victu & vestitu.

S Obrius esto, monet Apostolus ; habens alimenta & quibus tegaris, his contentus sis.

Nonne tamen gravari sino cor meum crapulâ & ebrietate ? Quinimò, nonne Deus meus venter est ? Nonne vanitatem in vestitu, supellectili, & in reliquo vitæ genere præ me fero ? Ita sanè ; (*Concil. Trid. Sess. 22. de ref. c. 1.*)

hoc ad verecundiam meam & flens dico: Scio quia Christus Dominus, cujus Minister sum, cùm dives esset, propter me egenus factus est; non habuit diversorium, nec ubi caput reclinaret; jejunavit, sitivit, esuriit, felle & aceto potatus est; hoc scio, hoc prædico: quo ergò jure imagini ejus adeò dissimilis, me prædestinandum spero?

REFLEXIO IV.

Detraçtio.

D*etraçtores Deo òdibiles. Abominatio hominum detraçtio. Nolite ergò detrahete alterutrum.*

Quoties tamen, ex eo quòd Sacerdos sim, mihi jus vindico detrahendi fratribus meis? Proh scelus! ... quoties lingua mea Sanguine Christi adhuc rubescens, dolos concinnavit adversus fratrem meum? Proh pudor! ... quoties erubescens Evangelium, & hominibus placere quærens, non habui redargutiones in ore meo, nec detrahentem secretò proximo suo, hunc persecutus sum? ... O idolum charitatis meæ! Quare? Quia vera charitas operit multitudinem peccatorum; nonne ergò vana est mea religio? Ecquandò linguam meam, hunc ignem, hunc gladium acutum, hancque malorum universitatem refrænabo? Ecquandò linguam detrahentium domare contendam? Nonne quod mihi facere volo, aliis facere debeo?

REFLEXIO V.

Via spatiosa.

Observare debeo ea quæ à Sanctis Pontificibus, & à sacris Conciliis, de venatione clamosâ & frequenti; de luxu, comessationibus, choreis, aleis, lusibus, ac quibuscumque criminibus, necnon de secularibus negotiis fugiendis, copiosè ac salubriter sancita sunt non obstantibus consuetudinibus. (Conc. Trid. Sess. 22. de ref. c. 1.)

Sed si hæc non observem? Ergò sequor viam spatiosam. Verùm, quò me ductura est hæc spatiosa via? Ad perditionem. Hæc sunt verba Christi; cœlum & terra transibunt, verba autem ejus non præteribunt. Si Dominus est, cur eum non audio? Cur eum non sequor? Nonne me tandem pudebit huic sæculo cui in Baptismate & in sacrâ Unctione renuntiavi, conformari? Heu! hodiè Catechumenus, hodiè Sacerdos; heri in circo, manè in altari. (S. Hier.) Undè hoc monstrum? Nùmquid respiciens retrò, aptus ero ministerio verbi, & regno Dei?

REFLEXIO VI.

Familiaritas cum Laïcis.

Abstinere jubeor à nimîâ Laïcorum familiaritate, (Conc. Aquil.) & ab eorum frequentiori convivio, quia valdè ho-

384 PRÆPARATIO PROXIMA
nestatem dedecet clericalem , ipsorumque Clericorum facit vilescere auctoritatem. (Conc. Raven.)

Quid est ergò cur ministerium meum turpiter vituperari sino ? ... Cur non frequenter Pastores juxta cor Dei , & Clericos boni testimonii viros , & qui potentes in opere & sermone trahunt post se ? ... Cur in odorem illorum virtutum non curro ? ... Nonne eas fastidio ? ... Nonne tamen , ex hoc odore , effloret super me sanctificatio Dei mei ? ... Scriptum est enim : cum Sancto Sanctus eris.

Sed , quàmvis cum hominibus converfer , estne tunc in coelis conversatio mea ? Nùmquid in conversatione sanctus sum ? Nonne potius ut iniqui , narro fabulationes , sed non ut lex Dei ? Verùm , decetne sanctos stultiloquium , aut scurrilitas ? Deestne in multiloquio peccatum ?

REFLEXIO VII.

Peccatum veniale.

P*eccatum veniale contristat Spiritum Sanctum ; quid mirum si diligentes Dominum , oderint hoc malum ? Levia delicta , quæ in Laïcis levia sunt , in Clericis sunt maxima ; (Trid. Sess. 22. de ref. c. 1.) & nugæ in ore Laïci , nugæ sunt ; in ore Sacerdotis blasphemiæ. (S. Bern.) Præterea , qui modica spernit , paulatim decidet , & qui in modico iniquus est , in majori iniquus erit. Hoc ipsa veritas pronuntiat ; nos autem , quod vidimus testamur.*

Quale

Quale est ergò cor meum contra peccata venialia ? Nonne adhuc adhæreo huic vitio quo tandiù laboravi, & quod quasi aquam bibi ? Quem conatum adhibui ex præteritâ Confessione, ut illud ex corde meo extirparem ? Heu ! volui & nolui piger. O si Deum diligerem, nonne ab omni specie malâ pro viribus me abstinerem ? Ad malum quidem pronus sum, & licet Sacerdos sim, circumdortamen infirmitate : septies in die cadit ipse justus. Sed quot peccata venialia, ex deliberatâ scientiâ, & plenâ voluntate committo ? Quoties reputo tanquàm leve, quod quidem veniale est plebi, sed quod criminale est Sacerdoti ? Quoties culpæ meæ, propter contemptum, aut scandalum, &c. de parvis, magnæ factæ sunt ? (*S. Greg.*) Abyssus siquidem abyssum invocat. Quoties heu ! malitiâ meâ excæcatus, & in falsam conscientiam imprudens lapsus, dixi in corde meo : pax, pax ? Dominus autem, qui intuetur cor, & qui secus judicat, dixit : non est pax ? O quantæ tenebræ ! Delicta quis intelligit ?

O summe scrutator cordium ! paveo, tabesco, & fremo in memetipso ; ab occultis meis munda me, Domine ; cor mundum crea in me, Deus ; malo mori, quàm foedare animam meam vel minimo peccato ; sed & tu, qui es fortitudo mea & firmamentum meum, custodi animam meam, quoniam sanctus sum. Viriliter agam ego, ut spiritum tuum non amplius contristem ; tu scis, Domine, quia amo te plus quàm me.

R

REFLEXIO VIII.

Vita tepida.

Habeo adversum te quod charitatem tuam primam reliquisti, dicit Dominus; memor esto itaque unde excideris, & age pœnitentiam; sin autem, venio, & movebo candelabrum tuum de loco suo, nisi pœnitentiam egeris. (Apoc. 2.) Scio opera tua: nomen habes quod vivas, & mortuus es; esto vigilans & confirma cœtera, quia mortura sunt: non enim invenio opera tua plena coram me. In mente ergo habe qualiter acceperis & audieris, & serva, & age pœnitentiam. Si ergo non vigilaveris, veniam ad te tanquàm fur, & nescies quâ horâ veniam ad te. Utinam frigidus esses aut calidus; sed quia tepidus es, & nec frigidus nec calidus, incipiam te evomere ex ore meo. (Apocal. 3.)

Ad quem, ô Domine Jesu, ad quem spectant hæc formidolosa verba? Cui imminet hæc tremenda nimis sententia? Ad vos, ô Sacerdotes, qui despicitis nomen meum, dicit Dominus exercituum. Qui legit intelligat. Sed & ego Sacerdos qui huic seculo conformor, qui vix operor bonum, qui opus Dei perfunctoriè & negligenter facio, qui peccata venialia quasi aquam bibo, quique exercitia spiritualia statui meo congruentia, fastidio, nonne hanc jure meritò timere debeo sententiam?

Insuper, tepidi Sacerdotes difficile corriguntur, sive quia gratiâ speciali, propter animi teporem atque ingratitude, relicto sufficienti auxilio, destituuntur; sive quia hunc languidum statum, miseri, ignorant; sive quia omnia vel utilissima remedia usu vilescunt. Nihil impossibilius quàm corrigere eum qui omnia scit: (S. Chrys.) pessima ergo eorum plaga, & curationum utilitas in eis non est.

Cujus est imago hæc? Nonne mea? Reverà, ego sum ille vir tepidus, & inutilis servus, jamjam ex ore Dei evomendus, & in tenebras exteriores projiciendus. Heu mihi! Præpotens vox Domini confringentis cedros Libani, non frangit, nec emollit duritiam cordis mei, nec ipsa mors peccatorum pessima, nec Judicia Dei abyssus multa, nec ipsa inferni pericula mihi imminetia, nec ipsi Salvatoris fontes; nihil horum me movet, nihil ad poenitentiam excitat; quomodò ergò effugiam à Judicio gehennæ?

O insensate! Domino ferviens, incœperam olim esse fervens spiritu; quomodò ergò obscuratum est aurum, mutatus est color optimus? Sed quid nunc faciam miser? In me reversus, emam mihi aurum ignitum, contraria contrariis curabo: ponens mihi ob oculos Pastores juxta cor Dei, & æmulans eorum charismata meliora, dicam semper: *Non poteris quod isti?* Sic violentus, ad eorum me urgebo fervorem; discam indè laborare ut bonus miles Christi, servire Deo in sanctitate &

R ij

justitiâ omnibus diebus meis , & esse fidelis usque ad mortem.

Verùm , ô Domine Jesu , qui facis Ministros tuos ignem urentem , ure renes meos & cor meum igne illo quem venisti mittere in terram ; indue me novum hominem usque in finem perseverantem. Tu es adjutor meus , bellator fortis.

REFLEXIO IX.

Otium.

Intelligent Clerici se non ad propria comoda , sed ad labores & sollicitudines , pro Dei gloriâ , vocatos esse : (Trid. Sess. 25. de ref. c. 1.) Sic ergò vigilare & laborare debent , ut in horâ mortis fiducialiter dicere possint : diù , noctuque æstu urebar & gelu , fugiebat somnus ab oculis meis , sicque per viginti annos in domo tuâ servivi. (Genes. 31.)

Verùm , licèt ad laborem natus sim , sicut avis ad volatum ; nonne tamen ignaviâ marceo ? Nonne , post recitatas perfunctoriè horas , & celebratum cursim & oscitanter Missæ sacrificium , sto totâ die otiosus ? O quantam malitiam docuit me otiositas ! Expertus loquor , quanta mala invexit in Ecclesiam & in oves mihi commissas hæc torpens & otiosa vita mea ? Quot scandala peperit ? Quòusque tandem , panem & patrimonium Crucifixi otiosus comedam , intereadùm Dominus Jesus , ejusque Discipuli fuerunt in labori-

bus à juventute suâ ; Væ mihi ! jam-jam venit nox , in quâ nemo potest operari. Quidni ergò recogito omnes annos meos in amaritudine animæ meæ ! Quidni contendo redimere dies malos præteritos ? Heu mihi ! licèt bonum hætenùs non fecerim , licèt meritis vacuus sim , & fortassè morti proximus , nihil aliud vaco , nisi aut dicere aut audire aliquid novi. Nonne tandem hora est de somno surgere , & negotiari dùm venit citò Judex ?

Domine Jesu , ne revoces me in dimidio dierum meorum ; patientiam habe in me , particula boni diei me non ampliùs præteribit , ut dies pleni inveniantur in me ; indè , gratiâ tuâ confisus , omnia reddam tibi.

R E F L E X I O X.

Inordinatus erga parentes amor.

Sacerdos Melchisedech , sine Patre , sine Matre , sine genealogiâ. (Heb. 7.)

Ego pariter Sacerdos sum secundùm ordinem Melchisedech ; nonne tamen acquiesco carni aut sanguini ? Nonne distraho , propter consanguineos , res Ecclesiasticas quæ Dei sunt ? . . . Nonne , ab his lupis rapacibus , me & pauperes , sciens & volens spoliari sino ? . . . Nonne satago illorum rerum temporalium ? . . . Nonne de resignando indigno nepoti beneficio jam deliberavi ? . . . O in quantum malorum seminarium projecit multos Clericos affectus

R iij

390 PRÆPARATIO PROXIMA
 paternus ? . . . (*Trid. Sess. 25. de ref. c. 1.*)
 Nonne & ego ex illis sum ? Heu ! Loquela
 mea , ipsaque opera me manifestum faciunt.
 Reverà , quotiès ipsimet consanguinei me à
 divinis averterunt ? Quotiès suis terrenis me
 coïnquinaverunt moribus ? Quotiès me totà
 die mœrore confecerunt ? Quotiès posue-
 runt me abominationem sibi ? Quotiès ,
 concinnantes dolos , dederunt me populis
 contemptibilem ? Quotiès eorum vitia ce-
 ciderunt super me , & præstiterunt me op-
 probrium hominum & abjectionem plebis ?
 O quantum periclitor ne ego Sacerdos fiam
 sicut consanguinei & sicut ipse populus !
 Nonne ergò tempus est egrediendi de terrâ
 meâ & de cognatione meâ , obliviscendi
 domum Patris mei , & deponendi penitùs
 omnem affectum paternum ? Longè à pa-
 rentibus salus. Quandonam tandem gratiam
 resuscitare enitar quæ data est mihi per im-
 positionem manuum , & quam , affectu pa-
 terno , præfocavi , & iniquâ miseratione
 evacuavi ?

REFLEXIO XI.

Charitas ergà Deum & Proximum.

IN lege quid scriptum est ? Quomoddò le-
 gis ? Diliges Dominum tuum ex toto cor-
 de tuo , & proximum tuum sicut teipsum.
Plenitudo legis dilectio.

Attamen , diligo ex toto corde meo Do-
 minum Jesum , cujus Minister sum ! . . . In
 signum mei erga eum amoris , servo ejus

mandata : Ambulo sicut ille ambulavit : Facio in omnibus , sive magnis , sive modicis , ejus voluntatem : Paratus sum pro illo pati , animam meam ponere , promovere sincerè gloriam ejus , &c. : Probatio amoris exhibitio est operis : (S. Greg.) Ergò anathema mihi , si non amem Jesum-Christum opere & veritate.

Diligo Fratres meos sicut meipsum , & sicut Christus Dominus dilexit me : Sum cum illis cor unum & anima una : . . . Nonne invidiæ & Schismatum livore tabesco : . . . Heu mihi ! quid sum sine charitate : Æs sonans , nihil. Quid sum , si dicens me diligere Deum , odero fratrem meum : Mendax ; sed irridetur Deus : Nonne perdet omnes qui loquuntur mendacium :

REFLEXIO XII.

Cura salutis.

S Alva animam tuam ; hoc est omnis homo : quære primùm regnum Dei ; quid enim prodest homini si universum mundum lucretur , animæ verò suæ detrimentum patiatur ? Væ , væ nobis , spiritu gemens ululat in inferno infinitus stultorum numerus : quid nobis profuit superbia , aut divitiarum jactantia quid contulit nobis ? O insensati ! ergò erravimus. Sed heu ! jam non possumus hinc transmeare , nec ampliùs datur nobis pœnitentiæ salutaris locus. Proh desperatio !

Sed & ego qui hæc meditor , incumbo strenuè & alacriter ad unum necessarium ,

scilicet ad salutem animæ meæ : . . . O insipiens corde ! Nonne animam meam in vanum accepisse videor ? Quid profuit Judæ proditori Apostolatum sortitum esse ? Nonne bonum erat ei , si natus non fuisset : . . . Væ væ ! quid mihi pariter prodest , si cùm universum mundum Christo lucrifecerim , ipse reprobus efficiar : . . . Quam commutationem dabo pro animâ meâ : . . . Quid tandem supererit mihi , nisi fletus , stridor dentium , sempiternum dedecus , vermis non moriens , ignis inextinguibilis , æterna desperatio : . . . O stupiditatem meam ! O stultitiam meam , lachrymis sanguineis deplorandam !

Intellexi hæc omnia : Sed si intelligam , cur primùm non misereor animæ meæ , placens Deo : . . . Cur salutem meam ante omnia , cum timore & tremore non operor : . . . Si mihi nequam , cui bonus ero ? Si animæ meæ præesse nescio , quomodò Ecclesiæ Dei diligentiam habebō : . . . Sed in me reversus dixi : nunc cœpi , hæc mutatio dexteræ Excelsi.

Domine Jesu , illumina oculos meos ; da mihi intellectum , & sedium tuarum assistentem sapientiam ; notum fac mihi finem meum , ut sciam quid desit mihi : tuus sum ego , salvum me fac. Arctam viam quæ ducat ad vitam , viriliter , gratiâ tuâ adjutus , jugiter sequar , ut factus concha , deindè canalis , efficacius & meipsum primùm salvum faciam , & eos qui me audient. Hoc spiritu principali confirma me , ô Deus salutis meæ.

REFLEXIO XIII.

Abusus gratiarum.

Quid ultra debuit facere Dominus Jesus Ministris suis, & non fecit! Non solum eduxit eos de terrâ Ægypti, eosque de rore cœli & de pinguedine terræ satiavit, quò liberiùs suæ, alienæque salutis, vacarent; sed etiam hos elegit ex omni carne, hos exaltavit ad regale Sacerdotium, hos amicos suos & Angelos fecit, cives Sanctorum & domesticos Dei, ejusque mysteriorum dispensatores. Quid sublimius? Nùmquid fecit taliter omni nationi & principibus terræ? Nonne jure merito expectare debet ut faciant uvas, non autem labruscas?

Verùm, quantam præsertim mecum fecit misericordiam magister bonus? Profectò, nisi adjuvisset me, paulò minùs habitasset in inferno anima mea. Attamen, ille patiens, & multæ misericordiæ Pater, concedit mihi tempus acceptabile & dies salutis; vocat & urget me, ut de plenitudine ejus accipiens gratias uberes & salutare, dignè ambulem vocatione quâ vocatus sum, sim perfectus sicut ille perfectus est, in ejus domo oliva fructifera, & illius in æternum securiùs cohæres. Enim verò, ne sollicitus essem quid manducabo, aut quid bibam, aut quo operiar, & ne sapiam quæ sunt super terram, suppeditat mihi alimenta, & quibus tegar. Scio hæc omnia pretiosa dona Dei, eaque aliis prædico.

R. v.

REFLEXIO XIV.

Frequentatio Sacramenti Pœnitentiæ.

DEvotâ hujus Sacramenti frequentatione, non solum liberamur à peccatis, sed etiam his præservamur, (Conc. Trident. Sess. 14. cap. 3.) & ad perfectiorem viam nobis tuti paramus, præsertim, si habentes Ananiam, & vitæ ducem juxta cor Dei, ei simus docibiles corde.

Sed quo zelo frequento hoc Sacramentum? Nonne potius me elongo à throno gratiæ, quia ipse me seducens dico: peccatum non habeo? Estne veritas in me? Dominus est qui judicat me; & quàmvis non habeam nisi peccata venialia, nonne piorum hominum usus demonstrat; ea rectè & utiliter in Confessione dici? Quâ conscientiæ pace & serenitate; quâ vehementi spiritûs consolatione (Trid. Sess. 14 c. 3.) & fortitudine me privo hâc confitendi negligentia & nausæa? Quid sapit illa negligentia, nisi perfectionis meæ fastidium? Quid mihi minatur?

REFLEXIO XV.

Examen conscientiæ.

Confessio non est quidem conscientiarum carnificina; attamen examen conscientiæ debet esse diligens; (Trid. Sess. 14. c. 5.) aded ut, si nosmetipsos non dijudicaverimus, à Domino utiquè judicandi sumus; ecquis vivens in conspectu ejus justificabitur?

Verùm, discutio me diligentius? ... exploro sinus & latebras hujus conscientiae meae, (*Trid. Sess. 14. c. 5.*) & onera mea humeris Angelicis formidanda? Heu mihi! Deus tandem cùm acceperit tempus, ostendet gentibus nuditatem meam, reptilia, peccata occulta & aliena, quorum non est numerus. Quid est cur mihi blandior?

R E F L E X I O X V I.

Contritio.

Contritio est animi dolor, ac detestatio de peccato commisso (*Trid. Sess. 14. c. 4.*) Undè illud Joëlis Prophetæ: scindite corda vestra, & non vestimenta vestra, ait Dominus omnipotens.

Recogito annos meos in amaritudine animæ meae? ... Doleo de peccatis verè & sincerè? ... De corde exeunt peccata; igitur cor meum debet esse tantò priùs ad pœnam, quantò principalius fuit ad culpam. (*Tert.*) Nonne tamen ex illis sum de quibus dicitur: non est in ore eorum veritas, cor autem eorum vanum est? Et verò, semper agentem quod pœnitet, (*S. Isid.*) illudque amantem, nonne reprehendit me cor meum? Væ mihi! Confiteor, non vero dolore, sed aridâ consuetudine; mentior hominibus & non Deo. Ecquandò redibo ad cor, prævaricator!

Doleo de peccatis quia peccavi Domino summè bono & dilecto? Aut saltem, propter gloriæ desiderium, aut gehennæ metum?

Quid profuit Esau & Saül rugiisse & doluisse, turpis lucri & dignitatis gratiâ? Quid mihi pariter prodest amarè flere, si non fleam motivo aliquo supernaturali?

Omnem viam iniquitatis odio habere debeo, quia qui offendit in uno, factus est omnium reus: malum enim ex quocumque defectu. Sed convertor ad Deum in toto corde meo? Nonne parco huic lethali Amalecitæ? ... Si res ita sit, frustrà rogabo Dominum, à quo non ero misericordiam consecuturus.

REFLEXIO XVII.

Propositum.

D Eclarat sancta Synodus, contritionem, cessationem à peccato & vitæ novæ propositum & inchoationem continere: (Trid. Sess. 14. c. 4.) undè illa Christi præcepta: *vade, & jam noli amplius peccare: facite fructus dignos pœnitentiæ.*

Propositum meum non peccandi de cætero, est-ne sincerum, firmum & constans? ... Contendo facere mihi cor novum, ut efficiar nova creatura? ... Cognoscor verè pœnitens ex dignis pœnitentiæ fructibus? ... Si adhuc ago id quod pœnitet, irrisor sum & non pœnitens. (*S. Isid.*)

O monstruosa mea emendationis velleitas!

Reverà, nonne adhuc amo periculum? Si res ita sit, nonne, amans periculum, in illo peribo? Adhibeo emendationis media, scilicèt pœnitentiam medicinalem, examen

particulare, &c. : Enitor exinanire usque ad fundamentum peccatum illud quod mihi dominatur, quodque aliorum est origo : ... Incumbo viriliter curare contraria contrariis : ... Facio pro curandis animæ morbis, quod pro salute corporis : ... Heu mihi ! Id parùm curo. Quid mirum, si statim post Confessionem ad vomitum revertar, si novissima mea fiant pejora prioribus, ac si semper peccanti, aliquid mihi deterius minetur & contingat : Quare : Quia scriptum est : desideria occidunt pigrum. Nonne & me, Deum quodammodò tentantem, occident : Dimittor quidem in pace post absolutionem ; sed heu ! Non est pax in terrâ nisi hominibus bonæ voluntatis. Quòusque ergò detinebor hâc ferreâ peccandi voluntate meâ :

REFLEXIO XVIII.

Confessio.

Omnibus post Baptismum lapsis, integra peccatorum Confessio, jure divino necessaria existit. (Trid. Sess. 14. c. 5.)

Sed, declaro in Confessione peccata occultissima, quæ nonnunquàm animum gravius fauciant, & periculosiora sunt iis quæ manifestè admittuntur : (Trid. Sess. 14. c. 5.)

Quot peccata ut meros scrupulos depono, quæ tamen in me maxima sunt : ... (Trid. Sess. 22. de ref. c. 1.) O miserum me ! Quoniam tacui & taceo, inveteraverunt cæca mea, inveteravit effrænatior peccandi

licentia, inveteravit fortassè sacrilegiorum cumulus. De declarato & propitiato peccato non debeo esse sine metu; cur ergò non anxiatur spiritus meus, & non conturbatur cor meum super tot peccatis & tot circumstantiis Ecclesiæ clavibus non subjectis, in thesauris tamen Dei conditis, stylo ferreo signatis, ac in die ultionis revelandis? Id ipsum parùm recogito corde; ô excors!

REFLEXIO XIX.

Satisfactio.

Satisfactio, populo Christiano fuit perpetuo tempore commendata. (Trid. Sess. 14. c. 8.) Grande scelus grandem habet necessariam satisfactionem. (S. Amb.)

Peccata mea grandia nimis sunt coram Domino: grandis ergò debet esse pœnitentia mea. Attamen, proh pudor! Viam spatiosam sequi, otio, comestationibus, aleis, somno torpidè indulgere non formido, ego qui peccata populi precibus & suffragiis redimere deberem!... Nonne quantum fui in deliciis, tantum patiar tormentum?... Ecquandò exhibebo corpus meum servire justitiæ ad sanctificationem, sicut illud exhibui immunditiæ & iniquitati ad iniquitatem?... Ecquandò peccata mea eleëmofynis, orationibus, aliisque piis operibus, dum tempus habeo, redimere conabor? Si illud velim, quare non modò? Nùmquid expecto dum inciderim in manus Dei viventis? Horrendum!

Prætereà , sum forsan obnoxius restitutio-
ni , propter damnum quomodocùmque illa-
tum , vel propter malè recitata & ôscitanter
cantata Officia & Missas , vel propter va-
nam & fraudulentam à choro , & à parochiâ
absentiam , vel propter omissa onera mei
Beneficii , ex justitiâ adimplenda. Si res
ita sit , quid est cur Cæsari non reddo quæ
Cæsaris sunt ? An mihi latet non remitti
peccatum , nisi restituatur ablatum ?

REFLEXIO XX.

*Vocatio , & ad Beneficia & ad Ordines
ascensio ac assumptio.*

V Idete , Fratres , vocationem vestram ;
monet Apostolus ; quomodò hùc intraſti ,
acerbè queritur Dominus ? In novissimis die-
bus , instabunt tempora periculosa , erunt ho-
mines seipsos amantes , cupidi & elati. De
quibus loqui videtur Gentium Doctòr ? Non-
nè de his Clericis , qui , exemplo Judæ pro-
ditoris , & Simonis Magi , pecuniis & Be-
neficiis inhiantes , jam nunc serpunt ut
cancer in ipsâ Dei domo , quam faciunt
speluncam latronum , mammonæ potiùs quàm
Deo servientes ? Non singuli ad ordines assu-
mi debent , sed digni dumtaxat , & quorum
probata virtus senectus sit , (Trid. Sess. 13.
c. 12.) quique , utpotè boni testimonii viri ,
judicio sui Episcopi sint utiles aut necessarij
suis Ecclesiis ; (Trid. Sess. 13. c. 16.) Sa-
tius enim est , maximè in ordinatione Sacer-
dotum , paucos bonos , quàm multos malos

habere Ministros ; (Conc. Later. 4.) Multiplicaretur quidem gens , sed heu ! non magnificaretur lætitia ; undè hæc formidolosa Apostoli verba : manus citò nemini imposueris , neque communicaveris peccatis alienis. Nonne idem judicium , eademque pœna imminet iis qui Beneficia non distribuunt juxta pondus sanctuarii , juxta mentem & decreta Sacro-Sancti Concilii Tridentini , (Sess. 24. c. 1. & 18. de ref. & Sess. 7. c. 3.) Ac secundùm ordinem charitatis & justitiæ ? Ita sanè. Quis ergò non caveat à serie tot peccatorum alienorum quorum non est numerus , & quorum tamen collatores Ordinum & Beneficiorum se conscios imprudenter & quidem facilè præstare possunt ? Quis non quærat inter dispensatores , ut fidelis & dignior quis inveniatur ?

Quis mihi hanc vocationem revelavit ? An Pater cœlestis , an caro & sanguis ? Si Pater cœlestis elegerit & assumpserit me , beatus ; inhabitabo confidenter in atriis ejus : si verò caro & sanguis , infelix ; quotidie periclitabor.

Quo fine intravi in sanctuarium Dei ? An zelo zelatus pro Domino Deo exercituum , pro meâ & aliorum salute ? An turpis lucri gratiâ , ex appetitu laudis , dignitatis & quietis , ac proditorio & seductrici amore parentelæ ?

Quomodò intravi ; Nonne favore , simulatâ capacitate , turpi mendicatione , iniquâ hæreditate , finistrâ resignatione , pessimâ confidentiæ simoniâ , muneribus à linguâ , vel à manu , vel ab obsequio ,

obreptitiâ vel subreptitiâ dispensatione ? Nonne aliquod ex his monstruosis adminiculis, meipsum, non Deum, decipiens, forsan adhibui ? Verum, si non intraverim in ovile per ostium, sed aliundè, nonne fur & latro sum ? Heu mihi ! non morietur vermis meus.

Et quàmvis pluralitas Beneficiorum contineat certum animarum periculum, (*Conc. Later. 3.*) nonne hæc avidus ambii, falsâque securitate possideo ? . . . An puto sufficere propriam utilitatem ad plura possidenda beneficia ? Erro, affirmat D. Bernardus: requiritur communis; nonne ergò perverto ecclesiasticum ordinem. (*Trid. Sess. 24. c. 17.*)

Si autem dispensationem subreptitiam habeam, quò ibo cum dispensatione meâ ? In infernum, teste Alberto magno; cui enim mentitus sum ? Nonne ipsi Deo ?

Quòd si, aliorum exemplo, moveor ad plura possidenda beneficia, nonne in eâdem damnatione sum ? Quare ? Quia consuetudo sine veritate vetustas erroris est, ut loquitur S. Cyprianus. Ambii, & possideo plura beneficia, ut eleëmofynas dare queam ? O proditoria calliditas ! Verè à satanâ me tentari sino; non enim sufficit hoc propositum, nisi Ecclesiæ necessitas aut utilitas aliud postulet. Verè mihi viam ad luxum & ambitionem paro: si multum mihi fuerit, abundanter quidem tribuere debeo; si autem exiguum, sufficit ut & illud libenter impertiar. Nonne ergò meipsum, non Deum decipio ? Nonne fraudo fundatorum inten-

tionem, ut rectè loquitur D. Thomas :

Forſan ambio, aut certè poſſideo duo beneficia quia ſum Canonicus, & nobili genere natus, vel quia meus Canonicatus non ſuppetit undè vivam honeſtè ſecundùm meum ſtatum. Hæc cauſa valet quidem juxta Concilium Tridentinum: (*Trid. Sef. 24. c. 17.*) fed ô quàm metuendum eſt ne mentiatur iniquitas ſibi! Quot Canonici & Paro- chi, & quidem me nobiliores & meritis præſtantes ſunt, qui æquali beneficio non ſolùm honeſtè vivunt, ſed etiam habent undè pauperibus diſpergere poſſint: Undè fit ut meum beneficium, quàmvis ſat pingue, non ſufficiat interdùm ſumptibus meis: Undè fit: Quia aleis, comefſationibus nimium indulgeo, quia me como veſtibus & munditiis corporis nimis pretioſis, quàmvis hæc omnia, non obſtantibus conſuetudinibus, prohibeantur. (*Trid. Sef. 24. c. 17.*) Quàm ſecus, inſtante morte, & coram Chriſto judice, ſentiam de hâc ſeduc- tricè meâ illuſione!

O! Si illam ſimplicitatem quam aded commendat Tridentina Synodus, in menſâ, in ſuppelleſtili, in veſtitu, & in reliquo vitæ genere præ me ferrem, (*Trid. Sef. 22. de Ref. c. 1.*) nùmquid necelle eſſet ut beneficia beneficiis, præbendas minores majoribus, penſiones penſionibus aggregarem, Eccleſiaſq; Eccleſiis: (*S. Ber.*)

Sed tandem moriar, cupidus & elatus ego homo; hæc quæ paro & congre- go beneficia, cujus erunt: Hæc mecum non ſumam, ea alienis relinquam; mihi verò ſo-

lum supererit sepulchrum. Ecquid? Si damnatio ambitioni meæ debita, me sequatur! Nūmq̃uid illa præteribit? Heu! Minimè. Quid mihi tunc proderit divitiarum jactantia?

Quàmvis multis nunc augear beneficiis, affluam divitiis & honoribus; sepultus tandem in inferno, in æternum ululabo; aquæ guttulam obtinere numquàm potero. Horrendum discrimen!

O ambitio ambientium crux! Quomodo ergò omnes torquens, omnibus places? (*S. Ber.*)

Deniquè, si quem indignum, carni aut sanguini, aut respectui humano acquiescere volens, in Ecclesiam, aut in Beneficium intrusi rejectis dignioribus; nonne spiritu in æternum gemens, & desperatione actus, vorabo carnem brachii mei? Nonne tot ovium perditarum sanguis de manu requiretur meâ? Nūmq̃uid hi Ministri quos indignos ad regale sacerdotium exaltavi, & ad animarum curam promovi, surgent ut mihi in inferno opitulentur?

REFLEXIO XXI.

Perfectio proprii statûs.

Ministerium tuum imple, monet Apostolus; quia ambulans vocatione quâ vocatus es, quæ placita sunt Deo, semper, & quidem securè facies: hæc est villicatio in quâ præcipuè consistit sanctificatio tua quam Deus vult; villicatio de quâ strictam reddes rationem.

in die judicii. Cætera interdum vanitas, & præsumptio spiritûs, fascinatio nugacitatis, illusionum abyssus, & animæ perdendæ periculum. Sic meritò censent qui, non ex voluntate carnis, neque ex voluntate viri, sed ex Deo nati sunt.

Quale est ergò cor meum erga munia & onera mei statûs, in quo, ut confido, me Spiritus Sanctus posuit regere Ecclesiam Dei, me & alios salvos facere? ... Quot ignorantibus, quot negligentibus, quot omissionibus thesauris mihi iram Dei in novissimis diebus? Heu! Hæc animo recogitanti, jam undiquè mihi sunt angustiae; quàmvis enim mirabilia magna fecerim aliundè, quid mihi proderit, si voluntati Dei contradicens, & erga plurima aliena turbatus, defuerim munis proprii statûs, vel ea secundum beneplacitum Christi, & dignè Deo non impleverim? Quòusque ergò à Satanâ me tentari sinam? Quòusque errabo, ambulans difficiles & fallentes vias. Domine Jesu! cogitavi vias meas; ecce nunc convertito pedes meos in testimonia tua, in tuum exemplum, in semitam Virginis matris tuæ, & omnium Sanctorum: in his totus ero, ut profectus meus sit coram te & omnibus manifestus, & ut securus ad te veniam, qui ministerium & cursum suum dignè & constanter consummantibus, reponis coronam justitiæ. Paratum est cor meum in te, Domine, sperare: confirmatum est cor meum; non commovebor donec despiciam inimicos meos, quibus hætenùs illusor sum; tu es defensor

406 PRÆPARATIO PROXIMA
vitæ, perfectionis & salutis meæ, à quo
trepidabo ?

R E F L E X I O X X I I.

Studium & Scientia.

P Ræceptum sempiternum est in generatio-
nes vestras, ut habeatis scientiam dis-
cernendi inter sanctum & profanum... (Exo.
28.) Quia repulisti scientiam, repellam te,
ne Sacerdotio fungaris mihi.... (Osee 4.)
Si quis ignorat, ignorabitur. (1. Cor. 4.)
Erudimini ergò, qui judicatis terram. (Ps.
2.)

Quapropter attendo studio & scientiæ
Casum conscientiæ, Canonum, Rituum,
Rubricarum, & Scripturæ sacre, hujus
Libri vitæ, & aliarum obligationum mea-
rum : Nonne ignorantia laboro, quia
nolo intelligere ut benè agam : Quis
fuit, quis est illius ignaviæ & ignorantiae
effectus ? Deus illum scrutabitur, eumque
in furore suo manifestabit. Quot cæcos,
ego cæcus, in foveam mecum præcipita-
vi ? Quoties, præ ignorantia meâ, factus
sum sicut populus, ego Sacerdos, & op-
probrium hominum ? Proh pudor !

Verùm, quàmvis studeam, quo fine
studeo ? Scriptum est : scientia inflat. Do
operam ut scientiam meam charitas ædi-
ficet ? Heu ! si linguis hominum loquar
& Angelorum, charitatem autem non ha-
buerò, quid mihi prodest ?

Si ergò scientiam Sanctorum acquirere

neglexero , semper quidem discere poterō ; sed in vanum laborabo , & ad scientiam veritatis , testante Apostolo , nunquam perveniam. Et quare ? quia Pater & Dominus cœli & terræ , qui hæc parvulis revelat , abscondit ea à sapientibus & prudentibus seculari doctrinâ inebriatis , inflatis & ingurgitatis , ut loquitur D. Bernardus. Cum simplicibus fermocinatio ejus , & intellectum dat parvulis.

Domine Jesu , qui linguas infantium difertas facis , & qui infirma mundi eligis ut fortia quæque confundas , ne gloriatur omnis caro in conspectu tuo , da mihi supereminentem scientiæ charitatem tui , ut implear in omnem plenitudinem Dei ; quapropter , da mihi spiritum tuum , ut quærens te in simplicitate cordis mei , te Deum , & scientiarum Dominum inveniam : hoc est ante te omne desiderium meum. Noverim te , noverim me , & doctus sum satis.

REFLEXIO XXIII.

Schismaticorum , & suspectorum librorum horror.

Atendite à falsis Prophetis , qui veniunt ad vos in vestimentis ovium ; intrinsecus autem sunt lupi rapaces. (Matth. 7.) Molli sunt sermones eorum super oleum , sed ipsi sunt jacula , & quidem intento arcu ita ad nocendum parata , ut sagittent in obscuro rectos corde. Quinimò , seductores illi , mendacii Parentis exemplo ac magisterio edocti ,

pestiferos libros studiosè nimis quaquaversum disseminant, ut nefarii erroris contagium, si fieri possit, pertranseat de gente in gentem, & de regno ad Populum alterum. Rogamus ergò, Fratres, ut sedulò observetis hos magistros mendaces & in deceptione illusores, qui dissensiones & offendicula, præter doctrinam quam vos didicistis, faciunt, & qui per dulces sermones & benedictiones seducunt corda innocentium; hos sermones, qui sunt venenum aspidum sub labiis eorum, detestemini, eorumque consuetudinem quasi pestem fugite; scriptum est enim: cum perverso perverteris.

His ergò monitis edoctus, fugio, quasi à facie colubri, hos auctores qui erraverunt ab utero, qui, insipientes corde, locuti sunt falsa, & qui, sub præclarâ pietatis & veritatis specie, à veritate auditum averunt impii, lethale venenum & serpentinos errores longè latèque disseminant... Nonne hi sunt seductores & antichristi, quibus vel ave dicere prohibeor, ne communem erroribus & operibus eorum?

Nùmquid autem eligo & avidè lego auctores qui Ecclesiæ Romanæ, Ecclesiarum matri & magistræ (*Trid. Sess. 7. Can. 1.*) fideliter adhærentes, docent semper, & profitentur verbo & opere quæ decent sanam doctrinam? Si sunt filii Dei, nonne his ergò, viam Dei in veritate docentibus adhærere, in deliciis habere debeo? Imò, Domine, eorum solùm doctrinam firmiter tenebo; attamen rogo te, ô summe scrutator rerum & cordium, da mihi scientiam discernendi inter veros & falsos Catholicos

tholicos & educendi noxia zizaniorum femina è medio tritici, ne infeliciter incautus decipiar; quod à me avertat illa sapientia tua quæ suaviter omnia disponit.

REFLEXIO XXIV.

Extrema opinionum vitanda.

VÆ qui dicitis malum bonum, & bonum malum, ponentes tenebras lucem, & lucem tenebras: ponentes amarum in dulce, & dulce in amarum. (Isa. 5.) Cavenda est conscientia nimis larga, & nimis stricta: nam prima generat præsumptionem, secunda, desperationem: item, prima sæpè dicit malum bonum; secunda è contrà, bonum malum: item prima sæpè salvat damnandum; secunda è contrà, damnat salvandum. (S. Bonav.)

Si ergò indulgentior sim quàm par est; nonne me & animas deduco per spatiosam & latam viam quæ ducit ad æternam perditionem: scriptum est enim: si cæcus cæcum ducat, ambo in foveam cadunt. Et quare? Quia tunc ex illis sum quibus Dominus indignatur & maledicit, quia consuunt pulvillos sub omni capite, & faciunt cervicalia sub capite universæ ætatis; (Ezech. 13.) qui dicunt videntibus: nolite videre; & aspicientibus: nolite aspicere nobis ea quæ recta sunt: loquimini nobis placentia, videte nobis errores. (Is. 30.)

O quantam morum relaxationem; & cri-

S

minum, etiam atrocissimorum, licentiam peperit, & quotidie parit hæc falsorum prophetarum, & propriæ innitentium prudentiæ pertinax factio! Quot animas, blandè & molliter seductas, ducit ad perditionem, & in dies ducit hæc sæva nimis indulgentia! Nonne hæc opinionum portenta Alexander VII. jure merito proscripsit & anathematizavit? An facile concipitur potuisse ea hominibus probari quibus aliqua rationis & probitatis scintilla superesset? Cur ergo me & alios inanibus verbis seduci sino? Quòdusque tandem, proprio abdicato sensu, communi bonorum judicio me conformare renuam? O quàm verè dictum est filios hujus seculi prudentiores filiis lucis in generatione suâ esse!

Verùm, quid sentiam in horâ mortis, & ante tremendum Judicis tribunal, de hæc laxiori indulgentiâ, & de his fabulis ad quas me & alios converto, & quibus me & alios usque ad inferni novissima projicio?

E contra, si in conscientiæ rebus severior sim, hominum imbecillitati rationem minimè habens, nec consilia à præceptis discernens; dùm illos ad nimis ardua compello, viam salutis æternæ, quam Christus illis aperuerat, præcludo; nonne salvandos damno? (*Bonav.*) Quare? quia accidit ut miseri homines, hæc auditâ severiori doctrinâ, credant, aut dubitent inesse culpam mortalem ubi nulla est; sed tamen rei difficultate victi, ex erroneâ conscientiâ mortaliter peccent & damnentur. Proh miseranda fors!

Quâ ergò temeritate alligo & impono in humeros hominum onera gravia & importabilia, quæ Patres & Doctores juxta cor Dei non imposuerunt, & quæ digito meo ipse forsan movere nolo? Nonne jugum Domini suave est, & onus ejus leve? Licetne mihi esse austero, ubi bonus & benignus est Dominus? Nonne fidelis dispensator inveniri debeo?

Verùm, si præ nimia austeritate, homines propriæ infirmitatis conscios, ad desperationem & perditionem adigam, nonne communico illorum peccatis? Nonne illorum damnationis reus, in æternam foveam & perditionem, unà cum illis casurus sum? Proh detestanda severitas mea!

Domine Jesu, qui non vis mortem peccatoris, da ut discam & sciam, exemplo tuo, compati & condolere hominum infirmitatibus. Hanc deinceps servi tui D. Gregorii Nazianzeni tenebo doctrinam: *Noli justitiæ rigidæ & inflexibili, neque prudentiæ versatili addictus esse; optima est in omnibus moderatio.*

Da mihi sapientiam, ut sciens reprobare malum & eligere bonum, ambulem coram te, misericordiam inter & veritatem.

Soleo quidem statim reprobare quæcumque non sapiunt extremam rigiditatem; sed in me reversus, tuæque benignitati inposterum adhærere volens, hoc sacri Canonis monitum fideliter observare conabor: *In his verò ubi jus non invenitur expressum, procedas, æquitate servatâ semper, in humaniorem partem declinando, se-*

Sij

eundum quod personas & causas, loca & tempora videris postulare. Hæc erit, te duce, te adjuvante, & dirigentibus bonis Pastoribus, via quam sequar, ut iustitiam diligens, ad pacem autem prudenter proclivior, securus ad te perveniam; & omnibus, quoad fas erit, omnia factus, eos tibi in æternum lucrifaciam.

REFLEXIO XXV.

Firmissima Ecclesiæ Romanæ, & sanæ doctrinæ adhæsiō.

B*Eatus es Simon Barjona! quia caro & sanguis non revelavit tibi, sed Pater meus qui in cælis est; & ego dico tibi: quia tu es Petrus, & super hanc petram ædificabo Ecclesiam meam, & portæ inferi non prævalebunt adversus eam, & tibi dabo claves regni cælorum; & quodcumque ligaveris super terram, erit ligatum & in cælis, & quodcumque solveris super terram, erit solutum & in cælis... Pasce agnos meos; pasce oves meas... Ego autem rogavi pro te, Petre, ut non deficiat fides tua; & tu aliquandò conversus, confirma fratres tuos... Ecclesia Romana omnium Ecclesiarum mater est & magistra... (Trid. Sess. 7. Can. 1.) Una fides, unus Dominus, unus Pastor... Una est Fidelium universalis Ecclesia, extra quam nullus omnino salvatur... (Conc. Lat. 4.) Quænam ergo iusta, præscidendæ unitatis, causa esse potest? (S. Aug.) Qui habet aures audiendi, audiat; & qui potest capere, capiat.*

II. Nolite omni spiritui credere ; sed probate spiritus si ex Deo sint. Veniet illud tempus cum sanam doctrinam non sustinebunt ; ecce jam venit : multi enim Prophetæ exierunt in mundum . . . Qui novit Deum , audit nos . . . In hoc cognoscimus spiritum veritatis & spiritum erroris . . . Qui vos audit , me audit ; qui vos spernit , me spernit . . . Noli esse incredulus , sed fidelis , & loquere , ex abundantia cordis , quæ decent sanam doctrinam ; Dominus locutus est ; Ecclesia Romana , columna & firmamentum veritatis , locuta est : causa finita est. Igitur firmiter crede , benè vive ; & nihil timeas , salvus eris.

Cum ergò Romana seu Apostolica Sedes centrum sit ac vinculum unitatis & communionis catholicæ , juxta omnium Catholicorum doctrinam , nùm Catholicus haberi possem , si , unitate fidei ac doctrinæ , cum eâ conjunctus non essem ? Erro ; quidquid aliud suggerant Schismatici , in eâdem sum damnatione. Ecquid tandem audirem ego , segregatus ab unitate Ecclesiæ visibilis , cujus caput extat Christus , nisi ista formidabilia verba : *recede à me , putre membrum ; Ecclesiam audire noluisti , ethnice & pagane ; justum est ut ab æternâ Fidelium communionem in æternum discedas ; te diabolo spiritui erroris conjunxisti , stet in æternum à dextris tuis ipse diabolus.*

Quid timeo , si hanc à Jesu & à Fidelium communionem separationem non timeam ? Surgeret-ne hæc Schismaticorum & Hæreticorum factio , ut mihi in infer-

no opitularetur ?

Insuper , si Pater cœlestis revelarit Petro ejusque successoribus quæ mihi credenda proposuerunt ; si Spiritus Sanctus in eis loquitur ; si veritatem dicunt mihi , ut constet tamquàm certissimum veræ fidei ac purioris doctrinæ signum & argumentum , quid est cur non crederem ? Quare dubitarem ? Fides est quidem argumentum non apparentium ; nonne tamen beati sunt illi qui non viderunt & crediderunt ? Nūquid portæ inferi prævalebunt adversus Romanæ Ecclesiæ fidem ? Nonne testimonia quibus illa nititur , credibilia facta sunt nimis ? O insensate ! Quis me adeò fascinaret ut non obedirem veritati , adhærerem autem tot Schismaticis & Hæreticis , qui præsumptione , temeritate , libidine & malitiâ excæcati , ac in reprobum sensum traditi , depravant scripturas ad sui perditionem , Ecclesiam Dei pertinaciter conturbant , Evangelium Christi convertere volunt , serpunt ubique ut cancer , ut in errorem inducant , si fieri potest , etiam electos , dicentes impii in corde suo , & publicè : nolite credere Ecclesiæ definitionibus ; sequamini vias nostras ?

O inconsiderate ! quid periclitor credendo definitionibus Ecclesiæ Romanæ ? Nihil. Quid è contra incredulitate meâ non periclitor ? Innumera periclitor mala ; nam etiamsi mirabilia magna facerem , & corpus meum in servitutem redigerem , quid mihi sine fide prodesset ? Nonne per arctam pœnitentiæ viam me in perditionem

ducerem ? Nonne jam judicatus essem , & in proprio iudicio condemnatus ? Quare ? quia sine fide impossibile est placere Deo.

Deploranda ergò Schismaticorum rebellio. Sed , ô beata nimis Fidelium obedientia ! Ista enim est tuta & brevis ad gratias singulares & ad salutem via. Quidni & ego Ecclesiæ Romanæ fidelis essem usque ad mortem ?

Sed tandem cœlum & terra transibunt ; verba autem Domini Jesu , qui est ipsa veritas , & qui loquitur in Ecclesiâ & per Ecclesiam , non præteribunt ; transibo & ego , quantumvis incredulus essem ; Domini autem triumphatrix veritas , in æternum permanebit ; nûmq̃uid damnatio incredulitati meæ debita præteriret ? Heu minimè ! In æternum experirer quod nunc credere nollem ; tunc , præ angustia spiritûs gemens , dicerem semper & invitus , sed heu , frustra ! Ergò erravi corde & gravi corde.

Domine Jesu , qui venisti à Deo magister , & qui viam Dei in veritate doces , confirma me in verbis tuis , & in fide Romanæ Ecclesiæ ; da mihi , quæso , ut sim docibilis corde ut parvulus ; vae mihi , si aliquandò deficeret fides mea ; adjuva incredulitatem meam. Approbo quidquid Ecclesia Romana approbat ; anathematizo quidquid illa anathematizat ; abrenuntio spiritui erroris , & Angelo satanæ , qui sæpè transfiguratur in Angelum lucis , ut incautos decipiat , & incredulos seducat & obduret : profiteor coram te & omnibus

S iv

viventibus, quòd firmiter credam quidquid Romana Ecclesia haftenùs docuit & deinceps doctura est, & quidem in eodem sensu in quo illa, quam tu ipsa veritas regis & reges usque ad consummationem seculi, illud intelligit & intellectura est. Adauge fidem meam; paratus sum & non sum turbatus in carcerem & in mortem potius ire, quàm ab illâ verâ & Apostolicâ fide, quam ore & corde profiteor, deflectere. Da mihi, supplex oro, ut in hac fide fortis usque in finem perseverem. Quinimò, ô Domine Jesu, qui loqueris in nobis, & qui ex ore infantium & lactentium perfecisti laudem, ut destruas inimicum & ultorem, da mihi os & sapientiam cui non possint resistere omnes adversarii tui, & quâ, inobedientes, si locus sit, viriliter redarguere valeam, eosque in veritatis viam reducere.

Verùm, ô anima mea, vivis ex fide sicut justus? Pensa, & iterùm pensa quòd fides sine operibus mortua sit; vae tibi, si voce fatens Christum, eum factis neges! Nonne Regina Austri, ipsi ethnici & pagani surgerent adversus te in magnâ constantiâ, condemnantes te in die Iudicii? Absit. Igitur opere comple quod fide tenes, ne de ore tuo judiceris.



REFLEXIO XXVI.

Horæ Canonicae.

Recitare debeo horas canonicas dignè ;
 attentè , studiosè , & devotè. (Concil.
 Later. 4)

Spiritus quidem promptus est , caro autem infirma ; spiritus est vadens & non rediens , & caro concupiscit adversus spiritum ; attamen , quotiès , dùm psallo in conspectu Angelorum , vagatur mens mea , aret cor meum , quia vim in illud non facio ut sim attentus & devotus , quia dilexi verba præcipationis , lingua dolosa , & quia dedi locum Diabolo , id est , distractioni ; quâ fronte me audiri postulo à Deo , cùm ipse me non audiam ? (*S. Cypr.*) Omittere officium absque causâ , est peccatum mortale ; sed recitare illud cum distractionibus , directè vel indirectè voluntariis , quid est ? Prophetisa , anima mea , simul & time.

Insuper , quid redolet inordinatio temporis & modi recitandi Officium , nisi modicam fidem & amorem tepidum ? Nonne peccati venialis macula me interdum coïnquinat ?



REFLEXIO XXVII.

Pia in choro residentia, & scientia cantûs.

Quisquis non assistit Horis in choro, non acquirit dominium distributionum, nisi excusetur infirmitate, vel justâ & rationabili corporis necessitate, aut evidenti Ecclesiæ utilitate. (Trid. Sess. 24. de Ref. c. 12.) Beneficium propter officium. Si quis non vult operari, nec manducet. Præterea, graviter reprehenduntur Clerici tardè chorum ingredientes, vel ante officium expletum exeuntes, vel ibi confabulantes, &c. (Clem. 1. c. dolentes de Miss. cel.) *Psallete Deo nostro, psallete sapienter, inquit Propheta.*

Nonne tamen absûm interdùm à choro absque rationabili causâ? In verticem meum descendet fraus meâ... Nonne blandior mihi in cantandis Horis? Canonicus à canendo nomen accipere dicitur. Laudo Deum distinctè, reverenter & devotè? (Trid. Sess. 24. de Ref. 1. 12.) Quoties forsan accepi fructus quos non debuissim facere meos? Nonne Deus, qui novit abscondita cordis, & qui vult adorari in spiritu & veritate, requirit illos?

Quoties, ob præcipitantiam & nauseam, recito versum meum, nondùm integrè absoluto nec à me audito sociorum versu, nec in medio versuum spirans; quinimò abscindens interdùm syllabas? Quoties deniquè accidit, ut chorum non ingrediar nisi tardè; & ut hinc exeam ante exple-

rum officium? Quid hoc sapit, nisi Canonum contemptum, mercenariorum morem, tepidum gloriæ Dei zelum, pusillorum scandalum &c? Nonne & ego reprehenderem operarium quem conduxissem, quique in vineam meam non nisi tardè iret, & indè recederet nondùm expleto solito opere? Ita fanè: cur ergò me ipsum non reprehendo? Sed tandem Deus ultionis reprehendet me. Prætereà, scio tantum planum ut cantus & soni graves sint & pii, & ut ad pietatem auditores excitentur? (*Conc. Mediol.*) O homo modicæ fidei!

REFLEXIO XXVIII.

Missæ sacrificium.

Accipite, & comedite. Probet autem seipsum homo, & sic de pane illo edat, & de calice bibat; qui enim manducat & bibit indignè, judicium sibi manducat & bibit... Oportet ut non solùm præpares te ad devotionem, ante communionem; sed ut etiam te sollicitè conserves post Sacramenti perceptionem, (*Imit. Chr.*) ut gustare possis quàm suavis sit Dominus.

Verùm, quotiès, præ falsâ humilitate; & quò liberius secundùm carnem vivam, me elongo ab altari & à throno gratiæ? Quotiès Panem Angelorum, tanquàm levissimum cibum, fastidio? Quid sapit illa protracta nimis Missæ celebratio, nisi contemptum, scandalum, sterilitatem animæ;

& proximam mortem ? Nisi enim manducaveritis , dicit bonus Pastor , non habebitis vitam in vobis.

Quâ devotione perago sacro-sanctum Missæ sacrificium ? Nonne , quia cursim , & perfunctoriè incumbo , tùm præparationi ad Missam , tùm celebrationi ipsius , tùm gratiarum actioni , fame pereor in ipsâ mensâ Domini , aret cor meum ; & est anima mea sicut terra sine aquâ in ipsis fontibus Salvatoris ? Nonne , imbecillis & dormiens , periclitor multùm ne reus Corporis Domini tandem fiam ? Horrenda catastrophe ! Terribilis exitus , si perceptio Corporis Christi proveniret mihi in iudicium & condemnationem ! Cur ergò meipsum accuratiùs non probo , & in actualem animi devotionem non incumbo ?

Quo fine celebro ? An magnificandi Dominum ? An turpis lucri & respectûs humani gratiâ ? Respondeat cor meum.

REFLEXIO XXIX.

Sancta Mysteriorum Dei dispensatio.

Sancta sanctè tractanda sunt. Si Dominus ego sum , dicit Deus exercituum , ubi est honor meus ? Ad vos , ô Sacerdotes.

Hoc fateor. Sed quâ devotione distribuo Fidelibus sanctissimum Christi Corpus , & tracto alia divina Mysteria quorum dispensator sum ? An molestè ; an hilariter ? An usu ; an affectu ? An purâ intentione ;

an torpidâ ? An sanctè & ferventer ; an tepidè & perfunctoriè ? An vero , an ficto animo ? Nonne fidelem dispensatorem , hilarem ac sincerum datorem diligit Deus , ut in omnibus honorificetur in ædificationem Corporis Christi ? Quotiès tamen , hâc meâ rerum sacrarum indignâ tractatione , inhonoro Deum , scandaliso pusillos , ipsosque Paganos ? Quid ergò de me sentio , servus nequam ? An ignoro eum maledictum vocari qui facit opus Dei negligenter ?

R E F L E X I O X X X.

Reverentia Ecclesiis exhibenda.

Templum Domini sanctum est ; domus Dei , locus orationis. Sanctuarium meum metuite , ego Dominus.

Quâ ergò devotione introëo in domum Dei ? . . . Quo timore adoro eum ad templum sanctum ejus ? Dominum benedicere jubeor ego qui sto in atriis & in domo Domini ; sed quomodò eum hîc honoro ? An corde , an labiis tantùm ? . . . Paveo ad ejus sanctuarium , juxta eam quæ illud decet sanctitudinem ? . . . Nonne scandaliso pusillos , & ipsos Laicos ; eosque , garruens , distraho in hoc orationis loco ? Undè fit ut non dijudicem domum Domini ? Non possum sic excusare excusationes : locus iste sanctus est , & ego nesciebam. Undè ergò accidit ut tam parùm paveam ? Heu ! Nimirum quia paulatim deficit fi-

des mea, & quia, præ aridâ consuetudine, & turpi interdum lucro, in templum intranti, vilescit mihi terribilis ille locus. Obstupescite, cœli, super hoc! Cur ipse non stupefco, ego reus?

REFLEXIO XXXI.

Rituum & Canonum observatio.

Qui timet Deum nihil negligit... Iota unum, aut unus apex non præteribit à lege, donec omnia fiant. Omnia ergò honestè & secundum ordinem fiant... Ama, & fac quod vis, inquit D. Augustinus.

Sum in modica fidelis? An ea sperno? ... Observo cæremonias & rubricas, simul & canones ac statuta diœceseos circa vestem clericalem, tonsuram, comam, modestiam, frugalitatem, & alia hujusmodi, sive fugienda, sive observanda? Quid mea mihi objicit conscientia? Væ mihi, si ex transgressione horum rituum & canonum, qui vitæ meæ regula extant, oriatur contemptus, scandalum, &c. Nonne adsunt? ... Nonne saltem, in modico iniquus, in majori, seriùs ociùs, iniquus ero? Dominus locutus est: heu! Nonne id & ego expertus sum? Quid nunc facere volo? Si rem grandem mihi concilia & statuta dicerent, ecce tacere deberem; sed quantò magis cùm dicitur mihi: *sis in modico fidelis*; caput inclina quotiès pronunciatur nomen Jesu, Mariæ, Patroni Ecclesiæ tuæ, & Sancti de quo fit

officium, &c. Eandem fidelitatem observa circa alias rubricas: hoc fac & vives? Nonne ergò inexcusabilis sum, si his desim?

REFLEXIO XXXII.

Imitatio Christi, & vita spiritualis.

Ego sum via, veritas, & vita... Qui sequitur me, non ambulat in tenebris, sed habebit lumen vitæ, dicit Dominus. Undè Apostolus, imitator Christi, sic gloriatur: vivo ego; jam non ego, vivit verò in me Christus.

Ecquis debet esse magis conformis imagini Christi, quàm ego qui ejus minister sum? Studeo ergò, ejus exemplo, esse fervens, sanctus, mitis, & humilis corde, zelator animarum proficere sapientiâ & gratiâ? In hoc tamen positus sum, ut semper sentiam in me quod & in Christo Jesu. Quâ alacritate inspirationibus ejus ad perfectiora vocantis, respondeo?

Enim verò, quale est cor meum erga exercitia spiritualia? An jucunda mihi sunt, an molesta? Impendo libenter solitudini, orationi, meditationi, lectioni, examini, puritati conscientiae, cordis & mentis? Cogito frequenter & piè de Deo? Delector & gaudeo in Jesu, Deo & salutari meo? Mortificor propter illum, non quidem totâ die, sed saltem interdum per diem? ... O quàm libenter hoc sacrificium justitiæ, has oblationes, hæc medullata holocausta acceptaret! O quàm ad-

424 PRÆPARATIO PROXIMA
mirabiles ascensiones disponeres in corde
meo ! Heu ! Hæc omnia exercitia , eo-
rumque unctiones fastidio , quia usum non
habeo , & quia non diligo Jesum-Christum.
Quid redolet illud fastidium ? Quid vati-
cinatur ? Ipse viderim.

REFLEXIO XXXIII.

Bonum exemplum.

Nihil est quod alios magis ad pietatem
assiduè instruat , quàm eorum vita &
exemplum qui se divino ministerio dedica-
runt , &c. (Trid. Sess. 22. de ref. c. 1.)
Undè lucere jubentur , ut glorificetur Pater
cælestis , & ædificentur Fideles.

Quæ cùm ita sint , nùmquid sum bonus
odor Christi , & exemplum Fidelium ; an
lapis offensionis & petra scandali ? Quid
respondet cor meum ? ... Nonne accidit
ut non modò non faciam modestiam meam
coram omnibus hominibus notam , sed
è contra , communicem peccatis alienis ,
sivè verbo , sivè gestu , sivè incessu , &
mille aliis indecoris modis ? Proh scelus !
Parùmne est quòd iniquitates meæ , sicut
onus grave , gravatæ sint super me ? Quid
est quòd alienis graver ?

O Jesu ! A peccatis alienis parce servo
tuo. Concede mihi , ut in spiritu satisfac-
tionis , sim deinceps coram te & homi-
nibus lucerna lucens & ardens.



REFLEXIO XXXIV.

Munia pastoralia.

Interroga Majores tuos, & dicent tibi: Rectorem te posuerunt? Noli extolli; sed, cum timore, ministerium tuum, humeris Angelicis formidandum, imple; vigila, in omnibus labora, opus fac Evangelistæ. Durissimum judicium his qui præsumt fiet. Anima pro animâ, dens pro dente. Quis est ille Pastor qui audiens auditionem Domini, jam non timeat?

Quàmvis solius Dei sit suscitare sibi Sacerdotes fideles & Pastores juxta cor suum, qui facti forma gregis ex animo, ducant eum ad pascua vitæ æternæ. Nonne tamen mendicatione, favore, sinistrâ resignatione, turpis lucri, quietis, & vanitatis gratiâ, vel seductrici erga parentes, affectu, effrænatus suscepi animarum curam? Nonne scientiâ, Dei spiritu, legis & animarum zelo vacuus? O pauperes greges dispersi, & jam jam à lupis vorandi! Quis medebitur vobis? Quis & cæco pastori medebitur mihi?

Quod ignorat medicina, non curat. Satis ergo scire & callere munia & onera ministerii mei? Ars artium est regimen animarum. Verùm, licet in horum scientiam incumbam, sum-ne in hæc fidelis?

Pascere jubeor qui in me est gregem. Dei; sed, quo zelo inardesco erga animas mihi commissas, pretioso sanguine

Agni immaculati redemptas , & quorum sanguis de manu meâ est requirendus ? Sum Pastor bonus , an mercenarius , & idolum Pastoris ?

Speculatorem dedit me Dominus domui Israël. Sed vigilo ? Habeo oculos anre & retrò ? Verùm , si præsens sim corpore , nonne spiritu absens sum ? Nùmquid non sum canis mutus , & cæcus speculator , videns vana , dormiens , & amans somnia ; simulachrum , os habens & non loquens ; oculos , & non videns ; pedes , & non ambulans ? Væ mihi , si iussus annuntiare incessanter populis scelera eorum , ignavè tacuero !

Curationem quidem non exigor , sed curam. Incumbo cognoscere oves meas ? Offero pro his Missæ sacrificium , secundùm mensuram reddituum meorum ? Pasco eas , saltem diebus Dominicis , verbi divini prædicatione , (*Trid. Sess. 6. de ref. c. 1.*) facilitate & brevitate sermonis ? Catechiso affectu paterno & in spiritu lenitatis , infantes & rudes ? Prædico meipsum , an Jesum-Christum ? An turpis lucri gratiâ , an parandi Domino plebem perfectam ? An verbo & linguâ tantùm ; an opere , veritate , & exemplo ? Væ mihi , si adulterem verbum Dei ! Nonne illud adultero ?

Administro ovibus meis Sacramenta , quotiès indigent , & rationabiliter illa petunt ? Sum fidelis dispensator Sacramentorum , an dissipator , dando Sanctum canibus ? O quàm multi Ministri

sacrilegiis cooperti , gemunt & ululant in inferno , ob projectas ante porcos margaritas ! Væ mihi si hoc exemplo edoctus , & iniquâ miseratione adhuc commotus , Sacramenta à canibus conculcari sino !

Discite à me quia mitis sum corde , dicit Princeps Pastorum , Christus. Verùm habeo & adhibeo illum spiritum lenitatis , quo ipse , & Pastores , juxta cor ejus , usi sunt ad alliciendas & lucrandas animas ? Paratus sum omnibus ovibus omnia fieri , & pro eis , si necesse sit , animam meam ponere , ut omnes salvas faciam ? Eligo tempus & momenta opportuna , simul & modum salutarem , ut fructuosa sit correctio facienda ? Scio dissimulare , saltem ad tempus , minus peccatum , ad præcavendum majus ? Quo fine corripio delinquentes ? An in odium peccati , an in odium ipsorum delinquentium ? Nonne facile credo susurris , in populo discordias & schismata disseminare paratis ? Si non habeam hunc spiritum lenitatis fluentem lac & mel , illamque Dei sapientiam , suaviter omnia disponentem , quonam ausu puto & ego quòd spiritum Dei habeam ? Verè nescio cujus spiritûs sim. Non in commotione Dominus. Patientia ergò mihi necessaria est. O si haberem charitatem Dei , haberem & patientiam ; quia charitas patientis est , & benigna.

Attamen , si ob delinquentis contumaciam , & delicti gravitatem , virgâ opus fuerit ; adhibeo tunc cum mansuetudine vigorem , cum misericordiâ judicium , cum

severitate lenitatem, ut, cum asperitate, disciplina salutaris & necessaria conserve-
tur? (*Trid. Sess. 13. de Ref. c. 1.*) Erro fa-
nè si non efficiam ut, hoc temperamento,
misericordia & veritas obvient sibi, & ut
justitia & pax invicem osculentur. Ecquid,
si contra Fideles mihi commissos, levi de
causâ, litigem? Ego qui sum angelus pa-
cis, ego qui sic quotidie oro: *Extingue
flamas litium, ne litis horror insonet.*
Nonne debeo vincere in bono malum?
Ita fanè, ut quondam gloriari queam:
cum his qui oderunt pacem, eram paci-
ficus; cum loquebar illis, impugnabant
me gratis.

Nûmq̃uid pauperum, aliorumque mise-
rabilium personarum paternam curam ge-
ro? (*Trid. Sess. 6. de Ref. c. 1.*) Impen-
do in hos pauperes, præsertim ægrotos &
verecundos, vel in alios pios usus, par-
tem fructuum honestæ sustentationi super-
fluam? Quid timeo, si non timeam ista
formidolosa verba, nimirum: *Esurivi, &
non dedistis mihi manducare, &c. Lac co-
medebatis, & lanis operiebamini, gregem
autem meum non pascebatis, &c. Discedite,
in ignem æternum?* Nonne hi pauperes
quos occidi, quia hos non pavi, stabunt
in magnâ constantiâ adversum me?

Ut autem multos lucrifaciam Jesu-
Christo, concilio mihi suaviter & fortiter
fiduciam & benevolentiam animarum,
tamquàm firmissimum ministerii mei fun-
damentum, & efficaciorum consummatio-
nem? Si in earum charitate radicitus fir-

matus non fuero , aërem verberabo.

Ploro idemtidem inter vestibulum & altare pro peccatoribus derelinentibus legem Dei , ut fiam , in tempore iracundiæ , reconciliatio ? ... Nonne memini me ex hominibus assumptum esse , ut offeram dona & sacrificia pro me & pro populo ? Quidni ergò satago fungi sacerdotio , & habere laudem in nomine ipsius ?

Doceo obstetrices formam Baptismi ? ... Diligo decorem domûs Dei , sacrarii , ornamentorum , fontis baptismalis , vasorum sacrorum ? ... Renovo idemtidem species Eucharistiæ ? Huc spectant munia mea.

Nonne me piget visitare infirmos & moribundos ? Ita sanè. Verùm , si præ ignaviâ meâ pereat infirmus , propter quem Christus mortuus est , nonne erit anima mea pro animâ ejus ?

Inter sum collationi de casibus conscientiae , singulis mensibus , juxta statuta dioeceseos , faciendæ. Qui superiorem spernit , ipsum Deum spernit.

Curo ut foundationes & pia legata impleantur ; ut redditus fabricæ & sodalitatum non dissipentur , & ut statuta dioeceseos observentur . Quid deterius , si ego ipse foundationes & legata , tepore , ignaviâ , & respectu humano negligere ; si Missarum mihi commissarum celebrationem ad longius tempus , præter rationabilem Fidelium voluntatem , protraherem , si dioeceseos statuta , frontosâ temeritate transgrederer ? Nonne Deus requireret ista ? Invigilo ut præceptor suo fungatur officio ;

Adimpleo onera beneficio meo annexa, scilicet, vel celebrandi Missas talibus anni diebus, & in quibusdam statutis Ecclesiis & altaribus; vel suppeditandi ornamenta, & alia hujusmodi: Nonne sentiens commodum, & onus sentire debeo?

Utor, ut bonus Pater-familias, agris beneficio meo annexis, an ut dissipator? Incumbo reparationibus quibus indigent? Curo pariter reparationes modicas domui presbyterali faciendas?

Heu! Quot munia! Quot pericula! O-
quàm verè dictum est: *Interdum dominatur homo homini in malum suum!* (Eccle. 8.) Undè sic concludit D. Chrysostomus: miror an fieri possit ut aliquis ex Rectoribus sit salvus. Undè ergò fit ut animarum formidandum regimen adeò ardentè ambiatur, tam foedè mendicetur turmatim? Ubi sunt Gregorii, Martini, & alii sanctissimi Viri, qui, quàmvis à Deo vocati, fugiebant, & in speluncis latebant, ne onus & honorem susciperent?

Domine Jesu! Da mihi intellectum; scio quia puer ego sum, nesciens loqui; infirmus nimis & imbecillis sum ut loquar ad Pharaones & incircumcisos corde: igitur, ne permittas ut temerè mihi fumam honorem. Sciens tamen quòd infirma mundi eligas ut fortia quæque confundas, oro te ut doceas me facere voluntatem tuam; si vocaveris me, respondebo tibi: ecce ego, adsum, mitte me; & quoniam dixisti: non estis vos qui loquimini, sed spiritus patris vestri qui loquitur in vobis;

da mihi os & sapientiam, ut sim Pastor juxta cor tuum, & exemplo tuo libentissimè impendam, & superimpendar ipse pro animabus mihi commissis vel committendis.

REFLEXIO XXXV.

Munia Syndicorum.

Qui benè præsunt Presbyteri, duplici honore digni sunt; sed vae speculatoribus cæcis, & quæcumque ignorant blasphemantibus; vae illis Præpositis per quos scandalum & abominatio desolationis veniunt in locum sanctum, & in eo stant!

Quatenùs ergò Syndicus sum, aut Præpositus communitalis ecclesiasticæ, vel capituli, do operam ut sancta sanctè tractentur? Est-ne apud me acceptio personarum? Præsumne verbo & exemplo, si videns prævaricantes, erubesco dicere: *Non licet*, eosque corripere; si ipse ego petra scandali, delinquere faciam Clericos, quos ædificare debeo? Quid sum? nefandus prævaricator.

Nùmquid tueor jura & emolumenta communitalis? Si ad hæc omnia juramento teneor, quid sum si his desim? Perjurus. Sed ô quantam malorum vim in caput meum struo!



REFLEXIO XXXVI.

Modus agendi bonum.

Quod justum est, justè persequere, & dignè Deo... Ego justitias judicabo, dicit Dominus.

Verùm, perago omnia opera mea, præsertim proprii statûs, in gloriam Dei, cum fervore, in spiritu & veritate, in unione intentionum & meritorum Christi? Facio alacriter, prompto animo, & constanter omnia honestè, secundùm ordinem, locum & modum? In hoc consistit gloria filiae regis, testimonium bonæ conscientiae, meritum actionum mearum, sanctificatio mea, corona mea. Quid ergò sunt opera mea his adjunctis destituta? Paleæ ad comburendum igni. Quid inveniam in manibus meis? Nihil. Postquàm enim jejuna-vero, prophetavero, mirabilia magna fecero, & Dæmonia ejecero, Deus hæc sacrificia non aspiciet; postquàm seminavero multum, nihil, aut parum inferam. Quid tandem audiam, nisi ista terribilia verba: *Et tunc confitebor illis, quia non novi vos; vestris enim obsequiis vos inhonorastis me: jam mercedem accepistis. O stulti divitiarum viri, non invenio opera vestra plena coram me; quia ergò nudi, cæci, miseri, & miserabiles estis, discedite à me; thesaurisastis vobis, non thesauros in cælis, sed iram meam in hoc novissimo die. Nescio vos, in æternum discedite. O horrendum!* Quare

Quare ergò non vereor omnia opera mea?
Quid est cur non satago operari secundùm
beneplacitum & exemplum Christi, qui
benè, omnia fecit?

Domine Jesu, da mihi intellectum, ut
sciam omnia facere in gloriam tuam, in
spiritu & veritate, honestè, ordinatim, &
constanter; hanc puram intentionem tibi
placendi, tibi que in spiritu, honestè & or-
dinatim serviendi omnibus diebus meis,
renovabo, non solùm diluculo, verùm
etiam in principio & decursu omnium ope-
rum meorum. Confirma me in hoc pro-
posito quod operaris in me, ô Magister
bone, ut per misericordiam tuam, audire
quondam possim hoc mellifluum verbum:
*Euge, serve bone, quia in pauca fuisti fi-
delis; quia conscientiam bonam, fide non fictam,
ac in simplicitate cordis tui ambulasti coram
me cunctis diebus vitæ tuæ: intra in gau-
dium Domini tui.*

REFLEXIO XXXVII.

Novissimorum recogitatio.

Cogitationes hominum vanæ sunt; popu-
li meditantur inania; ipsius sanctuarii
lapides dispersi sunt in capite omnium pla-
tearum; & quoniam diminutæ sunt verita-
tes à filiis hominum, & nullus est qui reco-
gitet corde; hinc fit, ut desolatione desole-
tur terra, ac deficiat sanctus in ipso sanc-
tuario, in ipsâ sanctorum terrâ.

Nonne ipse erravi sicut ovis quæ periit,
T

quia ad cor nunquàm redeo, & quia abhorreo ab illâ solitudine in quam Deus vocat & ducit homines bonæ voluntatis, ut loquatur ad cor eorum eloquia ignita, eosque repleat Spiritu Sancto: Hinc miserè accidit ut non degustem, quin potius respuam veritates venturi sæculi, ut nunquàm sapiens, nec novissima providens, totam vitam tepidè transigam, quasi nunquàm moriturus; hinc accidit ut non intelligam, comparatus jumentis insipientibus quibus non est intellectus; & ut, licèt sim in honore, sciens bonum & malum, semper tamen vagans, vadens & non rediens, vanisque distractus curis, periclitter quotidie. Proh cæcitas mea! O si memorarer novissima mea, an peccarem? O si vita mea esset abscondita in Christo cum Deo, quàm parùm saperem quæ sunt super terram! Quàm fervens essem spiritu! Nonne essem ad mortem semper paratus?

Sed saltem provideo interdum novissima mea: ... Reversus idemtidem in me, dijudico strictè meipsum: ... Habeo in mente annos æternos, an inania & fabulationes? ... Descendo in infernum vivens, ut non descendam moriens? Curo habere semper lucernas ardentes in manibus meis? Heu mihi! Id parùm satago. Si ergò animam meam nunc repeterent à me, ubi parerem? Quò irem? ... O insipiens! Hæc & alia, nunquàm, aut vix recogito corde. Est-ne cura salutis, & timor Domini ante oculos meos? ... Ve-

rùm, si stupiditatem meam nunc cognoscens, ferventiùs deinceps non vigilem, quid sum? Quid ero?

His & aliis animo recogitatis; si cognoscas te profecisse, gratias age Deo qui dedit tibi victoriam per Jesum-Christum; si verò sentias te defecisse, cave ne animo concidas, vide in quo peccaveris & frequentius pecces; & erubescens, age pœnitentiam, resipiscere stude, & remedium adhibe; scito quid desit tibi, alacriùs labora ut bonus miles Christi; persequere fortiùs inimicos tuos; aggredere præsertim vitium illud ad quod proclivior es, nec convertaris donec deficiat; confide in Domino qui docebit manus tuas ad prælium; quapropter, leva sæpè in cælum oculos tuos, undè veniet auxilium tibi, veniet & victoria.

Sed interim, præpara animam tuam ad confessionem, & animi dolorem; fidelis est Deus, ut remittat tibi peccata tua.

NERVOSA CONSIDERATIO

Ad excitandum de peccatis dolorem.

S Criptum est: nullus est qui agat pœnitentiam super peccato suo, dicens: quid feci? Hâc horrendâ nimis desolatione desolatur & perit anima mea, quia non recogitavi corde.

Verùm, in te nunc reversa anima mea, vide & recogita corde & in amaritudine tuâ, quàm malum & amarum sit reliquisse te Dominum Deum tuum!

Tij

I. Quid feci, infelix ego homo ! Pec-
cavi Domino ; peccavi Deo sancto, sancto,
sancto, altissimo super omnem terram ;
peccavi Domino, qui solus est bonus,
Regi seculorum immortalis ; eum servire
feci iniquitatibus meis. Proh scelus ! Ma-
lum feci coram illo qui est sol justitiæ &
candor lucis æternæ ; propter pugillum
hordei, offendi Regem regum, cujus
majestate repleta est terra ; huic nolui ser-
vire, frontosè dicens : non serviam ; Do-
minum meum postposui vilissimæ volupta-
ti, & ipsi Satanæ. Proh abominatio !

O magne Domine, & laudabilis nimis !
Quàm parùm te amo ! Quàm parùm te
cognosco, ô pulchritudo & bonitas tam
antiqua ! Noverim te, dilecte mi, ut indè
cognoscens abominationem peccatorum
meorum ; dicam semper ex abundantia cor-
dis mei : *Quis dabit oculis meis fontem la-
chrymarum, & plorabo die ac nocte !* O Je-
su, qui convertis rupes in fontes aquarum,
da ut peccatrix anima mea tristis sit usque
ad mortem, propter te summè amabilem.

II. Quid feci ! Deum qui me genuit
derelinqui ; oblitus sum Creatoris mei ; de-
relinqui fontem aquarum viventium Domi-
num, ut foderem mihi cisternas dissipatas
quæ continere non valent aquas ; Deum,
qui me ut filium enutrivit & exaltavit ;
sprevi ; Ego dispensator Mysteriorum ejus ;
Ego dux ejus, notus & amicus ejus, mag-
nificavi super eum supplantationem. Obstu-
pescite, cœli super hoc ! O monstruosa in-
gratitudo mea ! Quis mihi hoc tribuat ut

magna sit velut mare contritio mea : Eia , fletum deducite oculi mei , liquefce anima mea amoris igne , præ dolore deficias , propter Deum qui dilexit te & benefecit tibi , & quem , heu ! tu prævaricatrix adeò graviter offendisti.

III. Quid feci : Persecutus sum Dominum Jesum , ego minister & angelus ejus ; ego Dñum gloriæ crucifixi in monte Calvariæ ; quid vilius : Ego , millies postea , rursus mihi metipsi crucifixi filium Dei ; quid crudelius : Et adhuc vivo : Et adhuc doloris gladio non scinditur cor meum ? O cor meum , non cor ! O cor saxi & ferro durius !

Sed , dic , anima ; misera anima mea , quid fecit tibi Dominus Jesus : Quid molestus fuit , aut in quo contristavit te , ut eum tu contristares & crudeliter crucifigeres : Quidni saltem plangis , quasi virgo ; planctu amaro , ô anima mea :

IV. Christus factus est pro me maledictus ; peccata mea portavit in corpore suo , super lignum ; oportuit illum pati , ut me Deo Patri , in sanguine suo reconciliaret , quia præter eum , nullus erat qui redimeret , neque qui salvum faceret.

Indè cognosco , ô Jesu pro me crucifixe , cognosco quàm gravia sint vulnera mea , pro quibus necesse est te Dominum Christum vulnerari ; (*S. Ber.*) sed heu ! si in viridi ligno hæc faciunt , in arido quid fiet ? O Angeli pacis , qui ad hoc spectaculum amarè flevistis , amarè nunc flete , quia ego super meipso non fleo ; impetrate mihi hanc aquam.

V. Dominus Jesus, videns civitatem, flevit super illam, prævidens scelera ingratorum hominum, quorum primus ego sum; cœpit pavere & tædere in horto; factus est in eo sudor sicut guttæ sanguinis decurrentis in terram. Propheta regius vix crimen agnoscit, statim laborat in gemitu suo; lectum & stratum suum lachrymis per singulas noctes rigat; Maria Magdalena, olim peccatrix, sed in se reversa, diligit multum, lachrymis, præ dolore, pedes Domini rigat sollicita; Apostolus Petrus totâ vitâ amarè flet; & ego., qui eum Dominum nefandius & sæpius offendi, non recogito peccata mea in amaritudine animæ meæ! Et ego rideo; aut, ad summum, vix doleo! Undè hoc monstrum? Quòdusque me patietur Dominus, & me sustinebit terra?

VI. Peccavi! Et dixi, insipiens, in corde meo: quid mihi accidit triste? Væ mihi! Quid accidit? Millia infortunia, tenebræ intellectûs, duritia cordis, conscientia lubrica, effrænatior peccandi libido, frequentiores lapsus in vitia, gratiæ jactura, periculum imminens, & pessimæ mortis, & perditionis æternæ. Hic est fructus, infelix fructus, quem habeo in illis in quibus nunc erubescere debeo, finis ergò illorum est mors, & secunda mors.

Vide nunc anima mea, vide quid accidit & accidet; enim verò, nonne, secundum impœnitens cor tuum, thesaurifas tibi iram Dei in die judicii? Nonne

meritò contra te jam exardescet, sicut ignis, ira ejus: Nonne ducens in bonis dies tuos, nec umquàm poenitens corde, in puncto ad inferna descendes: Nonne in æternum in hâc flammâ cruciaberis: Agnosce, cæca, agnosce quàm grave sit peccatum, quândòquidem Dominus, cujus misericordiæ à sæculo sunt, æterno igne unum peccatum mortale punit: Disce indè redire ad cor, confundi, dolere, conteri, & plorare die ac nocte, ne, præ angustia, in æternum & frustrâ in inferno gemas.

Absit à me tanta cæcitas, tantaque duritia; & quoniam iniquitatem meam nunc melius ego cognosco, dixi: nunc cœpi.

Quapropter, ô bone Jesu, ô dilecte & amabilis Jesu! his omnibus animo meo recogitatis, & cordi meo altè, per tuam gratiam, defixis, confiteor quia tibi soli peccavi. Quid nunc faciam tibi, ô custos hominum: Quid faciam: Sacrificium justitiæ. Igitur, offero tibi cor contritum & humiliatum, quod tibi summè placet, quodque numquàm despicias. Verè doleo quòd peccaverim; doleo, non propter gehennæ metum, non propter gloriæ desiderium, sed propter te, qui es totus amabilis, summè bonus & sanctus; & quia parum doleo, propter te maximè doleo; jam nolo amplius peccare propter te, qui idem ipse semper es, bonus & amabilis; sufficit mihi gratia & amicitia tua: & modò ut te semper diligam, ô dilecte mi; modò ut non amplius peccem

tibi , ô bonitas infinita , nihil aliud peto ;
da mihi amorem tui , & dives sum satis ;
Deus auxilii mei , adjuva me ; Domine
ne moreris , quia pauper & inops sum
ego , & ad malum , ab adolescentiâ , vehe-
mentissimè pronus.

AD CONFENSIONEM

Accessus.

ACcede ad Sacramentum Pœnitentiæ
cum fiduciâ , in spiritu humilitatis , &
in animo contrito ; confitere in amaritudi-
ne animæ tuæ saltem peccata totius mensis
præteriti ; da operam ut propositum tuum
sit magis sincerum & firmitus ; quapropter ,
vigila & ora , diffidens tibi , & in Deo
sperans , qui dat fortitudinem plebi suæ ;
noli amplius peccare ; sed si stas , vide
ne cadas , ne quid deterius tibi contin-
gat , & ne tandem de ore Dei evomaris ,
ferve nequam.

CELEBRATIO MISSÆ.

Diligentiùs ipse probatus , ut præcipit
Apostolus , veste nuptiali indutus , &
ferventiori devotione actuali ornatus , ac-
cede ad sacram Missam & Communio-
nem ; sed cogita , Ministrum , tibi super
lectum doloris communicanti , dicere :
*Accipe Viaticum , frater , Corporis Domini
nostri Jesu-Christi.* Vide , in Regulâ Cleri ,

aspirationes ignitas, tùm præparationi,
tùm gratiarum actioni aptatas.

DISPOSITIO TESTAMENTI.

S Anctus Augustinus testamentum nullum fecit, quia undè faceret pauper Christi non habuit. Utinam de te, sic paupere moriente, jure dici posset, quod de S. Francisco, de S. Thoma de Villanova, & de aliis prædicatur: pauper hic & modicus, cœlum dives ingreditur, hymnis cœlestibus honoratur; dispersit, dedit pauperibus, justitia ejus manet in seculum seculi. Nonne & tu pauperes semper tecum habes? Cur ergò non facis tibi amicos, ut cun defeceris, recipiant te in æterna tabernacula?

Fortassè dispones in horâ mortis largas eleëmofinas, in sinu pauperum post mortem concludendas; dotabis Ecclesias, &c. Et interim, videns quotidie & ubique mendicos Lazaros in januis jacentes, ab iis viscera tua, inclemens, claudis? Vetè à Satanâ te tentari finis; verè, divitiis affluentibus cor apponis. O præclarum, imò potius detestandum sæpissimè sacrificium! Nam tunc necessitate coactus, dabis quod tuum non erit; dabis quod tunc auferetur, & quo diutius frui non poteris. O miser! quis te ita fascinavit, ut hanc vanitatem, Deo & hominibus odibilem, non videas? O quàm metuendum est ne pecunia tua tecum sit in perditionem!

T y

Si autem necesse sit testamentum facere, fac illud coram Christo Iudice interea-
dum sanus es & tuus; in infirmitate,
blanditiis & minis duceris quò tu non vis.
(*S. Aug.*) Cur ergò differs?

Prætereà, nonne ipsis laïcis fuades ut
maturè disponant domui suæ; id est, ut
testamentum condant dum sana mens est
in corpore sano? Ita sanè; & quare; Quia
illa dispositio in horam mortis dilata, dis-
trahit à Deo, à curâ animæ & beatæ
mortis, est discordiarum & litium semina-
rium, & quia infirmitatis tempus nimis
breve & pretiosum est, quàm ut totum
studio beatæ mortis non impendatur. Quare
ergò tu ipse maturè non sapi? O cæcitas
tua!

Cave etiam ne, si imprudenter de die
in diem differas, tempus illud condendi,
ut sæpiùs miserè accidit, non habeas. Me-
mineris iterùm, affectum paternum, malo-
rum seminarium, extarè in Ecclesiâ Dei,
& te debere, ut jam monuimus, paupe-
rum, aliarumque personarum miserabilium
paternam curam gerere; cave ergò ne
quis te seducat inanibus verbis, & ne do-
nans consanguineis divitibus res Ecclesias-
ticas, quæ Dei sunt, in æternùm pereas.
Surgerent-ne hi patentes ut tibi opitula-
rentur in inferno, & ut de illo te libera-
rent? Nequaquàm: quia in inferno nulla
est redemptio.

Tandem, quàmvis sanus testamentum
feceris, disperge adhuc vivens, & ut hi-
laris dator, quidquid poteris pauperibus;

sis per teipsum misericordiæ vir, & eleemosynas tuas enarrabit Ecclesia Sanctorum.

CONSIDERATIO

De angustiis quæ Sacerdotes in horâ mortis torquere solent.

I. **D** Elicta juventutis meæ, peccata occulta & aliena, quibus communicavi, vel citò imponendo manus, vel conferendo indignis beneficia, absolutionem, &c. vel non arguendo populum de peccato, vel scandalizando pusillos; insuper peccata excusata & pro nihilo reputata; vita tepida, inutilis & animalis; sed præsertim falsa conscientia. O cogitatio, sæva animæ meæ carnificina! Tribulatio & angustia jam inveniunt me!

II. Abusus tot dierum salutis, tot gratiarum, & præsertim divinæ Eucharistiæ; tot Missarum & Communium; quantus timor & tremor! Quot sacrilegia, sub præclarâ pietatis specie! Væ mihi, si Sanguis Jesu-Christi exquiratur! Insuper, dilapidatio rerum Ecclesiasticarum, quæ Dei sunt. Heu! Quot pauperes stabunt adversus me?

III. Defectus diligentis examinis, sinceri doloris, veri firmique propositi & integritatis in confessionibus præteritis. O quantum timeo, ne mortaliter lapsus, hâc secundâ post naufragium tabulâ, propter poenitentiam foedè actam, abusus sim!

IV. Non satisfacisse Deo pro tot pec-

catis, & Proximo ac Ecclesiæ, pro tot damnis, verbo, opere, scandalo, cooperatione, fraudulentâ à choro absentia, pravâ officii recitatione, &c. illatis. Nonne debui reddere Deo quæ Dei sunt, & quæ sunt Cæsaris, Cæsari?

V. Suscepisse curam animarum non vocatum, aut capacitate carentem: insuper, ignorasse, aut certè neglexisse munia mea, præsertim pastoralia. Heu! Quanta amaritudinum abyssus! In quantum profundissimum jam me hæc demergit tempestas! Quot ovium sanguis de manu meâ requiratur!

VI. Non incubuisse perfectioni meæ; dixisse & non fecisse. Quid est cur me ipsum non curavi, medicus insipiens? Nonne jam ore meo me judicare teneor? Posuerunt me custodem in vineis, & vineam meam non custodivi! Proh pudor! O stupiditatem meam! Nonne similis sum illis, qui post fabricatam Noë arcam, ut salvarentur, ipsi in aquis periere? Proh dolor?

VII. Non fecisse omnia in gloriam Dei, sanctè, ferventer, & constanter; in spiritu & veritate, secundum ordinem, & juxta beneplacitum Christi. Quid ergò juvat sic gloriari: dives sum? Dùm Dominus dicit: miserabilis es?

VIII. Non vigilavisse, & de maturâ ad mortem præparatione non curasse. Quis mihi dabit lachrymas, ut tantam plorem imprudentiam?

Vide nunc, charissime frater, coram Deo

miser icorde , nùm hi conscientiæ stimuli te in horâ mortis exagitarent. O nimis felix quòd hos prævenire possis ; remedium , nobis crede , protinùs adhibe , ne his , Deo vindice & frustrâ , crucieris in novissimo die.

ACCEPTATIO MORTIS.

BEatus ille servus quem cùm venerit Dominus invenerit vigilantem. Forfan hâc nocte animam meam repetent à me. Deus , Deus meus , vigilem ergò semper ad te , ut semper paratus sim , quia quâ horâ non puto , tu venies. Dixi : nunc cœpi ; volo maturè sapere , ac novissima providere ; idcirco , jam hodiè immolo tibi sacrificium laudis.

I. Voluntariè sacrifico tibi vitam meam , quia in gloriam tuam creasti eam.

II. Statutum est omnibus hominibus semel mori , quia vitæ & mortis potestatem , tu Deus , habes. Ergò , in pulverem revertatur corpus meum ; non mea voluntas ; sed tua fiat ; ita Pater , quoniam sic fuit placitum ante te.

III. Tu scis , Domine , quia amo te , & ideò animam meam pono pro te.

IV. O Jesu ! quid retribuam tibi pro omnibus quæ retribuisti mihi ? O pie pellucane ! in hoc cognosco charitatem tuam , quoniam animam tuam pro me posuisti. Quid retribuam tibi , ô bone Jesu ? animam meam. Majorem hâc siquidem dilectionem nemo habet , ut animam suam ponat quis pro amicis suis.

V. Peccavi ! iniquitates meæ supergressæ sunt caput meum ; exhibui omnia membra mea servire immunditiæ & iniquitati ; & licèt minister tui sim , & dispensator mysteriorum Dei , te tamen servire feci iniquitatibus meis. Igitur , exurge , Deus , judica causam tuam ; cadat iste armatus & inimicus homo & servus peccati ; reus est mortis ; crucifigatur , crucifigatur ; quasi putredo consumatur , & quasi vestimentum quod comeditur à tineâ.

Superbii , terra & cinis : revertar ergò ad terram tenebrosam. Oblivioni der , tamquàm mortuus à corde , in spiritu humilitatis , contritionis & satisfactionis ; subter corpus meum , quod aggravat animam , sternatur tinea , & operimentum meum sint vermes ; interim circumdent me dolores mortis ; meritò hæc patiar ; dilexi mundum , & ea quæ in mundo sunt : à mundo separet me amara mors ; justus es , Domine , & rectum judicium tuum.

VI. Væ mihi ! appono quotidie iniquitatem super iniquitatem ; in terrâ Sanctorum iniqua gero , lapis offensionis sum ac petra scandali ; & licèt plantatus in domo Domini , sum tamen servus inutilis ; veniat mors super me , ut non amplius peccem tibi ; malo tibi dilecto mori , quàm tibi offenso vivere , ô Jesu mi ! Idcirco , à te peto ut moriar ; neque enim melior sum quàm patres mei.

Hei mihi ! tua quidem judicia sunt abyssus multa , terribilis es in consiliis super filios hominum ; judicabis justitias ; de omni

verbo otioso reddam rationem ; quasi pannus menstruatae , universae justitiae meae ; in Angelis reperis pravitatem , non parcis delinquenti : horrendum est incidere in manus tuas. Vix justus salvabitur : ubi parebo ego impius & peccator ? Timor & tremor veniunt super me ; ecquis novit potestatem irae tuae ? Verè , Domine , rectum judicium tuum. Torrentes iniquitatis meae & pericula inferni conturbant me ; ecquis potest cogitare diem adventus tui ? Quis stabit ad videndum te ? Idcirco , ex unâ parte , mori timeo , quia non sum paratus ; & ex aliâ , vivere erubesco , quia parum proficio , & quia , quò diutius vivo , eò magis mihi thesauriso iram tuam in die judicii. Malo tamen mori , & misericordiae tuae me committere , quia benignus & misericors es , quàm de meâ malâ conversatione scandalum facere. Quis ergò liberabit me de corpore mortis hujus ?

VII. O Jesu laus mea , Jesu cordis mei ! Tædet animam meam vitae meae , quia non diligo te fortitudo mea , & vita animae meae ; opus tuum facio negligenter ; ideò factus sum mihi metipso gravis ; ideò , amor mi , expecto donec veniat immutatio mea : ut quid terram occupo ? Vocabis me , & ego respondebo tibi. O utinam jam jam inhabitem in domo tuâ , ut in secula seculorum laudem te !

VIII. O ignis jugiter ardens ! Continuus est dolor cordi meo ; tabesco , & tristis est anima mea usque ad mortem , quia ubique video praevaricantes & polluentes templum sanctum tuum ; tolle ergò ani-

nam meam, expedit mihi magis mori quàm vivere.

IX. O Jesu, qui cùm dilexisses nos, in finem dilexisti nos, & pro omnibus mortuus es, oblatus quia ipse voluisti; exemplum dedisti mihi, ut quemadmodum tu fecisti, ita & ego faciam: nonne æquum est ut conformis fiam imago tui? Non est servus major Domino suo; insuper tui minister sum, & ubi tu es, illic imperas ut minister tuus sit; volo mori, ut faciam secundum exemplar quod mihi in monte monstratum est.

O Jesu, portio mea in terrâ viventium! O torrens voluptatis! O Jesu fons vitæ! Cupio dissolvi & esse tecum; tu mihi vivere fuisti, nonne mori mihi lucrum erit? Veniat mors super me, instet tempus resolutionis meæ; satiabor cùm apparuerit gloria tua. Veni, Domine Jesu, veni, Sponse mi, quia amore langueo. Fuerunt mihi lachrymæ meæ die ac nocte, dùm dicitur mihi quotidie: ubi est Deus tuus? Veni, ô vita animæ meæ, educ de custodiâ animam meam ad confitendum nomini tuo; me expectant justi, donec retribuas mihi. O quandò hæc erunt? Quæ enim nunc expectatio mea? Nonne tu Dominus Deus!



A C T U S R E L I G I O N I S ,

*Per vitam , & præcipuè in horâ mortis
eliciendi.*

A C T U S F I D E I .

Credo in Deum qui me creavit ad imaginem & similitudinem suam ; & in Jesum-Christum Salvatorem meum , qui dilexit me , lavit , & redemit me Sanguine suo ; & in Spiritum Sanctum , qui me in Baptismo sanctificavit.

Credo quòd Redemptor meus vivit , & in novissimo die , de terrâ surrecturus sum , & in carne meâ videbo Deum Salvatorem meum.

Credo quidquid dixit Dei Filius ; nihil hoc verbo veritatis verius.

Credo quidquid sancta , catholica , & apostolica Ecclesia , à Christo & Apostolis hùc usquè credidit , & mihi credendum proposuit.

Hic recita Symbolum Apostolorum : Credo ; cui subjunge :

Hæc omnia credo , quia , tu Domine , qui es ipsa veritas , ea revelasti. In hâc fide natus & baptisatus sum ; in hâc , per gratiam tuam vixi , in hâc volo mori. Paratus sum & non sum turbatus , in carcerem & in mortem ire pro hâc fidei veritate tuenda : adauge fidem meam.

Te pariter obsecro , ut in omnibus hominibus sanctum istud lumen fidei augere

450 PRÆPARATIO PROXIMA

velis , & in infidelibus illud accendere , ut
eò magis te omnes agnoscant , confiteantur
& adorent. O utinam confiteantur tibi po-
puli Deus , confiteantur tibi populi omnes !
Utinam omnis terra adoret te & psallat
tibi in hâc vitâ , ut tandem in secula se-
culorum omnes laudent te !

Actus Spei.

In te , Domine , speravi , non confundar
in æternum ; vitam verò æternam posside-
bo , quia non vis mortem peccatoris , sed
ut magis convertatur & vivat. O Jesu , Sal-
vator mi , gratiam & gloriam , ut confido ,
dabis mihi , quia mortuus es propter justi-
ficationem nostram , & quia in promissis
tuis fidelissimus es. Quantumvis ergò tu
justus sis , & ego homo peccator sim , &
peccatorum primus ; attamen , ô Jesu mi-
sericors & miserator , misericordiæ tuæ mag-
næ lætificant animam meam ; hæc tria au-
divi , nimirum quia tibi est potestas , mise-
ricordia , & fidelitas ; horum memor fui ,
& delectatus sum.

Iterum & securè dico : lætatus sum in
his quæ dicta sunt mihi , in domum Do-
mini ibimus. Adveniat ergò regnum tuum ;
regnum , inquam , quod parasti Electis à
constitutione mundi ; sonet in auribus meis
hæc melliflua vox : *Hodiè mecum eris in
Paradiso.* Reposita est hæc spes mea in
sinu meo ; hæc me consolatur in tribulatio-
ne & humilitate meâ.

Audite hæc , omnes gentes , ut non con-
tristemini ; consolamini invicem in verbis
istis , neque dicatis sicut & cæteri qui spem

non habent : major est iniquitas nostra , quàm ut veniam & gloriam obtinere possimus ; nonne bonitas Dei præstabilis est super malitiâ vestrâ ? Scitote quia nullum deserit Pater misericordiarum , nisi ab eo ipse prius deferatur ; si enim , cùm essemus inimici , reconciliati sumus Deo per mortem Filii ejus , quantò magis , reconciliati , salvi erimus in vitâ ipsius ? Convertimini ergò , agite poenitentiam , contendite usque ad finem perseverare , & confidite : fides vestra vos salvos faciet.

Actus Charitatis.

O Deus charitas ! quàm serò te amavi ! Pereat tempus in quo non te amavi , ô pulchritudo antiqua ! . . . O ignis consumens , Deus ! O ignis jugiter ardens & nunquàm deficiens , ure renes meos & cor meum , ut anima mea amore langueat , & liquefiat tui amoris igne. O amor ! da mihi amorem tui. O bonitas infinita ! diligo te propter te. O totus amabilis ! utinam nec ipsa mors separet me à charitate tuâ. Diligo etiam proximum meum sicut meipsum , & inimicos meos propter te ; ne statuas illis ullum peccatum.

Actus Pœnitentiæ.

Tibi soli peccavi , Domine , tibi summo bono , & malum coram te feci ; quid vilius ? Quid ultrà debuisti facere , & non fecisti ? At ego offendi te , dereliqui te Deum factorem & summum benefactorem meum ! Quid detestabilius ? Peccavi , Domine ; & scio quia nihil coinquinatum intrabit in regnum cœlorum : non intres in

452. PRÆPARATIO PROXIMA

judicium cum servo tuo ; quia non iustificabitur in conspectu tuo omnis vivens ; sed secundum magnam misericordiam tuam miserere mei ; ab occultis meis munda me , Domine , & ab alienis parce servo tuo. Doleo , Domine , doleo vehementer quòd tibi soli peccaverim , quia bonus es tu. O Jesu , mi Jesu ! vae tempori illi quo te offendi , Deus meus & omnia. Exitus aquarum deducant oculi mei , quia non custodierunt legem tuam , & quia millies mihi metipsi te crucifixi , dulcissime Salvator mi ! Nolo amplius peccare , etiamsi oportuerit me millies mori. Verum , mecum sit gratia tua ; teneat me , deducat me dextera tua , Domine fortitudo mea ; & ab inimicis meis salvus ero.

Actus Resignationis.

O bone Jesu ! oblatus quia ipse voluisti ; bibisti calicem passionis & mortis ; passus es , relinquens mihi exemplum ut sequar vestigia tua : igitur , quemadmodum fecisti , ita & ego facere volens , libenti animo dico : possum bibere calicem quem mihi offers , & , te juvante illum bibam. Interim , ô Jesu mi ! complaceo mihi propter te in infirmitatibus meis , quia hæc est voluntas tua ut patiar super lectum doloris mei ; tu mihi vivere es , & mori lucrum : sive vivam , sive moriar , tui sum.

Paratum cor meum , Deus , paratum cor meum ; paratum vivere , ut anima mea vivens laudet te , & confiteatur tibi , Domine , ut tuæ tibi confixus cruci compariar , & stigmata tua in corpore meo por-

tem. De cætero , nemo mihi molestus sit : paratus sum & in carcerem & in mortem ire. Nonne quæ à te sunt , ordinata sunt ? Nonne vita & mors sunt à te ? Si capillus de capite non cadat nisi te volente ; si ventus & mare obediunt tibi , nonne tibi subjecta erit anima mea ? Ergò , Domine Jesu ! non mea voluntas , sed tua fiat. Repleor consolatione , superabundo gaudio in omni tribulatione meâ , quia dignus habeor pati & mori pro nomine tuo , ô Jesu , & Deus cordis mei !

Ecquid ? Tu Rex gloriæ , tu Fili Dei vivi , morte turpissimâ condemnatus , fuisti obediens usque ad mortem , mortem autem crucis ; & ego servus & peccator , dolores mortis , ipsamque mortem , reus mortis , recusarem ? Absit.

Volo ergò quidquid vis , volo quia vis ; volo quomodò vis , volo quamdiù vis.

Attamen , memini quia pridie quàm patereris & morereris , cœpisti pavere & tædere , & tristis usque ad mortem fuisti ; quis non paveat appropinquante morte , si tu , fortitudo & victoria Martyrum , sic formidasti ? Quid , instante morte , fiet de me ? Quomodò subsistere potero , nisi tu mecum sis , & pugnes pro me , qui laborantes & oneratos invitas ad te , ut eos reficias. Eia ergò , Jesu , qui es refugium meum , patientia & fortitudo mea , ne derelinquas me in tempore malo , sicut nec Pater tuus dereliquit te ; mitte , inquam , & mihi sanctum Angelum tuum qui me in his angustiis confortet & confirmet , do-

454 PRÆPARATIO PROXIMA
nec peracto agone , & de timore inimico-
rum meorum liberatus , accipiam coronam
vitæ , quam promifisti legitimè certantibus
& ufque in finem perfeverantibus.

Actus Desiderii.

Domine Jefu ! tu es gloria mea , coro-
na mea , tu exaltans caput meum ; fi ergò
inveni gratiam in confpectu tuo , ostende
mihi faciem tuam. Unam petii à te , Do-
mine Jefu , ut inhabitem in domo tuâ om-
nibus diebus vitæ meæ ; fatiabor cum ap-
paruerit gloria tua , ibi in fecula feculorum
laudabo te. Non mortui laudabunt te , Do-
mine , neque omnes qui descendunt in in-
fernum. Quarè , ô Jefu , fecifti me , fi non
debeo tibi effe conjunctus ? (*S. Bon.*)
Tuus fum ego ; falvum me fac , ô falus
mea ! Gratiam & gloriam dabis , Domine ;
hæc fpes confortatur me in humilitate meâ
& in hâc lachrymarum valle.

Heu mihi ! quia incolatus meus prolon-
gatus eft ! Ecquandò tandem veniam &
& apparebo ante faciem tuam ? O Deus
meus , mifericordia & tranquillitas mea ,
irrequietum eft cor meum , donec requief-
cat in te , in quem defiderant Angeli prof-
picere.

Actus Abrenuntiationis.

Abrenuntio mundo , qui totus in ma-
ligno pofitus eft ; renuntio omnibus quæ
poffideo ; odi , propter te , patrem & ma-
trem , odi & animam meam ; omnia ar-
bitror ut ftercora , ut te lucrifaciam. Tu
es thefaurus meus , ibi eft cor meum ; nudus
egreffus fum , nudus revertar ad te , fufcipe

servum tuum in bonum , aspice in me , ne fortè , cùm aliis prædicaverim rerum omnium abdicationem , ipse , cupiditate & amore seculi pressus , reprobus efficiar.

Petitio victoriæ Tentationum.

Militia est vita hominis super terram. O fidelis Deus ! ne patiaris , præsertim in horâ mortis , me tentari super id quod possum. Tunc adversarius meus , tanquàm leo rugiens circuibit me acriùs , ut devoret me ; sed si tu es pro me , quis contra me ? Et si ambulavero in medio umbræ mortis , non timebo mala , quoniam tu mecum eris. Jam nunc renuntio omnibus diaboli suggestionibus : vadat retrò satanas ; exurge , Deus , & dissipentur omnes inimici mei ; iter meum impedire non audeant. Si , dùm anxietur cor meum , ô spes mea , sis turris fortitudinis à facie inimici , inhabitabo in tabernaculo tuo in secula , quia tunc anima mea , miserante te , morietur morte justorum.

Perseverantiæ Petitio.

O Jesu ! tu scis quia servus inutilis sum ; sed , ô bone Jesu , tu qui cognoscis figmentum meum , qui es spes mea in terrâ viventium , & ex quo omnis sufficientia mea est & gloriatio , corona dona tua , corona me in misericordiâ & miserationibus , & , propter gloriam nominis tui , da mihi coronam vitæ quam promittis diligentibus adventum tuum , & perseverantibus usque in finem. Utinam obdormiam in te , ô Jesu mi ! Jam tunc in pace obdormiam & requiescam ; ipsa caro mea requiescet in spe.

Intrem tandem in gaudium tuum. In manus tuas commendo spiritum meum, & misericordias tuas in æternum cantabo.

MEDITATIO

De sententiâ quæ feretur contra pravos Sacerdotes in die Judicii.

D *Iscedite à me, maledicti, in ignem æternum.*

Discedite à me; vos Sacerdotes quos elegeram ut essetis populus meus peculiaris, noti, & Angeli mei; vos servistis mammonæ, & non Deo; dereliquistis Deum factorem & zelatorem vestrum, qui dederat vobis claves regni cœlestis; discedite à me; non populus meus, nec ero vester. O separatio, totâ gehennâ gravior.

Maledicti. Heu! maledici ab illo à quo profluit omnis benedictio dulcedinis! O terribilis pœna.

Maledicti à me, quem inhonorastis; à Patre meo, quem contempsistis; à sanguine meo, quem effudistis & indignè bibistis; à Matre meâ cujus præsidium despexistis; ab Electis, quos habuistis aliquandò in derisum; à populis & pusillis, quos scandalifastis; à Ninivitis, qui in prædicatione Jonæ pœnitentiam egerunt; vos verò, in terrâ Sanctorum iniqua gessistis; dixistis, & non fecistis. O maledictio, fons omnis mali! Quid times, ô anima mea, si hanc non timeas?

Verum, ô Domine Jesu, quo ibunt hi prævaricatores

prævaricatores Ministri , quos expellis & maledicis ? Ubi est hæc horrenda nimis habitatio ?

Audite hæc , omnes gentes ; audite , Sacerdotes , & pavete.

Discedite in ignem ; crucietur in hâc flammâ , cum diabolo , corpus vestrum , quod , unctione consecratum , coïnquinaastis & polluistis mensâ dæmoniorum ; justum est ut ipsum corpus quod participavit cum animâ concupiscentiæ ignis , participet cum animâ igneis vinculis quibus vos sub caligine reservavi. O miseranda fors ! O juste Judex ultionis , quàm horrendum est incidere in manus tuas !

Sed , ô Domine , dic mihi iterùm : usquequò perseverabit illud exilium , ignis ille ?

Iterùm audite , Sacerdotes , erudimini ad hanc vocem , vos qui judicatis terram , & discite servire Domino in timore.

Discedite in ignem æternum , in ignem inextinguibilem ; character sacerdotalis quo signati estis , erit vobis in æternam ignominiam , in sempiternam angustiam ; discedite , nunquàm videbitis gloriam meam , infernus erit in æternum domus vestra ; ibi erit æternus fletus , æternus stridor dentium , ibi sempiternus horror ; vermis vester non morietur : nolulistis cantare in æternum misericordias meas , discedite ; narrate in æternum potestatem iræ meæ , perditio vestra ex vobis. Proh desperatio !


Ecquid ego Sacerdos , cùm sim in honore , nunquàm intelligam ? Ecquid , separari à Jesu meo , cujus Minister sum !

Hâc solâ recordatione conturbatur cor meum , contremiscunt omnia ossa mea.

Heu ! quomodò habitare potero cum ardoribus sempiternis , ego qui in deliciis sum ? Quid est cur non misereor animæ meæ , ego qui , zelo meo , aliorum misereor ? Nonne bonum erat mihi si in Sanctuarium nunquàm intrassem , & si natus non fuisset ?

O piissime Jesu , miserere mei dùm tempus est miserendi ; hîc ure , hîc seca , hîc non parcas , modò in æternùm parcas. Volo salvare animam meam ; quapropter , paratus sum meipsum docere omnia salutis media quæ alios doceo , eaque viriliter exequi , ne fortè cùm aliis prædicaverim , ipse reprobus efficiar ; adjutor meus esto , Domine , ne moreris.

Charissime Frater , per viscera misericordiæ obsecramus te : quodcumque potest manus tua , instanter operare , quia nec opus , nec ratio , nec sapientia erunt in inferno quò tu properas. Fuge præsertim illud peccatum quod tibi à Jesu separationem minatur , & stude adhærere semper Domino tuo per crebros & ignitos amoris actus , ut in te vivat in æternùm quem totâ mente per vitam dilexeris.



ALIA MEDITATIO

De sententiâ erga probos & electos Sacerdotes in die Judicii.

V*enite, benedicti Patris mei, possidete paratum vobis regnum à constitutione mundi.*

Venite, vos qui reliquistis omnia, & secuti estis me; vos coadjutores & ministri mei, qui dignè ambulantes vocatione quâ vocati estis, passi estis propter justitiam, & bibistis calicem quem ego bibi; jam hyems transiit, surgite & venite; ubi sum ego, ibi & vos ministri mei eritis.

Suavis invitatio, desiderabilis super aurum & lapidem pretiosum multum! O Jesu spes suspirantis animæ meæ! quis mihi det ut tibi adeò fidelis sim usque ad mortem, ut cum electis vocari tandem possim?

Benedicti Patris mei, vos discipuli mei, ab hominibus passi estis maledictiones & persecutiones; putabant vitam vestram insaniam; tanquàm purgamenta hujus mundi facti estis, omnium peripsēma usque adhuc; vos autem à Patre electi & computati estis inter filios Dei; benedicti vos à Domino qui fecit cœlum & terram.

Felix benedictio! O quàm beatus ero cum maledixerint mihi homines! Hanc lætus accipiam benedictionem à Deo salutari meo; cum illâ venient mihi pariter omnia bona.

Possidete paratum vobis regnum à constitutione mundi, vos Domestici mei, quia

V ij

omnia fecistis quæ ego præcepi vobis , percipite hanc immarcessibilem gloriæ coronā , quam ego , Princeps Pastorum , promisi vobis ; hanc percipite Ministri mei , qui benè ministrantes , bonum gradum vobis acquisivistis ; vos Presbyteri duplici honore digni , quia benè præfuisstis , & quia verbo & exemplo dedistis scientiam salutis plebi meæ , & usque in finem perseverastis , fulgebitis in perpetuas æternitates.

Gaudete & exultate ; ecce enim merces vestra copiosa est in cœlis. Ego ipse fons vitæ , & torrens voluptatis , ero merces vestra magna nimis , merces æterna ; seminastis aliquandiù in lachrymis , plantastis Ecclesiam sanguine vestro ; jam priora transierunt ; gustate nunc & videte quomodò hoc leve & momentaneum tribulationis vestræ , æternum gloriæ pondus operabitur in vobis ; gaudete , & iterùm dico , gaudete , gaudium vestrum nemo tollet à vobis.

Quàm bonus Israël Deus his qui recto sunt corde ! Fidelis sermo omni acceptione dignus ! Jam ad hæc audita inardescit animus ; lætatur cor meum in his quæ dicta sunt mihi ; liquefit anima mea , & deficit in atria tua , ô Jesu centrum animæ meæ ; jam cætera arbitror ut stercora , ut te lucrifaciam Deum meum & omnia ; jam ardenter cupio dissolvi & esse tecum ; quando ergò veniam & apparebo ante faciem tuam ? Veni , Domine Jesu , & noli tardare.

O anima mea , bonum quidem est tibi esse ubi desideras & speras sine fine gau-

dere; verum, coërce tantisper desideria tua; nonne oportuit Christum, cujus Minister es, pati, & ita intrare in gloriam suam? Stude & tu mortificari propter illum, quoad vixeris, totâ die; labora interdum sicut bonus miles Christi, imple ministerium tuum, zela zelum legis ejus & salutis tuæ, spera in eo, & fac bonitatem, incumbe puritati tuæ; quis enim ascendet in montem Domini, aut quis stabit in loco sancto ejus, nisi innocens manibus & mundo corde? Et cum tandem cursum consummaveris, fidem servaveris, audies, propitio Deo, istud mellifluum verbum: *veni, amica mea; veni, coronaberis.*

PIA ET EFFICAX

Ad Christum crucifixum consideratio.

ECce, ô anima mea, ecce Salvator tuus: fiducialiter agas in eo, & ne timeas; ecce Agnus Dei qui occisus est, & qui tollit peccata mundi; quare ergo tristis es anima mea, & quare conturbas me? Inspice vulnera pendentis, sanguinem morientis, pretium redimentis; caput inclinatum ad osculandum, cor apertum ad diligendum, brachia extensa ad amplectendum, totum corpus extensum ad redimendum. Accede ergo cum fiduciâ ad Deum pro te crucifixum; præbe illi cor tuum, cor amore flagrans, cor contritum & humiliatum, cor compatiens & obediens usque ad mortem; sic cum illo loquere ex abundantia amoris, doloris, & fiduciæ.

Adoro te, Jesu Christe, & benedico tibi, quia per Crucem tuam redemisti mundum. Salvator mundi, salva me, qui per Crucem tuam redemisti me. O Jesu miserator & misericors! Anticipent me misericordiæ tuæ, quia pauper factus sum nimis. O Jesu! Quid est Jesus, nisi Salvator? Ergò, ô Jesu, propter gloriam nominis tui redime me, miserere mei, salva me, dum non est præter te qui redimat neque qui salvum faciat.

O Jesu, Agne immaculate, recordare quòd non corruptibilibus auro vel argento redemptus sim, sed pretioso Sanguine tuo. Verùm, quæ utilitas mihi in sanguine tuo, si descendero in æternam corruptionem? Ecce redemisti me, Crucem passus; tantus ergò labor non sit cassus, sed salva me, fons pietatis, & copiosa redemptio mea!

O Jesu, qui latroni poenitenti Paradisum promisisti, & qui factus es mihi sanctificatio & redemptio, miserere mei, quoniam in te confidit anima mea. Ab occultis meis munda me, Domine, & ab alienis parce servo tuo. Ecce adeo cum fiducia ad thronum gratiæ tuæ, ut misericordiam consequar, & gratiam inveniam in auxilio opportuno. Quid mihi nunc denegabis testamenti novi mediator Jesu, si iniquitates meas portans, pro me mortuus es? Ecce aspersio Sanguinis tui melius loquitur quàm Abel. Peccata quidem mea, ô Jesu mi, clamant vindictam; at Sanguis tuus, veniam & misericordiam.

Horrendum quidem est incidere in manus Dei viventis ; sed , ô amantissime Jesu , quàm suave est incidere in manus Dei morientis ! Ergò , in manus tuas commendo spiritum meum ; redemisti me Deus veritatis. In te , Domine , speravi , non confundar in æternùm. Utinam audiam in horâ mortis hoc mellifluum verbum : hodiè mecum eris in Paradiso. Reposita est hæc spes mea in sinu meo.

Judicia quidem tua , abyssus multa ; terrores tui & torrentes iniquitatum mearum conturbant me ; sed hæc vulnera tua , brachia extensa , caput inclinatum , cor apertum , & misericordiæ tuæ quæ à seculo sunt , lætificant animam meam : igitur , propitius esto mihi peccatori , ô misericordia mea ; ne in furore tuo arguas me , & non intres in judicium cum servo tuo ; intra vulnera tua absconde me donec pertranseat furor tuus , & ne permittas sanctum tuum videre corruptionem.

O cor lanceâ militis perforatum ! O cor , petra refugium herinaciis ! Ibi passer invenit sibi domum , & turtur nidum sibi ubi ponat pullos suos. O cor refugium meum in tempore malo ; hæc requies mea , hîc habitabo , quoniam elegi eam ; hoc in nidulo meo moriar , & ab inimicis meis salvus ero ; sed interim , ô cor Jesu flagrans amore mei , inflamma cor meum amore tui , illo igne quem venisti mittere in terram.

O Jesu , confiteor quia ego millies te mihi metipsi crucifixi ; ego vulneravi cor tuum ; sed recordare , Jesu pie , quòd non

V iv

despicias cor contritum & humiliatum ; verè doleo quia tibi soli peccavi , & quia paravi tibi crucem Salvatori meo ; non dimittam te donec benedixeris mihi , & donec audiam in corde meo istud suave verbum : vade in pace , remittuntur tibi peccata tua. Diligo te , fortitudo mea & liberator meus , paratus sum , & non sum turbatus , animam meam ponere pro te , qui dilexisti me , & lavisti me in sanguine tuo ; interim , ô Jesu mi , tibi conformis imago esse cupiens , stigmata tua , quoad vixero , in corpore meo portabo , ut adimplens ea quæ defunt passionum tui , & tandem in arâ crucis , & in tuo amplexu ac osculo mortuus , dimissa in pace , & socius sim consolationis.

O Jesu , mi Jesu , qui dixisti : cùm exaltatus fuero à terrâ , omnia traham ad me ipsum ; ecce te exaltatum video in hoc patibulo : eia ergò , suscipe me inter amorosa brachia tua , quæ pro me in hâc cruce extensa cerno ; trahe ad te animam meam , nec dimittas , donec recipias eam in æterna tabernacula ; suscipe me , dulcissime Jesu , in misericordiâ tuâ , suscipe in pace spiritum meum.

ASPIRATIONES

Ad felicem mortem postulandam.

O Bone Jesu ! Cùm statutum sit omnibus hominibus semel mori , & cùm ex mortis momento pendeat tota æternitatis

causa, rogo te ut beatæ mortis curæ, viriliter & semper studeam, ne, heu! in æternum peream pessimâ & irreparabili peccatorum morte.

O bone Jesu, qui dixisti: vigilate, quia nescitis neque diem, neque horam; libera me à subitanâ & improvisâ morte; quapropter, rogo te, ut de mortis adventu incertus, maturè domui meæ disponam, & moriar quotidie, exemplo Apostoli, ut ad mortem semper paratus, possim, in primâ, secundâ, & tertiâ vigiliâ, ac singulis momentis, mori, te propitio, morte iustorum.

O bone Jesu, qui nobis præcipis ut, tanquàm advenæ & peregrini, abstineamus à carnalibus desideriis, & ut utamur hoc mundo tanquàm non utentes, quia præterit figura hujus mundi; rogo te, ut non habens hîc manentem civitatem, futuram tantò ardentius inquiram, & ut, relictis omnibus, saltem corde & animo, antequàm moriar, liberiùs & ardentissimè cupiam dissolvi & esse tecum, ac inebriari ubertate domûs tuæ.

O bone Jesu! ô Deus veritas! ô Deus bonitas, & protector vitæ meæ! ô charitas! ô charitas Deus, & ignis consumens! da mihi, præsertim in horâ mortis, fidei, spei, & charitatis augmentum, ut firmiùs credens, securiùs sperans, & ardentius amans, merear, propter nimiam charitatem tuam, assequi quod promittis.

O bone Jesu, qui cor contritum & humiliatum numquàm despicias, & qui sanas

466 PRÆPARATIO PROXIMA

contritos corde , rogo te ut , per totam vitam , & præcipuè in horâ mortis ; recogitem tibi , & propter te summè bonum , omnes annos meos in amaritudine animæ meæ ; tunc acceptabis sacrificium justitiæ , remittes mihi peccata multa , quoniam dilexero multum ; & quia præstabilis est bonitas tua super malitiâ peccatoris , lavabis me , & super nivem dealbabor , quia misericordiâ tuâ plena est terra ; tunc , mundus corde , dimittar in pace , & te videbo in gloriâ , & interim dicam semper : confitemini Domino , quoniam bonus , quoniam in seculum misericordia ejus.

O bone Jesu , qui instituisti Sacramenta , ut per illa omnis vera justitia , vel incipiat , vel incepta augeatur , vel amissa recuperetur , (*Trid. Sess. 7.*) concede mihi spatium dignè suscipiendi in horâ mortis Sacramentum Pœnitentiæ , Eucharistiæ , & Extremæ-Uctionis , ut hauriens in gaudio de his fontibus tuis aquam salientem in vitam æternam , gustem in cœlo illa gaudia plena , quorum pignus in his Sacramentis nobis , misericors & miserator Domine , reliquisti.

O bone Jesu , qui potestatem habens ponendi animam tuam , & iterum sumendi eam , factus tamen es obediens usque ad mortem , mortem autem crucis , concede mihi gratiam , ut aspiciens in te auctorem fidei , & consummatorem Jesum , qui proposito tibi gaudio , sustinuisti crucem , voluntariè sacrificem tibi vitam meam , & dicam semper : magnificeris in me , ô Jesu .

Christe , in corpore meo , sive per vitam , sive per mortem ; non mea voluntas , sed tua semper fiat.

O bone Jesu , qui pestilentiam & morbos , non solum ob peccata immittere consuevisti , sed etiam ad gloriam tuam manifestandam , & qui quos diligis , hos castigas & flagellas , rogo te ut in dolore patientiam habeam ; nonne æquum est ut sicut bona suscipio de manu tuâ , ita & mala æquanimiter sustineam ? Nonne vita & mors sunt à te ? Nonne universa propter te ipsum operatus es ? Eia ergò , mi Jesu , qui es patientia mea , & qui nobiscum es in tribulatione , adjuva me , ut propter te , & in unione dolorum tuorum patiens , ac in patientiâ meâ animam meam viriliter possidens , audire tandem possim : jam hyems transiit ; surge , amica mea & veni , intra in gaudium Domini tui.

O bone Jesu ! O fidelis Deus , qui non pateris nos tentari supra id quod possumus , sed facis cum tentatione proventum , ut possimus sustinere , ne inducas me , instante morte , in tentationem infidelitatis , presumptionis , desperationis , vel tristitiæ , tædii , molestiæ , vel impatientiæ , vel inordinati vivendi & salutis recuperandæ desiderii ; & si ambulavero in medio umbræ mortis , non timebo mala , quoniam tu mecum eris ; veni ergò tunc , tanquàm bellator fortis , ut postquàm legitime certavero , de manu inimicorum meorum liberatus , te miserante , coronari merear.

O bone Jesu , qui consolaris nos in omni

468 PRÆPARATIO PROXIMA

ni tribulatione nostrâ, ne derelinquas me cum defecerit virtus mea, cum anxietur cor meum, pavebit, tædebit, & conturbabitur anima mea, attenuabitur spiritus meus; præsertim, quando dolores mortis circumdabunt me, torrentes iniquitatis meæ & terrores tui conturbabunt me, ac pericula inferni me invenient. Heu! undiquè mihi tunc erunt angustiae; ubi ergò, ubi parebo, si in hoc tempore malo discesseris à me, ô Deus salutis meæ!

O bone Jesu, judex vivorum & mortuorum, & qui, statim post mortem, me manifestari præcipies ante tremendum tuum tribunal, supplex oro ut non intres in iudicium cum servo tuo, neque in furore tuo arguas me, nec facias mihi secundum peccata mea; sed miserere mei ante diem rationis; & dum tempus est miserendi, confige timore tuo carnes meas, ut, meipsum per vitam dijudicans, stem cum fiducia ante tribunal justitiæ tuæ.

O bone Jesu, qui nihil odisti horum quæ fecisti, qui non vis mortem peccatoris, sed ut magis convertatur & vivat, & qui latroni poenitenti paradysum promisisti, rogo te ut, secundum magnam misericordiam tuam, miserearis mei in horâ mortis meæ, & ut educas de custodiâ animam meam, ad confitendum nomini tuo; mirificabis misericordias tuas: ergò, ô Jesu, mi Jesu! da gloriam nomini tuo, & salva me, fons pietatis.

O bone Jesu! Per illum zelum quo languores nostros tuo livore sanasti; per an-

gustias cordis tui , cùm te à Patre derelictum clamasti ; per agonias quas in horâ mortis sustinuiſti , miferere animæ meæ in egressu suo , & perduc eam in vitam æternam.

Attamen ſi , juſto judicio tuo , deſcendero in Purgatorium , ut poenæ peccatis meis debitæ plenius ſatisfaciam , jam nunc tribulationem meam , quam in hoc exilio paſſurus ſum , ante te pronuntio , Deus ; & quoniam tunc amore vehementiùs languebo , & erunt mihi amariores lachrymæ , dùm dicetur mihi : ubi eſt Deus tuus ? Accelera tunc ut eruas & conſoleris me ; excita fidelium voluntates , ut per illorum ſuffragia de illo carcere eductus , te citiùs poſſideam , ô centrum animæ meæ.

O bone Jeſu ! Rogo te per illum doloris gladium quo dulciſſimum Matris tuæ cor in paſſione tuâ tranſfixum fuit , ac per merita omnium Sanctorum , ut nec vita , nec mors , neque alia creatura me à te ſeparare valeat , & ut anima mea moriens morte juſtorum , & de terreſtri domo hujus habitationis diſſoluta , domum non manu factam habeat in cœlis , & miſericordias tuas in æternùm cantet. Amen.

SPIRITUALIS ADMINISTRATIO EXTREMÆ-UNCTIONIS.

QUàmvis tandem infirmeris ad mortem , chariſſime Frater ; tamen , propter ſubitaneam mortem , non erit forſan tempus ad-

ducendi Presbyteros Ecclesiæ, ut te oleo ungant, te oratione fidei allevient, & ut te à peccatorum reliquiis mudent. Ecquid, si in peccatis sis? Quapropter, consultum est, ut sanus & incolumis tibi interdum, quasi jam morituro, administres spiritualiter & in voto, Extremam-Unionem, signando signo crucis Dominicæ, vel aquâ benedictâ, singulos sensus, dicendo vehementi animi dolore:

Ad oculos.

Misericors & miserator Domine, per tuam piissimam misericordiam, & per merita Salvatoris mei Jesu-Christi, indulge mihi, quæso, quidquid peccavi per visum per hos oculos, per quos, tanquam per fenestras, praviæ cogitationes, illicita desideria, ipsaque mors ascenderunt in animam meam. Propitius esto mihi peccatori; doleo quia tibi soli peccavi summè bono & dilecto; jam nolo amplius peccare; volo autem mortificare oculos meos, eos claudendo omnibus seculi vanitatibus. O lumen oculorum meorum Deus, eos ipse averte, ne videant vanitatem. Ad te, Domine, ô pulchritudo antiqua, ad te sint semper oculi mei; perennes aquarum exitus deducant hæc peccatorum instrumenta, in spiritu satisfactionis, quia non custodierunt legem tuam.

Ad aures.

Misericors & miserator Domine, per tuam piissimam misericordiam, & per merita Salvatoris mei Jesu-Christi, indulgeas mihi, quæso, quidquid peccavi per audi-

tum ; lava aures meas à colloquiis quæ contra divinam majestatem tuam , contra Proximum , & meipsum avidè audierunt.

Propitius esto mihi peccatori ; doleo , quia tibi soli peccavi summè bono & dilecto ; jam nolo amplius peccare ; volo autem mortificare aures meas , eas spinis sepiendo , sive in spiritu humilitatis & satisfactionis , sive ut non amplius audiam iniquorum fabulationes , sive , & quidem præcipuè , quò attentius audiam quid loquaris in me , Dominus Deus.

Ad os.

Misericors , & miserator Domine , per tuam piissimam misericordiam , & per merita Salvatoris mei Jesu-Christi , indulgeas mihi , quæso , quidquid peccavi per guttum , crapulæ hætenus , tanquàm Deo , servientem. Heu mihi ! hoc guttur & os meum fuerunt sepulchrum patens , ex abundantia foetidi cordis mei loquens & ructans vaniloquia , scurrilia ; falsa , turpia mendaciorum & detractionum monstra. Propitius esto mihi peccatori ; doleo quia tibi soli peccavi summè bono & dilecto ; jam nolo amplius peccare ; volo autem mortificare & gustum meum , sobriè vivens , ac alimenta ut medicamenta sumens ; & os meum , ei ponens custodiam , ut non declinet cor meum in verba malitiæ , nec in otiosa ; quinimò , quoad fas erit , servabo silentium in spiritu humilitatis ; si autem loquar , de regno tuo , & sermones tuos duntaxat pro viribus , te inspirante , loquar ; in multiloquio enim vano non

deest peccatum : expertus loquor.

Ad nares.

Miserator , & misericors Domine , per tuam piissimam misericordiam , & per merita Salvatoris mei Jesu-Christi , indulge mihi , quæso , quidquid peccavi per odoratum. Propitius esto mihi peccatori ; doleo quia tibi soli peccavi summè bono & dilecto ; jam nolo amplius peccare ; volo autem mortificare propter te , ac in spiritu humilitatis & satisfactionis, odoratum meum, in rebus etiam licitis , omnia hujus mundi ut foetida stercora arbitrans & declinans ; tu eris deinceps fragrans odor meus : da ut pariter sim ego bonus odor tuus , dans in omni loco , sicut balsamum aromatizans , suavitatem odoris.

Ad manus.

Miserator & misericors Domine , per tuam piissimam misericordiam , & per merita Salvatoris mei Jesu-Christi , indulge mihi , quæso , quidquid peccavi per tactum manuum. Heu mihi ! quot mala opera turpiter patrarunt manus istæ ? Ecquid , si in operibus manuum mearum deprehensus fuisset ego peccator ? Sed , ô bone Jesu , patienter erga me egisti : igitur propitius esto mihi peccatori ; doleo quia tibi soli peccavi summè bono & dilecto ; jam nolo amplius peccare. Et quoniam manus meæ iniquitatem fecerunt , jam deinceps distillabunt in spiritu satisfactionis , myrrham poenitentiae. Da quod jubes , & jube quod vis.

Ad pedes.

Miserator & misericors Domine , per tuam piissimam misericordiam , & per merita Salvatoris mei Jesu-Christi , indulge mihi , quæso , quidquid peccavi per incessum pedum ; propitius esto mihi peccatori : doleo quia tibi soli peccavi summè bono & dilecto ; jam nolo amplius peccare ; sed , ô bone Jesu , qui es via , perfice gressus meos in semitis tuis , ut non moveantur vestigia mea , & ut non sim lapis offensionis ac petra scandali.

Ad pectus.

Miserator & misericors Domine , per tuam piissimam misericordiam , & per merita Salvatoris mei Jesu-Christi , indulge mihi , quæso , quidquid peccavi per pravas cogitationes cordis. Heu ! De hoc corde exierunt omnia peccata mea : igitur , scindatur dolore cor meum ; propitius esto mihi peccatori ; doleo quia tibi soli peccavi summè bono & dilecto ; jam nolo amplius peccare , volo te deinceps diligere ex toto corde , tibi servire & te adorare ex toto corde. Accipe hoc sacrificium justitiæ quod in spiritu humilitatis tibi indignus offero ; sed amplius lava hoc cor meum ab iniquitate meâ. Tunc benignè acceptabis istud sacrificium : *præbeo tibi cor meum , omnia mea tua sunt.*



P R O T E S T A T I O N E S.

IN nomine Patris , & Filii , & Spiritûs Sancti. Ego N. sciens me moriturum , nesciens autem mortis diem neque horam , integris tamen corporis & animæ viribus , ac plenâ libertate adhuc fruens , protestor in conspectu Dei , & coram omnibus viventibus :

I. Quòd sine fide impossibile sit placere Deo & salvari ; quapropter , volo mori in verâ sanctæ , Catholicæ & Apostolicæ Ecclesiæ fide , in quâ hætenus vixi. Credo firmiter quidquid illa mihi credendum proponit , quia tu , Domine , qui es ipsa veritas , illud revelasti ; omnia credo , & illa intelligo eodem præcisè sensu , quo illa semper intellexit sancta Mater Ecclesia Romana , quæ omnium Ecclesiarum Mater est & Magistra , (*Trid. Sess. 7. can. 1.*) Ecclesia Dei vivi , columna & firmamentum veritatis , cui protestor me velle in omnibus esse obedientem , si necesse sit , usque ad mortem crucis. Confirma hoc propositum , Deus , quod operaris in me , ut non deficiat fides mea , confirmem verò fratres meos.

II. Protestor quòd , cum fides sine operibus mortua sit , & vim patiatur regnum cœlorum , velim viriliter agere , laborare sicut bonus miles Christi , incessanter operari bonum dum tempus habeo. Non tacebo die ac nocte laudare nomen Dei , ut per bona opera mea certam meam voca-

tionem & electionem faciam , & ut inde intrem in gloriam Dei , in quam omnes Sancti , & ipse Dominus Jesus non intrarunt nisi laborando à juventute suâ , nisi operando & patiando usque ad mortem.

III. Quapropter , protestor , ô altissime Deus , quòd velim te Deum meum adorare , tibi soli servire , & tibi benedicere in omni tempore ; tu es Rex meus , Deus meus , & omnia : tibi ergò Regi seculorum immortalì , soli Deo , honor & gloria ; tibi Dòmino & Deo meo subjecta erit anima mea , tibi semper sacrificabit hostiam laudis pro omnibus quæ retribuisti mihi : omnis terra adoret te , psallat , & benedicat tibi ; hoc est & erit rationabile & sempiternum obsequium & desiderium cordis mei , quæ tibi nunc offero pro omnibus agonizantis quibus , præ angustia , hæc medullata holocausta offerre non valebo , nihil quidem , sine te facere possum , sed mihi diffidens & in te confortatus , omnia possum ; & sicut gratia tuâ sum id quod sum ; ita , gratia tuâ , ero quod ero : rogo te ut gratia tua in me vacua non sit.

IV. Domine Jesu ! in manibus tuis fortes meæ ; vitæ & mortis potestatem habes , mortificans & vivificans , deducens ad inferos & reducens ; tu enim misereris cujus misereris , & non est volentis neque currentis , sed tui , Deus meus , miserearis. Ecquis tibi imputabit , si perierint gentes quas tu fecisti ? Quæ cum à te benè ordinata sint , protestor quòd me humillimè subjiciam sententiæ quam erga me vel con-

tra me post iudicium feres, firmissimè credens quòd, si salvus faciendus sim, salvantis tui futurum sit donum; & quòd, si periero & fuerim reprobus, pereuntis mei futurum sit meritum, (*Conc. Arausi.*) & dicam semper: perditio mea ex me; quapropter, meritò iram tuam in æternum portabo, & multis jure vapulabo, quia sciens voluntatem tuam, hanc, servus nequam, facere nolui, & quia, incircumciso corde, Spiritui Sancto semper resistens, obduravi cor meum. Justus es, Domine, & rectum iudicium tuum. O altitudo! adoro incomprehensibilia iudicia tua, tuasque investigabiles vias: Dominus es; quod bonum est in oculis tuis facias semper, ô Deus majestatis, in cujus ditione cuncta sunt posita; si tamen heu! adeò infelix fuerim ut, maledictus, in æternum à te Deo meo separandus sim, hanc, velim, mihi concede gratiam, ut per residuum annorum meorum sis tu dilectus meus mihi, & ego tibi; & quidquid justo & occulto iudicio tuo, mihi post mortem acciderit, contendam interim diligere te ex toto corde meo, ô Deus cordis mei; tu scis, Domine, quia amo te, & quidem propter te; non enim quæro quæ mea sunt, sed te.

V. Non sum quidem dignus nec oculos in cœlum levare, quia iniquitates meæ supergressæ sunt caput meum; sed quis intelliget, Domine, misericordias tuas? Igitur, quàmvis occideris me; licèt meritò dicere possim: infernus domus mea est; protestor tamen quòd sperem in bonitate

tuâ, quia præstabilis est super malitiâ meâ. Iterum & securè dico : in te, Domine, spero, non confundar in æternum; annuntiabo hoc in universâ terrâ, & ubiquè omnia ossa mea dicent : Domine, quis similis tibi in misericordiâ? Beatus homo qui sperat in te. Sperate in Deo, omnis congregatio populi, & facite bonitatem, ne Deum tentare videamini.

VI. Protestor quòd diligam te ex toto corde meo, quia bonus es tu. Quis mihi hoc tribuat ut, charitatis incendiis, potius quàm vi mortis, obdormiam in te, ô Deus cordis mei? Et quia amo te, plenissimè accepto calicem morbi & mortis, in unionem passionis & mortis tuæ. Diligo etiam proximum meum, & inimicos meos, propter te.

VII. Protestor quòd doleam de peccatis meis propter te summè dilectum; iterum dico, & quoad vixero, ex abundantia cordis dicam, quòd ad hunc animi dolorem non me moveat nec gehennæ timor, nec gloriæ desiderium, sed summa bonitas tua, summè amabilis; & malo tibi dilecto, mori, quàm tibi offenso, vivere. O quando liberabor de corpore mortis hujus, ut jam non amplius peccem tibi, & ut perfectè in secula seculorum laudem te?

VIII. Quoniam reddenda omnibus debita præcipis, protestor quòd paratum sit cor meum ad redimenda, sive in hac vitâ, sive in Purgatorio, tot peccata quæ contra divinam tuam majestatem commisi; paratum insuper ad satisfaciendum, ante-

quàm moriar, omnibus his quos offendī & læsi verbo, scandalo, fraude, &c. & ab illis omnibus veniam supplex oro, eorumque precibus me confidenter committo.

IX. Etiam si oportuerit me millies mori, protestor quòd jam nolim amplius peccare. Heu tamen! cùm militia sit vita hominis super terram, protestor quòd, tuâ gratiâ adjutus, nolim assentiri suggestionibus quas Satanas mihi in horâ mortis suggeret contra fidem, spem, & charitatem; ut autem, instante agone, fortis sim in bello, & fidelis usque ad mortem, protestor quòd Sacramenta Ecclesiæ his in angustiis recipere optem, & quòd ardentè desiderem, si amplius loqui non potuerim, commendare spiritum meum in manus tuas, & me committere præfidiis Beatæ Mariæ Virginis, & omnium Sanctorum, ut has armaturas accipiens, victor evadam, & obtineam coronam vitæ. Amen.

COMMENDATIO

Animæ.

AD crucifixi imaginem provolutus; vel eam præ manibus tenens, recita devotissimè animæ commendationem quæ habetur in breviario, & quam tibi morienti nemo forsitan recitabit; vel istam, si tibi ita expedierit.

Egredere, anima mea, egredere de corpore mortis hujus; Dominus adest & vocat te; tempus est ut manifeste ante tribunal ejus; ut judicaris, & recipias secundum opera tua.

Dulcissime Jesu ! Scio quidem te esse judicem vivorum & mortuorum ; sed etiam scio te esse patrem , & clementissimum patrem , qui non vis mortem peccatoris , sed ut in æternum vivat ; nemo tam pater , quàm tu , ô bone Jesu ! Non solum enim formasti me ad imaginem & similitudinem tuam ; non solum redemisti me & conservasti ; non solum patienter erga me egisti , & me millies ex inferno inferiori liberaisti ; verum etiam mortuus es propter justificationem meam , ut divinæ naturæ tuæ & gloriæ consors fierem : grandis misericordia ! Quis similis tibi ?

Quoniam ergo , piissime Jesu , opus manuum tuarum sum ego , & tui Sanguinis pretium , corona me in misericordiâ tuâ ; ne derelinquas animam meam in inferno ; in inferno enim quis confitebitur tibi ? Eam verò suscipe in manus tuas quæ fecerunt & redemerunt me ; in manus tuas quas clavis pro me perforatas video ; suscipe me , Jesu-Christe , inter hæc amorosa brachia , quæ in hac Cruce extensa fiducialiter amplector ; corona me nunc in misericordiâ & miserationibus ; peccavi quidem in cœlum & coram te ; sed ecce Domine Jesu , ecce pono hanc crucem & mortem tuam inter judicium tuum & miseram animam meam ; ecce vehementi animi dolore , ardenti amore , ac totâ fiduciâ dico quod & tuus Proto-Martyr moriens dicebat : suscipe spiritum meum , dulcissime plasmator & redemptor mi ; tuus sum ego , salvum me fac ; in manus tuas

480 PRÆPARATIO PROXIMA
commendo spiritum meum, redemisti me,
Deus veritatis. Aperi, Domine, aperi;
me expectant justī donec retribuas mihi, ut
unā cum illis confitear nomini tuo. Fui
quidem semper servus inutilis, spero ta-
men gloriam per misericordiam tuam quam
mecum semper fecisti; corona nunc mise-
ricordias tuas, & eas in æternū cantabo.

O Pater æterne, pater misericordiarum,
respice, supplex oro, respice in faciem
Christi tui, ac per eum indignationem tuam
averte à me, & recipe me in dilecta taber-
nacula tua, in quæ ardentissimè concupiscit
& deficit anima mea; in secula seculorum
laudabo te.

Maria Mater gratiæ, Mater misericor-
diæ, quæ doloris gladio percussa, filio tuo
morienti, juxta crucem adstitisti, opem
feras mihi, quæso, super lectum doloris
mei, mihiq̃ue periclitanti, manuum tua-
rum, propitia, porrige dexteram; monstra
nunc præsertim te esse matrem; tu me ab
hoste protege, ac me in horā mortis sus-
cipe.

Tu es refugium peccatorum: eia ergò,
advocata mea, illos tuos misericordes ocu-
los ad me converte, & Jesum, benedic-
tum fructum ventris tui, mihi post hoc
exilium ostende; ô clemens, ô pia, ô
dulcis Virgo Maria.

O Archangele Michaël, qui zelo zela-
tus pro Domino Deo exercituum, mili-
tiæ cœlestis meruisti principatum, defende
me in proelio, ut non peream in tremen-
do judicio.

O vos

O vos Angeli, quibus Deus mandavit de me ut custodiretis me in omnibus viis meis, qui semper faciem Patris in Coelis videtis, qui super uno peccatore pœnitentiam agente gaudetis; ô administratorii spiritus, qui capientibus hæreditatem salutis, in ministerium missi estis, & qui malos de medio justorum separabitis; de ore leonis, fortes in prælio, liberate me; occurrite, Angeli Domini, aperite mihi portas justitiæ, ingressus in eas confitebor vobiscum Domino.

Sancte Joseph, qui Mariæ sponsus eligi, & Jesu pater putari meruisti; qui inter brachia Jesu & Mariæ mortuus, in Domino obdormiisti; ô specialis beatæ mortis protector! Impetra mihi pretiosam Sanctorum mortem.

O Sancti omnes, qui ludibria & verbera experti, & propter justitiam passi, videtis nunc non in ænigmate, sed facie ad faciem Dominum Deum vestrum, orate pro me, ut de laqueo venantium liberatus, Deum Deorum in sanctâ Sion in æternum laudem. Amen.

C O N C L U S I O

Hujusce ad mortem præparationis.

TRansige residuum hujus diei eâdem animi tranquillitate quasi inter Jesu brachia expirasses, in æternum victurus; & claudens recollectionis diem, gratias age Deo, qui te in solitudinem ducens, locutus est ad cor.

X

uum eloquia ignita ; exeas ex hac solitudine sicut Apostoli , spirans flammam ignis , factus ipsi diabolo terribilis ; ac mundo tibiue mortuus , jam non tibi vivas , sed Christo. Quapropter ista sequere documenta.

Offer Deo proposita tua ; eum enixè roga ut eis benedicat eaque facundet , confirmando quod operatus est in te , disponendo ascensiones in corde tuo , & te confortando contra impetus inimicorum tuorum , ut non prævaleant adversum te , & ut victor usque in finem perseveres.

II. Cave tamen ne vaga & generalia sint proposita tua ; perscrutare & aggredere illud tuum radicale vitium à quo cætera pullulant , quodque tuam perfectionem retardat & est relapsuum origo. Igitur oportet ut per totum sequentem mensem omnem curam impendas ad illud eradicandum ; adhibe ad hunc finem examen particulare , vigilantiam , orationem , pœnitentiam medicinalem , actus contrarios , tui diffidentiam , in Deo spem & Sanctorum præsidium.

III. Ne animo concidas , imò ne mire-
ris si labaris , aut si non tantum proficias quantum optas ; terra tua , scilicet cor tuum ad malum pronum , dabit fructum suum , & germinabit tibi identidem tribulos & spinas peccatorum : igitur si lapsus sis , redeas cum fiduciâ ad Sacramentum pœnitentiæ ; si opus sit , renova propositum tuum , legitimè certa , quotidie incipe ; tantum proficies , quantum tibi vim intuleris : (*Imit. Christ.*) jugis conatus ad perfectionem , perfectio reputatur. (*S. Bern.*)

IV. Quò ferventiùs his monitis pareas , in omnibus operibus tuis memorare novissima tua , & in æternùm non peccabis. Quapropter , singulis diei horis dicito tibi : transit mundus , tempus breve est , ventus est vita mea , anni mei sicut aranea meditabuntur ; sed heu ! appropinquat æternitas , & æternitas numquàm finienda.

V. Horâ tertiâ pomeridianâ , hanc effunde orationem : *O Domine Jesu-Christe ; rogo te per illam amaritudinem passionis tuæ quam in horâ mortis sustinuisti ; maximè tunc quandò tua sanctissima anima de benedicto tuo corpore est egressa , miserere animæ meæ in egressu suo de corpore meo , & perduc eam in vitam æternam. Amen.*

VI. Quandò videbis Viaticum aut Extremam-Ūctionem ad infirmum & moribundum deferri , dicito tibi : tandem ego ipse versabor in infirmitate meâ , sicut ille nunc in suâ versatur. Quid tunc me fecisse vellem ? Ero tunc ad mortem paratus , si nunc sanus & incolumis , non aptem oleum bonorum operum ? Quo fervore Sacramenta in horâ mortis recipiam , si per vitam abutar his fontibus Salvatoris ?

VII. Quandò campanæ te de alicujus morte monebunt , hæc tecum cogita : *hic mortuus est , jam judicatus est , vel in æternùm inter Sanctos computandus , vel in æternùm igni , cum diabolo deputandus. Idipsum de me dicetur. Eædem , vel aliæ campanæ populum de meâ morte monebunt ; peribit quidem memoria mea cum sonitu ; verùm ubi parebo , si non moriar.*

quotidiè , si maturè & ex nunc non disponam domui meæ , & beatæ mortis studio non incumbam ? Et licèt homines me post mortem laudent , quid mihi proderit , si ad inferna descendero ?

VIII. Quandò videbis defunctum ad tumulum deferri , lege in ejus vultu foedè mutato caducitatem rerum humanarum ; cogita illum te sic monere : *mihi heri , & tibi hodiè : omnis caro fœnum , & omnis gloria ejus quasi flos agri ; exsiccatum est fœnum , & cecidit flos. Vanitas vanitatum , & omnia vanitas ; se ad mortem parare , & ad mortem esse semper paratum , hæc est vera & unica sapientia ; cætera nugacitas , fascinatïo intellectûs ; undè fit ut infinitus sit stultorum numerus.*


Sed heu ! Undè evenit illa nimis frequens stultitia ? Audi quid scriptum sit , & quomodò fiat verum istud : *desolatione desolata est terra , quia nullus est qui recogitet corde.* Hæc foetida nimis spectacula usu vilescunt , ut jam monuimus ; aliorum tumulum oscitanter videmus , nostrum autem à longè aspiciamus ; & sic parùm satagimus ut per bona opera certam nostram vocationem faciamus ; & tamen in imagine pertransit homo ; undè , sicut pisces capiuntur hamo , & aves laqueo , sic subitò capiuntur homines in tempore malo ; & dùm inducias petunt usquè manè , moriuntur ; pulsant quidem , sed jam clausa est janua , & eis terribiliter dicitur : *Nescio vos.*


O filii hominum , & præsertim nos Sacerdotes , qui hæc sæpissimè legimus &

dìcimus : quis nos ita fascinavit, ut, scientes & volentes, à Satanâ nos turpiter tentari sinamus, & nobis, ô cæci, imponamus ? Usquequò, gravi corde, diligemus vanitatem, & quæremus mendacium ? Eia ergò, Fratres charissimi, misereamur animæ nostræ, providentes maturè studio beatæ mortis, & huic quam tradidimus ad vitam viæ, sedulò inhærentes.

Misereamur etiam periclitanti moribundorum animæ, eos in tam difficili luctû fideliter adjuvantes, & ad felicem exitum dirigentes. Complura ad hoc opportuna exercitia suggerit ista ad mortem præparatio ; hæc eligamus quæ cuilibet agonisanti aptiora noverimus ; quæ tamen non temerè & confertim ; sed sensim, leniter, & per intervalla ingerenda sunt. Si huic pietatis officio desimus, quomodò charitas Dei in nobis est ? Quâ fronte boni Pastoris nomen induimus ? Nonne, heu ! eâdem mensurâ quâ mensi fuerimus, reme-tietur nobis ?

FINIS.





INDEX

HUJUS

REGULÆ CLERI.

CAPUT PRIMUM.

Janua ad statum Clericalem. Pag. 1

ART. I. <i>S</i> eminarium.	Ibid.
ART. II. <i>V</i> ocatio.	15
ART. III. <i>P</i> robatio ante ordines.	19

CAPUT SECUNDUM.

Finis statûs Clericalis. 24

ART. I. <i>S</i> anctitas.	Ibid.
ART. II. <i>P</i> rogressus in virtute.	27
ART. III. <i>I</i> mitatio Christi, & intima cum illo unio.	29

CAPUT TERTIUM.

Impedimenta Sanctitatis & salutis Clericorum. 34

ART. I. <i>Q</i> uodcumque peccatum.	Ibid.
	X iv

ART. II. <i>Superbia.</i>	36
ART. III. <i>Ambitio.</i>	37
ART. IV. <i>Avaritia.</i>	40
ART. V. <i>Cura rerum secularium, & negotiatio.</i>	43
ART. VI. <i>Luxuria.</i>	45
ART. VII. <i>Vita otiosa.</i>	48
ART. VIII. <i>Amor seculi.</i>	50
ART. IX. <i>Vita tepida, & spatiosa via.</i>	53
ART. X. <i>Pravum exemplum.</i>	58
ART. XI. <i>Falsa conscientia.</i>	61
ART. XII. <i>Difficultas conversionis Sacerdotum.</i>	67

CAPUT QUARTUM.

<i>Obligationes & exercitia Clericis omnibus communia.</i>	69
ART. I. <i>Zelus propriæ salutis & perfectio- nis.</i>	Ibid.
ART. II. <i>Perfectio proprii statûs.</i>	72
ART. III. <i>Horæ Canonicae.</i>	73
ART. IV. <i>Frequens celebratio Missæ.</i>	76
ART. V. <i>Exercitia ante Missæ celebratio- nem.</i>	81
ART. VI. <i>Exercitia post Missam & Commu- nionem.</i>	101
ART. VII. <i>Alia brevior ad Missam præpa- ratio.</i>	116
ART. VIII. <i>Alia breviores post Missam gra- tiarum actiones.</i>	126
ART. IX. <i>Studium & scientia.</i>	133
ART. X. <i>Bonum exemplum.</i>	135
ART. XI. <i>Canonum observatio.</i>	137

INDEX.

489

ART. XII. <i>Ritus , cæremoniæ , & rubrica.</i>	139
ART. XIII. <i>Vestis Clericalis , tonsura , & coma congruentes.</i>	141
ART. XIV. <i>Reverentia in Ecclesiis.</i>	143
ART. XV. <i>Ecclesiarum nitor.</i>	145
ART. XVI. <i>Eleemosyna.</i>	146
ART. XVII. <i>Animarum zelus.</i>	148
ART. XVIII. <i>Signa puri gloriæ divinæ zeli.</i>	151
ART. XIX. <i>Prædicatio verbi divini.</i>	156
§. I. <i>Regulæ ante concionem observandæ.</i>	Ibid.
§. II. <i>Regulæ in ipso prædicationis exercitio observandæ.</i>	169
§. III. <i>Regulæ post concionē observandæ.</i>	171
ART. XX. <i>Studiosa puerorum catechisandorum cura.</i>	178
ART. XXI. <i>Diligens rudium & pauperum instructio.</i>	187
ART. XXII. <i>Zelus & modus administrandi Pænitiæ Sacramentum.</i>	193
§. I. <i>Regulæ ante administrationem Pænitiæ Sacramenti observandæ.</i>	196
§. II. <i>Regulæ inter audiendas confessiones observandæ.</i>	201
§. III. <i>Regulæ post auditas confessiones observandæ.</i>	209
ART. XXIII. <i>Zelosa ægrotorum & præsertim agonisantium visitatio , & cura.</i>	212

CAPUT QUINTUM.

Obligationes particulares. 217 .

ART. I. *Munia Syndicorum & Præpositorum*

<i>Capituli & Communitatum Ecclesiasticarum.</i>	217
<i>ART. II. Munia Pastoralia.</i>	219
<i>ART. III. Munia Canonorum & Beneficiorum circa residentiam in choro, & scientiam cantûs.</i>	230
<i>ART. IV. Modus canendi vel recitandi horas.</i>	234
<i>ART. V. Exhortatio ad psallentes.</i>	235

CAPUT SEXTUM.

<i>Media Clericis omnibus utilia ad perfectionem & salutem æternam consequendam.</i>	236
<i>ART. I. Solitudinis amor.</i>	Ibid.
<i>ART. II. Exercitium meditationis.</i>	238
<i>ART. III. Exercitium præsentiae Dei.</i>	241
<i>ART. IV. Exercitium mortificationis.</i>	243
<i>ART. V. Lectio librorum pietatis.</i>	246
<i>ART. VI. Pia frequentatio Sacramenti Pœnitentiæ.</i>	248
<i>ART. VII. Habere Directorem, & illi in omnibus obedire.</i>	250
<i>ART. VIII. Examen particulare.</i>	254
<i>ART. IX. Recollectio annua per octiduum, vel unius diei ex singulis mensibus.</i>	255
<i>§. I. Præparatio ad recollectionem.</i>	257
<i>§. II. Ordo recollectionis.</i>	259
<i>§. III. Documenta ad conservandum recollectionis fructum utilia.</i>	260
<i>ART. X. Collationes frequentes habere de rebus ad pietatem & ad disciplinam Ecclesiasticam pertinentibus.</i>	261
<i>ART. XI. Visitatio frequens & sancta Christi</i>	

CAPUT SEPTIMUM.

<i>Exercitia quotidiana.</i>	278
<i>Oratio matutina.</i>	280
<i>MEDITATIO. De morte.</i>	285
<i>MED. De terribili malorum Sacerdotum morte.</i>	287
<i>MED. De pretiosâ bonorum Sacerdotum morte.</i>	292
<i>MED. De Judicio Particulari.</i>	295
<i>MED. De Judicio Universali.</i>	297
<i>MED. De Sententiâ erga electos & reprobos.</i>	299
<i>MED. De Inferno.</i>	301
<i>MED. De damnatorum luctibus.</i>	303
<i>MED. De mercede multâ nimis & æternâ bonis Sacerdotibus in Cœlis paratâ.</i>	306
<i>MED. De Humilitate.</i>	310
<i>ALIA MED. De Humilitate & Timore.</i>	313
<i>Series exercitiorum - tum proprii statûs, tum pietatis.</i>	316
<i>Quædam alia exercitia & aspirationes selectæ pro decursu diei.</i>	322
<i>Oratio vespertina.</i>	328
<i>Reflexio & aspiratio pro crastinâ Communionem.</i>	329
<i>Acceptatio mortis, & alia exercitia ante cubitum.</i>	Ibid.



CAPUT OCTAVUM.

	<i>Exercitia menstrua.</i>	334
ART. I.	<i>Recollectio unius diei.</i>	Ibid.
ART. II.	<i>Reflexiones de statu conscientiae.</i>	336

CAPUT NONUM.

	<i>Exercitia annua.</i>	343
--	-------------------------	-----

CAPUT DECIMUM.

	<i>Modus peragendi bonum honestè, sanctè, & dignè Deo.</i>	345
ART. I.	<i>Fervor.</i>	346
ART. II.	<i>Devotio interna.</i>	347
ART. III.	<i>Puritas intentionis.</i>	348
ART. IV.	<i>Ordo temporis & actionum.</i>	349
ART. V.	<i>Perseverantia in bonis actibus.</i>	350
	<i>Conclusio hujus Regulæ, & ad Sacerdotes exhortatio.</i>	351



INDEX

PRÆPARATIONIS AD MORTEM.

<i>V</i>	<i>Iva ad Sacerdotes exhortatio. Pag.</i>	<i>361</i>
	<i>Præparatio ad recollectionem unius diei</i>	
	<i>ex singulis mensibus.</i>	<i>365</i>
	<i>Reflexiones de morte & de hujus circumstan-</i>	
	<i>tiis.</i>	<i>366</i>
	<i>Exercitia pro ipsâ recollectionis die, & ordo</i>	
	<i>diei.</i>	<i>369</i>
	<i>Monita salutis.</i>	<i>370</i>
	<i>Meditatio de pessimâ pravorum Sacerdotum</i>	
	<i>morte.</i>	<i>371</i>
	<i>Alia Meditatio. De stricto in pravos Sa-</i>	
	<i>cerdotes iudicio.</i>	<i>374</i>
	<i>Præparatio ad Confessionem totius mensis</i>	
	<i>præteriti.</i>	<i>377</i>
	<i>Reflexiones de statu conscientia.</i>	<i>Ibid.</i>
	<i>I. Generalis annorum recogitatio.</i>	<i>378</i>
	<i>II. Horror peccati mortalis, præsertim su-</i>	
	<i>perbiæ, luxuriæ & avaritiæ.</i>	<i>379</i>
	<i>III. Intemperantia in victu & vestitu.</i>	<i>381</i>
	<i>IV. Detractio.</i>	<i>382</i>
	<i>V. Via spatiosa.</i>	<i>383</i>
	<i>VI. Familiaritas cum Laïcis.</i>	<i>Ibid.</i>
	<i>VII. Peccatum veniale.</i>	<i>384</i>
	<i>VIII. Vita tepida.</i>	<i>386</i>
	<i>IX. Otium.</i>	<i>388</i>
	<i>X. Inordinatus erga parentes amor.</i>	<i>389</i>

I N D E X.

<i>Celebratio Missæ.</i>	495
<i>Dispositio testamenti.</i>	440
<i>Consideratio de angustiis quæ Sacerdotes in</i> <i>horâ mortis torquere solent.</i>	441
<i>Acceptatio mortis.</i>	443
<i>Actus religionis.</i>	445
<i>Meditatio de sententiâ quæ feretur contra præ-</i> <i>vos Sacerdotes in die Judicii.</i>	449
<i>Alia Meditatio de sententiâ quæ feretur</i> <i>ergâ probos & electos Sacerdotes in die</i> <i>Judicii.</i>	456
<i>Pia & efficax ad Christum crucifixum con-</i> <i>sideratio.</i>	459
<i>Aspirationes ad felicem mortem postulan-</i> <i>dam.</i>	461
<i>Spiritualis administratio Extremæ - Unctio-</i> <i>nis.</i>	464
<i>Protestationes.</i>	469
<i>Commendatio animæ.</i>	474
<i>Conclusio hujusce præparationis ad mor-</i> <i>tem.</i>	478
	481

F I N I S I N D I C I S.

MAG 201276

